

全 唐 诗

(第十一部)

· 全唐诗 ·

卷三百八十一

卷 381_1【吊国殇】

孟郊

徒言人最灵，白骨乱纵横。如何当春死，不及群草生。
尧舜宰乾坤，器农不器兵。秦汉盗山岳，铸杀不铸耕。
天地莫生金，生金人竞争。

卷 381_2【吊比干墓】

孟郊

殷辛帝天下，厌为天下尊。乾刚既一断，贤愚无二门。
佞是福身本，忠是丧己源。饿虎不食子，人无骨肉恩。
日影不入地，下埋冤死魂。有骨不为土，应作直木根。
今来过此乡，下马吊此坟。静念君臣间，有道谁敢论。

· 全唐诗 ·

卷 381_3【吊元鲁山】

孟郊

搏螯有余饱，鲁山长饥空。豪人饫鲜肥，鲁山饭蒿蓬。
食名皆霸官，食力乃尧农。君子耻新态，鲁山与古终。
天璞本平一，人巧生异同。鲁山不自剖，全璞竟没躬。

自剖多是非，流滥将何归。奔竞立诡节，凌侮争怪辉。
五常坐销铄，万类随衰微。以兹见鲁山，道蹇无所依。

君子不自蹇，鲁山蹇有因。苟含天地秀，皆是天地身。
天地蹇既甚，鲁山道莫伸。天地气不足，鲁山食更贫。
始知补元化，竟须得贤人。

贤人多自羸，道理与俗乖。细功不敢言，远韵方始谐。
万物饱为饱，万人怀为怀。一声苟失所，众憾来相排。
所以元鲁山，饥衰难与偕。

远阶无近级，造次不可升。贤人洁肠胃，寒日空澄凝。
血誓竟讹谬，膏明易煎蒸。以之驱鲁山，疏迹去莫乘。

言从鲁山宦，尽化尧时心。豺狼耻狂噬，齿牙闭霜金。
竞来辟田土，相与耕嶽岑。当宵无关锁，竟岁饶歌吟。
善教复天术，美词非俗箴。精微自然事，视听不可寻。
因书鲁山绩，庶合箫韶音。

· 全唐诗 ·

箫韶太平乐，鲁山不虚作。千古若有知，百年幸如昨。
谁能嗣教化，以此洗浮薄。君臣贵深遇，天地有灵橐。
力运既艰难，德符方合漠。名位苟虚旷，声明自销铄。
礼法虽相救，贞浓易糟粕。哀哀元鲁山，毕竟谁能度。

当今富教化，元后得贤相。冰心镜衰古，霜议清遐障。
幽埋尽洸洗，滞旅免流浪。唯余鲁山名，未获旌廉让。
二三贞苦士，刷视耸危望。发秋青山夜，目断丹阙亮。
诱类幸从兹，嘉招固非妄。小生奏狂狷，感惕增万状。

黄犊不知孝，鲁山自驾车。非贤不可妻，鲁山竟无家。
供养耻他力，言词岂纤瑕。将遥鲁山德，赜海谁能涯。
遗婴尽雏乳，何况骨肉枝。心肠结苦诚，胸臆垂甘滋。
事已出古表，谁言独今奇。贤人母万物，岂弟流前诗。

卷 381_4 【哭李观】

孟郊

志士不得老，多为直气伤。阮公终日哭，寿命固难长。
颜子既殁谢，孔门无辉光。文星落奇曜，宝剑摧修铓。
常作金应石，忽为宫别商。为尔吊琴瑟，断弦难再张。
偏轂不可转，只翼不可翔。清尘无吹嘘，委地难飞扬。
此义古所重，此风今则亡。自闻丧元宾，一日八九狂。
沉痛此丈夫，惊呼彼穹苍。我有出俗韵，劳君疾恶肠。
知音既已矣，微言谁能彰。旅葬无高坟，栽松不成行。

· 全唐诗 ·

哀歌动寒日，赠泪沾晨霜。神理本昏昏，今来更茫茫。
何以荡悲怀，万事付一觞。

卷 381_5【李少府厅吊李元宾遗字】

孟郊

零落三四字，忽成千万年。那知冥冥客，不有补亡篇。
斜月吊空壁，旅人难独眠。一生能几时，百虑来相煎。
戚戚故交泪，幽幽长夜泉。已矣难重言，一言一潸然。

卷 381_6【悼吴兴汤衡评事】

孟郊

君生霁水清，君歿霁水浑。空令骨肉情，哭得白日昏。
大夜不复晓，古松长闭门。琴弦绿水绝，诗句青山存。
昔为芳春颜，今为荒草根。独问冥冥理，先儒未曾言。

卷 381_7【哀孟云卿嵩阳荒居】

孟郊

戚戚抱幽独，宴宴沉荒居。不闻新欢笑，但睹旧诗书。

· 全唐诗 ·

艺槩意弥苦，耕山食无余。定交昔何在，至戚今或疏。
薄俗易销歇，淳风难久舒。秋芜上空堂，寒槿落枯渠。

薤草恐伤蕙，摄衣自理锄。残芳亦可饵，遗秀谁忍除。
徘徊未能去，为尔涕涟如。

卷 381_8 【哭卢贞国】

孟郊

一别难与期，存亡易寒燠。下马入君门，声悲不成哭。
自能富才艺，当冀深荣禄。皇天负我贤，遗恨至两目。
平生叹无子，家家亲相嘱。

卷 381_9 【伤旧游】

孟郊

去春会处今春归，花数不减人数稀。
朝笑片时暮成泣，东风一向还西辉。

· 全唐诗 ·

卷 381_10【吊房十五次卿少府】

孟郊

日高方得起，独赏些些春。可惜宛转莺，好音与他人。
昔年此气味，还走曲江滨。逢著韩退之，结交方殷勤。
蜀客骨目高，聪辩剑戟新。如何昨日欢，今日见无因。
英奇一谢世，视听一为尘。谁言老泪短，泪短沾衣巾。

卷 381_11【逢江南故昼上人会中郑方回】

孟郊

相逢失意中，万感因语至。追思东林日，掩抑北邙泪。
筐篋有遗文，江山旧清气。尘生逍遥注，墨故飞动字。
荒毁碧涧居，虚无青松位。珠沉百泉暗，月死群象闭。
永谢平生言，知音岂容易。

卷 381_12【哭秘书包大监】

孟郊

哲人卧病日，贱子泣玉年。常恐宝镜破，明月难再圆。
文字未改素，声容忽归玄。始知知音稀，千载一绝弦。

· 全唐诗 ·

旧馆有遗琴，清风那复传。

卷 381_13【悼幼子】

孟郊

一闭黄蒿门，不闻白日事。生气散成风，枯骸化为地。
负我十年恩，欠尔千行泪。洒之北原上，不待秋风至。

卷 381_14【悼亡】

孟郊

山头明月夜增辉，增辉不照重泉下。泉下双龙无再期，
金蚕玉燕空销化。朝云暮雨成古墟，萧萧野竹风吹亚。

卷 381_15【吊李元宾坟】

孟郊

晓上荒凉原，吊彼寂寥魂。眼咽此时泪，耳凄在日言。
冥冥千万年，坟锁孤松根。

· 全唐诗 ·

卷 381_16【览崔爽遗文，因纾幽怀】

孟郊

堕泪数首文，悲结千里坟。苍旻且留我，白日空遗君。
仙鹤未巢月，衰凤先坠云。清风独起时，旧语如再闻。
瑶草罢葳蕤，桂花休氛氲。万物与我心，相感吴江滨。

卷 381_17【峡哀】

孟郊

昔多相与笑，今谁相与哀。峡哀哭幽魂，噉噉风吹来。
堕魄抱空月，出没难自裁。齖粉一闪间，春涛百丈雷。
峡水声不平，碧沓牵清洄。沙棱箭箭急，波齿断断开。

呀彼无底吮，待此不测灾。谷号相喷激，石怒争旋回。
古醉有复乡，今縲多为能。字孤徒仿佛，衔雪犹惊猜。
薄俗少直肠，交结须横财。黄金买相吊，幽泣无余淮。
我有古心意，为君空摧颓。

上天下天水，出地入地舟。石剑相劈斫，石波怒蛟虬。
花木叠宿春，风飙凝古秋。幽怪窟穴语，飞闻胖蛭流。
沉哀日已深，衔诉将何求。

· 全唐诗 ·

三峡一线天，三峡万绳泉。上仄碎日月，下掣狂漪涟。
破魂一两点，凝幽数百年。峡晖不停午，峡险多饥涎。

树根锁枯棺，孤骨袅袅悬。树枝哭霜栖，哀韵杳杳鲜。
逐客零落肠，到此汤火煎。性命如纺绩，道路随索缘。
奠泪吊波灵，波灵将闪然。

峡乱鸣清磬，产石为鲜鳞。喷为腥雨涎，吹作黑井身。
怪光闪众异，饿剑唯待人。老肠未曾饱，古齿崭岩嗔。
嚼齿三峡泉，三峡声断断。

峡螭老解语，百丈潭底闻。毒波为计校，饮血养子孙。
既非皋陶吏，空食沉狱魂。潜怪何幽幽，魄说徒云云。
峡听哀哭泉，峡吊鰥寡猿。峡声非人声，剑水相劈翻。
斯谁士诸谢，奏此沉苦言。

谗人峡虬心，渴罪呀然浚。所食无直肠，所语饶泉音。
石齿嚼百泉，古风号千琴。幽哀莫能远，分雪何由寻。
月魄高卓卓，峡窟清沉沉。衔诉何时明，抱痛已不禁。
犀飞空波涛，裂石千嶽岑。

峡棱剗日月，日月多摧辉。物皆斜仄生，鸟亦斜仄飞。
潜石齿相锁，沉魂招莫归。恍惚清泉甲，斑斓碧石衣。
饿咽潺湲号，涎似泓泓肥。峡青不可游，腥草生微微。

峡景滑易堕，峡花怪非春。红光根潜涎，碧雨飞沃津。
巴谷蛟螭心，巴乡魍魉亲。啖生不问贤，至死独养身。

· 全唐诗 ·

腥语信者谁，拗歌欢非真。仄田无异稼，毒水多狞鳞。
异类不可友，峡哀哀难伸。

峡水剑戟狞，峡舟霹雳翔。因依虺蜴手，起坐风雨忙。
峡旅多窜官，峡氓多非良。滑心不可求，滑习积已长。
漠漠涎雾起，断断涎水光。渴贤如之何，忽在水中央。

泉鸥作人语，蛟虬吸水波。能于白日间，谄欲晴风和。
骇智蹶众命，蕴腥布深萝。齿泉无底贫，锯涎在处多。
仄树鸟不巢，踔塔猿相过。峡哀不可听，峡怨其奈何。

卷 381_15【杏殇】

孟郊

冻手莫弄珠，弄珠珠易飞。惊霜莫翦春，翦春无光辉。
零落小花乳，斓斑昔婴衣。拾之不盈把，日暮空悲归。

地上空拾星，枝上不见花。哀哀孤老人，戚戚无子家。
岂若没水帛，不如拾巢鸦。浪叠破便飞，风雏袅相夸。
芳婴不复生，向物空悲嗟。

应是一线泪，入此春木心。枝枝不成花，片片落翦金。
春寿何可长，霜哀亦已深。常时洗芳泉，此日洗泪襟。

儿生月不明，儿死月始光。儿月两相夺，儿命果不长。

· 全唐诗 ·

如何此英英，亦为吊苍苍。甘为堕地尘，不为末世芳。

踏地恐土痛，损彼芳树根。此诚天不知，翦弃我子孙。
垂枝有千落，芳命无一存。谁谓生人家，春色不入门。

冽冽霜杀春，枝枝疑纤刀。木心既零落，山窍空呼号。
班班落地英，点点如明膏。始知天地间，万物皆不牢。

哭此不成春，泪痕三四斑。失芳蝶既狂，失子老亦孱。
且无生生力，自有死死颜。灵凤不衔诉，谁为扣天关。

此儿自见灾，花发多不谐。穷老收碎心，永夜抱破怀。
声死更何言，意死不必咥。病叟无子孙，独立犹束柴。

霜似败红芳，剪啄十数双。参差呻细风，噉喙沸浅江。
泣凝不可消，恨壮难自降。空遗旧日影，怨彼小书窗。

卷 381_16【吊江南老家人春梅】

孟郊

念尔筋力尽，违我衣食恩。奈何粗犷儿，生鞭见死痕。
旧使常以礼，新怨将谁吞。胡为乎泥中，消歇教义源。

· 全唐诗 ·

卷 381_17【哭李丹员外，并寄杜中丞】

孟郊

生死方知交态存，忍将醋齏报幽魂。
十年同在平原客，更遣何人哭寝门。

卷 381_18【哭刘言史】

孟郊

诗人业孤峭，饿死良已多。相悲与相笑，累累其奈何。
精异刘言史，诗肠倾珠河。取次抱置之，飞过东溟波。
可惜大国谣，飘为四夷歌。常于众中会，颜色两切磋。
今日果成死，葬襄之洛河。洛岸远相吊，洒泪双滂沱。

卷 381_19【吊卢殷】

孟郊

诗人多清峭，饿死抱空山。白云既无主，飞出意等闲。
久病床席尸，护丧童仆孱。故书穷鼠啮，狼藉一室间。
君归新鬼乡，我面古玉颜。羞见入地时，无人叫追攀。
百泉空相吊，日久哀潺潺。

· 全唐诗 ·

唧唧复唧唧，千古一月色。新新复新新，千古一花春。
邙风噫孟郊，嵩秋葬卢殷。北邙前后客，相吊为埃尘。
北邙棘针草，泪根生苦辛。烟火不自暖，筋力早已贫。
幽荐一杯泣，泻之清洛滨。添为断肠声，愁杀长别人。

棘针风相号，破碎诸苦哀。苦哀不可闻，掩耳亦入来。
哭弦多煎声，恨涕有余摧。噫贫气已焚，噫死心更灰。
梦世浮闪闪，泪波深洄洄。薤歌一以去，蒿闭不复开。

登封草木深，登封道路微。日月不与光，莓苔空生衣。
可怜无子翁，蚍蜉缘病肌。挛卧岁时长，涟涟但幽噫。
幽噫虎豹闻，此外相访稀。至亲唯有诗，抱心死有归。
河南韩先生，后君作因依。磨一片嵌岩，书千古光辉。

贤人无计校，生苦死徒夸。他名润子孙，君名润泥沙。
可惜千首文，闪如一朝花。零落难苦言，起坐空惊嗟。

耳闻陋巷生，眼见鲁山君。饿死始有名，饿名高氛氲。
戇叟老壮气，感之为忧云。所忧唯一泣，古今相纷纷。
平生与君说，逮此俱云云。

初识漆鬢发，争为新文章。夜踏明月桥，店饮吾曹床。
醉啜二杯酿，名郁一县香。寺中摘梅花，园里翦浮芳。
高嗜绿蔬羹，意轻肥膩羊。吟哦无滓韵，言语多古肠。
白首忽然至，盛年如偷将。清浊俱莫追，何须骂沧浪。

前贤多哭酒，哭酒免哭心。后贤试衔之，哀至无不深。

· 全唐诗 ·

少年哭酒时，白发亦已侵。老年哭酒时，声韵随生沉。
寄言哭酒宾，勿作登封音。登封徒放声，天地竟难寻。
同人少相哭，异类多相号。始知禽兽痴，却至天然高。

非子病无泪，非父念莫劳。如何裁亲疏，用礼如用刀。
孤丧鲜匍匐，闭哀抱郁陶。烦他手中葬，诚信焉能褒。
嗟嗟无子翁，死弃如脱毛。

圣人哭贤人，骨化气为星。文章飞上天，列宿增晶荧。
前古文可数，今人文亦灵。高名称谪仙，升降曾莫停。
有文死更香，无文生亦腥。为君铿好辞，永传作谧宁。

· 全唐诗 ·

卷三百八十二

卷 382_1【寄远曲】

张籍

美人来去春江暖，江头无人湘水满。浣沙石上水禽栖，
江南路长春日短。兰舟桂楫常渡江，无因重寄双琼珰。

卷 382_2【行路难】

张籍

湘东行人长叹息，十年离家归未得。弊裘羸马苦难行，
僮仆饥寒少筋力。君不见床头黄金尽，壮士无颜色。
龙蟠泥中未有云，不能生彼升天翼。

· 全唐诗 ·

卷 382_3 【征妇怨】

张籍

九月匈奴杀边将，汉军全没辽水上。万里无人收白骨，
家家城下招魂葬。妇人依倚子与夫，同居贫贱心亦舒。
夫死战场子在腹，妾身虽存如昼烛。

卷 382_4 【白纈歌】

张籍

皎皎白纈白且鲜，将作春衣称少年。裁缝长短不能定，
自持刀尺向姑前。复恐兰膏污纤指，常遣傍人收堕珥。
衣裳著时寒食下，还把玉鞭鞭白马。

卷 382_5 【野老歌】

张籍

老农家贫在山住，耕种山田三四亩。苗疏税多不得食，
输入官仓化为土。岁暮锄犁傍空室，呼儿登山收橡实。
西江贾客珠百斛，船中养犬长食肉。

· 全唐诗 ·

卷 382_6【寄衣曲】

张籍

织素缝衣独苦辛，远因回使寄征人。官家亦自寄衣去，
贵从妾手著君身。高堂姑老无侍子，不得自到边城里。
殷勤为看初著时，征夫身上宜不宜。

卷 382_7【送远曲】

张籍

戏马台南山簇簇，山边饮酒歌别曲。行人醉后起登车，
席上回尊劝僮仆。青天漫漫覆长路，远游无家安得住。
愿君到处自题名，他日知君从此去。

卷 382_8【筑城词】

张籍

筑城处，千人万人齐把杵。重重土坚试行锥，
军吏执鞭催作迟。来时一年深磧里，尽著短衣渴无水。
力尽不得抛杵声，杵声未尽人皆死。家家养男当门户，
今日作君城下土。

· 全唐诗 ·

卷 382_9【猛虎行】

张籍

南山北山树冥冥，猛虎白日绕林行。向晚一身当道食，
山中麋鹿尽无声。年年养子在空谷，雌雄上山不相逐。
谷中近窟有山村，长向村家取黄犍。五陵年少不敢射，
空来林下看行迹。

卷 382_10【别离曲】

张籍

行人结束出门去，几时更踏门前路。忆昔君初纳采时，
不言身属辽阳戍。早知今日当别离，成君家计良为谁。
男儿生身自有役，那得误我少年时。不如逐君征战死，
谁能独老空闺里。

卷 382_11【牧童词】

张籍

远牧牛，绕村四面禾黍稠。陂中饥乌啄牛背，
令我不得戏垅头。入陂草多牛散行，白犍时向芦中鸣。

· 全唐诗 ·

隔堤吹叶应同伴，还鼓长鞭三四声。牛牛食草莫相触，
官家截尔头上角。

卷 382_12【沙堤行，呈裴相公】

张籍

长安大道沙为堤，早风无尘雨无泥。宫中玉漏下三刻，
朱衣导骑丞相来。路傍高楼息歌吹，千车不行行者避。

街官闾吏相传呼，当前十里惟空衢。白麻诏下移相印，
新堤未成旧堤尽。

卷 382_13【求仙行】

张籍

汉皇欲作飞仙子，年年采药东海里。蓬莱无路海无边，
方士舟中相枕死。招摇在天回白日，甘泉玉树无仙实。

九皇真人终不下，空向离宫祠太乙。丹田有气凝素华，
君能保之升绛霞。

· 全唐诗 ·

卷 382_14 【古钗叹】

张籍

古钗堕井无颜色，百尺泥中今复得。凤凰宛转有古仪，
欲为首饰不称时。女伴传看不知主，罗袖拂拭生光辉。
兰膏已尽股半折，雕文刻样无年月。虽离井底入匣中，
不用还与坠时同。

卷 382_15 【各东西】

张籍

游人别，一东复一西。出门相背两不返，惟信车轮与马蹄。
道路悠悠不知处，山高海阔谁辛苦。远游不定难寄书，
日日空寻别时语。浮云上天雨堕地，暂时会合终离异。
我今与子非一身，安得死生不相弃。

卷 382_16 【节妇吟，寄东平李司空师道】

张籍

君知妾有夫，赠妾双明珠。感君缠绵意，系在红罗襦。
妾家高楼连苑起，良人执戟明光里。知君用心如日月，

· 全唐诗 ·

事夫誓拟同生死。还君明珠双泪垂，何不相逢未嫁时。

卷 382_17【宴客词】

张籍

上客不用顾金羁，主人有酒君莫违。请君看取园中花，
地上渐多枝上稀。山头树影不见石，溪水无风应更碧。

人人齐醉起舞时，谁觉翻衣与倒帻。明朝花尽人已去，
此地独来空绕树。

卷 382_18【永嘉行】

张籍

黄头鲜卑入洛阳，胡儿执戟升明堂。晋家天子作降虏，
公卿奔走如牛羊。紫陌旌幡暗相触，家家鸡犬惊上屋。

妇人出门随乱兵，夫死眼前不敢哭。九州诸侯自顾土，
无人领兵来护主。北人避胡多在南，南人至今能晋语。

· 全唐诗 ·

卷 382_19 【采莲曲】

张籍

秋江岸边莲子多，采莲女儿凭船歌。青房圆实齐戢戢，
争先竞折漾微波。试牵绿茎下寻藕，断处丝多刺伤手。
白练束腰袖半卷，不插玉钗妆梳浅。船中未满度前洲，
借问阿谁家住远。归时共待暮潮上，自弄芙蓉还荡桨。

卷 382_20 【伤歌行】

张籍

黄门诏下促收捕，京兆尹系御史府。出门无复部曲随，
亲戚相逢不容语。辞成谪尉南海州，受命不得须臾留。
身着青衫骑恶马，中门之外无送者。邮夫防吏急喧驱，
往往惊堕马蹄下。长安里中荒大宅，朱门已除十二戟。
高堂舞榭锁管弦，美人遥望西南天。

卷 382_21 【吴宫怨】

张籍

吴宫四面秋江水，江清露白芙蓉死。吴王醉后欲更衣，

· 全唐诗 ·

座上美人娇不起。宫中千门复万户，君恩反覆谁能数。
君心与妾既不同，徒向君前作歌舞。茱萸满宫红实垂，
秋风裊裊生繁枝。姑苏台上夕燕罢，他人侍寝还独归。
白日在天光在地，君今那得长相弃。

卷 382_22【北邙行】

张籍

洛阳北门北邙道，丧车辘辘入秋草。车前齐唱薤露歌，
高坟新起白峨峨。朝朝暮暮人送葬，洛阳城中人更多。
千金立碑高百尺，终作谁家柱下石。山头松柏半无主，
地下白骨多于土。寒食家家送纸钱，乌鸢作窠衔上树。
人居朝市未解愁，请君暂向北邙游。

卷 382_23【关山月】

张籍

秋月朗朗关山上，山中行人马蹄响。关山秋来雨雪多，
行人见月唱边歌。海边茫茫天气白，胡儿夜度黄龙碛。
军中探骑暮出城，伏兵暗处低旌戟。溪水连天霜草平，
野驼寻水碛中鸣。陇头风急雁不下，沙场苦战多流星。
可怜万国关山道，年年战骨多秋草。

· 全唐诗 ·

卷 382_24 【陇头行】

张籍

陇头路断人不行，胡骑夜入凉州城。汉兵处处格斗死，
一朝尽没陇西地。驱我边人胡中去，散放牛羊食禾黍。
去年中国养子孙，今著毡裘学胡语。谁能更使李轻车，
收取凉州入汉家。

卷 382_25 【楚妃叹】

张籍

湘云初起江沉沉，君王遥在云梦林。江南雨多旌旗暗，
台下朝朝春水深。章华殿前朝万国，君心独自无终极。
楚兵满地能逐禽，谁用一身骋筋力。西江若翻云梦中，
麋鹿死尽应还宫。

卷 382_26 【春日行】

张籍

春日融融池上暖，竹牙出土兰心短。草堂晨起酒半醒，
家僮报我园花满。头上皮冠未曾整，直入花间不寻径。

· 全唐诗 ·

树树殷勤尽绕行，攀枝未遍春日暝。不用积金著青天，
不用服药求神仙。但愿园里花长好，一生饮酒花前老。

卷 382_27【秋夜长】

张籍

秋天如水夜未央，天汉东西月色光。愁人不寐畏枕席，
暗虫唧唧绕我傍。荒城为村无更声，起看北斗天未明。
白露满田风袅袅，千声万声鹧鸪鸣。

卷 382_28【白鼉鸣】

张籍

天欲雨，有东风，南谿白鼉鸣窟中。六月人家井无水，
夜闻鼉声人尽起。

卷 382_29【洛阳行】

张籍

洛阳宫阙当中州，城上峨峨十二楼。翠华西去几时返，
泉巢乳鸟藏蛰燕。御门空锁五十年，税彼农夫修玉殿。

· 全唐诗 ·

六街朝暮鼓冬冬，禁兵持戟守空宫。百官月月拜章表，
驿使相续长安道。上阳宫树黄复绿，野豺入苑食麋鹿。
陌上老翁双泪垂，共说武皇巡幸时。

卷 382_30【春江曲】

张籍

春江无云潮水平，蒲心出水鳧雏鸣。长干夫婿爱远行，
自染春衣缝已成。妾身生长金陵侧，去年随夫住江北。
春来未到父母家，舟小风多渡不得。欲辞舅姑先问人，
私向江头祭水神。

卷 382_31【送远曲】

张籍

吴门向西流水长，水长柳暗烟茫茫。行人送客各惆怅，
话离叙别倾清觞。吟丝竹，鸣笙簧，酒酣性逸歌猖狂。
行人告我挂帆去，此去何时返故乡。殷勤振衣两相嘱，
世事近来还浅促。愿君看取吴门山，带雪经春依旧绿。
行人行处求知亲，送君去去徒酸辛。

· 全唐诗 ·

卷 382_32 【塞下曲】

张籍

边州八月修城堡，候骑先烧碛中草。胡风吹沙度陇飞，
陇头林木无北枝。将军阅兵青塞下，鸣鼓逢逢促猎围。
天寒山路石断裂，白日不销帐上雪。乌孙国乱多降胡，
诏使名王持汉节。年年征战不得闲，边人杀尽唯空山。

卷 382_33 【董逃行】

张籍

洛阳城头火曛曛，乱兵烧我天子宫。宫城南面有深山，
尽将老幼藏其间。重岩为屋橡为食，丁男夜行候消息。
闻道官军犹掠人，旧里如今归未得。董逃行，
汉家几时重太平。

卷 382_34 【少年行】

张籍

少年从猎出长杨，禁中新拜羽林郎。独对辇前射双虎，
君王手赐黄金珰。日日斗鸡都市里，赢得宝刀重刻字。

· 全唐诗 ·

百里报仇夜出城，平明还在娼楼醉。遥闻虏到平陵下，
不待诏书行上马。斩得名王献桂宫，封侯起第一日中。
不为六郡良家子，百战始取边城功。

卷 382_35【白头吟】

张籍

请君膝上琴，弹我白头吟。忆昔君前娇笑语，
两情宛转如萦素。宫中为我起高楼，更开花池种芳树。
春天百草秋始衰，弃我不待白头时。罗襦玉珥色未暗，
今朝已道不相宜。扬州青铜作明镜，暗中持照不见影。
人心回互自无穷，眼前好恶那能定。君恩已去若再返，
菖蒲花开月长满。

卷 382_36【将军行】

张籍

弹箏峡东有胡尘，天子择日拜将军。蓬莱殿前赐六纛，
还领禁兵为部曲。当朝受诏不辞家，夜向咸阳原上宿。
战车彭彭旌旗动，三十六军齐上陇。陇头战胜夜亦行，
分兵处处收旧城。胡儿杀尽阴碛暮，扰扰唯有牛羊声。
边人亲戚曾战没，今逐官军收旧骨。碛西行见万里空，
幕府独奏将军功。

· 全唐诗 ·

卷 382_37【贾客乐】

张籍

金陵向西贾客多，船中生长乐风波。欲发移船近江口，
船头祭神各浇酒。停杯共说远行期，入蜀经蛮谁别离。

金多众中为上客，夜夜算缗眠独迟。秋江初月猩猩语，
孤帆夜发潇湘渚。水工持楫防暗滩，直过山边及前侣。

年年逐利西复东，姓名不在县籍中。农夫税多长辛苦，
弃业长为贩宝翁。

卷 382_38【羁旅行】

张籍

远客出门行路难，停车敛策在门端。荒城无人霜满路，
野火烧桥不得度。寒虫入窟鸟归巢，僮仆问我谁家去。

行寻田头暝未息，双毂长辕碍荆棘。缘冈入涧投田家，
主人舂米为夜食。晨鸡喔喔茅屋傍，行人起扫车上霜。

旧山已别行已远，身计未成难复返。长安陌上相识稀，
遥望天山白日晚。谁能听我辛苦行，为向君前歌一声。

· 全唐诗 ·

卷 382_39 【车遥遥】

张籍

征人遥遥出古城，双轮齐动驷马鸣。山川无处不归路，
念君长作万里行。野田人稀秋草绿，日暮放马车中宿。
惊麕游兔在我傍，独唱乡歌对僮仆。君家大宅凤城隅，
年年道上随行车。愿为玉銮系华轼，终日有声在君侧。
门前旧辙久已平，无由复得君消息。

卷 382_40 【妾薄命】

张籍

薄命妇，良家子，无事从军去万里。汉家天子平四夷，
护羌都尉裹尸归。念君此行为死别，对君裁缝泉下衣。
与君一日为夫妇，千年万岁亦相守。君爱龙城征战功，
妾愿青楼歌乐同。人生各各有所欲，讵得将心入君腹。

卷 382_41 【朱鹭】

张籍

翩翩兮朱鹭，来泛春塘栖绿树。羽毛如翦色如染，

· 全唐诗 ·

远飞欲下双翅敛。避人引子入深堑，动处水纹开滟滟。
谁知豪家网尔躯，不如饮啄江海隅。

卷 382_42 【远别离】

张籍

莲叶团团杏花拆，长江鲤鱼鬣鬣赤。念君少年弃亲戚，
千里万里独为客。谁言远别心不易，天星坠地能为石。
几时断得城南陌，勿使居人有行役。

卷 382_43 【楚宫行】

张籍

章华宫中九月时，桂花半落红橘垂。江头骑火照辇道，
君王夜从云梦归。霓旌凤盖到双阙，台上重重歌吹发。

千门万户开相当，烛笼左右列成行。下辇更衣入洞房，
洞房侍女尽焚香。玉阶罗幕微有霜，齐言此夕乐未央。

玉酒湛湛盈华觞，丝竹次第鸣中堂。巴姬起舞向君王，
回身垂手结明珰。愿君千年万年寿，朝出射麋夜饮酒。

· 全唐诗 ·

卷 382_44 【江南行】

张籍

江南人家多橘树，吴姬舟上织白苎。土地卑湿饶虫蛇，
连木为牌入江住。江村亥日长为市，落帆度桥来浦里。
清莎覆城竹为屋，无井家家饮潮水。长干午日沽春酒，
高高酒旗悬江口。娼楼两岸临水栅，夜唱竹枝留北客。
江南风土欢乐多，悠悠处处尽经过。

卷 382_45 【乌夜啼引】

张籍

秦乌啼哑哑，夜啼长安吏人家。吏人得罪囚在狱，
倾家卖产将自赎。少妇起听夜啼乌，知是官家有赦书。
下床心喜不重寐，未明上堂贺舅姑。少妇语啼乌，
汝啼慎勿虚。借汝庭树作高巢，年年不令伤尔雏。

卷 382_46 【促促词】

张籍

促促复促促，家贫夫妇欢不足。今年为人送租船，

· 全唐诗 ·

去年捕鱼在江边。家中姑老子复小，自执吴绡输税钱。
家家桑麻满地黑，念君一身空努力。
愿教牛蹄团团羊角直，君身常在应不得。

卷 382_47【宛转行】

张籍

华屋重翠幄，绮席雕象床。远漏微更疏，薄衾中夜凉。
炉气暗裴徊，寒灯背斜光。妍姿结宵态，寝臂幽梦长。
宛转复宛转，忆君更未央。

卷 382_48【短歌行】

张籍

青天荡荡高且虚，上有白日无根株。流光暂出还入地，
使我年少不须臾。与君相逢勿寂寞，衰老不复如今乐。
玉卮盛酒置君前，再拜愿君千万年。

· 全唐诗 ·

卷 382_49 【山头鹿】

张籍

山头鹿，角芟芟，尾促促。贫儿多租输不足，
夫死未葬儿在狱。早日熬熬蒸野冈，禾黍不收无狱粮。
县家唯忧少军食，谁能令尔无死伤。

卷 382_50 【湘江曲】

张籍

湘水无潮秋水阔，湘中月落行人发。送人发，送人归，
白蘋茫茫鹧鸪飞。

卷 382_51 【楚妃怨】

张籍

梧桐叶下黄金井，横架辘轳牵素绠。
美人初起天未明，手拂银瓶秋水冷。

· 全唐诗 ·

卷 382_52 【离宫怨】

张籍

高堂别馆连湘渚，长向春光开万户。

荆王去去不复来，宫中美人自歌舞。

卷 382_53 【成都曲】

张籍

锦江近西烟水绿，新雨山头荔枝熟。

万里桥边多酒家，游人爱向谁家宿。

卷 382_54 【寒塘曲】

张籍

寒塘沉沉柳叶疏，水暗人语惊栖鸟。

舟中少年醉不起，持烛照水射游鱼。

· 全唐诗 ·

卷 382_55【春别曲】

张籍

长江春水绿堪染，莲叶出水大如钱。

江头橘树君自种，那不长系木兰船。

卷 382_56【春堤曲】

张籍

野塘鸥鹭飞树头，绿蒲紫菱盖碧流。

狂客谁家爱云水，日日独来城下游。

卷 382_57【乌栖曲】

张籍

西山作宫潮满池，宫鸟晓鸣茱萸枝。

吴姬采莲自唱曲，君王昨夜舟中宿。

· 全唐诗 ·

卷 382_58【雀飞多】

张籍

雀飞多，触网罗，网罗高树颠。汝飞蓬蒿下，
勿复投身网罗间。粟积仓，禾在田。巢之雏，望其母来还。

卷 382_59【泗水行】

张籍

泗水流急石纂纂，鲤鱼上下红尾短。春冰销散日华满，
行舟往来浮桥断。城边鱼市人早行，水烟漠漠多棹声。

卷 382_60【废居行】

张籍

胡马崩腾满阡陌，都人避乱唯空宅。宅边青桑垂宛宛，
野蚕食叶还成茧。黄雀衔草入燕窠，啧啧啾啾白日晚。

去时禾黍埋地中，饥兵掘土翻重重。鸱枭养子庭树上，
曲墙空屋多旋风。乱定几人还本土，唯有官家重作主。

· 全唐诗 ·

卷 382_61【寄菖蒲】

张籍

石上生菖蒲，一寸十二节。仙人劝我食，令我头青面如雪。
逢人寄君一绛囊，书中不得传此方。君能来作栖霞侣，
与君同入丹玄乡。

卷 382_62【江村行】

张籍

南塘水深芦笋齐，下田种稻不作畦。耕场磷磷在水底，
短衣半染芦中泥。田头刈莎结为屋，归来系牛还独宿。
水淹手足尽有疮，山虻绕身飞颺颺。桑林椹黑蚕再眠，
妇姑采桑不向田。江南热旱天气毒，雨中移秧颜色鲜。
一年耕种长苦辛，田熟家家将赛神。

卷 382_63【樵客吟】

张籍

上山采樵选枯树，深处樵多出辛苦。秋来野火烧栎林，
枝柯已枯堪采取。斧声坎坎在幽谷，采得齐梢青葛束。

· 全唐诗 ·

日西待伴同下山，竹担弯弯向身曲。共知路傍多虎窟，
未出深林不敢歇。村西地暗狐兔行，稚子叫时相应声。
采樵客，莫采松与柏。松柏生枝直且坚，与君作屋成家宅。

卷 382_64【湖南曲】

张籍

潇湘多别离，风起芙蓉洲。江上人已远，夕阳满中流。
鸳鸯东南飞，飞上青山头。

卷 382_65【春水曲】

张籍

鸭鸭，鶑唼唼。青蒲生，春水狭。荡漾木兰船，
中有双少年。少年醉，鸭不起。

卷 382_66【云童行】

张籍

云童童，白龙之尾垂江中。今年天旱不作雨，
水足墙上有禾黍。

· 全唐诗 ·

卷 382_67【新桃行】

张籍

桃生叶婆娑，枝叶四向多。高未出墙颠，蒿苋相凌摩。
植之三年馀，今年初试花。秋来已成实，其阴良已嘉。

青蝉不来鸣，安得迅羽过。常恶牵丝虫，蒙幂成网罗。
顾托戏儿童，勿折吾柔柯。明年结其实，磊磊充汝家。

卷 382_68【忆远曲】

张籍

水上山沉沉，征途复绕林。途荒人行少，马迹犹可寻。
雪中独立树，海口失侣禽。离忧如长线，千里萦我心。

卷 382_69【长塘湖】

张籍

长塘湖，一斛水中半斛鱼。大鱼如柳叶，小鱼如针锋，
水浊谁能辨真龙。

· 全唐诗 ·

卷 382_70【废瑟词】

张籍

古瑟在匣谁复识，玉柱颠倒朱丝黑。千年曲谱不分明，
乐府无人传正声。秋虫暗穿尘作色，腹中不辨工人名。
几时天下复古乐，此瑟还奏云门曲。

· 全唐诗 ·

卷三百八十三

卷 383_1【野居】

张籍

贫贱易为适，荒郊亦安居。端坐无余思，弥乐古人书。
秋田多良苗，野水多游鱼。我无耒与网，安得充廩厨。

寒天白日短，檐下暖我躯。四肢暂宽柔，中肠郁不舒。
多病减志气，为客足忧虞。况复苦时节，览景独踟蹰。

卷 383_2【西州】

张籍

羌胡据西州，近甸无边城。山东收税租，养我防塞兵。
胡骑来无时，居人常震惊。嗟我五陵间，农者罢耘耕。

边头多杀伤，士卒难全形。郡县发丁役，丈夫各征行。
生男不能养，惧身有姓名。良马不念秣，烈士不苟营。
所愿除国难，再逢天下平。

· 全唐诗 ·

卷 383_3【杂怨】

张籍

切切重切切，秋风桂枝折。人当少年嫁，我当少年别。
念君非征行，年年长远途。妾身甘独殁，高堂有舅姑。
山川岂遥远，行人自不返。

卷 383_4【惜花】

张籍

春潭足芳树，水清不如素。幽人爱华景，一一空山暮。
月出潭气白，游鱼暗冲石。夜深春思多，酒醒山寂寂。

卷 383_5【三原李氏园宴集】

张籍

暮春天早热，邑居苦嚣烦。言从君子乐，乐彼李氏园。
园中有草堂，池引泾水泉。开户西北望，远见嵯峨山。
借问主人翁，北州佐戎轩。仆夫守旧宅，为客侍华筵。
高怀有馀兴，竹树芳且鲜。倾我所持觞，尽日共留连。
疏拙不偶俗，常喜形体闲。况来幽栖地，能不重叹言。

· 全唐诗 ·

卷 383_6【沈千运旧居】

张籍

汝北君子宅，我来见颓墉。乱离子孙尽，地属邻里翁。
土木被丘墟，谿路不连通。旧井蔓草合，牛羊坠其中。

君辞天子书，放意任体躬。一生不自力，家与逆旅同。
高议切星辰，余声激暗聋。方将旌旧闾，百世可封崇。

嗟其未积年，已为荒林丛。时岂无知音，不能崇此风。
浩荡竟无睹，我将安所从。

卷 383_7【赠别孟郊】

张籍

历历天上星，沉沉水中萍。幸当清秋夜，流影及微形。
君生衰俗间，立身如礼经。纯诚发新文，独有金石声。

才名振京国，归省东南行。停车楚城下，顾我不念程。
宝镜曾坠水，不磨岂自明。苦节居贫贱，所知赖友生。
欢会方别离，戚戚忧虑并。安得在一方，终老无送迎。

· 全唐诗 ·

卷 383_8 【卧疾】

张籍

身病多思虑，亦读神农经。空堂留灯烛，四壁青荧荧。
羁旅随人欢，贫贱还自轻。今来问良医，乃知病所生。

僮仆各忧愁，杵臼无停声。见我形憔悴，劝药语丁宁。
春雨枕席冷，窗前新禽鸣。开门起无力，遥爱鸡犬行。
服药察耳目，渐如醉者醒。顾非达性命，犹为忧患生。

卷 383_9 【别段生】

张籍

与子骨肉亲，愿言长相随。况离父母傍，从我学书诗。
同在道路间，讲论亦未亏。为文于我前，日夕生光仪。

行役多疾疚，赖此相扶持。贫贱事难拘，今日有别离。
我去秦城中，子留汴水湄。离情两飘断，不异风中丝。

幼年独为客，举动难得宜。努力自修励，常如见我时。
送我登山冈，再拜问还期。还期在新年，勿怨欢会迟。

· 全唐诗 ·

卷 383_10【哭于鹄】

张籍

青山无逸人，忽觉大国贫。良玉沉幽泉，名为天下珍。
野性疏时俗，再拜乃从军。气高终不合，去如镜上尘。
我初有章句，相合者唯君。今来吊嗣子，对陇烧新文。
耕者废其耜，爨者绝其薪。苟无新衣裳，曷用光我身。
奠酒徒拜手，哀怀安能陈。徒保金石韵，千载人所闻。

卷 383_11【南归】

张籍

促促念道路，四支不常宁。行车未及家，天外非尽程。
骨肉待我欢，乡里望我荣。岂知东与西，憔悴竟无成。
人言苦夜长，穷者不念明。惧离其寝寐，百忧伤性灵。
世道多险薄，相劝毕中诚。远游无知音，不如商贾行。
达人有常志，愚夫劳所营。旧山行去远，言归乐此生。

卷 383_12【惜花】

张籍

濛濛庭树花，坠地无颜色。日暮东风起，飘扬玉阶侧。

· 全唐诗 ·

残蕊在犹稀，青条耸复直。为君结芳实，令君勿叹息。

卷 383_13【奉和舍人叔直省时思琴】

张籍

蔼蔼紫薇直，秋意深无穷。滴沥仙阁漏，肃穆禁池风。
竹月泛凉影，萱露澹幽丛。地清物态胜，宵闲琴思通。
时属雅音际，迴凝虚抱中。达人掌枢近，常与隐默同。

卷 383_14【离妇】

张籍

十载来夫家，闺门无瑕疵。薄命不生子，古制有分离。
托身言同穴，今日事乖违。念君终弃捐，谁能强在兹。
堂上谢姑嫜，长跪请离辞。姑嫜见我往，将决复沉疑。
与我古时钏，留我嫁时衣。高堂拊我身，哭我于路陲。
昔日初为妇，当君贫贱时。昼夜常纺织，不得事蛾眉。
辛勤积黄金，济君寒与饥。洛阳买大宅，邯郸买侍儿。
夫婿乘龙马，出入有光仪。将为富家妇，永为子孙资。
谁谓出君门，一身上车归。有子未必荣，无子坐生悲。
为人莫作女，作女实难为。

· 全唐诗 ·

卷 383_15 【怀别】

张籍

仆人驱行轩，低昂出我门。离堂无留客，席上唯琴樽。
古道随水曲，悠悠绕荒村。远程未奄息，别念在朝昏。
端居愁岁永，独此留清景。岂无经过人，寻叹门巷静。
君如天上雨，我如屋下井。无因同波流，愿作形与影。

卷 383_16 【学仙】

张籍

楼观开朱门，树木连房廊。中有学仙人，少年休谷粮。
高冠如芙蓉，霞月披衣裳。六时朝上清，佩玉纷锵锵。
自言天老书，秘覆云锦囊。百年度一人，妄泄有灾殃。
每占有仙相，然后传此方。先生坐中堂，弟子跪四厢。
金刀截身发，结誓焚灵香。弟子得其诀，清斋入空房。
守神保元气，动息随天罡。炉烧丹砂尽，昼夜候火光。
药成既服食，计日乘鸾凰。虚空无灵应，终岁安所望。
勤劳不能成，疑虑积心肠。虚羸生疾疹，寿命多夭伤。
身歿惧人见，夜埋山谷傍。求道慕灵异，不如守寻常。
先王知其非，戒之在国章。

· 全唐诗 ·

卷 383_17【夜怀】

张籍

穷居积远念，转转迷所归。幽蕙零落色，暗萤参差飞。
病生秋风簟，泪堕月明衣。无愁坐寂寞，重使奏清徽。

卷 383_18【城南】

张籍

漾漾南涧水，来作曲池流。言寻参差岛，晓榜轻盈舟。
万绕不再止，千寻尽孤幽。藻涩讶人重，萍分指鱼游。
繁苗毯下垂，密箭翻回輳。曝鳖乱自坠，阴藤斜相钩。
卧蒋黑米吐，翻芰紫角稠。桥低竞俯俦，亭近闲夷犹。
目为逐胜朗，手因掇芳柔。渐喜游来极，忽疑归无由。
气状虽可览，纤微谅难搜。未听主人赏，徒爱清华秋。

卷 383_19【怀友】

张籍

人生有行役，谁能如草木。别离感中怀，乃为我桎梏。
百年受命短，光景良不足。念我别离者，愿怀日月促。

· 全唐诗 ·

平地施道路，车马往不复。空知为良田，秋望禾黍熟。
端居无俦侣，日夜祷耳目。立身难自觉，常恐忧与辱。
穷贱无闲暇，疾痛多嗜欲。我思携手人，逍遥任心腹。

卷 383_20【寄别者】

张籍

寒天正飞雪，行人心切切。同为万里客，中路忽离别。
别君汾水东，望君汾水西。积雪无平冈，空山无人蹊。
羸马时倚辕，行行未遑食。下车劝僮仆，相顾莫叹息。
讵知佳期隔，离念终无极。

卷 383_21【献从兄】

张籍

悠悠旱天云，不远如飞尘。贤达失其所，沉飘同众人。
擢秀登王畿，出为良使宾。名高满朝野，幼贱谁不闻。
一朝遇谗邪，流窜八九春。诏书近迁移，组绶未及身。
冬井无寒冰，玉润难为焚。虚怀日迢遥，荣辱常保纯。
我念出游时，勿吟康乐文。愿言灵溪期，聊欲相依因。

· 全唐诗 ·

卷 383_22【寄韩愈】

张籍

野馆非我室，新居未能安。读书避尘杂，方觉此地闲。
过郭多园墟，桑果相接连。独游竟寂寞，如寄空云山。

夏景常昼毒，密林无鸣蝉。临溪一盥濯，清去肢体烦。
出林望曾城，君子在其间。戎府草章记，阻我此游盘。

忆昔西潭时，并持钓鱼竿。共忻得鲂鲤，烹飪于我前。
几朝还复来，叹息时独言。

卷 383_23【赠姚怱】

张籍

漏天日无光，泽土松不长。君今职下位，志气安得扬。
白发文思壮，才为国贤良。无人识高韵，荐于天子傍。

况我愚朴姿，强趋利名场。远同干贵人，身举固难彰。
昔逢汴水滨，今会习池阳。岂无再来期，顾恐非此方。
愿为石中泉，不为瓦上霜。离别勿复道，所贵不相忘。

· 全唐诗 ·

卷 383_24【病中寄白学士拾遗】

张籍

秋亭病客眠，庭树满枝蝉。凉风绕砌起，斜影入床前。
梨晚渐红坠，菊寒无黄鲜。倦游寂寞日，感叹蹉跎年。
尘欢久消委，华念独迎延。自寓城阙下，识君弟事焉。
君为天子识，我方沉病缠。无因会同语，悄悄中怀煎。

卷 383_25【雨中寄元宗简】

张籍

秋堂羸病起，盥漱风雨朝。竹影冷疏涩，榆叶暗飘萧。
街径多坠果，墙隅有蛭蛸。延瞻游步阻，独坐闲思饶。
君居应如此，恨言相去遥。

卷 383_26【野寺后池寄友】

张籍

佛寺连野水，池幽夏景清。繁木荫芙蕖，时有水禽鸣。
通溪岸暂断，分渚流复萦。伴僧钟磬罢，月来池上明。
友人竟不至，东北见高城。独游自寂寞，况此恨盈盈。

· 全唐诗 ·

卷 383_27【董公诗】

张籍

谁主东诸侯，元臣陇西公。旌节居汴水，四方皆承风。
在朝四十年，天下诵其功。相我明天子，政成如太宗。
东方有艰难，公乃出临戎。单车入危城，慈惠安群凶。
公谓其党言，汝材甚骁雄。为我帐下士，出入卫我躬。
汝息为我子，汝亲我为翁。众皆相顾泣，无不和且恭。
其父教子义，其妻勉夫忠。不自以为资，奉上但颙颙。
公衣无文采，公食少肥浓。所忧在万人，人实我宁空。
轻刑宽其政，薄赋弛租庸。四郡三十城，不知岁饥凶。
天子临朝喜，元老留在东。今闻扬盛德，就安我大邦。
百辟贺明主，皇风恩赐重。朝廷有大事，就决其所从。
海内既无虞，君臣方肃雍。端居任僚属，宴语常从容。
翩翩者苍乌，来巢于林丛。甘瓜生场圃，一蒂实连中。
田有嘉谷陇，异亩穗亦同。贤人佐圣人，德与神明通。
感应我淳化，生瑞我地中。昔者此州人，但矜马与弓。
今公施德礼，自然威武崇。公其共百年，受禄将无穷。

卷 383_28【祭退之】

张籍

呜呼吏部公，其道诚巍昂。生为大贤姿，天使光我唐。

· 全唐诗 ·

德义动鬼神，鉴用不可详。独得雄直气，发为古文章。
学无不该贯，吏治得其方。三次论谏退，其志亦刚强。
再使平山东，不言所谋臧。荐待皆寒羸，但取其才良。
亲朋有孤稚，婚姻有办营。如彼天有斗，人可为信常。
如彼岁有春，物宜得华昌。哀哉未申施，中年遽殁丧。
朝野良共哀，矧于知旧肠。籍在江湖间，独以道自将。
学诗为众体，久乃溢笈囊。略无相知人，黯如雾中行。
北游偶逢公，盛语相称明。名因天下闻，传者入歌声。
公领试士司，首荐到上京。一来遂登科，不见苦贡场。
观我性朴直，乃言及平生。由兹类朋党，骨肉无以当。
坐令其子拜，常呼幼时名。追招不隔日，继践公之堂。
出则连辔驰，寝则对榻床。搜穷古今书，事事相酌量。
有花必同寻，有月必同望。为文先见草，酿熟偕共觞。
新果及异鲑，无不相待尝。到今三十年，曾不少异更。
公文为时师，我亦有微声。而后之学者，或号为韩张。
我官麟台中，公为大司成。念此委末秩，不能力自扬。
特状为博士，始获升朝行。未几享其资，遂忝南宫郎。
是事赖拯扶，如屋有栋梁。去夏公请告，养疾城南庄。
籍时官休罢，两月同游翔。黄子陂岸曲，地旷气色清。
新池四平涨，中有蒲荇香。北台临稻畴，茂柳多阴凉。
板亭坐垂钓，烦苦稍已平。共爱池上佳，联句舒遐情。
偶有贾秀才，来兹亦同并。移船入南溪，东西纵篙撑。
划波激船舷，前后飞鸥鶩。回入潭濑下，网截鲤与鲂。
踏沙掇水蔬，树下烝新粳。日来相与嬉，不知暑日长。
柴翁携童儿，聚观于岸傍。月中登高滩，星汉交垂芒。
钓车掷长线，有获齐欢惊。夜阑乘马归，衣上草露光。
公为游谿诗，唱咏多慨慷。自期此可老，结社于其乡。

· 全唐诗 ·

籍受新官诏，拜恩当入城。公因同归还，居处隔一坊。
中秋十六夜，魄圆天差晴。公既相邀留，坐语于阶楹。
乃出二侍女，合弹琵琶箏。临风听繁丝，忽遽闻再更。
顾我数来过，是夜凉难忘。公疾浸日加，孺人视药汤。
来候不得宿，出门每回遑。自是将重危，车马候纵横。
门仆皆逆遣，独我到寝房。公有旷达识，生死为一纲。
及当临终晨，意色亦不荒。赠我珍重言，傲然委衾裳。
公比欲为书，遗约有修章。令我署其末，以为后事程。
家人号于前，其书不果成。子符奉其言，甚于亲使令。
鲁论未讫注，手迹今微茫。新亭成未登，闭在庄西厢。
书札与诗文，重叠我笥盈。顷息万事尽，肠情多摧伤。
旧茔盟津北，野窆动鼓钲。柳车一出门，终天无回箱。
籍贫无赠赀，曷用申哀诚。衣器陈下帐，醪饵奠堂皇。
明灵庶鉴知，仿佛斯来飡。

· 全唐诗 ·

卷三百八十四

卷 384_1【蓟北旅思】

张籍

日日望乡国，空歌白苧词。长因送人处，忆得别家时。
失意还独语，多愁只自知。客亭门外柳，折尽向南枝。

卷 384_2【江南春】

张籍

江南杨柳春，日暖地无尘。渡口过新雨，夜来生白蘋。
晴沙鸣乳燕，芳树醉游人。向晚青山下，谁家祭水神。

卷 384_3【西楼望月】

张籍

城西楼上月，复是雪晴时。寒夜共来望，思乡独下迟。

· 全唐诗 ·

幽光落水堑，净色在霜枝。明日千里去，此中还别离。

卷 384_4【别鹤】

张籍

双鹤出云谿，分飞各自迷。空巢在松顶，折羽落红泥。
寻水终不饮，逢林亦未栖。别离应易老，万里雨凄凄。

卷 384_5【江陵孝女】

张籍

孝女独垂发，少年唯一身。无家空托墓，主祭不从人。
相吊有行客，起庐无旧邻。江头闻哭处，寂寂楚花春。

卷 384_6【山中古祠】

张籍

春草空祠墓，荒林唯鸟飞。记年碑石在，经乱祭人稀。
野鼠缘朱帐，阴尘盖画衣。近门潭水黑，时见宿龙归。

· 全唐诗 ·

卷 384_7【渔阳将】

张籍

塞深沙草白，都护领燕兵。放火烧奚帐，分旗筑汉城。
下营看岭势，寻雪觉人行。更向桑干北，擒生问碣名。

卷 384_8【听夜泉】

张籍

细泉深处落，夜久渐闻声。独起出门听，欲寻当涧行。
还疑隔林远，复畏有风生。月下长来此，无人亦到明。

卷 384_9【送南迁客】

张籍

去去远迁客，瘴中衰病身。青山无限路，白首不归人。
海国战骑象，蛮州市用银。一家分几处，谁见日南春。

· 全唐诗 ·

卷 384_10 【蓟北春怀】

张籍

渺渺水云外，别来音信稀。因逢过江使，却寄在家衣。
问路更愁远，逢人空说归。今朝蓟城北，又见塞鸿飞。

卷 384_11 【思远人】

张籍

野桥春水清，桥上送君行。去去人应老，年年草自生。
出门看远道，无信向边城。杨柳别离处，秋蝉今复鸣。

卷 384_12 【赠同溪客】

张籍

幽居得相近，烟景每寥寥。共伐临谿树，因为过水桥。
自教青鹤舞，分采紫芝苗。更爱南峰住，寻君路恐遥。

· 全唐诗 ·

卷 384_13 【望行人】

张籍

秋风窗下起，旅雁向南飞。日日出门望，家家行客归。
无因见边使，空待寄寒衣。独倚青楼暮，烟深鸟雀稀。

卷 384_14 【送宫人入道】

张籍

旧宠昭阳里，寻仙此最稀。名初出宫籍，身未称霞衣。
已别歌舞贵，长随鸾鹤飞。中官看入洞，空驾玉轮归。

卷 384_15 【送越客】

张籍

见说孤帆去，东南到会稽。春云剡溪口，残月镜湖西。
水鹤沙边立，山鼯竹里啼。谢家曾住处，烟洞入应迷。

· 全唐诗 ·

卷 384_16 【赠辟谷者】

张籍

学得餐霞法，逢人与小还。身轻曾试鹤，力弱未离山。
无食犬犹在，不耕牛自闲。朝朝空漱水，叩齿草堂间。

卷 384_17 【思江南旧游】

张籍

江皋三月时，花发石楠枝。归客应无数，春山自不知。
独行愁道远，回信畏家移。杨柳东西渡，茫茫欲问谁。

卷 384_18 【夜到渔家】

张籍

渔家在江口，潮水入柴扉。行客欲投宿，主人犹未归。
竹深村路远，月出钓船稀。遥见寻沙岸，春风动草衣。

· 全唐诗 ·

卷 384_19 【送远使】

张籍

扬旌过陇头，陇水向西流。塞路依山远，戍城逢笛秋。
寒沙阴漫漫，疲马去悠悠。为问征行将，谁封定远侯。

卷 384_20 【不食姑】

张籍

几年山里住，已作绿毛身。护气常稀语，存思自见神。
养龟同不食，留药任生尘。要问西王母，仙中第几人。

卷 384_21 【古苑杏花】

张籍

废苑杏花在，行人愁到时。独开新堑底，半露旧烧枝。
晚色连荒辙，低阴覆折碑。茫茫古陵下，春尽又谁知。

· 全唐诗 ·

卷 384_22 【送流人】

张籍

独向长城北，黄云暗塞天。流名属边将，旧业作公田。
拥雪添军垒，收冰当井泉。知君住应老，须记别乡年。

卷 384_23 【宿临江驿】

张籍

楚驿南渡口，夜深来客稀。月明见潮上，江静觉鸥飞。
旅宿今已远，此行殊未归。离家久无信，又听捣寒衣。

卷 384_24 【送蛮客】

张籍

借问炎州客，天南几日行。江连恶谿路，山绕夜郎城。
柳叶瘴云湿，桂丛蛮鸟声。知君却回日，记得海花名。

· 全唐诗 ·

卷 384_25【襄国别友】

张籍

晓色荒城下，相看秋草时。独游无定计，不欲道来期。
别处去家远，愁中驱马迟。归人渡烟水，遥映野棠枝。

卷 384_26【送远客】

张籍

南原相送处，秋水草还生。同作忆乡客，如今分路行。
因谁寄归信，渐远问前程。明日重阳节，无人上古城。

卷 384_27【山中赠日南僧】

张籍

独向双峰老，松门闭两崖。翻经上蕉叶，挂衲落藤花。
甃石新开井，穿林自种茶。时逢海南客，蛮语问谁家。

· 全唐诗 ·

卷 384_28 【征西将】

张籍

黄沙北风起，半夜又翻营。战马雪中宿，探人冰上行。
深山旗未展，阴碛鼓无声。几道征西将，同收碎叶城。

卷 384_29 【寄友人】

张籍

忆在江南日，同游三月时。采茶寻远涧，斗鸭向春池。
送客沙头宿，招僧竹里棋。如今各千里，无计得相随。

卷 384_30 【送防秋将】

张籍

白首征西将，犹能射戟支。元戎选部曲，军吏换旌旗。
逐虏招降远，开边旧垒移。重收陇外地，应似汉家时。

· 全唐诗 ·

卷 384_31【律僧】

张籍

苦行长不出，清羸最少年。持斋唯一食，讲律岂曾眠。
避草每移径，滤虫还入泉。从来天竺法，到此几人传。

卷 384_32【山中秋夜】

张籍

寂寂山景静，幽人归去迟。横琴当月下，压酒及花时。
冷露湿茆屋，暗泉冲竹篱。西峰采药伴，此夕恨无期。

卷 384_33【送南客】

张籍

行路雨修修，青山尽海头。天涯人去远，岭北水空流。
夜市连铜柱，巢居属象州。来时旧相识，谁向日南游。

· 全唐诗 ·

卷 384_34【宿江店】

张籍

野店临西浦，门前有橘花。停灯待贾客，卖酒与渔家。
夜静江水白，路回山月斜。闲寻泊船处，潮落见平沙。

卷 384_35【岭表逢故人】

张籍

过岭万馀里，旅游经此稀。相逢去家远，共说几时归。
海上见花发，瘴中唯鸟飞。炎州望乡伴，自识北人衣。

卷 384_36【出塞】

张籍

秋塞雪初下，将军远出师。分营长记火，放马不收旗。
月冷边帐湿，沙昏夜探迟。征人皆白首，谁见灭胡时。

· 全唐诗 ·

卷 384_37【寄紫阁隐者】

张籍

紫阁气沉沉，先生住处深。有人时得见，无路可相寻。
夜鹿伴茅屋，秋猿守栗林。唯应采灵药，更不别营心。

卷 384_38【夜宿黑灶溪】

张籍

夜到碧溪里，无人秋月明。逢幽更移宿，取伴亦探行。
花下红泉色，云西乳鹤声。明朝记归处，石上自书名。

卷 384_39【古树】

张籍

古树枝柯少，枯来复几春。露根堪系马，空腹定藏人。
蠹节莓苔老，烧痕霹雳新。若当江浦上，行客祭为神。

· 全唐诗 ·

卷 384_40 【送徐先生归蜀】

张籍

日暮远归处，云间仙观钟。唯持青玉牒，独立碧鸡峰。
阴涧长收乳，寒泉旧养龙。几时因卖药，得向海边逢。

卷 384_41 【隐者】

张籍

先生已得道，市井亦容身。救病自行药，得钱多与人。
问年长不定，传法又非真。每见邻家说，时闻使鬼神。

卷 384_42 【送友人归山】

张籍

出山成北首，重去结茅庐。移石修废井，扫龛盛旧书。
开田留杏树，分洞与僧居。长在幽峰里，樵人见亦疏。

· 全唐诗 ·

卷 384_43 【雪溪西亭晚望】

张籍

雪水碧悠悠，西亭柳岸头。夕阴生远岫，斜照逐回流。
此地动归思，逢人方倦游。吴兴耆旧尽，空见白蘋洲。

卷 384_44 【哭山中友人】

张籍

入云遥便哭，山友隔今生。绕墓招魂魄，镌岩记姓名。
犬因无主善，鹤为见人鸣。长说能尸解，多应别路行。

卷 384_45 【答僧拄杖】

张籍

灵藤为拄杖，白净色如银。得自高僧手，将扶病客身。
春游不骑马，夜会亦呈人。持此归山去，深宜戴角巾。

· 全唐诗 ·

卷 384_46 【灵都观李道士】

张籍

仙观雨来静，绕房琼草春。素书天上字，花洞古时人。
泥灶煮灵液，扫坛朝玉真。几回游阆苑，青节亦随身。

卷 384_47 【送韦评事归华阴】

张籍

三峰西面住，出见世人稀。老大谁相识，恓惶又独归。
扫窗秋菌落，开簏夜蛾飞。若向云中伴，还应着褐衣。

卷 384_48 【送闽僧】

张籍

几夏京城住，今朝独远归。修行四分律，护净七条衣。
谿寺黄橙熟，沙田紫芋肥。九龙潭上路，同去客应稀。

· 全唐诗 ·

卷 384_49 【送海南客归旧岛】

张籍

海上去应远，蛮家云岛孤。竹船来桂浦，山市卖鱼须。
入国自献宝，逢人多赠珠。却归春洞口，斩象祭天吴。

卷 384_50 【登咸阳北寺楼】

张籍

高秋原上寺，下马一登临。渭水西来直，秦山南向深。
旧宫人不住，荒碣路难寻。日暮凉风起，萧条多远心。

卷 384_51 【送新罗使】

张籍

万里为朝使，离家今几年。应知旧行路，却上远归船。
夜泊避蛟窟，朝炊求岛泉。悠悠到乡国，远望海西天。

· 全唐诗 ·

卷 384_52【宿广德寺寄从舅】

张籍

古寺客堂空，开帘四面风。移床动栖鹤，停烛聚飞虫。
闲卧逐凉处，远愁生静中。林西微月色，思与宁家同。

卷 384_53【宿邯郸馆寄马磁州】

张籍

孤客到空馆，夜寒愁卧迟。虽沽主人酒，不似在家时。
几宿得欢笑，如今成别离。明朝行更远，回望隔山陂。

卷 384_54【舟行寄李湖州】

张籍

客愁无次第，川路重辛勤。藻密行舟涩，湾多转楫频。
薄游空感惠，失计自怜贫。赖有汀洲句，时时慰远人。

· 全唐诗 ·

卷 384_55【送闲师归江南】

张籍

遍住江南寺，随缘到上京。多生修律业，外学得诗名。
讲殿偏追入，斋家别请行。青枫乡路远，几日尽归程。

卷 384_56【游襄阳山寺】

张籍

秋色江边路，烟霞若有期。寺贫无利施，僧老足慈悲。
薜荔侵禅窟，虾蟆占浴池。闲游殊未遍，即是下山时。

卷 384_57【登城寄王秘书建】

张籍

闻君鹤岭住，西望日依依。远客偏相忆，登城独不归。
十年为道侣，几处共柴扉。今日烟霞外，人间得见稀。

· 全唐诗 ·

卷 384_58【送从弟戴玄往苏州】

张籍

杨柳阊门路，悠悠水岸斜。乘舟向山寺，着屐到渔家。
夜月红柑树，秋风白藕花。江天诗景好，回日莫令赊。

卷 384_59【送朱庆余及第归越】

张籍

东南归路远，几日到乡中。有寺山皆遍，无家水不通。
湖声莲叶雨，野气稻花风。州县知名久，争邀与客同。

卷 384_60【过贾岛野居】

张籍

青门坊外住，行坐见南山。此地去人远，知君终日闲。
蛙声篱落下，草色户庭间。好是经过处，唯愁暮独还。

· 全唐诗 ·

卷 384_61【酬韩庶子】

张籍

西街幽僻处，正与懒相宜。寻寺独行远，借书常送迟。
家贫无易事，身病足闲时。寂寞谁相问，只应君自知。

卷 384_62【赠姚合少府】

张籍

病来辞赤县，案上有丹经。为客烧茶灶，教儿扫竹亭。
诗成添旧卷，酒尽卧空瓶。阙下今遗逸，谁瞻隐士星。

卷 384_63【送僧游五台兼谒李司空】

张籍

远去见双节，因行上五台。化楼侵晓出，雪路向春开。
边寺连峰去，胡儿听法来。定知巡礼后，解夏始应回。

· 全唐诗 ·

卷 384_64 【送郑秀才归宁】

张籍

桂楫彩为衣，行当令节归。夕潮迷浦远，昼雨见人稀。
野芰到时熟，江鸥泊处飞。离琴一奏罢，山雨霭余晖。

卷 384_65 【送李评事游越】

张籍

未习风尘事，初为吴越游。露沾湖草晚，日照海山秋。
梅市门何在，兰亭水尚流。西陵待潮处，知汝不胜愁。

卷 384_66 【夏日闲居】

张籍

无事门多闭，偏知夏日长。早蝉声寂寞，新竹气清凉。
闲对临书案，看移晒药床。自怜归未得，犹寄在班行。

· 全唐诗 ·

卷 384_67【闲居】

张籍

东城南陌尘，紫幰与朱轮。尽说无多事，能闲有几人。
唯教推甲子，不信守庚申。谁见衡门里，终朝自在贫。

卷 384_68【寄昭应王中丞】

张籍

借得街西宅，开门渭水头。长贫唯要健，渐老不禁愁。
独凭藤书案，空悬竹酒钩。春风石瓮寺，作意共君游。

卷 384_69【酬孙洛阳】

张籍

家贫相远住，斋馆入时稀。独坐看书卷，闲行著褐衣。
早蝉庭笋老，新雨径莎肥。各离争名地，无人见是非。

· 全唐诗 ·

卷 384_70【送人任济阴】

张籍

黄绶在腰下，知君非旅行。将书报旧里，留褐与诸生。
赠别尽沽酒，惜欢多出城。春风济水上，候吏听车声。

卷 384_71【晚春过崔駙马东园】

张籍

闲园多好风，不意在街东。早早诗名远，长长酒性同。
竹香新雨后，莺语落花中。莫遣经过少，年光渐觉空。

卷 384_72【夏日闲居】

张籍

多病逢迎少，闲居又一年。药看辰日合，茶过卯时煎。
草长晴来地，虫飞晚后天。此时幽梦远，不觉到山边。

· 全唐诗 ·

卷 384_73【晚秋闲居】

张籍

独坐高秋晚，萧条足远思。家贫常畏客，身老转怜儿。
万种尽闲事，一生能几时。从来疏懒性，应只有僧知。

卷 384_74【和陆司业习静寄所知】

张籍

幽室独焚香，清晨下未央。山开登竹阁，僧到出茶床。
收拾新琴谱，封题旧药方。逍遥无别事，不似在班行。

卷 384_75【酬韩祭酒雨中见寄】

张籍

雨中愁不出，阴黑尽连宵。屋湿唯添漏，泥深未放朝。
无刍怜马瘦，少食信儿娇。闻道韩夫子，还同此寂寥。

· 全唐诗 ·

卷 384_76【和裴仆射移官言志】

张籍

身在勤劳地，常思放旷时。功成归圣主，位重委群司。
看垒台边石，闲吟箠里诗。苍生正瞻望，难与故山期。

卷 384_77【酬白二十二舍人早春曲江见招】

张籍

曲江冰欲尽，风日已恬和。柳色看犹浅，泉声觉渐多。
紫蒲生湿岸，青鸭戏新波。仙掖高情客，相招共一过。

卷 384_78【和裴仆射朝回寄韩吏部】

张籍

独爱南关里，山晴竹杪风。从容朝早退，萧洒客常通。
案曲新亭上，移花远寺中。唯应有吏部，诗酒每相同。

· 全唐诗 ·

卷 384_79【春日李舍人宅见两省诸公唱和，因书情即事】

张籍

又见帝城里，东风天气和。官闲人事少，年长道情多。
紫掖发章句，青闱更咏歌。谁知余寂寞，终日断经过。

卷 384_80【和李仆射秋日病中作】

张籍

由来病根浅，易见药功成。晓日杵臼静，凉风衣服轻。
犹疑少气力，渐觉有心情。独倚红藤杖，时时阶上行。

卷 384_81【早春病中】

张籍

羸病及年初，心情不自如。多申请假牒，只送贺官书。
幽径独行步，白头长懒梳。更怜晴日色，渐渐暖贫居。

· 全唐诗 ·

卷 384_82【送严大夫之桂州】

张籍

旌旆过湘潭，幽奇得遍探。莎城百越北，行路九疑南。
有地多生桂，无时不养蚕。听歌疑似曲，风俗自相谙。

卷 384_83【咏怀】

张籍

老去多悲事，非唯见二毛。眼昏书字大，耳重觉声高。
望月偏增思，寻山易发劳。都无作官意，赖得在闲曹。

卷 384_84【使至蓝谿驿，寄太常王丞】

张籍

独上七盘去，峰峦转转稠。云中迷象鼻，雨里下笪头。
水没荒桥路，鸦啼古驿楼。君今在城阙，肯见此中愁。

· 全唐诗 ·

卷 384_85 【留别江陵王少府】

张籍

迢迢山上路，病客独行迟。况此分手处，当君失意时。
寒林远路驿，晚烧过荒陂。别后空回首，相逢未有期。

卷 384_86 【赠海东僧】

张籍

别家行万里，自说过扶余。学得中州语，能为外国书。
与医收海藻，持咒取龙鱼。更问同来伴，天台几处居。

卷 384_87 【寄汉阳故人】

张籍

知君汉阳住，烟树远重重。归使雨中发，寄书灯下封。
同时买江坞，今日别云松。欲问新移处，青萝最北峰。

· 全唐诗 ·

卷 384_88 【送安西将】

张籍

万里海西路，茫茫边草秋。计程沙塞口，望伴驿峰头。
雪暗非时宿，沙深独去愁。塞乡人易老，莫住近蕃州。

卷 384_89 【题李山人幽居】

张籍

襄阳南郭外，茅屋一书生。无事焚香坐，有时寻竹行。
画苔藤杖细，踏石笋鞋轻。应笑风尘客，区区逐世名。

卷 384_90 【早春闲游】

张籍

年长身多病，独宜作冷官。从来闲坐惯，渐觉出门难。
树影新犹薄，池光晚尚寒。遥闻有花发，骑马暂行看。

· 全唐诗 ·

卷 384_91【赠太常王建藤杖笋鞋】

张籍

蛮藤剪为杖，楚笋结成鞋。称与诗人用，堪随礼寺斋。
寻花入幽径，步日下寒阶。以此持相赠，君应惬素怀。

卷 384_92【和周赞善闻子规】

张籍

秦城啼楚鸟，远思更纷纷。况是街西夜，偏当雨里闻。
应投最高树，似隔数重云。此处谁能听，遥知独有君。

卷 384_93【送李骑曹灵州归觐】

张籍

翩翩出上京，几日到边城。渐觉风沙起，还将弓箭行。
席箕侵路暗，野马见人惊。军府知归庆，应教数骑迎。

· 全唐诗 ·

卷 384_94【寒食夜寄姚侍郎】

张籍

贫官多寂寞，不异野人居。作酒和山药，教儿写道书。
五湖归去远，百事病来疏。况忆同怀者，寒庭月上初。

卷 384_95【题清彻上人院】

张籍

古寺临坛久，松间别起堂。看添浴佛水，自合读经香。
爱养无家客，多传得效方。过斋长不出，坐卧一绳床。

卷 384_96【寄灵一上人初归云门寺】

张籍

寒山白云里，法侣自招携。竹径通城下，松门隔水西。
方同沃洲去，不作武陵迷。仿佛遥看处，秋风是会稽。

· 全唐诗 ·

卷 384_97【和裴司空即事通简旧僚】

张籍

肃肃上台坐，四方皆仰风。当朝奉明政，早日立元功。
独对赤墀下，密宣黄阁中。犹闻动高韵，思与旧僚同。

卷 384_98【使回留别襄阳李司空】

张籍

江亭寒日晚，弦管有离声。从此一筵别，独为千里行。
迟迟恋恩德，役役限公程。回首吟新句，霜云满楚城。

卷 384_99【和户部令狐尚书喜裴司空见招看雪】

张籍

南园新覆雪，上宰晓来看。谁共登春榭，唯闻有地官。
色连山远静，气与竹偏寒。高韵更相应，宁同歌吹欢。

· 全唐诗 ·

卷 384_100 【和裴司空以诗请刑部白侍郎双鹤】

张籍

皎皎仙家鹤，远留闲宅中。徘徊幽树月，嘹唳小亭风。
丞相西园好，池塘野水通。欲将来放此，赏望与宾同。

卷 384_101 【同锦州胡郎中清明日对雨西亭宴】

张籍

郡内开新火，高斋雨气清。惜花邀客赏，劝酒促歌声。
共醉移芳席，留欢闭暮城。政闲方宴语，琴筑任遥情。

卷 384_102 【庄陵挽歌词三首】

张籍

白日已昭昭，干戈亦渐消。迎师亲出道，从谏早临朝。
佞幸威权薄，忠良宠锡饶。丘陵今一变，无复白云谣。

观风欲巡洛，习战亦开池。始改三年政，旋闻七月期。
陵分内外使，官具吉凶仪。渭北新园路，箫笳远更悲。

· 全唐诗 ·

晓日龙车动，秋风阊阖开。行帷六宫出，执紼万方来。
惨惨郊原暮，迟迟挽唱哀。空山烟雨夕，新陌绕陵台。

卷 384_103【和左司元郎中秋居十首】

张籍

选得闲坊住，秋来草树肥。风前卷筒簟，雨里脱荷衣。
野客留方去，山童取药归。非因入朝省，过此出门稀。

有地唯栽竹，无池亦养鹅。学书求墨迹，酿酒爱朝和。
古镜铭文浅，神方谜语多。居贫闲自乐，豪客莫相过。

闲来松菊地，未省有埃尘。直去多将药，朝回不访人。
见僧收酒器，迎客换纱巾。更恐登清要，难成自在身。

自知清静好，不要问时豪。就石安琴枕，穿松压酒槽。
山晴因月甚，诗语入秋高。身外无余事，唯应笔砚劳。

闲堂新扫洒，称是早秋天。书客多呈帖，琴僧与合弦。
莎台乘晚上，竹院就凉眠。终日无忙事，还应似得仙。

醉倚斑藤杖，闲眠瘦木床。案头行气诀，炉里降真香。
尚俭经营少，居闲意思长。秋茶莫夜饮，新自作松浆。

· 全唐诗 ·

每忆旧山居，新教上墨图。晚花回地种，好酒问人沽。
夜后开朝簿，申前发省符。为郎凡几岁，已见白髭须。

菊地才通履，茶房不垒阶。凭医看蜀药，寄信觅吴鞋。
尽得仙家法，多随道客斋。本无荣辱意，不是学安排。

林下无拘束，闲行放性灵。好时开药灶，高处置琴亭。
更撰居山记，唯寻相鹤经。初当授衣假，无吏挽门铃。

客散高斋晚，东园景象偏。晴明犹有蝶，凉冷渐无蝉。
藤折霜来子，蜗行雨后涎。新诗才上卷，已得满城传。

卷 384_104 【经王处士原居】

张籍

旧宅谁相近，唯僧近竹关。庭闲云满井，窗晓雪通山。
来客半留宿，借书多寄还。明时未中岁，莫便一生闲。

卷 384_105 【不食仙姑山房】

张籍

寂寂花枝里，草堂唯素琴。因山曾改眼，见客不言心。
月出溪路静，鹤鸣云树深。丹砂如可学，便欲住幽林。

· 全唐诗 ·

卷 384_106 【江头】

张籍

晚步随江远，来帆过眼频。试寻新住客，少见故乡人。
回首怜归翼，长吟任此身。应同南浦雁，更见岭头春。

卷 384_107 【寄孙冲主簿】

张籍

低折沧洲簿，无书整两春。马从同事借，妻怕罢官贫。
道僻收闲药，诗高笑故人。仍闻长吏奏，表乞锁厅频。

卷 384_108 【赠任懒】

张籍

未肯求科第，深坊且隐居。胜游寻野客，高卧看兵书。
点药医闲马，分泉灌远蔬。汉庭无得意，谁拟荐相如。

· 全唐诗 ·

卷 384_109 【旧宫人】

张籍

歌舞梁州女，归时白发生。全家没蕃地，无处问乡程。
宫锦不传样，御香空记名。一身难自说，愁逐路人行。

卷 384_110 【春日留别】

张籍

游人欲别离，半醉对花枝。看著春又晚，莫轻少年时。
临行记分处，回首是相思。各向天涯去，重来未可期。

卷 384_111 【没蕃故人】

张籍

前年伐月支，城上没全师。蕃汉断消息，死生长别离。
无人收废帐，归马识残旗。欲祭疑君在，天涯哭此时。

· 全唐诗 ·

卷 384_112【赠箕山僧】

张籍

久住空林下，长斋耳目清。蒲团借客坐，石磴磬人行。
似鹤难知性，因山强号名。时闻衣袖里，暗掐念珠声。

卷 384_113【冬夕】

张籍

寒蛩独罢织，湘雁犹能鸣。月色当窗入，乡心半夜生。
不成高枕梦，复作绕阶行。回首嗟淹泊，城头北斗横。

卷 384_114【奉和陕州十四翁中丞寄雷州二十二翁司户之作】

张籍

联飞独不前，迢落海南天。贾傅竟行矣，邵公惟泫然。
瘴开山更远，路极水无边。沉劣本多感，况闻原上篇。

· 全唐诗 ·

卷 384_115 【老将】

张籍

鬓衰头似雪，行步急如风。不怕骑生马，犹能挽硬弓。
兵书封锦字，手诏满香筒。今日身憔悴，犹夸定远功。

卷 384_116 【送友生游峡中】

张籍

风静杨柳垂，看花又别离。几年同在此，今日各驱驰。
峡里闻猿叫，山头见月时。殷勤一杯酒，珍重岁寒姿。

卷 384_117 【送安法师】

张籍

出郭见落日，别君临古津。远程无野寺，宿处问何人。
原色不分路，锡声遥隔尘。山阴到家节，犹及蕙兰春。

· 全唐诗 ·

卷 384_118 【水】

张籍

荡漾空沙际，虚明入远天。秋光照不极，鸟色去无边。
势引长云阔，波轻片雪连。汀洲杳难测，万古覆苍烟。

卷 384_119 【岳州晚景】

张籍

晚景寒鸦集，秋声旅雁归。水光浮日去，霞彩映江飞。
洲白芦花吐，园红柿叶稀。长沙卑湿地，九月未成衣。

卷 384_120 【寒食后】

张籍

田舍清明日，家家出火迟。白衫眠古巷，红索搭高枝。
纱带生难结，铜钗重易垂。斩新衣著尽，还似去年时。

· 全唐诗 ·

卷 384_121【寒食书事二首】

张籍

今朝一百五，出户雨初晴。舞爱双飞蝶，歌闻数里莺。
江深青草岸，花满白云城。为政多孱懦，应无酷吏名。

出城烟火少，况复是今朝。闲坐将谁语，临觞只自谣。
阶前春藓遍，衣上落花飘。妓乐州人戏，使君心寂寥。

卷 384_122【和李仆射雨中寄卢、严二给事】

张籍

郊原飞雨至，城阙湿云埋。进点时穿牖，浮沤欲上阶。
偏滋解箨竹，并洒落花槐。晚润生琴匣，新凉满药斋。
从容朝务退，放旷掖曹乖。尽日无来客，闲吟感此怀。

卷 384_123【酬李仆射晚春见寄】

张籍

戟户洞初晨，莺声雨后频。虚庭清气在，众药湿光新。
鱼动芳池面，苔侵老竹身。教铺尝酒处，自问探花人。

· 全唐诗 ·

独此长多病，幽居欲过春。今朝听高韵，忽觉离埃尘。

卷 384_124 【和卢常侍寄华山郑隐者】

张籍

独住三峰下，年深学炼丹。一间松叶屋，数片石花冠。
酒待山中饮，琴将洞口弹。开门移远竹，剪草出幽兰。
荒壁通泉架，晴崖晒药坛。寄知骑省客，长向白云闲。

卷 384_125 【和令狐尚书平泉东庄近居李仆射有寄十韵】

张籍

平地有清泉，伊南古寺边。涨池闲绕屋，出野遍浇田。
旧隐离多日，新邻得几年。探幽皆一绝，选胜又双全。
门静山光别，园深竹影连。斜分采药径，直过钓鱼船。
鸡犬还应识，云霞顿觉鲜。追思应不远，赏爱谅难偏。
此处堪长往，游人早共传。各当恩寄重，归卧恐无缘。

卷 384_126 【送郑尚书出镇南海】

张籍

远镇承新命，王程不假催。班行争路送，恩赐并时来。

· 全唐诗 ·

牙旆从城展，兵符到府开。蛮声喧夜市，海色浸潮台。
画角天边月，寒关岭上梅。共知公望重，多是隔年回。

卷 384_127【徐州试反舌无声】

张籍

夏木多好鸟，偏知反舌名。林幽仍共宿，时过即无声。
竹外天空晓，谿头雨自晴。居人宜寂寞，深院益凄清。
入雾暗相失，当风闲易惊。来年上林苑，知尔最先鸣。

卷 384_128【省试行不由径】

张籍

田里有微径，贤人不复行。孰知求捷步，又恐异端成。
从易众所欲，安邪患亦生。谁能达天道，共此竞前程。
子羽有遗迹，孔门传旧声。今逢大君子，士节自光明。

卷 384_129【新城甲仗楼】

张籍

谢氏起新楼，西临城角头。图功百尺丽，藏器五兵修。

· 全唐诗 ·

结缔棖薨固，虚明户槛幽。鱼龙卷旗帜，霜雪积戈矛。
暑雨焯烝隔，凉风宴位留。地高形出没，山静气清优。
睥睨斜光彻，阑干宿霭浮。芊芊粳稻色，脉脉苑谿流。
郡化黄丞相，诗成沉隐侯。居兹良得景，殊胜岷山游。

卷 384_130 【赠殷山人】

张籍

郁郁山中客，知名四十年。恹惶身独隐，寂寞性应便。
世业公侯籍，生涯黍稷田。藤悬读书帐，竹系网鱼船。
已种千头橘，新开数脉泉。闲游摧酒远，幽语向僧偏。
入洞题松过，看花选石眠。避喧长汨没，逢胜即留连。
自古多高迹，如君少比肩。耕耘此辛苦，章句已流传。
昔日交游盛，当时省阁贤。同袍还共弊，连辔每推先。
讲序居重席，群儒愿执鞭。满堂虚左待，众目望乔迁。
才异时难用，情高道自全。畏人颜惨澹，疏物势迍邐。
贤者闻知命，吾生复礼玄。深藏报恩剑，久缉养生篇。
憔悴众夫笑，经过郡守怜。夕阳悲病鹤，霜气动饥鹑。
处士谁能荐，穷途世所捐。伯鸾甘寄食，元淑苦无钱。
策蹇秋尘里，吟诗黄叶前。故裘余白领，废瑟断朱弦。
志气终犹在，逍遥任自然。家贫念婚嫁，身老恋云烟。
放逸栖岩鹿，清虚饮露蝉。郑逃秦谷口，严爱越溪边。
霄汉予犹阻，荣枯子不牵。山城一相遇，感激意难宣。

· 全唐诗 ·

卷 384_131【夏日可畏】

张籍

赫赫温风扇，炎炎夏日徂。火威驰迥野，畏景铄遥途。
势矫翔阳翰，功分造化炉。禁城千品烛，黄道一轮孤。
落照频空簟，余晖卷夕梧。如何倦游子，中路独踟蹰。

卷 384_132【罔象得玄珠】

张籍

赤水今何处，遗珠已渺然。离娄徒肆目，罔象乃通玄。
皎洁因成性，圆明不在泉。暗中看夜色，尘外照晴田。
无胫真难掬，怀疑实易迁。今朝搜择得，应免媚晴川。

卷 384_133【和李仆射西园】

张籍

遇午归闲处，西庭敞四檐。高眠著琴枕，散帖检书签。
印在休通客，山晴好卷帘。竹凉蝇少到，藤暗蝶争潜。
晓鹊频惊喜，疏蝉不许拈。石苔生紫点，栏药吐红尖。
虚坐诗情远，幽探道侣兼。所营尚胜地，虽俭复谁嫌。

· 全唐诗 ·

卷三百八十五

卷 385_1【送裴相公赴镇太原】

张籍

盛德雄名远近知，功高先乞守藩维。衔恩暂遣分龙节，
署敕还同在凤池。天子亲临楼上送，朝官齐出道傍辞。
明年塞北清蕃落，应建生祠请立碑。

卷 385_2【寄元员外】

张籍

外郎直罢无馀事，扫洒书堂试药炉。门巷不教当要闹，
诗篇转觉足工夫。月明台上唯僧到，夜静坊中有酒沽。
朝省入频闲日少，可能同作旧游无。

· 全唐诗 ·

卷 385_3【赠梅处士】

张籍

早闻声价满京城，头白江湖放旷情。讲易自传新注义，
题诗不著旧官名。近移马迹山前住，多向牛头寺里行。
天子如今议封禅，应将束帛请先生。

卷 385_4【赠王秘书】

张籍

不曾浪出谒公侯，唯向花间水畔游。每著新衣看药灶，
多收古器在书楼。有官只作山人老，平地能开洞穴幽。
自领闲司了无事，得来君处喜相留。

卷 385_5【谢裴司空寄马】

张籍

騄耳新驹骏得名，司空远自寄书生。乍离华厩移蹄涩，
初到贫家举眼惊。每被闲人来借问，多寻古寺独骑行。
长思岁旦沙堤上，得从鸣珂傍火城。

· 全唐诗 ·

卷 385_6 【酬秘书王丞见寄】

张籍

相看头白来城阙，却忆漳溪旧往还。今体诗中偏出格，
常参官里每同班。街西借宅多临水，马上逢人亦说山。
芸阁水曹虽最冷，与君长喜得身闲。

卷 385_7 【送李馀及第后归蜀】

张籍

十年人咏好诗章，今日成名出举场。归去唯将新诰牒，
后来争取旧衣裳。山桥晓上芭蕉暗，水店晴看芋草黄。
乡里亲情相见日，一时携酒贺高堂。

卷 385_8 【早朝寄白舍人、严郎中】

张籍

鼓声初动未闻鸡，羸马街中踏冻泥。烛暗有时冲石柱，
雪深无处认沙堤。常参班里人犹少，待漏房前月欲西。
凤阙星郎离去远，閤门开日入还齐。

· 全唐诗 ·

卷 385_9【书怀寄元郎中】

张籍

转觉人间无气味，常因身外省因缘。经过独爱游山客，
计校唯求买药钱。重作学官闲尽日，一离江坞病多年。
吟君钓客词中说，便欲南归榜小船。

卷 385_10【赠道士宜师】

张籍

自到王城得几年，巴童蜀马共随缘。两朝侍从当时贵，
五字声名远处传。旧住红楼通内院，新承墨诏赐斋钱。
闲房暂喜居相近，还得陪师坐竹边。

卷 385_11【书怀寄王秘书】

张籍

白发如今欲满头，从来百事尽应休。只于触目须防病，
不拟将心更养愁。下药远求新熟酒，看山多上最高楼。
赖君同在京城住，每到花前免独游。

· 全唐诗 ·

卷 385_12【题韦郎中新亭】

张籍

起得幽亭景复新，碧莎地上更无尘。琴书著尽犹嫌少，
松竹栽多亦称贫。药酒欲开期好客，朝衣暂脱见闲身。
成名同日官连署，此处经过有几人。

卷 385_13【送扬州判官】

张籍

应得烟霞出俗心，茅山道士共追寻。闲怜鹤貌偏能画，
暗辨桐声自作琴。长啸每来松下坐，新诗堪向雪中吟。
征南幕里多宾客，君独相知最校深。

卷 385_14【喜王起侍郎放牒】

张籍

东风节气近清明，车马争来满禁城。二十八人初上牒，
百千万里尽传名。谁家不借花园看，在处多将酒器行。
共贺春司能鉴识，今年定合有公卿。

· 全唐诗 ·

卷 385_15 【赠王司马】

张籍

白笏朱衫年少时，久登班列会朝仪。贮财不省关身用，
行义唯愁被众知。藏得宝刀求主带，调成骏马乞人骑。
未曾相识多闻说，遥望长如白玉枝。

卷 385_16 【书怀】

张籍

自小信成疏懒性，人间事事总无功。别从仙客求方法，
时到僧家问苦空。老大登朝如梦里，贫穷作活似村中。
未能即便休官去，惭愧南山采药翁。

卷 385_17 【赠令狐博士】

张籍

头白新年六十馀，近闻生计转空虚。久为博士谁能识，
自到长安赁舍居。骑马出随寻寺客，呼儿散写乞钱书。
古来贤哲皆如此，应是才高与众疏。

· 全唐诗 ·

卷 385_18 【送从弟删东归】

张籍

云水东南两月程，贪归庆节马蹄轻。春桥欲醉攀花别，
野路闲吟触雨行。诗价已高犹失意，礼司曾赏会成名。
旧山风月知应好，莫向秋时不到京。

卷 385_19 【赠王秘书】

张籍

早在山东声价远，曾将顺策佐嫖姚。赋来诗句无闲语，
老去官班未在朝。身屈只闻词客说，家贫多见野僧招。
独从书阁归时晚，春水渠边看柳条。

卷 385_20 【哭丘长史】

张籍

曾是先皇殿上臣，丹砂久服不成真。常骑马在嘶空枥，
自作书留别故人。诗句遍传天下口，朝衣偏送地中身。
最悲昨日同游处，看却春风树树新。

· 全唐诗 ·

卷 385_21 【送枝江刘明府】

张籍

老著青衫为楚宰，平生志业有谁知。家僮从去愁行远，
县吏迎来怪到迟。定访玉泉幽院宿，应过碧涧早茶时。
向南渐渐云山好，一路唯闻唱竹枝。

卷 385_22 【送从弟彻东归】

张籍

缙山领印知公奏，才称同时尽不如。奉使贺成登册礼，
陪班看出降恩书。去回在路秋尘里，受诏辞归晓漏初。
早晚得为朝署拜，闲坊买宅作邻居。

卷 385_23 【哭胡十八遇】

张籍

早得声名年尚少，寻常志气出风尘。文场继续成三代，
家族辉华在一身。幼子见生才满月，选书知写未呈人。
送君帐下衣裳白，数尺坟头柏树新。

· 全唐诗 ·

卷 385_24 【赠贾岛】

张籍

篱落荒凉僮仆饥，乐游原上住多时。蹇驴放饱骑将出，
秋卷装成寄与谁。拄杖傍田寻野菜，封书乞米趁时炊。
姓名未上登科记，身屈惟应内史知。

卷 385_25 【逢王建有赠】

张籍

年状皆齐初有髭，鹄山漳水每追随。使君座下朝听易，
处士庭中夜会诗。新作句成相借问，闲求义尽共寻思。
经今三十馀年事，却说还同昨日时。

卷 385_26 【移居静安坊，答元八郎中】

张籍

长安寺里多时住，虽守卑官不苦贫。作活每常嫌费力，
移居只是贵容身。初开井浅偏宜树，渐觉街闲省踏尘。
更喜往还相去近，门前减却送书人。

· 全唐诗 ·

卷 385_27 【送杨少尹赴凤翔】

张籍

诗名往日动长安，首首人家卷里看。西学已行秦博士，
南宫新拜汉郎官。得钱只了还书铺，借宅常时事药栏。
今去岐州生计薄，移居偏近陇头寒。

卷 385_28 【送韩侍御归山】

张籍

闻君久卧在云间，为佐嫖姚未得还。新结茅庐招隐逸，
独骑骢马入深山。九灵洞口行应到，五粒松枝醉亦攀。
明日珂声出城去，家僮不复扫柴关。

卷 385_29 【新除水曹郎，答白舍人见贺】

张籍

年过五十到南宫，章句无名荷至公。黄纸开呈相府后，
朱衣引入谢班中。诸曹纵许为仙侣，群吏多嫌是老翁。
最幸紫薇郎见爱，独称官与古人同。

· 全唐诗 ·

卷 385_30【送杨少尹赴满城】

张籍

官为本府当身荣，因得还乡任野情。自废田园今作主，
每逢耆老不呼名。旧游寺里僧应识，新别桥边树已成。
公事况闲诗更好，将随相逐上山行。

卷 385_31【哭元九少府】

张籍

平生志业独相知，早结云山老去期。初作学官常共宿，
晚登朝列暂同时。闲来各数经过地，醉后齐吟唱和诗。
今日春风花满宅，入门行哭见灵帷。

卷 385_32【送侯判官赴广州从军】

张籍

年少才高求自展，将身万里赴军门。辟书远到开呈客，
公服新成著谢恩。驿舫过江分白堊，戍亭当岭见红幡。
海花蛮草连冬有，行处无家不满园。

· 全唐诗 ·

卷 385_33 【答白杭州郡楼登望画图见寄】

张籍

画得江城登望处，寄来今日到长安。乍惊物色从诗出，
更想工人下手难。将展书堂偏觉好，每来朝客尽求看。
见君向此闲吟意，肯恨当时作外官。

卷 385_34 【赠赵将军】

张籍

当年胆略已纵横，每见妖星气不平。身贵早登龙尾道，
功高自破鹿头城。寻常得对论边事，委曲承恩掌内兵。
会取安西将报国，凌烟阁上大书名。

卷 385_35 【送和蕃公主】

张籍

塞上如今无战尘，汉家公主出和亲。邑司犹属宗卿寺，
册号还同虜帐人。九姓旗幡先引路，一生衣服尽随身。
毡城南望无回日，空见沙蓬水柳春。

· 全唐诗 ·

卷 385_36 【寒食内宴二首】

张籍

朝光瑞气满宫楼，彩纛鱼龙四周稠。廊下御厨分冷食，
殿前香骑逐飞球。千官尽醉犹教坐，百戏皆呈未放休。
共喜拜恩侵夜出，金吾不敢问行由。

城阙沈沈向晓寒，恩当令节赐余欢，瑞烟深处开三殿，
春雨微时引百官，宝树楼前分绣幕，彩花廊下映华栏。
宫筵戏乐年年别，已得三回对御看。

卷 385_37 【朝日敕赐百官樱桃】

张籍

仙果人间都未有，今朝忽见下天门。捧盘小吏初宣敕，
当殿群臣共拜恩。日色遥分门下坐，露香才出禁中园。
每年重此先偏待，愿得千春奉至尊。

· 全唐诗 ·

卷 385_38 【太白老人】

张籍

日观东峰幽客住，竹巾藤带亦逢迎。暗修黄篆无人见，
深种胡麻共犬行。洞里仙家常独往，壶中灵药自为名。
春泉四面绕茅屋，日日唯闻杵臼声。

卷 385_39 【和裴司空酬满城杨少尹】

张籍

圣朝偏重大司空，人咏元和第一功。拥节高临汉水上，
题诗远入舜城中。共惊向老多年别，更忆登科旧日同。
谁不望归丞相府，江边杨柳又秋风。

卷 385_40 【寄和州刘使君】

张籍

别离已久犹为郡，闲向春风倒酒瓶。送客特过沙口堰，
看花多上水心亭。晓来江气连城白，雨后山光满郭青。
到此诗情应更远，醉中高咏有谁听。

· 全唐诗 ·

卷 385_41 【赠商州王使君】

张籍

衔命南来会郡堂，却思朝里接班行。才雄犹是山城守，
道薄初为水部郎。选胜相留开客馆，寻幽更引到僧房。
明朝从此辞君去，独出商关路渐长。

卷 385_42 【寄令狐宾客】

张籍

勋名尽得国家传，退狎琴僧与酒仙。还带郡符经几处，
暂辞台座已三年。留司未到龙楼下，拜表长怀玉案前。
秋日出城伊水好，领谁相逐上闲船。

卷 385_43 【寄梅处士】

张籍

扰扰人间是与非，官闲自觉省心机。六行班里身常下，
九列符中事亦稀。市客惯曾賒贱药，家僮惊见著新衣。
君今独得居山乐，应喜多时未办归。

· 全唐诗 ·

卷 385_44 【送施肩吾东归】

张籍

知君本是烟霞客，被荐因来城阙间。世业偏临七里濑，
仙游多在四明山。早闻诗句传人遍，新得科名到处闲。
惆怅灞亭相送去，云中琪树不同攀。

卷 385_45 【昆仑儿】

张籍

昆仑家住海中州，蛮客将来汉地游。言语解教秦吉了，
波涛初过郁林洲。金环欲落曾穿耳，螺髻长卷不裹头。
自爱肌肤黑如漆，行时半脱木绵裘。

卷 385_46 【赠李杭州】

张籍

仙郎白首未归朝，应为苍生领六条。惠化州人尽清净，
高情野鹤与逍遥。竹间虚馆无朝讼，山畔青田长夏苗。
终日政声长独坐，开门长望浙江潮。

· 全唐诗 ·

卷 385_47 【送郑尚书赴广州】

张籍

圣朝选将持符节，内使宣时百辟听。海北蛮夷来舞蹈，
岭南封管送图经。白鹇飞绕迎官舫，红槿开当宴客亭。
此处莫言多瘴疠，天边看取老人星。

卷 385_48 【贺秘书王丞南郊摄将军】

张籍

正初天子亲郊礼，诏摄将军领卫兵。斜带银刀入黄道，
先随玉辂到青城。坛边不在千官位，仗外唯闻再拜声。
共喜与君逢此日，病中无计得随行。

卷 385_49 【送令狐尚书赴东都留守】

张籍

朝廷重寄在关东，共说从前选上公。勋业新城大梁镇，
恩荣更守洛阳宫。行香暂出天桥上，巡礼常过禁殿中。
每领群臣拜章庆，半开门仗日曈曈。

· 全唐诗 ·

卷 385_50 【拜丰陵】

张籍

岁朝园寝遣公卿，学省班中亦摄行。身逐陵官齐再拜，
手持木铎叩三声。寒更报点来山殿，晓炬分行照柏城。
却下龙门看渐远，金峰高处日微明。

卷 385_51 【赠孔尚书】

张籍

能将直道历荣班，事著元和实录间。三表自陈辞北阙，
一家相送入南山。买来侍女教人嫁，赐得朝衣在篋闲。
宅近青山高静处，时归林下暂开关。

卷 385_52 【酬杭州白使君，兼寄浙东元大夫】

张籍

相印暂离临远镇，掖垣出守复同时。一行已作三年别，
两处空传七字诗。越地江山应共见，秦天风月不相知。
人间聚散真难料，莫叹平生信所之。

· 全唐诗 ·

卷 385_53【寄苏州白二十二使君】

张籍

三朝出入紫微臣，头白金章未在身。登第早年同座主，
题诗今日是州人。阊门柳色烟中远，茂苑莺声雨后新。
此处吟诗向山寺，知君忘却曲江春。

卷 385_54【送白宾客分司东都】

张籍

赫赫声名三十春，高情人独出埃尘。病辞省闼归闲地，
恩许宫曹作上宾。诗里难同相得伴，酒边多见自由身。
老人也拟休官去，便是君家池上人。

卷 385_55【赠阎少保】

张籍

辞荣恋阙未还乡，修养年多气力强。半俸归烧伏火药，
全家解说养生方。特承恩诏新开戟，每见公卿不下床。
竹树晴深寒院静，长悬石磬在虚廊。

· 全唐诗 ·

卷 385_56 【赠别王侍御赴任陕州司马】

张籍

京城在处闲人少，唯共君行并马蹄。更和诗篇名最出，
时倾杯酒户常齐。同趋阙下听钟漏，独向军前闻鼓鼙。
今日春明门外别，更无因得到街西。

卷 385_57 【田司空入朝】

张籍

西来将相位兼雄，不与诸君覲礼同。早变山东知顺命，
新收济上立殊功。朝官叙谒趋门外，恩使喧迎满路中。
阊阖晓开铜漏静，身当受册大明宫。

卷 385_58 【送浙西周判官】

张籍

由来自是烟霞客，早已闻名诗酒间。天阙因将贺表到，
家乡新著赐衣还。常吟卷里新酬句，自话湖中旧住山。
吴越主人偏爱重，多应不肯放君闲。

· 全唐诗 ·

卷 385_59【送吴炼师归王屋】

张籍

玉阳峰下学长生，玉洞仙中已有名。独戴熊须冠暂出，
唯将鹤尾扇同行。炼成云母休炊爨，已得雷公当吏兵。
却到瑶坛上头宿，应闻空里步虚声。

卷 385_60【送邵州林使君】

张籍

词客南行宠命新，潇湘郡入曲江津。山幽自足探微处，
俗朴应无争竞人。郭外相连排殿阁，市中多半用金银。
知君不作家私计，迁日还同到日贫。

卷 385_61【寄王六侍御】

张籍

渐觉近来筋力少，难堪今日在风尘。谁能借问功名事，
只自扶持老病身。贵得药资将助道，肯嫌家计不如人。
洞庭已置新居处，归去安期与作邻。

· 全唐诗 ·

卷 385_62【送稽亭山寺僧】

张籍

师住稽亭高处寺，斜廊曲阁倚云开。山门十里松间入，
泉涧三重洞里来。名岳寻游今已遍，家城礼谒便应回。
旧房到日闲吟后，林下还登说法台。

卷 385_63【送汀州源使君】

张籍

曾成赵北归朝计，因拜王门最好官。为郡暂辞双凤阙，
全家远过九龙滩。山乡只有输蕉户，水镇应多养鸭栏。
地僻寻常来客少，刺桐花发共谁看。

卷 385_64【寄孙洛阳格】

张籍

久持刑宪声名远，好是中朝正直臣。赤县上来应足事，
青山老去未离身。常思从省连归马，乍觉同班少旧人。
遥爱南桥秋日晚，雨边杨柳映天津。

· 全唐诗 ·

卷 385_65【胡山人归王屋，因有赠】

张籍

转转无成到白头，人间举眼尽堪愁。此生已是蹉跎去，
每事应从卤莽休。虽作闲官少拘束，难逢胜景可淹留。
君归与访移家处，若个峰头最较幽。

卷 385_66【寄虔州韩使君】

张籍

南康太守负才豪，五十如今未拥旄。早得一人知姓字，
常闻三事说功劳。月明渡口漳江静，云散城头赣石高。
郡政已成秋思远，闲吟应不问官曹。

卷 385_67【送从弟濛赴饶州】

张籍

京城南去鄱阳远，风月悠悠别思劳。三领郡符新寄重，
再登科第旧名高。去程江上多看堠，迎吏船中亦带刀。
到日更行清静化，春田应不见蓬蒿。

· 全唐诗 ·

卷 385_68【罗道士】

张籍

城里无人得实年，衣襟常带臭黄烟。楼中赊酒唯留药，
洞里争棋不赌钱。闻客语声知贵贱，持花歌咏似狂颠。
寻常行处皆逢见，世上多疑是谪仙。

卷 385_69【寄陆浑赵明府】

张籍

与君学省同官处，常日相随说道情。新作陆浑山县长，
早知三礼甲科名。郭中时有仙人住，城内应多药草生。
公事稀疏来客少，无妨著屐独闲行。

卷 385_70【同将作韦二少监赠水部李郎中】

张籍

旧年同是水曹郎，各罢鱼符自楚乡。重著青衫承诏命，
齐趋紫殿异班行。别来同说经过事，老去相传补养方。
忆得当时亦连步，如今独在读书堂。

· 全唐诗 ·

卷 385_71 【赠王侍御】

张籍

心同野鹤与尘远，诗似冰壶见底清。府县同趋昨日事，
升沉不改故人情。上阳春晚萧萧雨，洛水寒来夜夜声。
自叹独为折腰吏，可怜骢马路傍行。

卷 385_72 【送金少卿副使归新罗】

张籍

云岛茫茫天畔微，向东万里一帆飞。久为侍子承恩重，
今佐使臣衔命归。通海便应将国信，到家犹自著朝衣。
从前此去人无数，光彩如君定是稀。

卷 385_73 【送李司空赴镇襄阳】

张籍

中外兼权社稷臣，千官齐出拜行尘。再调公鼎勋庸盛，
三受兵符宠命新。商路雪开旗旆展，楚堤梅发驿亭春。
襄阳风景由来好，重与江山作主人。

· 全唐诗 ·

卷 385_74【送李仆射愬赴镇凤翔】

张籍

由来勋业属英雄，兄弟连营列位同。先入贼城擒首恶，
尽封笕库让元公。旌幢独继家声外，竹帛新添国史中。
天子新收秦陇地，故教移镇古扶风。

卷 385_75【寄白二十二舍人】

张籍

早知内诏过先辈，蹭蹬江南百事疏。湓浦城中为上佐，
炉峰寺后著幽居。偏依仙法多求药，长共僧游不读书。
三省比来名望重，肯容君去乐樵渔。

卷 385_76【送友人卢处士游吴越】

张籍

羨君东去见残梅，惟有王孙独未回。吴苑夕阳明古堞，
越宫春草上高台。波生野水雁初下，风满驿楼潮欲来。
试问渔舟看雪浪，几多江燕荇花开。

· 全唐诗 ·

卷 385_77【苏州江岸留别乐天】

张籍

银泥裙映锦障泥，画舸停桡马簇蹄。清管曲终鹦鹉语，
红旗影动薄寒嘶。渐消酒色朱颜浅，欲话离情翠黛低。
莫忘使君吟咏处，女坟湖北武丘西。

卷 385_78【寒食看花】

张籍

早入公门到夜归，不因寒食少闲时。颠狂绕树猿离锁，
踊跃缘冈马断羁。酒污衣裳从客笑，醉饶言语觅花知。
老来自喜常无事，仰面西园得咏诗。

卷 385_79【酬浙东元尚书见寄绫素】

张籍

越地缁纱纹样新，远封来寄学曹人。便令裁制为时服，
顿觉光荣上病身。应念此官同弃置，独能相贺更殷勤。
三千里外无由见，海上东风又一春。

· 全唐诗 ·

卷 385_80【赠项斯】

张籍

端坐吟诗忘忍饥，万人中觅似君稀。门连野水风长到，
驴放秋原夜不归。日暖剩收新落叶，天寒更著旧生衣。
曲江亭上频频见，为爱鸬鹚雨里飞。

· 全唐诗 ·

卷三百八十六

卷 386_1 【和韦开州盛山十二首·宿云亭】

张籍

清净当深处，虚明向远开。卷帘无俗客，应只见云来。

卷 386_2 【和韦开州盛山十二首·梅溪】

张籍

自爱新梅好，行寻一径斜。不教人扫石，恐损落来花。

卷 386_3 【和韦开州盛山十二首·茶岭】

张籍

紫芽连白蕊，初向岭头生。自看家人摘，寻常触露行。

· 全唐诗 ·

卷 386_4【和韦开州盛山十二首·流杯渠】

张籍

渌酒白螺杯，随流去复回。似知人把处，各向面前来。

卷 386_5【和韦开州盛山十二首·盘石磴】

张籍

垒石盘空远，层层势不危。不知行几匝，得到上头时。

卷 386_6【和韦开州盛山十二首·桃坞】

张籍

春坞桃花发，多将野客游。日西殊未散，看望酒缸头。

卷 386_7【和韦开州盛山十二首·竹岩】

张籍

独入千竿里，缘岩踏石层。笋头齐欲出，更不许人登。

· 全唐诗 ·

卷 386_8【和韦开州盛山十二首·琵琶台】

张籍

台上绿萝春，闲登不待人。每当休暇日，著履戴纱巾。

卷 386_9【胡芦沼】

张籍

曲沼春流满，新蒲映野鹅。闲斋朝饭后，拄杖绕行多。

卷 386_10【隐月岫】

张籍

月出深峰里，清凉夜亦寒。每嫌西落疾，不得到明看。

卷 386_11【绣衣石榻】

张籍

山城无别味，药草兼鱼果。时到绣衣人，同来石上坐。

· 全唐诗 ·

卷 386_12 【上士泉瓶】

张籍

阶上一眼泉，四边青石甃。唯有护净僧，添瓶将盥漱。

卷 386_13 【送远客】

张籍

憔悴远归客，殷勤欲别杯。九星坛下路，几日见重来。

卷 386_14 【寄西峰僧】

张籍

松暗水涓涓，夜凉人未眠。西峰月犹在，遥忆草堂前。

卷 386_15 【禅师】

张籍

独在西峰顶，年年闭石房。定中无弟子，人到为焚香。

· 全唐诗 ·

卷 386_16 【惜花】

张籍

山中春已晚，处处见花稀。明日来应尽，林间宿不归。

卷 386_17 【题晖师影堂】

张籍

日早欲参禅，竟无相识缘。道场今独到，惆怅影堂前。

卷 386_18 【泾州塞】

张籍

行到泾州塞，唯闻羌戍鼙。道边古双堠，犹记向安西。

卷 386_19 【野田】

张籍

漠漠野田草，草中牛羊道。古墓无子孙，白杨不得老。

· 全唐诗 ·

卷 386_20 【岸花】

张籍

可怜岸边树，红蕊发青条。东风吹渡水，冲着木兰桡。

卷 386_21 【别于鹄】

张籍

离灯及晨辉，行人起复思。出门两相顾，青山路逶迤。

卷 386_22 【送蜀客】

张籍

蜀客南行祭碧鸡，木绵花发锦江西。
山桥日晚行人少，时见猩猩树上啼。

卷 386_23 【送元结】

张籍

昔日同游漳水边，如今重说恨绵绵。

· 全唐诗 ·

天涯相见还离别，客路秋风又几年。

卷 386_24 【宿山祠】

张籍

秋草宫人斜里墓，宫人谁送葬来时。
千千万万皆如此，家在边城亦不知。

卷 386_25 【美人宫棋】

张籍

红烛台前出翠娥，海沙铺局巧相和。
趁行移手巡收尽，数数看谁得最多。

卷 386_26 【蛮州】

张籍

瘴水蛮中入洞流，人家多住竹棚头。
一山海上无城郭，唯见松牌记象州。

· 全唐诗 ·

卷 386_27【送元宗简】

张籍

貂帽垂肩窄皂裘，雪深骑马向西州。

暂时相见还相送，却闭闲门依旧愁。

卷 386_28【寄徐晦】

张籍

鄠陂鱼美酒偏浓，不出琴斋见雪峰。

应胜昨来趋府日，簿书床上乱重重。

卷 386_29【寄白学士】

张籍

自掌天书见客稀，纵因休沐锁双扉。

几回扶病欲相访，知向禁中归未归。

· 全唐诗 ·

卷 386_30 【喜王六同宿】

张籍

十八年来恨别离，唯同一宿咏新诗。

更相借问诗中语，共说如今胜旧时。

卷 386_31 【题玉像堂】

张籍

玉毫不着世间尘，辉相分明十八身。

入夜无烟灯更好，堂中唯有转经人。

卷 386_32 【与贾岛闲游】

张籍

水北原南草色新，雪消风暖不生尘。

城中车马应无数，能解闲行有几人。

· 全唐诗 ·

卷 386_33 【哭丘长史】

张籍

丘公已歿故人稀，欲过街西更访谁。

每到子城东路上，忆君相逐入朝时。

卷 386_34 【哭孟寂】

张籍

曲江院里题名处，十九人中最少年。

今日春光君不见，杏花零落寺门前。

卷 386_35 【患眼】

张籍

三年患眼今年校，免与风光便隔生。

昨日韩家后园里，看花犹似未分明。

· 全唐诗 ·

卷 386_36 【答刘竞】

张籍

刘君久被时抛掷，老向城中作选人。

昨日街西相近住，每来存问老夫身。

卷 386_37 【赠华严院僧】

张籍

一身依止荒闲院，烛耀窗中有宿烟。

遍礼华严经里字，不曾行到寺门前。

卷 386_38 【逢故人】

张籍

山东一十馀年别，今日相逢在上都。

说尽向来无限事，相看摩捋白髭须。

· 全唐诗 ·

卷 386_39【送萧远弟】

张籍

街北槐花傍马垂，病身相送出门迟。

与君别后秋风夜，作得新诗说向谁。

卷 386_40【送辛少府任乐安】

张籍

才多不肯浪容身，老大诗章转更新。

选得天台山下住，一家全作学仙人。

卷 386_41【赠任道人】

张籍

长安多病无生计，药铺医人乱索钱。

欲得定知身上事，凭君为算小行年。

· 全唐诗 ·

卷 386_42 【招周居士】

张籍

闭门秋雨湿墙莎，俗客来稀野思多。

已扫书斋安药灶，山人作意早经过。

卷 386_43 【送许处士】

张籍

高情自与俗人疏，独向蓝溪选僻居。

会到白云长取醉，不能窗下读闲书。

卷 386_44 【送律师归婺州】

张籍

京中开讲已多时，曾作坛头证戒师。

归到双溪桥北寺，乡僧争就学威仪。

· 全唐诗 ·

卷 386_45 【题杨秘书新居】

张籍

爱闲不向争名地，宅在街西最静坊。

卷里诗过一千首，白头新受秘书郎。

卷 386_46 【送晔师】

张籍

九星台下煎茶别，五老峰头觅寺居。

作得新诗旋相寄，人来请莫达空书。

卷 386_47 【送僧往金州】

张籍

闻道谿阴山水好，师行一一遍经过。

事须觅取堪居处，若个溪头药最多。

· 全唐诗 ·

卷 386_48 【寻徐道士】

张籍

寻师远到暉天观，竹院森森闭药房。

闻入静来经七日，仙童檐下独焚香。

卷 386_49 【答开州韦使君寄车前子】

张籍

开州午日车前子，作药人皆道有神。

惭愧使君怜病眼，三千余里寄闲人。

卷 386_50 【忆故州】

张籍

垒石为山伴野夫，自收灵药读仙书。

如今身是他州客，每见青山忆旧居。

· 全唐诗 ·

卷 386_51 【送客游蜀】

张籍

行尽青山到益州，锦城楼下二江流。

杜家曾向此中住，为到浣花溪水头。

卷 386_52 【送陆畅】

张籍

共踏长安街里尘，吴州独作未归身。

昔年旧宅今谁住，君过西塘与问人。

卷 386_53 【感春】

张籍

远客悠悠任病身，谢家池上又逢春。

明年各自东西去，此地看花是别人。

· 全唐诗 ·

卷 386_54 【赠李司议】

张籍

汉庭谁问投荒客，十载天南着白衣。

秋草茫茫恶谿路，岭头遥送北人稀。

卷 386_55 【别客】

张籍

青山历历水悠悠，今日相逢明日秋。

系马城边杨柳树，为君沽酒暂淹留。

卷 386_56 【登楼寄胡家兄弟】

张籍

独上西楼尽日闲，林烟演漾鸟蛮蛮。

谢家兄弟重城里，不得同看雨后山。

· 全唐诗 ·

卷 386_57【答刘明府】

张籍

身病多时又客居，满城亲旧尽相疏。

可怜绛县刘明府，犹解频频寄远书。

卷 386_58【酬藤杖】

张籍

病里出门行步迟，喜君相赠古藤枝。

倚来自觉身生力，每向傍人说得时。

卷 386_59【法雄寺东楼】

张籍

汾阳旧宅今为寺，犹有当时歌舞楼。

四十年来车马绝，古槐深巷暮蝉愁。

· 全唐诗 ·

卷 386_60【寄故人】

张籍

静曲闲房病客居，蝉声满树槿花疏。

故人只在蓝田县，强半年来未得书。

卷 386_61【邻妇哭征夫】

张籍

双鬟初合便分离，万里征夫不得随。

今日军回身独殁，去时鞍马别人骑。

卷 386_62【和崔驸马闻蝉】

张籍

凤凰楼下多欢乐，不觉秋风暮雨天。

应为昨来身暂病，蝉声得到耳旁边。

· 全唐诗 ·

卷 386_63 【和裴仆射看櫻桃花】

张籍

昨日南园新雨后，櫻桃花发旧枝柯。

天明不待人同看，绕树重重履迹多。

卷 386_64 【和长安郭明府与友人县中会饮】

张籍

一尊清酒两人同，好在街西水县中。

自恨病身相去远，此时闲坐对秋风。

卷 386_65 【唐昌观看花】

张籍

新红旧紫不相宜，看觉从前两月迟。

更向同来诗客道，明年到此莫过时。

· 全唐诗 ·

卷 386_66【九华观看花】

张籍

街西无数闲游处，不似九华仙观中。

花里可怜池上景，几重墙壁贮春风。

卷 386_67【赠姚合】

张籍

丹凤城门向晓开，千官相次入朝来。

唯君独走冲尘土，下马桥边报直回。

卷 386_68【同韦员外开元观寻时道士】

张籍

观里初晴竹树凉，闲行共到最高房。

昨来官罢无生计，欲就师求断谷方。

· 全唐诗 ·

卷 386_69 【同韩侍御南溪夜赏】

张籍

喜作闲人得出城，南溪两月逐君行。

忽闻新命须归去，一夜船中语到明。

卷 386_70 【使行望悟真寺】

张籍

采玉峰连佛寺幽，高高斜对驿门楼。

无端来去骑官马，寸步教身不得游。

卷 386_71 【重阳日至峡道】

张籍

无限青山行已尽，回看忽觉远离家。

逢高欲饮重阳酒，山菊今朝未有花。

· 全唐诗 ·

卷 386_72 【赠主客刘郎中】

张籍

忆昔君登南省日，老夫犹是褐衣身。

谁知二十余年后，来作客曹相替人。

卷 386_73 【同严给事闻唐昌观玉蕊近有仙过，因成绝句二首】

张籍

千枝花里玉尘飞，阿母宫中见亦稀。
应共诸仙斗百草，独来偷得一枝归。

九色云中紫凤车，寻仙来到洞仙家。
飞轮回处无踪迹，唯有斑斑满地花。

卷 386_74 【秋思】

张籍

洛阳城里见秋风，欲作归书意万重。
忽恐匆匆说不尽，行人临发又开封。

· 全唐诗 ·

卷 386_75 【忆远】

张籍

行人犹未有归期，万里初程日暮时。

唯爱门前双柳树，枝枝叶叶不相离。

卷 386_76 【玉仙馆】

张籍

长溪新雨色如泥，野水阴云尽向西。

楚客天南行渐远，山山树里鹧鸪啼。

卷 386_77 【寄府吏】

张籍

野外寻花共作期，今朝出郭不相随。

待君公事有闲日，此地春风应过时。

· 全唐诗 ·

卷 386_78【弟萧远雪夜同宿】

张籍

数卷新游蜀客诗，长安僻巷得相随。
草堂雪夜携琴宿，说是青城馆里时。

卷 386_79【凉州词三首】

张籍

边城暮雨雁飞低，芦笋初生渐欲齐。
无数铃声遥过碛，应驮白练到安西。
古镇城门白碛开，胡兵往往傍沙堆。

巡边使客行应早，欲问平安无使来。
凤林关里水东流，白草黄榆六十秋。
边将皆承主恩泽，无人解道取凉州。

卷 386_80【宫词】

张籍

新鹰初放兔犹肥，白日君王在内稀。

· 全唐诗 ·

薄暮千门临欲锁，红妆飞骑向前归。
黄金捍拨紫檀槽，弦索初张调更高。
尽理昨来新上曲，内官帘外送樱桃。

卷 386_81【华清宫】

张籍

温泉流入汉离宫，宫树行行浴殿空。
武帝时人今欲尽，青山空闭御墙中。

卷 386_82【崔驸马养鹤】

张籍

身闲无事称高情，已有人间章句名。
求得鹤来教翦翅，望仙台下亦将行。

卷 386_83【闲游】

张籍

老身不计人间事，野寺秋晴每独过。
病眼校来犹断酒，却嫌行处菊花多。

· 全唐诗 ·

卷 386_84 【刘兵曹赠酒】

张籍

一瓶颜色似甘泉，闲向新栽小竹前。

饮罢身中更无事，移床独就夕阳眠。

卷 386_85 【送梧州王使君】

张籍

楚江亭上秋风起，看发苍梧太守船。

千里同行从此别，相逢又隔几多年。

卷 386_86 【春日早朝】

张籍

晓陌春寒朝骑来，瑞云深处见楼台。

夜来新雨沙堤湿，东上閤门应未开。

· 全唐诗 ·

卷 386_87【寄朱、阡二山人】

张籍

为个朝章束此身，眼看东路去无因。

历阳旧客今应少，转忆邻家二老人。

卷 386_88【寄李渤】

张籍

五度溪头踯躅红，嵩阳寺里讲时钟。

春山处处行应好，一月看花到几峰。

卷 386_89【寻仙】

张籍

溪头一径入青崖，处处仙居隔杏花。

更见峰西幽客说，云中犹有两三家。

· 全唐诗 ·

卷 386_90 【同白侍郎杏园赠刘郎中】

张籍

一去潇湘头欲白，今朝始见杏花春。

从来迁客应无数，重到花前有几入。

卷 386_91 【答鄱阳客药名诗】

张籍

江皋岁暮相逢地，黄叶霜前半夏枝。

子夜吟诗向松桂，心中万事喜君知。

卷 386_92 【寄宋景】

张籍

诏发官兵取乱臣，将军弓箭不离身。

今君独在征东府，莫遣功名属别人。

· 全唐诗 ·

卷 386_93【寄王侍御】

张籍

爱君紫阁峰前好，新作书堂药灶成。

见欲移居相近住，有田多与种黄精。

卷 386_94【题渭北寺上方】

张籍

昔祭郊坛今谒陵，寺中高处最来登。

十余年后人多别，喜见当时转读僧。

卷 386_95【闲游】

张籍

终日不离尘土间，若为能见此身闲。

今朝暂共游僧语，更恨趋时别旧山。

· 全唐诗 ·

卷 386_96 【倡女词】

张籍

轻鬟丛梳阔扫眉，为嫌风日下楼稀。

画罗金缕难相称，故著寻常淡薄衣。

卷 386_97 【答元八遗纱帽】

张籍

黑纱方帽君边得，称对山前坐竹床。

唯恐被人偷剪样，不曾闲戴出书堂。

卷 386_98 【题僧院】

张籍

闻师行讲青龙疏，本寺住来多少年。

静扫空房唯独坐，千茎秋竹在檐前。

· 全唐诗 ·

卷 386_99【送元八】

张籍

百神斋祭相随遍，寻竹看山亦共行。

明日城西送君去，旧游重到独题名。

卷 386_100【吴楚歌词】

张籍

庭前春鸟啄林声，红夹罗襦缝未成。

今朝社日停针线，起向朱樱树下行。

卷 386_101【题方睦上人月台观】

张籍

一身清净无童子，独坐空堂得几年。

每夜焚香通月观，可怜光影最团圆。

· 全唐诗 ·

卷 386_102 【华山庙】

张籍

金天庙下西京道，巫女纷纷走似烟。

手把纸钱迎过客，遣求恩福到神前。

卷 386_103 【病中酬元宗简】

张籍

东风渐暖满城春，独占幽居养病身。

莫说樱桃花已发，今年不作看花人。

卷 386_104 【寺宿斋】

张籍

晚到金光门外寺，寺中新竹隔帘多。

斋官禁与僧相见，院院开门不得过。

· 全唐诗 ·

卷 386_105【赠施肩吾】

张籍

世间渐觉无多事，虽有空名未著身。

合取药成相待吃，不须先作上天人。

卷 386_106【赠王建】

张籍

白君去后交游少，东野亡来箠笥贫。

赖有白头王建在，眼前犹见咏诗人。

卷 386_107【逢贾岛】

张籍

僧房逢着款冬花，出寺行吟日已斜。

十二街中春雪遍，马蹄今去入谁家。

· 全唐诗 ·

卷 386_108 【山中酬人】

张籍

山中日暖春鸠鸣，逐水看花任意行。
向晚归来石窗下，菖蒲叶上见题名。

卷 386_109 【弱柏院僧影堂】

张籍

弱柏倒垂如线蔓，檐头不见有枝柯。
影堂香火长相继，应得人来礼拜多。

卷 386_110 【题故僧影堂】

张籍

香消云锁旧僧家，僧刹残形半壁斜。
日暮松烟寒漠漠，秋风吹破纸莲花。

· 全唐诗 ·

卷 386_111【无题】

张籍

桃溪柳陌好经过，灯下妆成月下歌。

为是襄王故宫地，至今犹有细腰多。

卷 386_112【山禽】

张籍

山禽毛如白练带，栖我庭前栗树枝。

猕猴半夜来取栗，一双中林向月飞。

卷 386_113【秋山】

张籍

秋山无云复无风，溪头看月出深松。

草堂不闭石床静，叶间坠露声重重。

· 全唐诗 ·

卷 386_114 【玉真观】

张籍

台殿曾为贵主家，春风吹尽竹窗纱。

院中仙女修香火，不许闲人入看花。

卷 386_115 【蛮中】

张籍

铜柱南边毒草春，行人几日到金麟。

玉钏穿耳谁家女，自抱琵琶迎海神。

卷 386_116 【赠道士】

张籍

茅山近别剡溪逢，玉节青旄十二重。

自说年年上天去，罗浮最近海边峰。

· 全唐诗 ·

卷 386_117【重平驿作】

张籍

茫茫菰草平如地，渺渺长堤曲似城。

日暮未知投宿处，逢人更问向前程。

卷 386_118【宿天竺寺，寄灵隐寺僧】

张籍

夜向灵溪息此身，风泉竹露净衣尘。

月明石上堪同宿，那作山南山北人。

卷 386_119【酬朱庆余】

张籍

越女新妆出镜心，自知明艳更沉吟。

齐纨未是人间贵，一曲菱歌敌万金。

· 全唐诗 ·

卷 386_120【寒食忆归】

张籍

京中曹局无多事，寒食贫儿要在家。

遮莫杏园胜别处，亦须归看傍村花。

卷 386_121【寒食】

张籍

绿杨枝上五丝绳，枝弱春多欲不胜。

唯有一年寒食日，女郎相唤摆阶{ 。

卷 386_122【赋花】

张籍

花，花。落早，开迟。对酒客，兴诗家。能回游骑，
每驻行车。宛宛清风起，茸茸丽日斜。且愿相留欢洽，
惟愁虚弃光华。明年攀折知不远，对此谁能更叹嗟。

· 全唐诗 ·

卷 386_123【句】

张籍

韩公国大贤，道德赫已闻。时出为阳山，尔区来趋奔。
韩官迁掾曹，子随至荆门。韩入为博士，崎岖送归轮。

· 全唐诗 ·

卷三百八十七

卷 387_1【月蚀诗】

卢仝

新天子即位五年，岁次庚寅，斗柄插子，律调黄钟。
森森万木夜僵立，寒气赑屃顽无风。烂银盘从海底出，
出来照我草屋东。天色绀滑凝不流，冰光交贯寒瞳瞳。
初疑白莲花，浮出龙王宫。八月十五夜，比并不可双。
此时怪事发，有物吞食来。轮如壮士斧斫坏，
桂似雪山风拉摧。百炼镜，照见胆，平地埋寒灰。
火龙珠，飞出脑，却入蚌蛤胎。摧环破壁眼看尽，
当天一搭如煤炰。磨踪灭迹须臾间，便似万古不可开。
不料至神物，有此大狼狈。星如撒沙出，争头事光大。
奴婢炷暗灯，掩茭如玳瑁。今夜吐焰长如虹，
孔隙千道射户外。玉川子，涕泗下，中庭独自行。
念此日月者，太阴太阳精。皇天要识物，日月乃化生。
走天汲汲劳四体，与天作眼行光明。此眼不自保，
天公行道何由行。吾见阴阳家有说，望日蚀月月光灭，
朔月掩日日光缺。两眼不相攻，此说吾不容。
又孔子师老子云，五色令人目盲。吾恐天似人，

· 全唐诗 ·

好色即丧明。幸且非春时，万物不娇荣。青山破瓦色，
绿水冰峥嵘。花枯无女艳，鸟死沉歌声。顽冬何所好，
偏使一目盲。传闻古老说，蚀月虾蟆精。径圆千里入汝腹，
汝此痴骸阿谁生。可从海窟来，便解缘青冥。
恐是睚眦间，掩塞所化成。黄帝有二目，帝舜重瞳明。
二帝悬四目，四海生光辉。吾不遇二帝，混沌不可知。
何故瞳子上，坐受虫豸欺。长嗟白兔捣灵药，
恰似有意防奸非。药成满臼不中度，委任白兔夫何为。
忆昔尧为天，十日烧九州。金烁水银流，玉燭丹砂焦。
六合烘为窑，尧心增百忧。帝见尧心忧，
勃然发怒决洪流。立拟沃杀九日妖，天高日走沃不及，
但见万国赤子^u々生鱼头。此时九御导九日，
争持节幡麾幢旒。驾车六九五十四头蛟螭虬，
掣电九火辔。汝若蚀开齟齬轮，御辔执索相爬钩，
推荡轰匐入汝喉。红鳞焰鸟烧口快，翎鬣倒侧声飀飀。
撑肠拄肚礧傀如山丘，自可饱死更不偷。不独填饥坑，
亦解尧心忧。恨汝时当食，藏头撮脑不肯食。不当食，
张唇哆觜食不休。食天之眼养逆命，安得上帝请汝刘。
呜呼，人养虎，被虎啖。天媚蟆，被蟆瞎。乃知恩非类，
一一自作孽。吾见患眼人，必索良工诀。想天不异人，
爱眼固应一。安得常娥氏，来习扁鹊术。手操春喉戈，
去此睛上物。其初犹朦胧，既久如抹漆。但恐功业成，
便此不吐出。玉川子又涕泗下，心祷再拜额榻砂土中，
地上虬虱臣全告愬帝天皇。臣心有铁一寸，可割妖蟆痴肠。
上天不为臣立梯磴，臣血肉身，无由飞上天，扬天光。
封词付与小心风，飀排闥阖入紫宫。密迩玉几前攀坼，
奏上臣全顽愚胸。敢死横干天，代天谋其长。东方苍龙角，

· 全唐诗 ·

插戟尾捩风。当心开明堂。统领三百六十鳞虫，
坐理东方宫。月蚀不救援，安用东方龙。南方火鸟赤泼血，
项长尾短飞跋扈，头戴井冠高逵枿。月蚀鸟宫十三度，
鸟为居停主人不觉察，贪向何人家。行赤口毒舌，
毒虫头上吃却月，不啄杀。虚眨鬼眼明，鸟罪不可雪。
西方攫虎立踟蹰，斧为牙，凿为齿。偷牺牲，食封豕。
大蟆一脔，固当软美。见似不见，是何道理。
爪牙根天不念天，天若准拟错准拟。北方寒龟被蛇缚，
藏头入壳如入狱。蛇筋束紧束破壳，寒龟夏鳖一种味。
且当以其肉充臄，死壳没信处，唯堪支床脚，
不堪钻灼与天卜。岁星主福德，官爵奉董秦。忍使黔娄生，
覆尸无衣巾。天失眠不吊，岁星胡其仁。荧惑矧铄翁，
执法大不中。月明无罪过，不纠蚀月虫。年年十月朝太微。
支卢谪罚何灾凶。土星与土性相背，反养福德生祸害。
到人头上死破败，今夜月蚀安可会。太白真将军，
怒激锋铓生。恒州阵斩郾定进，项骨脆甚春蔓菁。
天唯两眼失一眼，将军何处行天兵。辰星任廷尉，
天律自主持。人命在盆底，固应乐见天盲时。天若不肯信，
试唤皋陶鬼一问。一如今日，三台文昌宫，作上天纪纲。
环天二十八宿，磊磊尚书郎。整顿排班行，剑握他人将。
一四太阳侧，一四天市傍。操斧代大匠，两手不怕伤。
弧矢引满反射人，天狼呀啄明煌煌。痴牛与驂女，
不肯勤农桑。徒劳含淫思，旦夕遥相望。蚩尤簸旗弄旬朔，
始捶天鼓鸣琅琅。枉矢能蛇行，眊目森森张。天狗下舐地，
血流何滂滂。谲险万万党，架构何可当。眯目衅成就，
害我光明王。请留北斗一星相北极，指麾万国悬中央。
此外尽扫除，堆积如山冈，赎我父母光。当时常星没，

· 全唐诗 ·

殒雨如进浆。似天会事发，叱喝诛奸强。何故中道废，
自遗今日殃。善善又恶恶，郭公所以亡。愿天神圣心，
无信他人忠。玉川子词讫，风色紧格格。近月黑暗边，
有似动剑戟。须臾痴蟆精，两吻自决坼。初露半个璧，
渐吐满轮魄。众星尽原赦，一蟆独诛磔。腹肚忽脱落，
依旧挂穹碧。光彩未苏来，惨澹一片白。奈何万里光，
受此吞吐厄。再得见天眼，感荷天地力。或问玉川子，
孔子修春秋。二百四十年，月蚀尽不收。今子咄咄词，
颇合孔意不。玉川子笑答，或请听逗留。孔子父母鲁，
讳鲁不讳周。书外书大恶，故月蚀不见收。予命唐天，
口食唐土。唐礼过三，唐乐过五。小犹不说，大不可数。
灾沴无有小大愈，安得引衰周，研核其可否。日分昼，月
分夜，辨寒暑。一主刑，二主德，政乃举。孰为人面上，
一目偏可去。愿天完两目，照下万方士，万古更不瞽，万
万古，更不瞽，照万古。

卷 387_2【哭玉碑子】

卢仝

山有洞左峡，拾得玉碑子。其长一周尺，其阔一药匕。
颜色九秋天，棱角四面起。轻敲吐寒流。清悲动神鬼。
稽首置手中，只似一片水。至文反无文，上帝应有以。
予疑仙石灵，愿以仙人比。心期香汤洗，归送篆堂里。
颇奈穷相驴，行动如跛鳖。十里五里行，百蹶复千蹶。
颜子不少夭，玉碑中路折。横文寻龟兆，直理任瓦裂。

· 全唐诗 ·

劈竹不可合，破坏永离别。向人如有情，似痛滴无血。
勘斗平地上，罅坼多啮缺。百见百伤心，不堪再提挈。
怪哉坚贞姿，忽脆不坚固。矧曰人间人，安能保常度。
敢问生物成，败为有真素。为禀灵异气，不得受秽污。
驴罪真不厚，驴生亦错误。更将前前行，复恐山神怒。
白云蓊闭岭，高松吟古墓。置此忍其伤，驱驴下山路。

卷 387_3【观放鱼歌】

卢仝

常州贤刺史，从谏议大夫除。天地好生物，
刺史性与天地俱。见山客，狎鱼鸟。坐山客，北亭湖。
命舟人，驾舫子，漾漾菰蒲。酒兴引行处，正见渔人鱼。
刺史密会山客意，复念网罗婴无辜。忽脱身上殷绯袍，
尽买罟擣尽有无。鳗鱖鲇鳢鳅，涎恶最顽愚。鰕魴见豳风，
质干稍高流。时白喷雪鲫鲤_z，此辈肥脆为绝尤。
老鲤变化颇神异，三十六鳞如抹朱。水苞弘窟有蛟鼉，
饵非龙饵唯无鲈。丛杂百千头，性命悬须臾。天心应刺史，
刺史尽活诸。一一投深泉，跳脱不复拘。得水竞腾突，
动作诡怪殊。或透藻而出，或破浪而趋。或掉尾子子，
或奋鬣愉愉。或如鸢掷梭，或如蛇衔珠。四散渐不见，
岛屿徒萦纡。鸕鶿鵙鸥鳧，喜观争叫呼。小虾亦相庆，
绕岸摇其须。乃知贪生不独顽痴夫。可怜百千命，
几为中肠菹。若养圣贤真，大烹龙髓敢惜乎。苦痛如今人，
尽是鱼食鱼。族类恣饮啖，强力无亲疏。明明刺史心，

· 全唐诗 ·

不欲与物相欺诬。岸虫两与命，无意杀此活彼用贼徒。
亦忆清江使，横遭乎余且。圣神七十钻，不及泥中鳅。
哀哉托非贤，五脏生冤仇。若当刺史时，圣物保不囚。
不疑且不卜，二子安能谏。二子倘故谏，吾知心受诛。
礼重一草木，易封称中孚。又曰钓不纲，又曰远庖厨。
故仁人用心，刺史尽合符。昔鲁公观棠距箴，
遂被孔子贬而书。今刺史好生，德洽民心，
谁为刺史一褒誉。刺史自上来，德风如草铺。衣冠兴废礼，
百姓减暴租。豪猾不豪猾，鰥孤不鰥孤。开古孟渎三十里，
四千顷泥坑为膏腴，刺史视之总若无。讼庭雀噪坐不得，
湖上拔茭植芙蕖。胜业庄中二桑门，时时对坐谈真如。
因说十千天子事，福力当与刺史俱。天雨曼陀罗花深没膝，
四十千真珠璎珞堆高楼。此中怪特不可会，
但慕刺史仁有馀。刺史敕左右兼小家奴，慎勿背我沉毒钩。
念鱼承奉刺史仁，深僻处，远远游。刺史官职小，
教化未能敷。第一莫近人，恶人唯口腹。第一莫出境，
四境多网罟。重伤刺史心，丧尔微贱躯。

卷 387_4【示添丁】

卢仝

春风苦不仁，呼逐马蹄行人家。惭愧瘴气却怜我，
入我憔悴骨中为生涯。数日不食强强行，
何忍索我抱看满树花。不知四体正困惫，
泥人啼哭声呀呀。忽来案上翻墨汁，涂抹诗书如老鸦。

· 全唐诗 ·

父怜母惜搆不得，却生痴笑令人嗟。宿春连晓不成米，
日高始进一碗茶。气力龙钟头欲白，凭仗添丁莫恼爷。

卷 387_5【寄男抱孙】

卢仝

别来三得书，书道违离久。书处甚粗杀，且喜见汝手。
殷十七又报，汝文颇新有。别来才经年，囊盎未合斗。
当是汝母贤，日夕加训诱。尚书当毕功，礼记速须剖。
喽罗儿读书，何异摧枯朽。寻义低作声，便可养年寿。
莫学村学生，粗气强叫吼。下学偷功夫，新宅锄藁莠。
乘凉劝奴婢，园里耨葱韭。远篱编榆棘，近眼栽桃柳。
引水灌竹中，蒲池种莲藕。捞漉蛙蟆脚，莫遣生科斗。
竹林吾最惜，新笋好看守。万箨苞龙儿，攒迸溢林藪。
吾眼恨不见，心肠痛如搆。宅钱都未还，债利日日厚。
箨龙正称冤，莫杀入汝口。丁宁嘱托汝，汝活箨龙不。
殷十七老儒，是汝父师友。传读有疑误，辄告谘问取。
两手莫破拳，一吻莫饮酒。莫学捕鸪鸽，莫学打鸡狗。
小时无大伤，习性防已后。顽发苦恼人，汝母必不受。
任汝恼弟妹，任汝恼姨舅。姨舅非吾亲，弟妹多老丑。
莫恼添丁郎，泪子作面垢。莫引添丁郎，赫赤日里走。
添丁郎小小，别吾来久久。脯脯不得吃，兄兄莫捻搜。
他日吾归来，家人若弹纠。一百放一下，打汝九十九。

· 全唐诗 ·

卷 387_6【自咏三首】

卢仝

为报玉川子，知君未是贤。低头虽有地，仰面辄无天。
骨肉清成瘦，莠蔓老觉臃。家书与心事，相伴过流年。

卢子躩踵也，贤愚总莫惊。蚊虻当家口，草石是亲情。
万卷堆胸朽，三光撮眼明。翻悲广成子，闲气说长生。

物外无知己，人间一癖王。生涯身是梦，耽乐酒为乡。
日月黏髭须，云山锁肺肠。愚公只公是，不用谩惊张。

卷 387_7【送王储詹事西游献兵书】

卢仝

美酒拨醅酌，杨花飞尽时。落日长安道，方寸无人知。
筐中制胜术，气雄屈指算。半醉千殷勤，仰天一长叹。
玉匣百炼剑，龟文又龙吼。抽赠王将军，勿使虚白首。

· 全唐诗 ·

卷 387_8【送邵兵曹归江南】

卢全

春风杨柳陌，连骑醉离觞。千里远山碧，一条归路长。

花开愁北渚，云去渡南湘。东望濛濛处，烟波是故乡。

卷 387_9【寄外兄魏澈】

卢全

何处堪惆怅，情亲不得亲。兴宁楼上月，辜负酒家春。

卷 387_10【喜逢郑三游山】

卢全

相逢之处花茸茸，石壁攒峰千万重。

他日期君何处好，寒流石上一株松。

· 全唐诗 ·

卷 387_11【卓女怨】

卢仝

妾本怀春女，春愁不自任。迷魂随风客，娇思入琴心。

托援交情重，当垆酌意深。谁家有夫婿，作赋得黄金。

卷 387_12【守岁二首】

卢仝

去年留不住，年来也任他。当垆一榼酒，争奈两年何。

老来经节腊，乐事甚悠悠。不及儿童日，都卢不解愁。

卷 387_13【新月】

卢仝

仙宫云箔卷，露出玉帘钩。清光无所赠，相忆凤凰楼。

· 全唐诗 ·

卷 387_14 【解闷】

卢仝

人生都几日，一半是离忧。但有尊中物，从他万事休。

卷 387_15 【扬子津】

卢仝

风卷鱼龙暗楚关，白波沉却海门山。

鹏腾鳌倒且快性，地坼天开总是闲。

卷 387_16 【人日立春】

卢仝

春度春归无限春，今朝方始觉成人。

从今克己应犹及，颜与梅花俱自新。

· 全唐诗 ·

卷 387_17【送尉迟羽之归宣州】

卢全

君归乎，君归兴不孤。谢朓澄江今夜月，也应忆著此山夫。

卷 387_18【悲新年】

卢全

新年何事最堪悲，病客遥听百舌儿。
太岁只游桃李径，春风肯管岁寒枝。

卷 387_19【忆酒寄刘侍郎】

卢全

爱酒如偷蜜，憎醒似见刀。君为麹蘖主，酒醴莫辞劳。

卷 387_20【白鹭鸶】

卢全

刻成片玉白鹭鸶，欲捉纤鳞心自急。

· 全唐诗 ·

翘足沙头不得时，傍人不知谓闲立。

卷 387_21 【风中琴】

卢仝

五音六律十三徽，龙吟鹤响思庖羲。
一弹流水一弹月，水月风生松树枝。

卷 387_22 【感秋别怨】

卢仝

霜秋自断魂，楚调怨离分。魄散瑶台月，心随巫峡云。
蛾眉谁共画，凤曲不同闻。莫似湘妃泪，斑斑点翠裙。

卷 387_23 【新蝉】

卢仝

泉溜潜幽咽，琴鸣乍往还。长风翦不断，还在树枝间。

· 全唐诗 ·

卷 387_24 【题褚遂良孙庭竹】

卢仝

负霜停雪旧根枝，龙笙凤管君莫截。

春风一番琴上来，摇碎金尊碧天月。

卷 387_25 【访含曦上人】

卢仝

三入寺，曦未来。辘轳无人井百尺，渴心归去生尘埃。

卷 387_26 【客淮南病】

卢仝

扬州蒸毒似燂汤，客病清枯鬓欲霜。

且喜闭门无俗物，四肢安稳一张床。

· 全唐诗 ·

卷 387_27【村醉】

卢仝

昨夜村饮归，健倒三四五。摩挲青莓苔，莫嗔惊著汝。

卷 387_28【萧宅二三子赠答诗二十首·客赠石】

卢仝

竹下青莎中，细长三四片。主人虽不归，长见主人面。

卷 387_29【萧宅二三子赠答诗二十首·石让竹】

卢仝

自顾拨不转，何敢当主人。竹弟有清风，可以娱嘉宾。

卷 387_30【萧宅二三子赠答诗二十首·竹答客】

卢仝

竹弟谢石兄，清风非所任。随分有萧瑟，实无坚重心。

· 全唐诗 ·

卷 387_31【萧宅二三子赠答诗二十首·石请客】

卢仝

竹弟虽让客，不敢当客恩。自惭埋没久，满面苍苔痕。

卷 387_32【萧宅二三子赠答诗二十首·客答石】

卢仝

遍索天地间，彼此最痴癖。主人幸未来，与君为莫逆。

卷 387_33【萧宅二三子赠答诗二十首·石答竹】

卢仝

石报孤竹君，此客甚高调。共我相共痴，不怕主人天下笑。
我非蛱蝶儿，我非桃李枝。不要儿女扑，不要春风吹。
苔藓印我面，雨露皴我皮。此故不嫌我，突兀蒙相知。
此客即西归，我心徒依依。我欲随客去，累重不解飞。
知弟虚心亦待客，此客何以共报之。

· 全唐诗 ·

卷 387_34【萧宅二三子赠答诗二十首·竹请客】

卢仝

我本泰山阿，避地到南国。主人欲移家，我亦要归北。
上客幸先归，愿托归飞翼。唯将翛翛风，累路报恩德。

卷 387_35【萧宅二三子赠答诗二十首·客谢竹】

卢仝

扬州驳杂地，不辨龙蜥蜴。客身正干枯，行处无膏泽。
太山道不远，相庇实无力。君若随我行，必有煎茶厄。

卷 387_36【萧宅二三子赠答诗二十首·石请客】

卢仝

启母是诸母，三十六峰是诸父。知君家近父母家，
小人安得不怀土。怜君与我金石交，君归可得共载否。
小人无以报君恩，使君池亭风月古。

· 全唐诗 ·

卷 387_37【萧宅二三子赠答诗二十首·客谢石】

卢仝

我有水竹庄，甚近嵩之颠。是君归休处，可以终天年。
虽有提携劳，不忧粮食钱。但恐主人心，疑我相钓竿。

卷 387_38【萧宅二三子赠答诗二十首·石再请客】

卢仝

主人若知我，应喜我结得君。主人不知我，
我住何求于主人。我在天地间，自是一片物。
可得杠压我，使我头不出。

卷 387_39【萧宅二三子赠答诗二十首·客许石】

卢仝

石公说道理，句句出凡格。相知贵知心，岂恨主为客。
过须归去来，旦晚上无厄。主人诚贤人，多应不相责。

· 全唐诗 ·

卷 387_40【萧宅二三子赠答诗二十首·井请客】

卢仝

我生天地间，颇是往还数。已效炊爨劳，我亦不愿住。

君有造化力，在君一降顾。我愿拔黄泉，轻举随君去。

卷 387_41【萧宅二三子赠答诗二十首·客谢井】

卢仝

改邑不改井，此是井卦辞。井公莫怪惊，说我成憨痴。

我纵有神力，争敢将公归。扬州恶百姓，疑我卷地皮。

卷 387_42【萧宅二三子赠答诗二十首·马兰请客】

卢仝

兰兰是小草，不怕郎君骂。愿得随君行，暂到嵩山下。

· 全唐诗 ·

卷 387_43【萧宅二三子赠答诗二十首·客请马兰】

卢仝

嵩山未必怜兰兰，兰兰已受郎君恩。

不须刷帚跳踪走，只拟兰浪出其门。

卷 387_44【萧宅二三子赠答诗二十首·蛺蝶请客】

卢仝

粉末为四体，春风为生涯。愿得纷飞去，与君为眼花。

卷 387_45【萧宅二三子赠答诗二十首·客答蛺蝶】

卢仝

君是轻薄子，莫窥君子肠。且须看雀儿，雀儿衔尔将。

· 全唐诗 ·

卷 387_46 【萧宅二三子赠答诗二十首·虾蟆请客】

卢仝

凡有水竹处，我曹长先行。愿君借我一勺水，
与君昼夜歌德声。

卷 387_47 【萧宅二三子赠答诗二十首·客请虾蟆】

卢仝

虾蟆蟆，叩头莫语人闻声。扬州虾蚬忽得便，
腥臊臭秽逐我行。我身化作青泥坑。

· 全唐诗 ·

卷三百八十八

卷 388_1 【龟铭】

卢仝

龟，汝灵于人，不灵于身，致网于津。吾灵于身，
不灵于人，致走于尘。龟，吾与汝邻。

卷 388_2 【梳铭】

卢仝

有发兮朝朝思理，有身兮胡不如是。

卷 388_3 【小妇吟】

卢仝

小妇欲入门，隈门匀红妆。大妇出门迎，正顿罗衣裳。
门边两相见，笑乐不可当。夫子于傍聊断肠，

· 全唐诗 ·

小妇哆[上高堂。开玉匣，取琴张。陈金罍，酌满觞。
愿言两相乐，永与同心事我郎。夫子于傍剩欲狂。

珠帘风度百花香，翠帐云屏白玉床。啼鸟休啼花莫笑，
女英新喜得娥皇。

卷 388_4【月下寄徐希仁】

卢仝

夜半沙上行，月莹天心明。沙月浩无际，此中离思生。
上天何寥廓，下地何峥嵘。吾道岂已矣，为君倾兕觥。

卷 388_5【赠徐希仁石砚别】

卢仝

灵山一片不灵石，手斫成器心所惜。凤鸟不至池不成，
蛟龙干蟠水空滴。青松火炼翠烟凝，寒竹风摇远天碧。

今日赠君离别心，此中至浅造化深。用之可以过珪璧，
弃置还为一片石。

· 全唐诗 ·

卷 388_6【有所思】

卢仝

当时我醉美人家，美人颜色娇如花。今日美人弃我去，
青楼珠箔天之涯。天涯娟娟姮娥月，三五二八盈又缺。
翠眉蝉鬓生别离，一望不见心断绝。心断绝，几千里。
梦中醉卧巫山云，觉来泪滴湘江水。湘江两岸花木深，
美人不见愁人心。含愁更奏绿绮琴，调高弦绝无知音。
美人兮美人，不知为暮雨兮为朝云。相思一夜梅花发，
忽到窗前疑是君。

卷 388_7【楼上女儿曲】

卢仝

谁家女儿楼上头，指挥婢子挂帘钩。林花撩乱心之愁，
卷却罗袖弹箜篌。箜篌历乱五六弦，罗袖掩面啼向天。
相思弦断情不断，落花纷纷心欲穿。心欲穿，凭栏干。
相忆柳条绿，相思锦帐寒。直缘感君恩爱一回顾，
使我双泪长珊珊。我有娇靥待君笑，我有娇蛾待君扫。
莺花烂漫君不来，及至君来花已老。心肠寸断谁得知，
玉阶幂历生青草。

· 全唐诗 ·

卷 388_8【秋梦行】

卢仝

客行一夜秋风起，客梦南游渡湘水。湘水泠泠彻底清，
二妃怨处无限情。娥皇不语启娇靥，女英目成转心愜。

长眉入鬓何连娟，肌肤白玉秀且鲜。裴回共咏东方日，
沉吟再理南风弦。声断续，思绵绵，中含幽意两不宣。

殷勤纤手惊破梦，中宵寂寞心凄然。心凄然，肠亦绝。
寐不寐兮玉枕寒，夜深夜兮霜似雪。镜中不见双翠眉，

台前空挂纤纤月。纤纤月，盈复缺，娟娟似眉意难诀。
愿此眉兮如此月，千里万里光不灭。

卷 388_9【自君之出矣】

卢仝

自君之出矣，壁上蜘蛛织。近取见妾心，夜夜无休息。
妾有双玉环，寄君表相忆。环是妾之心，玉是君之德。

驰情增悴容，蓄思损精力。玉簪寒凄凄，延想心恻恻。
风含霜月明，水泛碧天色。此水有尽时，此情无终极。

· 全唐诗 ·

卷 388_10【走笔谢孟谏议寄新茶】

卢仝

日高丈五睡正浓，军将打门惊周公。口云谏议送书信，
白绢斜封三道印。开缄宛见谏议面，手阅月团三百片。
闻道新年入山里，蛰虫惊动春风起。天子须尝阳羡茶，
百草不敢先开花。仁风暗结珠琲瓃，先春抽出黄金芽。
摘鲜焙芳旋封裹，至精至好且不奢。至尊之馀合王公，
何事便到山人家。柴门反关无俗客，纱帽笼头自煎吃。
碧云引风吹不断，白花浮光凝碗面。一碗喉吻润，
两碗破孤闷。三碗搜枯肠，唯有文字五千卷。四碗发轻汗，
平生不平事，尽向毛孔散。五碗肌骨清，六碗通仙灵。
七碗吃不得也，唯觉两腋习习清风生。蓬莱山，在何处。
玉川子，乘此清风欲归去。山上群仙司下土，
地位清高隔风雨。安得知百万亿苍生命，
堕在颠崖受辛苦。便为谏议问苍生，到头还得苏息否。

卷 388_11【冬行三首】

卢仝

虫豸腊月皆在蛰，吾独何乃劳其形。小大无由知天命，
但怪守道不得宁。老母妻子一挥手，涕下便作千里行。
自顾不及遭霜叶，旦夕保得同飘零。达生何足云，

· 全唐诗 ·

偶然苦乐经其身。古来尧孔与桀跖，善恶何补如今人。
长年爱伊洛，决计卜长久。赊买里仁宅，水竹且小有。
卖宅将还资，旧业苦不厚。债家征利心，饿虎血染口。
腊风刀刻肌，遂向东南走。贤哉韩员外，劝我莫强取。
凭风谢长者，敢不愧心苟。赁载得估舟，估杂非吾偶。
壮色排榻席，别座夸羊酒。落日无精光，哑暝被掣肘。
漕石生齿牙，洗滩乱相揪。奔澌嚼篙杖，夹岸雪龙吼。
可怜圣明朝，还为丧家狗。通运隔南溟，债利拄北斗。
扬州屋舍贱，还债堪了不。此宅贮书籍，地湿忧蠹朽。
贾僎旧相识，十年与营守。贫交多变态，僎得君子不。
利命子罕言，我诚孔门丑。且贵终焉图，死免惭狐首。
何当归帝乡，白云永相友。
不敢唾汴水，汴水入东海。污泥龙王宫，恐获不敬罪。
不敢蹋汴堤，汴堤连秦宫。蹋尽天子土，餧餧无由通。
此言虽太阔，且是臣心肠。野风结阴兵，千里鸣刀枪。
海月护羁魄，到晓点孤光。上不事天子，下不识侯王。
夜半睡独觉，爽气盈心堂。颜子甚年少，孔圣同行藏。
我年过颜子，敢道不自强。船人虽奴兵，亦有意智长。
问我何所得，乐色填清扬。我报果有为，孔经在衣裳。

卷 388_12【常州孟谏议座上闻韩员外职方贬国子博士有感五首】

卢仝

忽见除书到，韩君又学官。死生纵有命，人事始知难。

· 全唐诗 ·

烈火先烧玉，庭芜不养兰。山夫与刺史，相对两巘岏。
干禄无便佞，宜知黜此身。员郎犹小小，国学大频频。
孤宦心肝直，天王苦死嗔。朝廷无谏议，谁是雪韩人。
何事遭朝贬，知何被不容。不如思所自，只欲涕无从。
爵服何曾好，荷衣已惯缝。朝官莫相识，归去老岩松。
力小垂垂上，天高又不登。致身唯一己，获罪则颜朋。
禄位埋坑阱，康庄垒剑棱。公卿共惜取，莫遣玉山崩。
谁怜野田子，海内一韩侯。左道官虽乐，刚肠得健无。
功名生地狱，礼教死天囚。莫言耕种好，须避蒺藜秋。

卷 388_13【夏夜闻蚯蚓吟】

卢仝

夏夜雨欲作，傍砌蚯蚓吟。念尔无筋骨，也应天地心。
汝无亲朋累，汝无名利侵。孤韵似有说，哀怨何其深。
泛泛轻薄子，旦夕还讴吟。肝胆异汝辈，热血徒相侵。

卷 388_14【扬州送伯龄过江】

卢仝

伯龄不厌山，山不养伯龄。松颠有樵堕，石上无禾生。
不忍六尺躯，遂作东南行。诸侯尽食肉，壮气吞八纮。
不啻溜钝汉，何由通姓名。夷齐饿死日，武王称圣明。

· 全唐诗 ·

节义士枉死，何异鸿毛轻。努力事干谒，我心终不平。

卷 388_15【忆金鹅山沈山人二首】

卢仝

君家山头松树风，适来入我竹林里。一片新茶破鼻香，
请君速来助我喜。莫合九转大还丹，莫读三十六部大洞经。
闲来共我说真意，齿下领取真长生。不须服药求神仙，
神仙意智或偶然。自古圣贤放入土，淮南鸡犬驱上天。
白日上升应不恶，药成且辄一丸药。暂时上天少问天，
蛇头蝎尾谁安著。

君爱炼药药欲成，我爱炼骨骨已清。试自比较得仙者，
也应合得天上行。天门九重高崔嵬，清空凿出黄金堆。
夜叉守门昼不启，夜半醺祭夜半开。夜叉喜欢动关锁，
锁声y地生风雷。地上禽兽重血食，性命血化飞黄埃。
太上道君莲花台，九门隔阔安在哉。呜呼沈君大药成，
兼须巧会鬼物情，无求长生丧厥生。

卷 388_16【寄萧二十三庆中】

卢仝

萧乎萧乎，忆萧者嵩山之卢。卢扬州，萧歙州。

· 全唐诗 ·

相思过春花，鬓毛生麦秋。千灾万怪天南道，
猩猩鹦鹉皆人言。山魈吹火虫入碗，鸬鸟咒诅蛟吐涎。
就中南瘴欺北客，凭君数磨犀角吃，我忆君心千百间。
千百间君何时还，使我夜夜劳魂魄。

卷 388_17【赠金鹅山人沈师鲁】

卢仝

金鹅山中客，来到扬州市。买药床头一破颜，
撒然便有上天意。日月高挂玄关深，金膏切淬肌骨异。
人皆食谷与五味，独食太和阴阳气。浩浩流珠走百关，
绵若存有深致。种玉不耕山外非内粹。凿儒关决文泉彰，
风雅因君不复坠。光不外照刃不磨，回避人间恶富贵。
三日四日五六日，盘礴化元搜万类。昼饮兴酣陶天和，
夜话造微 精魅。示我插血不死方，赏我风格不肥膩。
肉眼不识天上书，小儒安敢窥奥秘。昆仑路隔西北天，
三山后浮不著地。君到头来忆我时，金简为吾镌一字。

卷 388_18【叹昨日三首】

卢仝

昨日之日不可追，今日之日须臾期。如此如此复如此，
壮心死尽生鬓丝。秋风落叶客肠断，不办斗酒开愁眉。

· 全唐诗 ·

贤名圣行甚辛苦，周公孔子徒自欺。

天下薄夫苦耽酒，玉川先生也耽酒。薄夫有钱恣张乐，
先生无钱养恬漠。有钱无钱俱可怜，百年骤过如流川。
平生心事消散尽，天上白日悠悠悬。

上帝板板主何物，日车劫劫西向没。自古贤圣无奈何，
道行不得皆白骨。白骨土化鬼入泉，生人莫负平生年。
何时出得禁酒国，满瓮酿酒曝背眠。

卷 388_19【月蚀诗】

卢仝

东海出明月，清明照毫发。朱弦初罢弹，金兔正奇绝。
三五与二八，此时光满时。颇奈虾蟆儿，吞我芳桂枝。
我爱明镜洁，尔乃痕翳之。尔且无六翮，焉得升天涯。
方寸有白刃，无由扬清辉。如何万里光，遭尔小物欺。
却吐天汉中，良久素魄微。日月尚如此，人情良可知。

卷 388_20【直钩吟】

卢仝

初岁学钓鱼，自谓鱼易得。三十持钓竿，一鱼钓不得。

· 全唐诗 ·

人钩曲，我钩直，哀哉我钩又无食。文王已没不复生，
直钩之道何时行。

卷 388_21【与马异结交诗】

卢仝

天地日月如等闲，卢仝四十无往还。唯有一片心脾骨，
嶮岩崿兀郁律。刀剑为峰嵒，平地放著高如昆仑山。
天不容，地不受，日月不敢偷照耀。神农画八卦，
凿破天心胸。女娲本是伏羲妇，恐天怒，捣炼五色石，
引日月之针，五星之缕把天补。补了三日不肯归婿家，
走向日中放老鸦。月里栽桂养虾蟆，天公发怒化龙蛇。
此龙此蛇得死病，神农合药救死命。天怪神农党龙蛇，
罚神农为牛头，令载元气车。不知药中有毒药，
药杀元气天不觉。尔来天地不神圣，日月之光无正定。
不知元气元不死，忽闻空中唤马异。马异若不是祥瑞，
空中敢道不容易。昨日仝不仝，异自异，是谓大仝而小异。
今日仝自仝，异不异，是谓仝不往兮异不至，
直当中兮动天地。白玉璞里斫出相思心，
黄金矿里铸出相思泪。忽闻空中崩崖倒谷声，
绝胜明珠千万斛，买得西施南威一双婢。此婢娇饶恼杀人，
凝脂为肤翡翠裙，唯解画眉朱点唇。自从获得君，
敲金摐玉凌浮云。却返顾，一双婢子何足云。
平生结交若少人，忆君眼前如见君。青云欲开白日没，
天眼不见此奇骨。此骨纵横奇又奇，千岁万岁枯松枝。

· 全唐诗 ·

半折半残压山谷，盘根蹙节成蛟螭。
忽雷霹雳卒风暴雨撼不动，欲动不动千变万化总是鳞皴皮。
此奇怪物不可欺。卢仝见马异文章，酌得马异胸中事。
风姿骨本恰如此，是不是，寄一字。

卷 388_22【感古四首】

卢仝

天生圣明君，必资忠贤臣。舜禹竭股肱，共佐尧为君。
四载成地理，七政齐天文。阶下蓂莢生，琴上南风薰。
轮转夏殷周，时复犹一人。秦汉事谄巧，魏晋忘机钧。
猜忌相翦灭，尔来迷恩亲。以愚保其身，不觉身沉沦。
以智理其国，遂为国之贼。苟图容一身，万事良可恻。
可怜万乘君，聪明受沉惑。忠良伏草莽，无因施羽翼。
日月异又蚀，天地晦如墨。既亢而后求，异哉龙之德。
人生何所贵，所贵有终始。昨日盈尺璧，今朝尽瑕弃。
苍蝇点垂棘，巧舌成锦绮。箕子为之奴，比干谏而死。
仲尼鲁司寇，出走为群婢。假如屈原醒，其奈一国醉。
一国醉号呶，一人行清高。便欲激颓波，此事真徒劳。
上山逢猛虎，入海逢巨鳌。王者苟不死，腰下鱼鳞刀。
东海波连天，三度成桑田。高岸高于屋，斯须变溪谷。
天地犹尚然，人情难久全。夜半白刃仇，旦来金石坚。
萧绶既解坼，陈印亦弃捐。竭节遇刀割，输忠遭祸缠。
不予衾之眠，信予衾之穿。镜明不自照，膏润徒自煎。
抱剑长太息，泪堕秋风前。

· 全唐诗 ·

古来不患寡，所患患不均。单醪投长河，三军尽沉沦。
今人异古人，结托唯亲宾。毁圻维鹊巢，不行鸚鵡仁。
鄙吝不识分，有心占阳春。鸾鹤日已疏，燕雀日已亲。
小物无大志，安测栖松筠。恩眷多弃故，物情尚逐新。
瓦砾暂拂拭，光掩连城珍。唇吻恣谈铄，黄金同灰尘。
苏秦北游赵，张祿西入秦。既变嫂叔节，仍摈华阳君。
万世金石交，一饷如浮云。骨肉且不顾，何况长羈贫。

君莫以富贵，轻忽他年少，听我暂话会稽朱太守。
正受冻饿时，索得人家贵傲妇。读书书史未润身，
负薪辛苦胝生肘。谓言琴与瑟，糟糠结长久。
不分杀人羽翮成，临临冲天妇嫌丑。
其奈一朝太守振羽仪，乡关昼行衣锦衣。哀哉旧妇何眉目，
新婿随行向天哭。寸心金石徒尔为，杯水庭沙空自覆。
乃知愚妇人，妒忌阴毒心。唯救眼底事，不思日月深。
等闲取羞死，岂如甘布衾。

卷 388_23【杂兴】

卢仝

意智未成百不解，见人富贵亦心爱。等闲对酒呼三达，
屠羊杀牛皆自在。放心为乐笙歌攒，壮气激作风霜寒。
厨中玉饌盈金盘，方丈厌见嫌不餐。飞鹰跃马实快性，
唇腐齿烂空巉巖。岂期福极翻成祸，祸成身诛家亦破。
昨朝惆怅不如君，今日悲君不如我。否泰交加无定主，

· 全唐诗 ·

懒学风云戢翎羽。绿酒清琴好养生，出将入相无心取。
三五图书旧揣摩，五千道德新规矩。

卷 388_24 【酬徐公以新文见招】

卢仝

昨夜霜月明，果有清音生。便欲走相和，愁闻寒玉声。

卷 388_25 【门箴】

卢仝

贪残奸酗，狡佞讪愆，身之八杀。背惠，恃己，狎不肖，
妒贤能，命之四孽。有是有此予敢辞，无是无此予之师，
一日不见予心思。思其人，惧其人。其交其难，敢告于门。

卷 388_26 【孟夫子生生亭赋】

卢仝

玉川子沿孟冬之寒流兮，辍棹上登生生亭。夫子何之兮，
面逐云没兮南行。百川注海而心不写兮，落日千里凝寒精。
予日衰期人生之世斯已矣，爰为今日犹犹岐路之心生。

· 全唐诗 ·

悲夫,南国风涛,鱼龙畜伏。予小子戇朴,必不能济夫子欲。
嗟自惭承夫子而不失予兮,传古道甚分明。

予且广孤目遐赅于天壤兮,庶得外尽万物变化之幽情。
然后惭愧而来归兮,大息吾躬于夫子之亭。

· 全唐诗 ·

卷三百八十九

卷 389_1【走笔追王内丘】

卢仝

自识夫子面，便获夫子心。夫子一启颜，义重千黄金。
平原孟尝骨已土，始有夫子堪知音。忽然夫子不语，
带席帽，骑驴去。余对醪醑不能斟，君且来，
余之瞻望心悠哉。零雨其濛愁不散，闲花寂寂斑阶苔。
不如对此景，含笑倾金罍。莫问四肢畅，暂取眉头开。
弦琴待夫子，夫子来不来。

卷 389_2【思君吟寄 生】

卢仝

我思君兮河之壖。我为河中之泉，君为河中之青天。
天青青，泉泠泠。泉含青天天隔泉，我思君兮心亦然。
心亦然，此心复在天之侧。我心为风兮淅淅，
君身为云兮幂幂。此风引此云兮云不来，
此风此云兮何悠哉，与我身心双裴回。

· 全唐诗 ·

卷 389_3【将归山招冰僧】

卢仝

买得一片田，济源花洞前。千里石壁坼，一条流泌泉。
青松盘樛枝，森森上插青冥天。枝上有猿，
宿处近鹤巢，清唳孤吟声相交。月轮下射空洞响，
丝篁成韵风萧萧。我心尘外心，爱此尘外物。
欲结尘外交，苦无尘外骨。泌泉有冰公，心静见真佛。
可结尘外交，占此松与月。

卷 389_4【酬愿公雪中见寄】

卢仝

积雪三十日，车马路不通。贫病交亲绝，想忆唯愿公。
春鸠报春归，苦寒生暗风。檐乳堕悬玉，日脚浮轻红。
梅柳意却活，园圃冰始融。更候四体好，方可到寺中。

卷 389_5【苦雪寄退之】

卢仝

天王二月行时令，白银作雪漫天涯。山人门前遍受赐，

· 全唐诗 ·

平地一尺白玉沙。云颓月坏桂英下，鹤毛风剪乱参差。
山人屋中冻欲死，千树万树飞春花。菜头出土胶入地，
山庄取栗埋却车。冷絮刀生削峭骨，冷齏斧破慰老牙。
病妻烟眼泪滴滴，饥婴哭乳声嘒嘒。市头博米不用物，
酒店买酒不肯赊。闻道西风弄剑戟，长阶杀人如乱麻。
天眼高开欺草芽，我死未肯兴叹嗟。但恨口中无酒气，
刘伶见我相揶揄。清风搅肠筋力绝，白灰压屋梁柱斜。
圣明有道 命汉，可得再见朝日耶。柴门没胫昼不扫，
黄昏绕树栖寒鸦。唯有河南韩县令，时时醉饱过贫家。

卷 389_6【寄赠含曦上人】

卢仝

楞伽大师兄，夸曦识道理。破锁推玄关，高辩果难揣。
论语老庄易，搜索通神鬼。起信中百门，敲骨得佛髓。
此外杂经律，泛读一万纸。高殿排名僧，执卷坐累累。
化物自一心，三教齐发起。随钟嚼宫商，满口文字美。
商贾女郎辈，不曾道生死。纵遇强礼拜，雅语不露齿。
劈破天地来，节义可屈指。季展即此僧，孤立无依倚。
近来爱作诗，新奇颇烦委。忽忽造古格，削尽俗绮靡。
假如慵裹头，但勤读书史。切磋并工夫，休远不可比。
怜僧无远，信佛残未已。貌古饶风情，清论兴亹亹。
访余十数度，相去三五里。见时心亦喜，不见心亦喜。
见时谈谑乐，四座尽角嘴。不见养天和，无人聒人耳。
昨朝披雪来，面色赤靴靴。封灶养黄金，许割方寸匕。

· 全唐诗 ·

泥丸佛 教，怛化庄亦耻。未达不敢尝，孔子疑季子。
药成必分余，余必投泥里。不如向阳堂，拨醅泛浮蚁。
麴米本无愆，酒成是法水。行道不见心，毁誉徒云尔。
雪晴天气和，日光弄梅李。春鸟娇关关，春风醉旖旎。
道上正无尘，人家有花卉。高僧有拄杖，愿得数觥止。

卷 389_7【听萧君姬人弹琴】

卢仝

弹琴人似膝上琴，听琴人似匣中弦。二物各一处，
音韵何由传。无风质气两相感，万般悲意方缠绵。
初时天山之外飞白雪，渐渐万丈涧底生流泉。
风梅花落轻扬扬，十指干净声涓涓。昭君可惜嫁单于，
沙场不远只眼前。蔡琰薄命没胡虏，乌枭啾唧啼胡天。
关山险隔一万里，颜色错漠生风烟。形魄散逐五音尽，
双蛾结草空婵娟。中腹苦恨杳不极，新心愁绝难复传。
金尊湛湛夜沉沉，馀音叠发清联绵。主人醉盈有得色，
座客向隅增内然。孔子怪责颜回瑟，野夫何事萧君筵。
拂衣屡命请中废，月照书窗归独眠。

· 全唐诗 ·

卷 389_8 【蜻蜓歌】

卢仝

黄河中流日影斜，水天一色无津涯，处处惊波喷流飞雪花。
篙工楫师力且武，进寸退尺莫能度。吾甚惧。念汝小虫子，
造化借羽翼。随风戏中流，翩然有馀力。吾不如汝无他，
无羽翼。吾若有羽翼，则上叩天关。为圣君请贤臣，
布惠化于人间。然后东飞浴东溟，吸日精，撼若木之英，
纷而零。使地上学仙之子，得而食之皆长生。
不学汝无端小虫子，叶叶水上无一事，忽遭风雨水中死。

卷 389_9 【出山作】

卢仝

出山忘掩山门路，钓竿插在枯桑树。当时只有鸟窥窬，
更亦无人得知处。家僮若失钓鱼竿，定是猿猴把将去。

卷 389_10 【寄崔柳州】

卢仝

使者立取书，叠纸生百忧。使君若不信，他时看白头。

· 全唐诗 ·

三百六十州，克情惟柳州。柳州蛮天末，鄙夫嵩之幽。
花落陇水头，各自东西流。凛凛长相逐，为谢池上鸥。

卷 389_11【赠稚禅师】

卢仝

春风满禅院，师独坐南轩。万化见中尽，始觉静性尊。
我来契平生，目击道自存。与师不动游，游此无迹门。

卷 389_12【送好约法师归江南】

卢仝

杯度度一身，法度度万民。为报江南三二日，
这回应见雪中人。

卷 389_13【萧二十三赴歙州婚期二首】

卢仝

淮上客情殊冷落，蛮方春早客何如。
相思莫道无来使，回雁峰前好寄书。

· 全唐诗 ·

南方山水生时兴，教有新诗得寄余。
路带长安迢递急，多应不逐使君书。

卷 389_14【掩关铭】

卢仝

蛇毒毒有形，药毒毒有名。人毒毒在心，对面如弟兄。
美言不可听，深于千丈坑。不如掩关坐，幽鸟时一声。

卷 389_15【逢病军人】

卢仝

行多有病住无粮，万里还乡未到乡。
蓬鬓哀吟古城下，不堪秋气入金疮。

卷 389_16【山中】

卢仝

饥拾松花渴饮泉，偶从山后到山前。
阳坡软草厚如织，困与鹿麕相伴眠。

· 全唐诗 ·

卷 389_17 【除夜】

卢全

衰残归未遂，寂寞此宵情。旧国馀千里，新年隔数更。
寒犹近北峭，风渐向东生。惟见长安陌，晨钟度火城。

殷勤惜此夜，此夜在逡巡。烛尽年还别，鸡鸣老更新。
雉声方去病，酒色已迎春。明日持杯处，谁为最后人。

· 全唐诗 ·

卷三百九十

卷 390_1【李凭箜篌引】

李贺

吴丝蜀桐张高秋，空白凝云颓不流。江娥啼竹素女愁，
李凭中国弹箜篌。昆山玉碎凤凰叫，芙蓉泣露香兰笑。
十二门前融冷光，二十三丝动紫皇。女娲炼石补天处，
石破天惊逗秋雨。梦入坤山教神妪，老鱼跳波瘦蛟舞。
吴质不眠倚桂树，露脚斜飞湿寒兔。

卷 390_2【残丝曲】

李贺

垂杨叶老莺哺儿，残丝欲断黄蜂归。绿鬓年少金钗客，
缥粉壶中沉琥珀。花台欲暮春辞去，落花起作回风舞。
榆荚相催不知数，沈郎青钱夹城路。

· 全唐诗 ·

卷 390_3【还自会稽歌】

李贺

野粉椒壁黄，湿萤满梁殿。台城应教人，秋衾梦铜辇。

吴霜点归鬓，身与塘蒲晚。脉脉辞金鱼，羁臣守违贱。

卷 390_4【出城寄权璩、杨敬之】

李贺

草暖云昏万里春，宫花拂面送行人。

自言汉剑当飞去，何事还车载病身。

卷 390_5【示弟】

李贺

别弟三年后，还家一日余。醪醑今夕酒，缃帙去时书。

病骨犹能在，人间底事无。何须问牛马，抛掷任臬卢。

· 全唐诗 ·

卷 390_6 【竹】

李贺

入水文光动，抽空绿影春。露华生笋径，苔色拂霜根。
织可承香汗，裁堪钓锦鳞。三梁曾入用，一节奉王孙。

卷 390_7 【同沈驸马赋得御沟水】

李贺

入苑白泱泱，宫人正靥黄。绕堤龙骨冷，拂岸鸭头香。
别馆惊残梦，停杯泛小觞。幸因流浪处，暂得见何郎。

卷 390_8 【始为奉礼忆昌谷山居】

李贺

扫断马蹄痕，衙回自闭门。长枪江米熟，小树枣花春。
向壁悬如意，当帘阅角巾。犬书曾去洛，鹤病悔游秦。
土甑封茶叶，山杯锁竹根。不知船上月，谁棹满溪云。

· 全唐诗 ·

卷 390_9【七夕】

李贺

别浦今朝暗，罗帷午夜愁。鹊辞穿线月，花入曝衣楼。
天上分金镜，人间望玉钩。钱塘苏小小，更值一年秋。

卷 390_10【过华清宫】

李贺

春月夜啼鸦，宫帘隔御花。云生朱络暗，石断紫钱斜。
玉碗盛残露，银灯点旧纱。蜀王无近信，泉上有芹芽。

卷 390_11【送沈亚之歌】

李贺

吴兴才人怨春风，桃花满陌千里红。紫丝竹断骢马小，
家住钱塘东复东。白藤交穿织书笈，短策齐裁如梵夹。
雄光宝矿献春卿，烟底蓦波乘一叶。春卿拾材白日下，
掷置黄金解龙马。携笈归江重入门，劳劳谁是怜君者。
吾闻壮夫重心骨，古人三走无摧挫。请君待旦事长鞭，
他日还辕及秋律。

· 全唐诗 ·

卷 390_12【咏怀二首】

李贺

长卿怀茂陵，绿草垂石井。弹琴看文君，春风吹鬓影。
梁王与武帝，弃之如断梗。惟留一简书，金泥泰山顶。
日夕著书罢，惊霜落素丝。镜中聊自笑，讵是南山期。
头上无幅巾，苦檠已染衣。不见清溪鱼，饮水得自宜。

卷 390_13【追和柳恽】

李贺

汀洲白蘋草，柳恽乘马归。江头楂树香，岸上蝴蝶飞。
酒杯箬叶露，玉轸蜀桐虚。朱楼通水陌，沙暖一双鱼。

卷 390_14【春坊正字剑子歌】

李贺

先辈匣中三尺水，曾入吴潭斩龙子。隙月斜明刮露寒，
练带平铺吹不起。蛟胎皮老蒺藜刺，鸂鶒淬花白鹇尾。
直是荆轲一片心，莫教照见春坊字。绛丝团金悬X Y，
神光欲截蓝田玉。提出西方白帝惊，嗷嗷鬼母秋郊哭。

· 全唐诗 ·

卷 390_45【贵公子夜阑曲】

李贺

袅袅沉水烟，乌啼夜阑景。曲沼芙蓉波，腰围白玉冷。

卷 390_46【雁门太守行】

李贺

黑云压城城欲摧，甲光向日金鳞开。角声满天秋色里，
寒上燕脂凝夜紫。半卷红旗临易水，霜重鼓寒声不起。
报君黄金台上意，提携玉龙为君死。

卷 390_47【大堤曲】

李贺

妾家住横塘，红纱满桂香。青云教绾头上髻，
明月与作耳边珰。莲风起，江畔春。大堤上，留北人。
郎食鲤鱼尾，妾食猩猩唇。莫指襄阳道，绿浦归帆少。
今日菖蒲花，明朝枫树老。

· 全唐诗 ·

卷 390_48 【蜀国弦】

李贺

枫香晚花静，锦水南山影。惊石坠猿哀，竹云愁半岭。
凉月生秋浦，玉沙粼粼光。谁家红泪客，不忍过瞿塘。

卷 390_49 【苏小小墓】

李贺

幽兰露，如啼眼。无物结同心，烟花不堪剪。草如茵，
松如盖。风为裳，水为珮。油壁车，夕相待。冷翠烛，
芳光彩。西陵下，风吹雨。

卷 390_50 【梦天】

李贺

老兔寒蟾泣天色，云楼半开壁斜白。玉轮轧露湿团光，
鸾珮相逢桂香陌。黄尘清水三山下，更变千年如走马。
遥望齐州九点烟，一泓海水杯中泻。

· 全唐诗 ·

卷 390_51 【唐儿歌】

李贺

头玉硃硃眉刷翠，杜郎生得真男子。骨重神寒天庙器，
一双瞳人剪秋水。竹马梢梢摇绿尾，银鸾睨光踏半臂。
东家娇娘求对值，浓笑画空作唐字。眼大心雄知所以，
莫忘作歌人姓李。

卷 390_52 【绿章封事】

李贺

青霓扣额呼宫神，鸿龙玉狗开天门。石榴花发满溪津，
溪女洗花染白云。绿章封事谏元父，六街马蹄浩无主。
虚空风气不清冷，短衣小冠作尘土。金家香巷千轮鸣，
扬雄秋室无俗声。愿携汉戟招书鬼，休令恨骨填蒿里。

卷 390_53 【河南府试十二月乐词·正月】

李贺

上楼迎春新春归，暗黄著柳宫漏迟。薄薄淡霭弄野姿，
寒绿幽风生短丝。锦床晓卧玉肌冷，露脸未开对朝暝。

· 全唐诗 ·

官街柳带不堪折，早晚菖蒲胜绾结。

卷 390_54【河南府试十二月乐词·二月】

李贺

二月饮酒采桑津，宜男草生兰笑人。蒲如交剑风如薰，
劳劳胡燕怨酣春。薇帐逗烟生绿尘，金翘峨髻愁暮云，
沓飒起舞真珠裙。津头送别唱流水，酒客背寒南山死。

卷 390_55【河南府试十二月乐词·三月】

李贺

东方风来满眼春，花城柳暗愁杀人。复宫深殿竹风起，
新翠舞衿净如水。光风转蕙百余里，暖雾驱云扑天地。
军装宫妓扫蛾浅，摇摇锦旗夹城暖。曲水漂香去不归，
梨花落尽成秋苑。

卷 390_56【河南府试十二月乐词·四月】

李贺

晓凉暮凉树如尽，千山浓绿生云外。依微香雨青氛氲，

· 全唐诗 ·

膩叶蟠花照曲门。金塘闲水摇碧漪，老景沉重无惊飞，
墮红残萼暗参差。

卷 390_57【河南府试十二月乐词·五月】

李贺

雕玉押帘额，轻縠笼虚门。井汲铅华水，扇织鸳鸯纹。
回雪舞凉殿，甘露洗空绿。罗袖从徊翔，香汗沾宝粟。

卷 390_58【河南府试十二月乐词·六月】

李贺

裁生罗，伐湘竹，帔拂疏霜簟秋玉。炎炎红镜东方开，
晕如车轮上裴回，啾啾赤帝骑龙来。

卷 390_59【河南府试十二月乐词·七月】

李贺

星依云渚冷，露滴盘中圆。好花生木末，衰蕙愁空园。
夜天如玉砌，池叶极青钱。仅厌舞衫薄，稍知花簟寒。
晓风何拂拂，北斗光阑干。

· 全唐诗 ·

卷 390_60【河南府试十二月乐词·八月】

李贺

嬖妾怨夜长，独客梦归家。傍檐虫缉丝，向壁灯垂花。
帘外月光吐，帘内树影斜。悠悠飞露姿，点缀池中荷。

卷 390_61【河南府试十二月乐词·九月】

李贺

离宫散萤天似水，竹黄池冷芙蓉死。月缀金铺光脉脉，
凉苑虚庭空澹白。露花飞飞风草草，翠锦斓斑满层道。
鸡人罢唱晓珑璁，鸦啼金井下疏桐。

卷 390_62【河南府试十二月乐词·十月】

李贺

玉壶银箭稍难倾，釭花夜笑凝幽明。碎霜斜舞上罗幕，
烛龙两行照飞阁。珠帷怨卧不成眠，金凤刺衣著体寒，
长眉对月斗弯环。

· 全唐诗 ·

卷 390_63【河南府试十二月乐词·十一月】

李贺

宫城团回凜严光，白天碎碎堕琼芳。挝钟高饮千日酒，
却天凝寒作君寿。御沟泉合如环素，火井温泉在何处。

卷 390_64【河南府试十二月乐词·十二月】

李贺

日脚淡光红洒洒，薄霜不销桂枝下。
依稀和气排冬严，已就长日辞长夜。

卷 390_65【河南府试十二月乐词·闰月】

李贺

帝重光，年重时，七十二候回环推，天官玉琯灰剩飞。
今岁何长来岁迟，王母移桃献天子，羲氏和氏迂龙辔。

· 全唐诗 ·

卷 390_66【天上谣】

李贺

天河夜转漂回星，银浦流云学水声。玉宫桂树花未落，
仙妾采香垂珮缨。秦妃卷帘北窗晓，窗前植桐青凤小。

王子吹笙鹅管长，呼龙耕烟种瑶草。粉霞红绶藕丝裙，
青洲步拾兰苕春。东指羲和能走马，海尘新生石山下。

卷 390_67【浩歌】

李贺

南风吹山作平地，帝遣天吴移海水。王母桃花千遍红，
彭祖巫咸几回死。青毛骢马参差钱，娇春杨柳含细烟。

箏人劝我金屈卮，神血未凝身问谁。不须浪饮丁都护，
世上英雄本无主。买丝绣作平原君，有酒惟浇赵州土。

漏催水咽玉蟾蜍，卫娘发薄不胜梳。看见秋眉换新绿，
二十男儿那刺促。

· 全唐诗 ·

卷 390_68【秋来】

李贺

桐风惊心壮士苦，衰灯络纬啼寒素。谁看青简一编书，
不遣花虫粉空蠹。思牵今夜肠应直，雨冷香魂吊书客。
秋坟鬼唱鲍家诗，恨血千年土中碧。

卷 390_69【帝子歌】

李贺

洞庭明月一千里，凉风雁啼天在水。九节菖蒲石上死，
湘神弹琴迎帝子。山头老桂吹古香，雌龙怨吟寒水光。
沙浦走鱼白石郎，闲取真珠掷龙堂。

卷 390_70【秦王饮酒】

李贺

秦王骑虎游八极，剑光照空天自碧。羲和敲日玻璃声，
劫灰飞尽古今平。龙头泻酒邀酒星，金槽琵琶夜枰枰。
洞庭雨脚来吹笙，酒酣喝月使倒行。银云栉栉瑶殿明，
宫门掌事报一更。花楼玉凤声娇狞，海绡红文香浅清，

· 全唐诗 ·

黄鹄跌舞千年觥。仙人烛树蜡烟轻，清琴醉眼泪泓泓。

卷 390_71 【洛姝真珠】

李贺

真珠小娘下清廓，洛苑香风飞绰绰。寒鬓斜钗玉燕光，
高楼唱月敲悬珰。兰风桂露洒幽翠，红弦袅云咽深思。
花袍白马不归来，浓蛾叠柳香唇醉。金鹅屏风蜀山梦，
鸾裾凤带行烟重。八骢笼晃脸差移，日丝繁散曛罗洞。
市南曲陌无秋凉，楚腰卫鬓四时芳。玉喉窈窕排空光，
牵云曳雪留陆郎。

卷 390_72 【李夫人歌】

李贺

紫皇宫殿重重开，夫人飞入琼瑶台。绿香绣帐何时歇，
青云无光宫水咽。翩联桂花坠秋月，孤鸾惊啼商丝发。
红壁阑珊悬珮珰，歌台小妓遥相望。玉蟾滴水鸡人唱，
露华兰叶参差光。

· 全唐诗 ·

卷 390_73【走马引】

李贺

我有辞乡剑，玉锋堪截云。襄阳走马客，意气自生春。
朝嫌剑花净，暮嫌剑光冷。能持剑向人，不解持照身。

卷 390_74【湘妃】

李贺

筠竹千年老不死，长伴秦娥盖湘水。蛮娘吟弄满寒空，
九山静绿泪花红。离鸾别凤烟梧中，巫云蜀雨遥相通。
幽愁秋气上青枫，凉夜波间吟古龙。

卷 390_75【南园十三首】

李贺

花枝草蔓眼中开，小白长红越女腮。
可怜日暮嫣香落，嫁与春风不用媒。

宫北田塍晓气酣，黄桑饮露窳宫帘。
长腰健妇偷攀折，将喂吴王八茧蚕。

· 全唐诗 ·

竹里缲丝挑网车，青蝉独噪日光斜。
桃胶迎夏香琥珀，自课越佣能种瓜。

三十未有二十馀，白日长饥小甲蔬。
桥头长老相哀念，因遗戎韬一卷书。

男儿何不带吴钩，收取关山五十州。
请君暂上凌烟阁，若个书生万户侯。

寻章摘句老雕虫，晓月当帘挂玉弓。
不见年年辽海上，文章何处哭秋风。

长卿牢落悲空舍，曼倩诙谐取自容。
见买若耶溪水剑，明朝归去事猿公。

春水初生乳燕飞，黄蜂小尾扑花归。
窗含远色通书幌，鱼拥香钩近石矶。

泉沙软卧鸳鸯暖，曲岸回篙舴艋迟。
泻酒木栏椒叶盖，病容扶起种菱丝。

边让今朝忆蔡邕，无心裁曲卧春风。
舍南有竹堪书字，老去溪头作钓翁。

长峦谷口倚嵇家，白昼千峰老翠华。
自履藤鞋收石蜜，手牵苔絮长莼花。

· 全唐诗 ·

松溪黑水新龙卵，桂洞生硝旧马牙。
谁遣虞卿裁道帙，轻绡一匹染朝霞。

小树开朝径，长茸湿夜烟。柳花惊雪浦，麦雨涨溪田。
古刹疏钟度，遥岚破月悬。沙头敲石火，烧竹照渔船。

· 全唐诗 ·

卷三百九十一

卷 391_1 【金铜仙人辞汉歌】

李贺

茂陵刘郎秋风客，夜闻马嘶晓无迹。画栏桂树悬秋香，
三十六宫土花碧。魏官牵车指千里，东关酸风射眸子。

空将汉月出宫门，忆君清泪如铅水。衰兰送客咸阳道，
天若有情天亦老。携盘独出月荒凉，渭城已远波声小。

卷 391_2 【古悠悠行】

李贺

白景归西山，碧华上迢迢。今古何处尽，千岁随风飘。
海沙变成石，鱼沫吹秦桥。空光远流浪，铜柱从年消。

· 全唐诗 ·

卷 391_3【黄头郎】

李贺

黄头郎，捞拢去不归。南浦芙蓉影，愁红独自垂。
水弄湘娥珮，竹啼山露月。玉瑟调青门，石云湿黄葛。
沙上蘼芜花，秋风已先发。好持扫罗荐，香出鸳鸯热。

卷 391_4【马诗二十三首】

李贺

龙脊贴连钱，银蹄白踏烟。无人织锦韉，谁为铸金鞭。
腊月草根甜，天街雪似盐。未知口硬软，先拟蒺藜衔。
忽忆周天子，驱车上玉山。鸣驺辞凤苑，赤骥最承恩。
此马非凡马，房星本是星。向前敲瘦骨，犹自带铜声。
大漠山如雪，燕山月似钩。何当金络脑，快走踏清秋。
饥卧骨查牙，粗毛刺破花。鬣焦朱色落，发断锯长麻。
西母酒将阑，东王饭已干。君王若燕去，谁为拽车辕。
赤兔无人用，当须吕布骑。吾闻果下马，羁策任蛮儿。
飏叔去匆匆，如今不豢龙。夜来霜压栈，骏骨折西风。
催榜渡乌江，神骓泣向风。君王今解剑，何处逐英雄。
内马赐宫人，银鞴刺骅骝。午时盐坂上，蹭蹬溘风尘。
批竹初攒耳，桃花未上身。他时须搅阵，牵去借将军。
宝玦谁家子，长闻侠骨香。堆金买骏骨，将送楚襄王。

· 全唐诗 ·

香襍赭罗新，盘龙蹙镫鳞。回看南陌上，谁道不逢春。
不从桓公猎，何能伏虎威。一朝沟陇出，看取拂云飞。
唐剑斩隋公，拳毛属太宗。莫嫌金甲重，且去捉旋风。
白铁剉青禾，砧间落细莎。世人怜小颈，金埴畏长牙。
伯乐向前看，旋毛在腹间。只今掇白草，何日蓦青山。
萧寺驮经马，元从竺国来。空知有善相，不解走章台。
重围如燕尾，宝剑似鱼肠。欲求千里脚，先采眼中光。
暂系腾黄马，仙人上彩楼。须鞭玉勒吏，何事谪高州。
汗血到王家，随鸾撼玉珂。少君骑海上，人见是青骡。
武帝爱神仙，烧金得紫烟。厩中皆肉马，不解上青天。

卷 391_5【申胡子觥策歌】

李贺

颜热感君酒，含嚼芦中声。花娘蓂纓妥，休睡芙蓉屏。
谁截太平管，列点排空星。直贯开花风，天上驱云行。
今夕岁华落，令人惜平生。心事如波涛，中坐时时惊。
朔客骑白马，剑弭悬兰纓。俊健如生猱，肯拾蓬中萤。

卷 391_6【老夫采玉歌】

李贺

采玉采玉须水碧，琢作步摇徒好色。老夫饥寒龙为愁，

· 全唐诗 ·

蓝溪水气无清白。夜雨冈头食蓁子，杜鹃口血老夫泪。
蓝溪之水厌生人，身死千年恨溪水。斜山柏风雨如啸，
泉脚挂绳青袅袅。村寒白屋念娇婴，古台石磴悬肠草。

卷 391_7【伤心行】

李贺

咽咽学楚吟，病骨伤幽素。秋姿白发生，木叶啼风雨。
灯青兰膏歇，落照飞蛾舞。古壁生凝尘，羁魂梦中语。

卷 391_8【湖中曲】

李贺

长眉越沙采兰若，桂叶水荇春漠漠。横船醉眠白昼闲，
渡口梅风歌扇薄。燕钗玉股照青渠，越王娇郎小字书。
蜀纸封巾报云鬓，晚漏壶中水淋尽。

卷 391_9【黄家洞】

李贺

雀步蹙沙声促促，四尺角弓青石镞。黑幡三点铜鼓鸣，

· 全唐诗 ·

高作猿啼摇箭箠。彩巾缠踣幅半斜，溪头簇队映葛花。
山潭晚雾吟白鼉，竹蛇飞蠹射金沙。闲驱竹马缓归家，
官军自杀容州槎。

卷 391_10【屏风曲】

李贺

蝶栖石竹银交关，水凝绿鸭琉璃钱。团回六曲抱膏兰，
将鬟镜上掷金蝉。沉香火暖茱萸烟，酒觥绾带新承欢。
月风吹露屏外寒，城上乌啼楚女眠。

卷 391_11【南山田中行】

李贺

秋野明，秋风白，塘水漻漻虫啧啧。云根苔藓山上石，
冷红泣露娇啼色。荒畦九月稻叉牙，蛰萤低飞陇径斜。
石脉水流泉滴沙，鬼灯如漆点松花。

· 全唐诗 ·

卷 391_12【贵主征行乐】

李贺

奚骑黄铜连锁甲，罗旗香干金画叶。中军留醉河阳城，
娇嘶紫燕踏花行。春营骑将如红玉，走马捎鞭上空绿。
女垣素月角咿咿，牙帐未开分锦衣。

卷 391_13【酒罢张大彻索赠诗】

李贺

长鬣张郎三十八，天遣裁诗花作骨。往还谁是龙头人，
公主遣乘鱼须笏。太行青草上白衫，匣中章奏密如蚕。
金门石阁知卿有，豸角鸡香早晚含。陇西长吉摧颓客，
酒阑感觉中区窄。葛衣断碎赵城秋，吟诗一夜东方白。

卷 391_14【罗浮山父与葛篇】

李贺

依依宜织江雨空，雨中六月兰台风。博罗老仙时出洞，
千岁石床啼鬼工。蛇毒浓凝洞堂湿，江鱼不食衔沙立。
欲剪箱中一尺天，吴娥莫道吴刀涩。

· 全唐诗 ·

卷 391_15 【仁和里杂叙皇甫湜】

李贺

大人乞马癯乃寒，宗人贷宅荒厥垣。横庭鼠径空土涩，
出篱大枣垂朱残。安定美人截黄绶，脱落缨裾暝朝酒。

还家白笔未上头，使我清声落人后。枉辱称知犯君眼，
排引才升强絙断。洛风送马入长关，阖扇未开逢楔犬。

那知坚都相草草，客枕幽单看春老。归来骨薄面无膏，
疫气冲头鬓茎少。欲雕小说干天官，宗孙不调为谁怜。
明朝下元复西道，崆峒叙别长如天。

卷 391_16 【宫娃歌】

李贺

蜡光高悬照纱空，花房夜捣红守宫。象口吹香氎 暖，
七星挂城闻漏板。寒入罽毼殿影昏，彩鸾帘额著霜痕。

啼蛄吊月钩栏下，屈膝铜铺锁阿甄。梦入家门上沙渚，
天河落处长洲路。愿君光明如太阳，放妾骑鱼撇波去。

· 全唐诗 ·

卷 391_17 【堂堂】

李贺

堂堂复堂堂，红脱梅灰香。十年粉蠹生画梁，
饥虫不食推碎黄。蕙花已老桃叶长，禁院悬帘隔御光。
华清源中礬石汤，裴回白凤随君王。

卷 391_18 【勉爱行二首送小季之庐山】

李贺

洛郊无俎豆，弊厩惭老马。小雁过炉峰，影落楚水下。
长船倚云泊，石镜秋凉夜。岂解有乡情，弄月聊呜哑。

别柳当马头，官槐如兔目。欲将千里别，持我易斗粟。
南云北云空脉断，灵台经络悬春线。青轩树转月满床，

下国饥儿梦中见。维尔之昆二十余，年来持镜颇有须。
辞家三载今如此，索米王门一事无。荒沟古水光如刀，
庭南拱柳生蛭螬。江干幼客真可念，郊原晚吹悲号号。

· 全唐诗 ·

卷 391_19 【致酒行】

李贺

零落栖迟一杯酒，主人奉觞客长寿。主父西游困不归，
家人折断门前柳。吾闻马周昔作新丰客，天荒地老无人识。
空将笺上两行书，直犯龙颜请恩泽。我有迷魂招不得，
雄鸡一声天下白。少年心事当拏云，谁念幽寒坐呜呃。

卷 391_20 【长歌续短歌】

李贺

长歌破衣襟，短歌断白发。秦王不可见，旦夕成内热。
渴饮壶中酒，饥拔陇头粟。凄凄四月阑，千里一时绿。
夜峰何离离，明月落石底。裴回沿石寻，照出高峰外。
不得与之游，歌成鬓先改。

卷 391_21 【公莫舞歌】

李贺

方花古础排九楹，刺豹淋血盛银罍。华筵鼓吹无桐竹，
长刀直立割鸣箏。横楣粗锦生红纬，日炙锦嫣王未醉。

· 全唐诗 ·

腰下三看宝玦光，项庄掉箭栏前起。材官小臣公莫舞，
座上真人赤龙子。芒砀云瑞抱天回，咸阳王气清如水。
铁枢铁键重束关，大旗五丈撞双镗。汉王今日颁秦印，
绝膑刳肠臣不论。

卷 391_22【昌谷北园新笋四首】

李贺

箨落长竿削玉开，君看母笋是龙材。
更容一夜抽千尺，别却池园数寸泥。
斫取青光写楚辞，腻香春粉黑离离。
无情有恨何人见，露压烟啼千万枝。
家泉石眼两三茎，晓看阴根紫脉生。
今年水曲春沙上，笛管新篁拔玉青。
古竹老梢惹碧云，茂陵归卧叹清贫。
风吹千亩迎雨啸，鸟重一枝入酒尊。

卷 391_23【恼公】

李贺

宋玉愁空断，娇饶粉自红。歌声春草露，门掩杏花丛。
注口樱桃小，添眉桂叶浓。晓奁妆秀靥，夜帐减香筒。
钿镜飞孤鹊，江图画水萍。陂陀梳碧凤，腰袅带金虫。

· 全唐诗 ·

杜若含清露，河蒲聚紫茸。月分蛾黛破，花合靥朱融。
发重疑盘雾，腰轻乍倚风。密书题豆蔻，隐语笑芙蓉。
莫锁茱萸匣，休开翡翠笼。弄珠惊汉燕，烧蜜引胡蜂。
醉缣抛红网，单罗挂绿蒙。数钱教姹女，买药问巴賁。
匀脸安斜雁，移灯想梦熊。肠攒非束竹，肱急是张弓。
晚树迷新蝶，残霞忆断虹。古时填渤澥，今日凿崆峒。
绣沓褰长幔，罗裙结短封。心摇如舞鹤，骨出似飞龙。
井槛淋清漆，门铺缀白铜。隈花开兔径，向壁印狐踪。
玳瑁钉帘薄，琉璃叠扇烘。象床缘素柏，瑶席卷香葱。
细管吟朝幌，芳醪落夜枫。宜男生楚巷，栀子发金墉。
龟甲开屏涩，鹅毛渗墨浓。黄庭留卫瓘，绿树养韩冯。
鸡唱星悬柳，鸦啼露滴桐。黄娥初出座，宠妹始相从。
蜡泪垂兰烬，秋芜扫绮栊。吹笙翻旧引，沽酒待新丰。
短珮愁填粟，长弦怨削菰。曲池眠乳鸭，小阁睡娃僮。
褥缝萼双线，钩绦辨五总。蜀烟飞重锦，峡雨溅轻容。
拂镜羞温峤，薰衣避贾充。鱼生玉藕下，人在石莲中。
含水弯蛾翠，登楼选马骕。使君居曲陌，园令住临邛。
桂火流苏暖，金炉细炷通。春迟王子态，莺啭谢娘慵。
玉漏三星曙，铜街五马逢。犀株防胆怯，银液镇心忪。
跳脱看年命，琵琶道吉凶。王时应七夕，夫位在三宫。
无力涂云母，多方带药翁。符因青鸟送，囊用绛纱缝。
汉苑寻官柳，河桥阁禁钟。月明中妇觉，应笑画堂空。

· 全唐诗 ·

卷 391_24【感讽五首】

李贺

合浦无明珠，龙洲无木奴。足知造化力，不给使君须。
越妇未织作，吴蚕始蠕蠕。县官骑马来，狞色虬紫须。

怀中一方板，板上数行书。不因使君怒，焉得诣尔庐。
越妇拜县官，桑牙今尚小。会待春日晏，丝车方掷掉。

越妇通言语，小姑具黄粱。县官踏餐去，簿吏复登堂。
奇俊无少年，日车何躑躅。我待纡双绶，遗我星星发。

都门贾生墓，青蝇久断绝。寒食摇扬天，愤景长肃杀。
皇汉十二帝，唯帝称睿哲。一夕信竖儿，文明永沦歇。

南山何其悲，鬼雨洒空草。长安夜半秋，风前几人老。
低迷黄昏径，袅袅青栎道。月午树无影，一山唯白晓。
漆炬迎新人，幽圻萤扰扰。

星尽四方高，万物知天曙。己生须己养，荷担出门去。
君平久不反，康伯循国路。晓思何譊譊，闾闾千人语。

石根秋水明，石畔秋草瘦。侵衣野竹香，蛰蛰垂叶厚。
岑中月归来，蟾光挂空秀。桂露对仙娥，星星下云逗。
凄凉栀子落，山璺泣清漏。下有张仲蔚，披书案将朽。

· 全唐诗 ·

卷 391_25 【三月过行宫】

李贺

渠水红繁拥御墙，风娇小叶学娥妆。

垂帘几度青春老，堪锁千年白日长。

· 全唐诗 ·

卷三百九十二

卷 392_1【追和何、谢铜雀妓】

李贺

佳人一壶酒，秋容满千里。石马卧新烟，忧来何所似。
歌声且潜弄，陵树风自起。长裾压高台，泪眼看花机。

卷 392_2【送秦光禄北征】

李贺

北虏胶堪折，秋沙乱晓颿。髯胡频犯塞，骄气似横霓。
灞水楼船渡，营门细柳开。将军驰白马，豪彦骋雄材。
箭射欃枪落，旗悬日月低。榆稀山易见，甲重马频嘶。
天远星光没，沙平草叶齐。风吹云路火，雪污玉关泥。
屡断呼韩颈，曾然董卓脐。太常犹旧宠，光禄是新隄。
宝玦麒麟起，银壶狔狔啼。桃花连马发，彩絮扑鞍来。
呵臂悬金斗，当唇注玉壘。清苏和碎蚁，紫腻卷浮杯。
虎踞先蒙马，鱼肠且断犀。Z \ 西旅狗，蹙额北方奚。
守帐然香暮，看鹰永夜栖。黄龙就别镜，青冢念阳台。

· 全唐诗 ·

周处长桥役，侯调短弄哀。钱塘阶凤羽，正室擘鸾钗。

内子攀琪树，羌儿奏落梅。今朝擎剑去，何日刺蛟回。

卷 392_3【酬答二首】

李贺

金鱼公子夹衫长，密装腰鞬割玉方。

行处春风随马尾，柳花偏打内家香。

雍州二月梅池春，御水陂鵲暖白蘋。

试问酒旗歌板地，今朝谁是拗花人。

卷 392_4【画角东城】

李贺

河转曙萧萧，鸦飞睥睨高。帆长摽越甸，壁冷挂吴刀。

淡菜生寒日，鲙鱼腥白涛。水花沾抹额，旗鼓夜迎潮。

· 全唐诗 ·

卷 392-5【谢秀才有妾缟练，改从于人，秀才引留之不得，从生感忆，座人制诗嘲谢，贺复继四首】

李贺

谁知泥忆云，望断梨花春。荷丝制机练，竹叶剪花裙。
月明啼阿姊，灯暗会良人。也识君夫婿，金鱼挂在身。

铜镜立青鸾，燕脂拂紫绵。腮花弄暗粉，眼尾泪侵寒。
碧玉破不复，瑶琴重拨弦。今日非昔日，何人敢正看。

洞房思不禁，蜂子作花心。灰暖残香炷，发冷青虫簪。
夜遥灯焰短，睡熟小屏深。好作鸳鸯梦，南城罢捣砧。

寻常轻宋玉，今日嫁文鸯。戟干横龙簏，刀环倚桂窗。
邀人裁半袖，端坐据胡床。泪湿红轮重，栖乌上井梁。

卷 392_6【昌谷读书示巴童】

李贺

虫响灯光薄，宵寒药气浓。君怜垂翅客，辛苦尚相从。

· 全唐诗 ·

卷 392_7【巴童答】

李贺

巨鼻宜山褐，庞眉入苦吟。非君唱乐府，谁识怨秋深。

卷 392_8【代崔家送客】

李贺

行尽柳烟下，马蹄白翩翩。恐随行处尽，何忍重扬鞭。

卷 392_9【出城】

李贺

雪下桂花稀，啼乌被弹归。关水乘驴影，秦风帽带垂。
入乡试万里，无印自堪悲。卿卿忍相问，镜中双泪姿。

卷 392_10【莫种树】

李贺

园中莫种树，种树四时愁。独睡南床月，今秋似去秋。

· 全唐诗 ·

卷 392_11 【将发】

李贺

东床卷席罢，溷落将行去。秋白遥遥空，日满门前路。

卷 392_12 【追赋画江潭苑四首】

李贺

吴苑晓苍苍，宫衣水溅黄。小鬟红粉薄，骑马珮珠长。
路指台城迥，罗薰袴褶香。行云沾翠辇，今日似襄王。

宝袜菊衣单，蕉花密露寒。水光兰泽叶，带重剪刀钱。
角暖盘弓易，靴长上马难。泪痕沾寝帐，匀粉照金鞍。

剪翅小鹰斜，绦根玉辘花。鞦垂妆钿粟，箭箠钉文牙。
狒狒啼深竹，鸂鶒老湿沙。宫官烧蜡火，飞烬污铅华。

十骑簇芙蓉，宫衣小队红。练香熏宋鹊，寻箭踏卢龙。
旗湿金铃重，霜干玉镫空。今朝画眉早，不待景阳钟。

· 全唐诗 ·

卷 392_13 【潞州张大宅病酒，遇江使，寄上十四兄】

李贺

秋至昭关后，当知赵国寒。系书随短羽，写恨破长笺。
病客眠清晓，疏桐坠绿鲜。城鸦啼粉堞，军吹压芦烟。
岸帻褰沙幌，枯塘卧折莲。木窗银迹画，石磴水痕钱。
旅酒侵愁肺，离歌绕懦弦。诗封两条泪，露折一枝兰。
莎老沙鸡泣，松干瓦兽残。觉骑燕地马，梦载楚溪船。
椒桂倾长席，鲈鲙斫玳筵。岂能忘旧路，江岛滞佳年。

卷 392_14 【难忘曲】

李贺

夹道开洞门，弱杨低画戟。帘影竹华起，箫声吹日色。
蜂语绕妆镜，拂蛾学春碧。乱系丁香梢，满栏花向夕。

卷 392_15 【贾公闾贵婿曲】

李贺

朝衣不须长，分花对袍缝。嚶嚶白马来，满脑黄金重。
今朝香气苦，珊瑚涩难枕。且要弄风人，暖蒲沙上饮。

· 全唐诗 ·

燕语踏帘钩，日虹屏中碧。潘令在河阳，无人死芳色。

卷 392_16【夜饮朝眠曲】

李贺

觞酣出座东方高，腰横半解星劳劳。柳苑鸦啼公主醉，
薄露压花蕙园气。玉转湿丝牵晓水，熟粉生香琅玕紫。
夜饮朝眠断无事，楚罗之帏卧皇子。

卷 392_17【王濬墓下作】

李贺

人间无阿童，犹唱水中龙。白草侵烟死，秋梨绕地红。
古书平黑石，袖剑断青铜。耕势鱼鳞起，坟科马鬣封。
菊花垂湿露，棘径卧干蓬。松柏愁香涩，南原几夜风。

卷 392_18【客游】

李贺

悲满千里心，日暖南山石。不谒承明庐，老作平原客。
四时别家庙，三年去乡国。旅歌屡弹铗，归问时裂帛。

· 全唐诗 ·

卷 392_19【崇义里滞雨】

李贺

落莫谁家子，来感长安秋。壮年抱羁恨，梦泣生白头。
瘦马秣败草，雨沫飘寒沟。南宫古帘暗，湿景传签筹。
家山远千里，云脚天东头。忧眠枕剑匣，客帐梦封侯。

卷 392_20【冯小怜】

李贺

湾头见小怜，请上琵琶弦。破得春风恨，今朝直几钱。
裙垂竹叶带，鬓湿杏花烟。玉冷红丝重，齐宫妾驾鞭。

卷 392_21【赠陈商】

李贺

长安有男儿，二十心已朽。楞伽堆案前，楚辞系肘后。
人生有穷拙，日暮聊饮酒。只今道已塞，何必须白首。
凄凄陈述圣，披褐鉏俎豆。学为尧舜文，时人责衰偶。
柴门车辙冻，日下榆影瘦。黄昏访我来，苦节青阳皱。
太华五千仞，劈地抽森秀。旁古无寸寻，一上戛牛斗。

· 全唐诗 ·

公卿纵不怜，宁能锁吾口。李生师太华，大坐看白昼。
逢霜作朴楸，得气为春柳。礼节乃相去，憔悴如刍狗。

风雪直斋坛，墨组贯铜绶。臣妾气态间，唯欲承箕帚。
天眼何时开，古剑庸一吼。

卷 392_22 【钓鱼诗】

李贺

秋水钓红渠，仙人待素书。菱丝萦独茧，蒲米蛰双鱼。
斜竹垂清沼，长纶贯碧虚。饵悬春蜥蜴，钩坠小蟾蜍。
詹子情无限，龙阳恨有余。为看烟浦上，楚女泪沾裾。

卷 392_23 【奉和二兄罢使遣马归延州】

李贺

空留三尺剑，不用一丸泥。马向沙场去，人归故国来。
笛愁翻陇水，酒喜沥春灰。锦带休惊雁，罗衣尚斗鸡。
还吴已渺渺，入郢莫凄凄。自是桃李树，何畏不成蹊。

· 全唐诗 ·

卷 392_24 【答赠】

李贺

本是张公子，曾名萼绿华。沉香熏小像，杨柳伴啼鸦。

露重金泥冷，杯阑玉树斜。琴堂沽酒客，新买后园花。

卷 392_25 【题赵生壁】

李贺

大妇然竹根，中妇舂玉屑。冬暖拾松枝，日烟坐蒙灭。

木藓青桐老，石井水声发。曝背卧东亭，桃花满肌骨。

卷 392_26 【感春】

李贺

日暖自萧条，花悲北郭骚。榆穿莱子眼，柳断舞儿腰。

上幕迎神燕，飞丝送百劳。胡琴今日恨，急语向檀槽。

· 全唐诗 ·

卷 392_27 【仙人】

李贺

弹琴石壁上，翻翻一仙人。手持白鸾尾，夜扫南山云。
鹿饮寒涧下，鱼归清海滨。当时汉武帝，书报桃花春。

卷 392_28 【河阳歌】

李贺

染罗衣，秋蓝难著色。不是无心人，为作台邛客。
花烧中潭城，颜郎身已老。惜许两少年，抽心似春草。

今日见银牌，今夜鸣玉晏。牛头高一尺，隔坐应相见。
月从东方来，酒从东方转。觥船饫口红，蜜炬千枝烂。

卷 392_29 【花游曲】

李贺

春柳南陌态，冷花寒露姿。今朝醉城外，拂镜浓扫眉。
烟湿愁车重，红油覆画衣。舞裙香不暖，酒色上来迟。

· 全唐诗 ·

卷 392_30【春昼】

李贺

朱城报春更漏转，光风催兰吹小殿。草细堪梳，柳长如线。
卷衣秦帝，扫粉赵燕。日含画幕，蜂上罗荐。平阳花坞，
河阳花县。越妇支机，吴蚕作茧。菱汀系带，荷塘倚扇。
江南有情，塞北无恨。

卷 392_31【安乐宫】

李贺

深井桐乌起，尚复牵情水。未盥邵陵瓜，瓶中弄长翠。
新成安乐宫，宫如凤凰翅。歌回蜡板鸣，左馆提壶使。
绿蘩悲水曲，茱萸别秋子。

卷 392_32【胡蝶飞】

李贺

杨花扑帐春云热，龟甲屏风醉眼缬。
东家胡蝶西家飞，白骑少年今日归。

· 全唐诗 ·

卷 392_33 【梁公子】

李贺

风采出萧家，本是菖蒲花。南塘莲子熟，洗马走江沙。
御笺银沫冷，长簟凤窠斜。种柳营中暗，题书赐馆娃。

卷 392_34 【牡丹种曲】

李贺

莲枝未长秦蘅老，走马驮金鬪春草。水灌香泥却月盆，
一夜绿房迎白晓。美人醉语园中烟，晚华已散蝶又阑。

梁王老去罗衣在，拂袖风吹蜀国弦。归霞帔拖蜀帐昏，
嫣红落粉罢承恩。檀郎谢女眠何处，楼台月明燕夜语。

卷 392_35 【后园凿井歌】

李贺

井上辘轳床上转。水声繁，弦声浅。情若何，荀奉倩。
城头日，长向城头住。一日作千年，不须流下去。

· 全唐诗 ·

卷 392_36 【开愁歌】

李贺

秋风吹地百草干，华容碧影生晚寒。我当二十不得意，
一心愁谢如枯兰。衣如飞鹑马如狗，临歧击剑生铜吼。

旗亭下马解秋衣，请赏宜阳一壶酒。壶中唤天云不开，
白昼万里闲凄迷。主人劝我养心骨，莫受俗物相填D ^。

卷 392_37 【秦宫诗】

李贺

越罗衫袂迎春风，玉刻麒麟腰带红。楼头曲宴仙人语，
帐底吹笙香雾浓。人间酒暖春茫茫，花枝入帘白日长。

飞窗复道传筹饮，十夜铜盘腻烛黄。秃衿小袖调鹦鹉，
紫绣麻x 踏哮虎。斫桂烧金待晓筵，白鹿青苏夜半煮。

桐英永巷骑新马，内屋深屏生色画。开门烂用水衡钱，
卷起黄河向身泻。皇天厄运犹曾裂，秦宫一生花底活。
鸾篋夺得不还人，醉睡氍毹满堂月。

· 全唐诗 ·

卷 392_38 【古邺城童子谣，效王粲刺曹操】

李贺

邺城中，暮尘起。将黑丸，斫文吏。棘为鞭，虎为马。
团团走，邺城下。切玉剑，射日弓。献何人，奉相公。
扶毂来，关右儿。香扫涂，相公归。

卷 392_39 【杨生青花紫石砚歌】

李贺

端州石工巧如神，踏天磨刀割紫云。佣刊抱水含满唇，
暗洒苌弘冷血痕。纱帷昼暖墨花春，轻沍漂沫松麝薰。
干腻薄重立脚匀，数寸光秋无日昏。圆毫促点声静新，
孔砚宽顽何足云。

卷 392_40 【房中思】

李贺

新桂如蛾眉，秋风吹小绿。行轮出门去，玉銮声断续。
月轩下风露，晓庭自幽涩。谁能事贞素，卧听莎鸡泣。

· 全唐诗 ·

卷 392_41 【石城晓】

李贺

月落大堤上，女垣栖乌起。细露湿团红，寒香解夜醉。
女牛渡天河，柳烟满城曲。上客留断缨，残蛾斗双绿。

春帟依微蝉翼罗，横茵突金隐体花。帟前轻絮鹤毛起，
欲说春心无所似。

卷 392_42 【苦昼短】

李贺

飞光飞光，劝尔一杯酒。吾不识青天高，黄地厚，
唯见月寒日暖，来煎人寿。食熊则肥，食蛙则瘦。
神君何在，太一安有。天东有若木，下置衔烛龙。

吾将斩龙足，嚼龙肉。使之朝不得回，夜不得伏。
自然老者不死，少者不哭。何为服黄金，吞白玉。
谁似任公子，云中骑碧驴。刘彻茂陵多滞骨，
嬴政梓棺费鲍鱼。

· 全唐诗 ·

卷 392_43 【章和二年中】

李贺

云萧索，田风拂拂，麦芒如簪黍如粟。关中父老百领襦，
关东吏人乏诟租。健犍春耕土膏黑，莠蒲丛丛沿水脉。
殷勤为我下田租，百钱携偿丝桐客。游春漫光坞花白，
野林散香神降席。拜神得寿献天子，七星贯断姮娥死。

卷 392_44 【春归昌谷】

李贺

束发方读书，谋身苦不早。终军未乘传，颜子鬓先老。
天网信崇大，矫士常慄慄。逸目骈甘华，羁心如荼蓼。
旱云二三月，岑岫相颠倒。谁揭赭玉盘，东方发红照。
春热张鹤盖，兔目官槐小。思焦面如病，尝胆肠似绞。
京国心烂漫，夜梦归家少。发轫东门外，天地皆浩浩。
青树骊山头，花风满秦道。宫台光错落，装尽偏峰峽。
细绿及团红，当路杂啼笑。香风下高广，鞍马正华耀。
独乘鸡栖车，自觉少风调。心曲语形影，只身焉足乐。
岂能脱负檐，刻鹤曾无兆。幽幽太华侧，老柏如建纛。
龙皮相排戛，翠羽更荡掉。驱趋委憔悴，眺览强容貌。
花蔓阁行轡，縠烟暝深徼。少健无所就，入门愧家老。
听讲依大树，观书临曲沼。知非出柙虎，甘作藏雾豹。

· 全唐诗 ·

韩鸟处矰缴，湘儵在笼罩。狭行无廓落，壮士徒轻躁。

卷 392_45【昌谷诗】

李贺

昌谷五月稻，细青满平水。遥峦相压叠，颓绿愁堕地。
光洁无秋思，凉旷吹浮媚。竹香满凄寂，粉节涂生翠。
草发垂恨鬓，光露泣幽泪。层围烂洞曲，芳径老红醉。
攒虫镂古柳，蝉子鸣高邃。大带委黄葛，紫蒲交狭浹。
石钱差复藉，厚叶皆蟠膩。汰沙好平白，立马印青字。
晚鳞自遨游，瘦鹄暝单跂。嘹嘹湿蛄声，咽源惊溅起。
纡缓玉真路，神娥蕙花里。苔絮萦涧砾，山实垂赭紫。
小柏俨重扇，肥松突丹髓。鸣流走响韵，垄秋拖光穉。
莺唱閼女歌，瀑悬楚练帔。风露满笑眼，骈岩杂舒坠。
乱条进石岭，细颈喧岛戾。日脚扫昏翳，新云启华闕。
谧谧厌夏光，商风道清气。高眠服玉容，烧桂祀天几。
雾衣夜披拂，眠坛梦真粹。待驾栖鸾老，故宫椒壁圯。
鸿珑数铃响，羈臣发凉思。阴藤束朱键，龙帐著魑魅。
碧锦帖花櫳，香衾事残贵。歌尘蠹木在，舞彩长云似。
珍壤割绣段，里俗祖风义。邻凶不相杵，疫病无邪祀。
鲐皮识仁惠，兕角知醜耻。县省司刑官，户乏诟租吏。
竹藪添堕简，石矶引钩饵。溪湾转水带，芭蕉倾蜀纸。
岑光晃縠襟，孤景拂繁事。泉尊陶宰酒，月眉谢郎妓。
丁丁幽钟远，矫矫单飞至。霞巘殷嵯峨，危溜听争次。
淡蛾流平碧，薄月眇阴悴。凉光入涧岸，廓尽山中意。

· 全唐诗 ·

渔童下宵网，霜禽竦烟翅。潭镜滑蛟涎，浮珠噉鱼戏。
风桐摇匣瑟，萤星锦城使。柳缀长缥带，篴掉短笛吹。
石根缘绿藓，芦笋抽丹渍。漂旋弄天影，古桧擎云臂。
愁月薇帐红，罍云香蔓刺。芒麦平百井，闲乘列千肆。
刺促成纪人，好学鸱夷子。

卷 392_46【铜驼悲】

李贺

落魄三月罢，寻花去东家。谁作送春曲，洛岸悲铜驼。
桥南多马客，北山饶古人。客饮杯中酒，驼悲千万春。
生世莫徒劳，风吹盘上烛。厌见桃株笑，铜驼夜来哭。

卷 392_47【自昌谷到洛后门】

李贺

九月大野白，苍岑竦秋门。寒凉十月末，露霰濛晓昏。
澹色结昼天，心事填空云。道上千里风，野竹蛇涎痕。
石涧淅波声，鸡叫清寒晨。强行到东舍，解马投旧邻。
东家名廖者，乡曲传姓辛。杖头非饮酒，吾请造其人。
始欲南去楚，又将西适秦。襄王与武帝，各自留青春。
闻道兰台上，宋玉无归魂。缃缥两行字，蛰虫蠹秋芸。
为探秦台意，岂命余负薪。

· 全唐诗 ·

卷 392_48【七月一日晓入太行山】

李贺

一夕绕山秋，香露溼蒙茷。新桥倚云阪，候虫嘶露朴。
洛南今已远，越衾谁为熟。石气何凄凄，老莎如短镞。

卷 392_49【秋凉诗，寄正字十二兄】

李贺

闭门感秋风，幽姿任契阔。大野生素空，天地旷肃杀。
露光泣残蕙，虫响连夜发。房寒寸辉薄，迎风绛纱折。
披书古芸馥，恨唱华容歇。百日不相知，花光变凉节。
弟兄谁念虑，笺翰既通达。青袍度白马，草简奏东阙。
梦中相聚笑，觉见半床月。长思剧寻环，乱忧抵覃葛。

· 全唐诗 ·

卷三百九十三

卷 393_1 【艾如张】

李贺

锦襜褕，绣裆襦。强饮啄，哺尔雏。陇东卧穽满风雨，
莫信笼媒陇西去。齐人织网如素空，张在野田平碧中。
网丝漠漠无形影，误尔触之伤首红。艾叶绿花谁剪刻，
中藏祸机不可测。

卷 393_2 【上云乐】

李贺

飞香走红满天春，花龙盘盘上紫云。三千宫女列金屋，
五十弦瑟海上闻。天江碎碎银沙路，嬴女机中断烟素。
断烟素，缝衣缕，八月一日君前舞。

· 全唐诗 ·

卷 393_3【摩多楼子】

李贺

玉塞去金人，二万四千里。风吹沙作云，一时渡辽水。
天白水如练，甲丝双串断。行行莫苦辛，城月犹残半。
晓气朔烟上，赳赳胡马蹄。行人临水别，隔陇长东西。

卷 393_4【猛虎行】

李贺

长戈莫春，长弩莫抨。乳孙哺子，教得生狞。
举头为城，掉尾为旌。东海黄公，愁见夜行。
道逢驺虞，牛哀不平。何用尺刀，壁上雷鸣。
泰山之下，妇人哭声。官家有程，吏不敢听。

卷 393_5【日出行】

李贺

白日下昆仑，发光如舒丝。徒照葵藿心，不照游子悲。
折折黄河曲，日从中央转。旸谷耳曾闻，若木眼不见。
奈尔铄石，胡为销人。羿弯弓属矢那不中，

· 全唐诗 ·

足令久不得奔，讵教晨光夕昏。

卷 393_6【苦篁调啸引】

李贺

请说轩辕在时事，伶伦采竹二十四。伶伦采之自昆丘，
轩辕诏遣中分作十二。伶伦以之正音律，轩辕以之调元气。

当时黄帝上天时，二十三管咸相随，唯留一管人间吹。
无德不能得此管，此管沉埋虞舜祠。

卷 393_7【拂舞歌辞】

李贺

吴娥声绝天，空云闲裴回。门外满车马，亦须生绿苔。
尊有乌程酒，劝君千万寿。全胜汉武锦楼上，
晓望晴寒饮花露。东方日不破，天光无老时。

丹成作蛇乘白雾，千年重化玉井土。从蛇作土一千载，
吴堤绿草年年在。背有八卦称神仙，邪鳞顽甲滑腥涎。

· 全唐诗 ·

卷 393_8【夜坐吟】

李贺

踏踏马蹄谁见过，眼看北斗直天河。西风罗幕生翠波，
铅华笑妾颦青蛾。为君起唱长相思，帘外严霜皆倒飞。
明星灿灿东方陲，红霞梢出东南涯，陆郎去矣乘班骓。

卷 393_9【筌篲引】

李贺

公乎公乎，提壶将焉如。屈平沉湘不足慕，
徐衍入海诚为愚。公乎公乎，床有菅席盘有鱼。
北里有贤兄，东邻有小姑。陇亩油油黍与葫，
瓦甒浊醪蚁浮浮。黍可食，醪可饮，公乎公乎其奈居。
被发奔流竟何如，贤兄小姑哭呜呜。

卷 393_10【巫山高】

李贺

碧丛丛，高插天，大江翻澜神曳烟。楚魂寻梦风飏然，
晓风飞雨生苔钱。瑶姬一去一千年，丁香筇竹啼老猿。

· 全唐诗 ·

古祠近月蟾桂寒，椒花坠红湿云间。

卷 393_11【平城下】

李贺

饥寒平城下，夜夜守明月。别剑无玉花，海风断鬓发。
塞长连白空，遥见汉旗红。青帐吹短笛，烟雾湿昼龙。
日晚在城上，依稀望城下。风吹枯蓬起，城中嘶瘦马。
借问筑城吏，去关几千里。惟愁裹尸归，不惜倒戈死。

卷 393_12【江南弄】

李贺

江中绿雾起凉波，天上叠嶂红嵯峨。水风浦云生老竹，
渚暝蒲帆如一幅。鲈鱼千头酒百斛，酒中倒卧南山绿。
吴歈越吟未终曲，江上团团帖寒玉。

卷 393_13【荣华乐】

李贺

鸢肩公子二十余，齿编贝，唇激朱。气如虹霓，饮如建瓴，

· 全唐诗 ·

走马夜归叫严更。径穿复道游椒房，龙裘金玦杂花光。
玉堂调笑金楼子，台下戏学邯郸倡。口吟舌话称女郎，
锦袂绣面汉帝旁。得明珠十斛，白璧一双，
新诏垂金曳紫光煌煌。马如飞，人如水，九卿六官皆望履。
将回日月先反掌，欲作江河唯画地。峨峨虎冠上切云，
竦剑晨趋凌紫氛。绣段千寻贻皂隶，黄金百镒贐家臣。
十二门前张大宅，晴春烟起连天碧。金铺缀日杂红光，
铜龙啗环似争力。瑶姬凝醉卧芳席，海素笼窗空下隔。
丹穴取凤充行庖，攫攫如拳那足食。金蟾呀呀兰烛香，
军装武妓声琅琅。谁知花雨夜来过，但见池台春草长。
嘈嘈弦吹匝天开，洪崖箫声绕天来。天长一矢贯双虎，
云弭绝骋聒旱雷。乱袖交竿管儿舞，吴音绿鸟学言语。
能教刻石平紫金，解送刻毛寄新兔。三皇皇后七贵人，
五十校尉二将军。当时飞去逐彩云，化作今日京华春。

卷 393_14【相劝酒】

李贺

羲和骋六辔，昼夕不曾闲。弹乌崦嵫竹，扶马蟠桃鞭。
蓐收既断翠柳，青帝又造红兰。尧舜至今万万岁，
数子将为倾盖间。青钱白璧买无端，丈夫快意方为欢。
臃肿熊何足云。会须钟饮北海，箕踞南山。
歌淫淫，管悒悒，横波好送雕题金。人生得意且如此，
何用强知元化心。相劝酒，终无辍。
伏愿陛下鸿名终不歇，子孙绵如石上葛。

· 全唐诗 ·

来长安，车骈骈。中有梁冀旧宅，石崇故园。

卷 393_15【瑶华乐】

李贺

穆天子，走龙媒。八轡冬珑逐天回，五精扫地凝云开。
高门左右日月环，四方错镂棱层殷。舞霞垂尾长盘珊，
江澄海净神母颜。施红点翠照虞泉，曳云拖玉下昆山。

列旆如松，张盖如轮。金风殿秋，清明发春。八銮十乘，
矗如云屯。琼钟瑶席甘露文，玄霜绛雪何足云。
薰梅染柳将赠君。铅华之水洗君骨，与君相对作真质。

卷 393_16【北中寒】

李贺

一方黑照三方紫，黄河冰合鱼龙死。三尺木皮断文理，
百石强车上河水。霜花草上大如钱，挥刀不入迷濛天。
争漈海水飞凌喧，山瀑无声玉虹悬。

· 全唐诗 ·

卷 393_17【梁台古愁】

李贺

梁王台沼空中立，天河之水夜飞入。台前斗玉作蛟龙，
绿粉扫天愁露湿。撞钟饮酒行射天，金虎蹙裘喷血斑。

朝朝暮暮愁海翻，长绳系日乐当年。芙蓉凝红得秋色，
兰脸别春啼脉脉。芦洲客雁报春来，寥落野篁秋漫白。

卷 393_18【公无出门】

李贺

天茫茫，地密密。熊虺食人魂，雪霜断人骨。
嗾犬狺狺相索索，舐掌偏宜佩兰客。帝遣乘轩灾自息，
玉星点剑黄金轭。我虽跨马不得还，历阳湖波大如山。

毒虬相视振金环，狻猊猱玃吐馋涎。鲍焦一世披草眠，
颜回廿九鬓毛斑。颜回非血衰，鲍焦不违天。天畏遭衔啮，
所以致之然。分明犹惧公不信，公看呵壁书问天。

· 全唐诗 ·

卷 393_19 【神弦别曲】

李贺

巫山小女隔云别，春风松花山上发。绿盖独穿香径归，
白马花竿前孑孑。蜀江风澹水如罗，堕兰谁泛相经过。
南山桂树为君死，云衫浅污胭脂花。

卷 393_20 【绿水词】

李贺

今宵好风月，阿侯在何处。为有倾人色，翻成足愁苦。
东湖采莲叶，南湖拔蒲根。未持寄小姑，且持感愁魂。

卷 393_21 【沙路曲】

李贺

柳脸半眠丞相树，珮马钉铃踏沙路。断烬遗香袅翠烟，
烛骑啼乌上天去。帝家玉龙开九关，帝前动笏移南山。
独垂重印押千官，金窠篆字红屈盘。沙路归来闻好语，
旱火不光天下雨。

· 全唐诗 ·

卷 393_22【上之回】

李贺

上之回，大旗喜。悬红云，挹凤尾。剑匣破，舞蛟龙。
蚩尤死，鼓逢逢。天高庆雷齐坠地，地无惊烟海千里。

卷 393_23【高轩过】

李贺

华裾织翠青如葱，金环压辔摇玲珑。马蹄隐耳声隆隆，
入门下马气如虹。云是东京才子，文章钜公。
二十八宿罗心胸，九精照耀贯当中。殿前作赋声摩空，
笔补造化天无功。庞眉书客感秋蓬，谁知死草生华风。
我今垂翅附冥鸿，他日不羞蛇作龙。

卷 393_24【贝宫夫人】

李贺

丁丁海女弄金环，雀钗翘揭双翅关。六宫不语一生闲，
高悬银榜照青山。长眉凝绿几千年，清凉堪老镜中鸾。
秋肌稍觉玉衣寒，空光帖妥水如天。

· 全唐诗 ·

卷 393_25 【兰香神女庙】

李贺

古春年年在，闲绿摇暖云。松香飞晚华，柳渚含日昏。
沙砌落红满，石泉生水芹。幽篁画新粉，蛾绿横晓门。
弱蕙不胜露，山秀愁空春。舞珮剪鸾翼，帐带涂轻银。
兰桂吹浓香，菱藕长莘莘。看雨逢瑶姬，乘船值江君。
吹箫饮酒醉，结绶金丝裙。走天呵白鹿，游水鞭锦鳞。
密发虚鬟飞，腻颊凝花匀。团鬟分蛛巢，秣眉笼小唇。
弄蝶和轻妍，风光怯腰身。深帟金鸭冷，奁镜幽凤尘。
踏雾乘同归，撼玉山上闻。

卷 393_26 【送韦仁实兄弟入关】

李贺

送客饮别酒，千觞无赭颜。何物最伤心，马首鸣金镮。
野色浩无主，秋明空旷间。坐来壮胆破，断目不能看。
行槐引西道，青梢长攒攒。韦郎好兄弟，叠玉生文翰。
我在山上舍，一亩蒿硗田。夜雨叫租吏，春声暗交关。
谁解念劳劳，苍突唯南山。

· 全唐诗 ·

卷 393_27【洛阳城外别皇甫湜】

李贺

洛阳吹别风，龙门起断烟。冬树束生涩，晚紫凝华天。
单身野霜上，疲马飞蓬间。凭轩一双泪，奉坠绿衣前。

卷 393_28【溪晚凉】

李贺

白狐向月号山风，秋寒扫云留碧空。玉烟青湿白如幢，
银湾晓转流天东。溪汀眠鹭梦征鸿，轻涟不语细游溶。
层岫回岑复叠龙，苦篁对客吟歌筒。

卷 393_29【官不来，题皇甫湜先辈厅】

李贺

官不来，官庭秋，老桐错干青龙愁。书司曹佐走如牛，
叠声问佐官来不。官不来，门幽幽。

· 全唐诗 ·

卷 393_30 【长平箭头歌】

李贺

漆灰骨末丹水沙，淒淒古血生铜花。白翎金鏃雨中尽，
直馀三脊残狼牙。我寻平原乘两马，驿东石田蒿坞下。

风长日短星萧萧，黑旗云湿悬空夜。左魂右魄啼肌瘦，
酪瓶倒尽将羊炙。虫栖雁病芦笋红，回风送客吹阴火。

访古洊澜收断镞，折锋赤璽曾刳肉。南陌东城马上儿，
劝我将金换簪竹。

卷 393_31 【江楼曲】

李贺

楼前流水江陵道，鲤鱼风起芙蓉老。晓钗催鬓语南风，
抽帆归来一日功。鼉吟浦口飞梅雨，竿头酒旗换青芷。

萧骚浪白云差池，黄粉油衫寄郎主。新槽酒声苦无力，
南湖一顷菱花白。眼前便有千里愁，小玉开屏见山色。

· 全唐诗 ·

卷 393_32【塞下曲】

李贺

胡角引北风，蓟门白于水。天含青海道，城头月千里。
露下旗濛濛，寒金鸣夜刻。蕃甲锁蛇鳞，马嘶青冢白。
秋静见旄头，沙远席羈愁。帐北天应尽，河声出塞流。

卷 393_33【染丝上春机】

李贺

玉罌泣水桐花井，菼丝沉水如云影。美人懒态燕脂愁，
春梭抛掷鸣高楼。彩线结茸背复叠，白袷玉郎寄桃叶，
为君挑鸾作腰绶，愿君处处宜春酒。

卷 393_34【五粒小松歌】

李贺

蛇子蛇孙鳞蜿蜿，新香几粒洪崖饭。绿波浸叶满浓光，
细束龙髯铰刀剪。主人壁上铺州图，主人堂前多俗儒。
月明白露秋泪滴，石笋溪云肯寄书。

· 全唐诗 ·

卷 393_35 【塘上行】

李贺

藕花凉露湿，花缺藕根涩。飞下雌鸳鸯，塘水声溘溘。

卷 393_36 【吕将军歌】

李贺

吕将军，骑赤兔。独携大胆出秦门，金粟堆边哭陵树。
北方逆气污青天，剑龙夜叫将军闲。将军振袖挥剑锷，
玉阙朱城有门阁。榼榼银龟摇白马，傅粉女郎火旗下。
恒山铁骑请金枪，遥闻箛中花箭香。西郊寒蓬叶如刺，
皇天新栽养神骥。厩中高桁排蹇蹄，饱食青刍饮白水。
圆苍低迷盖张地，九州人事皆如此。赤山秀铤御时英，
绿眼将军会天意。

卷 393_37 【休洗红】

李贺

休洗红，洗多红色浅。卿卿骋少年，昨日殷桥见。
封侯早归来，莫作弦上箭。

· 全唐诗 ·

卷 393_38 【神弦曲】

李贺

西山日没东山昏，旋风吹马马踏云。画弦素管声浅繁，
花裙綵屐步秋尘。桂叶刷风桂坠子，青狸哭血寒狐死。
古壁彩虬金帖尾，雨工骑入秋潭水。百年老鸮成木魅，
笑声碧火巢中起。

卷 393_39 【野歌】

李贺

鸦翎羽箭山桑弓，仰天射落衔芦鸿。麻衣黑肥冲北风，
带酒日晚歌田中。男儿屈穷心不穷，枯荣不等嗔天公。
寒风又变为春柳，条条看即烟濛濛。

卷 393_40 【神弦】

李贺

女巫浇酒云满空，玉炉炭火香冬冬。海神山鬼来座中，
纸钱窸窣鸣旋风。相思木帖金舞鸾，攒蛾一啼重一弹。
呼星召鬼歆杯盘，山魅食时人森寒。终南日色低平湾，

· 全唐诗 ·

神兮长在有无间。神嗔神喜师更颜，送神万骑还青山。

卷 393_41 【将进酒】

李贺

琉璃钟，琥珀浓，小槽酒滴真珠红。烹龙炮凤玉脂泣，
罗屏绣幕围香风。吹龙笛，击鼉鼓。皓齿歌，细腰舞。

况是青春日将暮，桃花乱落如红雨。劝君终日酩酊醉，
酒不到刘伶坟上土。

卷 393_42 【美人梳头歌】

李贺

西施晓梦绡帐寒，香鬟堕髻半沉檀。辘轳咿哑转鸣玉，
惊起芙蓉睡新足。双鸾开镜秋水光，解鬟临镜立象床。

一编香丝云撒地，玉钗落处无声腻。纤手却盘老鸦色，
翠滑宝钗簪不得。春风烂熳恼娇慵，十八鬟多无气力。

妆成o髻欹不斜，云裾数步踏雁沙。背人不语向何处，
下阶自折樱桃花。

· 全唐诗 ·

卷 393_43【月漉漉篇】

李贺

月漉漉，波烟玉。莎青桂花繁，芙蓉别江木。
粉态袪罗寒，雁羽铺烟湿。谁能看石帆，乘船镜中入。
秋白鲜红死，水香莲子齐。挽菱隔歌袖，绿刺冒银泥。

卷 393_44【京城】

李贺

驱马出门意，牢落长安心。两事谁向道，自作秋风吟。

卷 393_45【官街鼓】

李贺

晓声隆隆催转日，暮声隆隆呼月出。汉城黄柳映新帘，
柏陵飞燕埋香骨。槌发千年日长白，孝武秦王听不得。
从君翠发芦花色，独共南山守中国。几回天上葬神仙，
漏声相将无断缘。

· 全唐诗 ·

卷 393_46 【许公子郑姬歌】

李贺

许史世家外亲贵，宫锦千端买沉醉。铜驼酒熟烘明胶，
古堤大柳烟中翠。桂开客花名郑袖，入洛闻香鼎门口。

先将芍药献妆台，后解黄金大如斗。莫愁帘中许合欢，
清弦五十为君弹。弹声咽春弄君骨，骨兴牵人马上鞍。

两马八蹄踏兰苑，情如合竹谁能见。夜光玉枕栖凤凰，
袷罗当门刺纯线。长翻蜀纸卷明君，转角含商破碧云。

自从小厖来东道，曲里长眉少见人。相如冢上生秋柏，
三秦谁是言情客。蛾鬟醉眼拜诸宗，为谒皇孙请曹植。

卷 393_47 【新夏歌】

李贺

晓木千笼真蜡彩，落蕊枯香数分在。阴枝秀牙卷缥茸，
长风回气扶葱茏。野家麦畦上新塍，长吟裴回桑柘重。

刺香满地菖蒲草，雨梁燕语悲身老。三月摇扬入河道，
天浓地浓柳梳扫。

· 全唐诗 ·

卷 393_48 【题归梦】

李贺

长安风雨夜，书客梦昌谷。怡怡中堂笑，小弟裁涧蓂。
家门厚重意，望我饱饥腹。劳劳一寸心，灯花照鱼目。

卷 393_49 【经沙苑】

李贺

野水泛长澜，宫牙开小蒨。无人柳自春，草渚鸳鸯暖。
晴嘶卧沙马，老去悲啼展。今春还不归，塞嚶折翅雁。

卷 393_50 【出城别张又新，酬李汉】

李贺

李子别上国，南山崆峒春。不闻今夕鼓，差慰煎情人。
赵壹赋命薄，马卿家业贫。乡书何所报，紫蕨生石云。

长安玉桂国，戟带披侯门。惨阴地自光，宝马踏晓昏。
腊春戏草苑，玉辔鸣p 骖。绿网绁金铃，霞卷清池漣。

· 全唐诗 ·

开贯泻蛛母，买冰防夏蝇。时宜裂大袂，剑客车盘茵。
小人如死灰，心切生秋榛。皇图跨四海，百姓拖长绅。

光明霭不发，腰龟徒髹银。吾将噪礼乐，声调摩清新。
欲使十千岁，帝道如飞神。华实自苍老，流采长倾湔。

没没暗齟舌，涕血不敢论。今将下东道，祭酒而别秦。
六郡无剿儿，长刀谁拭尘。地理阳无正，快马逐服辕。

二子美年少，调道讲清浑。讥笑断冬夜，家庭疏筱穿。
曙风起四方，秋月当东悬。赋诗面投掷，悲哉不遇人。
此别定沾臆，越布先裁巾。

· 全唐诗 ·

卷三百九十四

卷 394_1 【南园】

李贺

方领蕙带折角巾，杜若已老兰荪春。南山削秀蓝玉合，
小雨归去飞凉云。熟杏暖香梨叶老，草梢竹栅锁池痕。
郑公乡老开酒尊，坐泛楚奏吟招魂。

卷 394_2 【假龙吟歌】

李贺

石轧铜杯，吟咏枯瘁。苍鹰摆血，白凤下肺。桂子自落，
云弄车盖。木死沙崩恶谿岛，阿母得仙今不老。

窟中跳汰截清涎，隈壖卧水埋金爪。崖蹬苍苔吊石发，
江君掩帐笈笻折。莲花去国一千年，雨后闻腥犹带铁。

· 全唐诗 ·

卷 394_3【感讽六首】

李贺

人间春荡荡，帐暖香扬扬。飞光染幽红，夸娇来洞房。
舞席泥金蛇，桐竹罗花床。眼逐春暝醉，粉随泪色黄。
王子下马来，曲沼鸣鸳鸯。焉知肠车转，一夕巡九方。

苦风吹朔寒，沙惊秦木折。舞影逐空天，画鼓馀清节。
蜀书秋信断，黑水朝波咽。娇魂从回风，死处悬乡月。

杂杂胡马尘，森森边士戟。天教胡马战，晓云皆血色。
妇人携汉卒，箭箠囊巾帼。不惭金印重，踉跄腰鞬力。
恂恂乡门老，昨夜试锋镝。走马遣书勋，谁能分粉墨。

青门放弹去，马色连空郊。何年帝家物，玉装鞍上摇。
去去走犬归，来来坐烹羔。千金不了馔，猪肉称盘臊。
试问谁家子，乃老能佩刀。西山白盖下，贤俊寒萧萧。

晓菊沾寒露，似悲团扇风。秋凉经汉殿，班子泣衰红。
本无辞辇意，岂见入空宫。腰极珮珠断，灰蝶生阴松。

蝶飞红粉台，柳扫吹笙道。十日悬户庭，九秋无衰草。
调歌送风转，杯池白鱼小。水宴截香腴，菱科映青罩。
蒙梨花满，春昏弄长啸。唯愁苦花落，不悟世衰到。
抚旧唯销魂，南山坐悲峭。

· 全唐诗 ·

卷 394_4【莫愁曲】

李贺

草生龙坡下，鸦噪城堞头。何人此城里，城角栽石榴。
青丝系五马，黄金络双牛。白鱼驾莲船，夜作十里游。

归来无人识，暗上沈香楼。罗床倚瑶瑟，残月倾帘钩。
今日槿花落，明朝桐树秋。莫负平生意，何名何莫愁。

卷 394_5【夜来乐】

李贺

红罗复帐金流苏，华灯九枝悬鲤鱼。丽人映月开铜铺，
春水滴酒猩猩沽。重一筐，香十株，赤金瓜子兼杂麸。

五丝封青鳧，阿侯此笑千万余。南轩汉转帘影疏，
桐林哑哑挟子乌。剑崖鞭节青石珠，白驄吹湍凝霜须。

漏长送珮承明庐，倡楼嵯峨明月孤。新客下马故客去，
绿蝉秀黛重拂梳。

· 全唐诗 ·

卷 394_6 【嘲雪】

李贺

昨日发葱岭，今朝下兰渚。喜从千里来，乱笑含春语。
龙沙湿汉旗，凤扇迎秦素。久别辽城鹤，毛衣已应故。

卷 394_7 【春怀引】

李贺

芳蹊密影成花洞，柳结浓烟花带重。蟾蜍碾玉挂明弓，
捍拨装金打仙凤。宝枕垂云选春梦，钿合碧寒龙脑冻。
阿侯系锦觅周郎，凭仗东风好相送。

卷 394_8 【白虎行】

李贺

火乌日暗崩腾云，秦皇虎视苍生群。烧书灭国无暇日，
铸剑佩玦惟将军。玉坛设醮思冲天，一世二世当万年。

烧丹未得不死药，拏舟海上寻神仙。鲸鱼张鬣海波沸，
耕人半作征人鬼。雄豪气猛如焰烟，无人为决天河水。

· 全唐诗 ·

谁最苦兮谁最苦，报人义士深相许。渐离击筑荆卿歌，
荆卿把酒燕丹语。剑如霜兮胆如铁，出燕城兮望秦月。
天授秦封祚未移，袞龙衣点荆卿血。朱旗卓地白虎死，
汉皇知是真天子。

卷 394_9 【有所思】

李贺

去年陌上歌离曲，今日君书远游蜀。帘外花开二月风，
台前泪滴千行竹。琴心与妾肠，此夜断还续。
想君白马悬雕弓，世间何处无春风。君心未肯镇如石，
妾颜不久如花红。夜残高碧横长河，河上无梁空白波。
西风未起悲龙梭，年年织素攒双蛾。江山迢递无休绝，
泪眼看灯乍明灭。自从孤馆深锁窗，桂花几度圆还缺。
鸦鸦向晓鸣森木，风过池塘响丛玉。白日萧条梦不成，
桥南更问仙人卜。

卷 394_10 【嘲少年】

李贺

青骢马肥金鞍光，龙脑入缕罗衫香。美人狭坐飞琼觞，
贫人唤云天上郎。别起高楼临碧筱，丝曳红鳞出深沼。
有时半醉百花前，背把金丸落飞鸟。自说生来未为客，

· 全唐诗 ·

一身美妾过三百。岂知鬪地种苗家，官税频催勿人织。

长得积玉夸豪毅，每揖闲人多意气。生来不读半行书，
只把黄金买身贵。少年安得长少年，海波尚变为桑田。

荣枯递传急如箭，天公不肯于公偏。莫道韶华镇长在，
发白面皱专相待。

卷 394_11【高平县东私路】

李贺

侵侵槲叶香，木花滞寒雨。今夕山上秋，永谢无人处。
石谿远荒涩，棠实悬辛苦。古者定幽寻，呼君作私路。

卷 394_12【神仙曲】

李贺

碧峰海面藏灵书，上帝拣作神仙居。清明笑语闻空虚，
斗乘巨浪骑鲸鱼。春罗书字邀王母，共宴红楼最深处。

鹤羽冲风过海迟，不如却使青龙去。犹疑王母不相许，
垂露娃鬟更传语。

· 全唐诗 ·

卷 394_13 【龙夜吟】

李贺

卷发胡儿眼睛绿，高楼夜静吹横竹。一声似向天上来，
月下美人望乡哭。直排七点星藏指，暗合清风调宫徵。
蜀道秋深云满林，湘江半夜龙惊起。玉堂美人边塞情，
碧窗皓月愁中听。寒砧能捣百尺练，粉泪凝珠滴红线。
胡儿莫作陇头吟，隔窗暗结愁人心。

卷 394_14 【昆仑使者】

李贺

昆仑使者无消息，茂陵烟树生愁色。金盘玉露自淋漓，
元气茫茫收不得。麒麟背上石文裂，虬龙鳞下红枝折。
何处偏伤万国心，中天夜久高明月。

卷 394_15 【汉唐姬饮酒歌】

李贺

御服沾霜露，天衢长蓂棘。金隐秋尘姿，无人为带饰。
玉堂歌声寝，芳林烟树隔。云阳台上歌，鬼哭复何益。

· 全唐诗 ·

铁剑常光光，至凶威屡逼。强枭噬母心，奔厉索人魄。
相看两相泣，泪下如波激。宁用清酒为，欲作黄泉客。
不说玉山颓，且无饮中色。勉从天帝诉，天上寡沈厄。
无处张繡帷，如何望松柏。妾身昼团团，君魂夜寂寂。
蛾眉自觉长，颈粉谁怜白。矜持昭阳意，不肯看南陌。

卷 394_16 【听颖师琴歌】

李贺

别浦云归桂花渚，蜀国弦中双凤语。芙蓉叶落秋鸾离，
越王夜起游天姥。暗珮清臣敲水玉，渡海蛾眉牵白鹿。
谁看挟剑赴长桥，谁看浸发题春竹。竺僧前立当吾门，
梵宫真相眉棱尊。古琴大轸长八尺，峯阳老树非桐孙。
凉馆闻弦惊病客，药囊暂别龙须席。请歌直请卿相歌，
奉礼官卑复何益。

卷 394_17 【谣俗】

李贺

上林胡蝶小，试伴汉家君。飞向南城去，误落石榴裙。
脉脉花满树，翩翩燕绕云。出门不识路，羞问陌头人。

· 全唐诗 ·

卷 394_18【静女春曙曲】

李贺

嫩叶怜芳抱新蕊，泣露枝枝滴天泪。粉窗香咽颰晓云，
锦堆花密藏春睡。恋屏孔雀摇金尾，莺舌分明呼婢子。
冰洞寒龙半匣水，一只商鸾逐烟起。

卷 394_19【少年乐】

李贺

芳草落花如锦地，二十长游醉乡里。红缨不动白马骄，
垂柳金丝香拂水。吴娥未笑花不开，绿鬟耸堕兰云起。
陆郎倚醉牵罗袂，夺得宝钗金翡翠。

卷 394_20【句】

李贺

不见山巅树，摧机下为薪。日睹井中泥，上出作埃尘。
情知一丘趣，不谢千里印。
倚剑登高台，悠悠送春目。

卷三百九十五

卷 395_1 【冰柱】

刘叉

师干久不息，农为兵兮民重嗟。骚然县宇，土崩水溃。
畹中无熟谷，塍上无桑麻。王春判序，百卉茁甲含葩。
有客避兵奔游僻，跋履险厄至三巴。貂裘蒙茸已敝缕，
鬓发蓬肥。雀惊鼠伏，宁遑安处。独卧旅舍无好梦，
更堪走风沙。天人一夜剪瑛珉，诘旦都成六出花。
南亩未盈尺，纤片乱舞空纷拏。旋落旋逐朝暾化，
檐间冰柱若削出交加。或低或昂，小大莹洁，随势无等差。
始疑玉龙下界来人世，齐向茅檐布爪牙。又疑汉高帝，
西方未斩蛇。人不识，谁为当风杖莫邪。铿鏜冰有韵，
的皪玉无瑕。不为四时雨，徒于道路成泥柎。不为九江浪，
徒为汨没天之涯。不为双井水，满瓯泛泛烹春茶。
不为中山浆，清新馥鼻盈百车。不为池与沼，
养鱼种芰成蠹蠹。不为醴泉与甘露，使名异瑞世俗夸。
特禀朝澈气，洁然自许靡间其迤迳。森然气结一千里，
滴沥声沈十万家。明也虽小，暗之大不可遮。
勿被曲瓦，直下不能抑群邪。柰何时逼，不得时在我目中，
倏然漂去无馀些。自是成毁任天理，天于此物岂宜有忒赊。

· 全唐诗 ·

反令井蛙壁虫变容易，背人缩首竞呀呀。
我愿天子回造化，藏之韞椟玩之生光华。

卷 395_2 【雪车】

刘叉

腊令凝绁三十日，缤纷密雪一复一。孰云润泽在枯荄，
闾闾饿民冻欲死。死中犹被豺狼食，官车初还城堡未完备。
人家千里无烟火，鸡犬何太怨。天下恤吾氓，
如何连夜瑶花乱。皎洁既同君子节，沾濡多著小人面。
寒锁侯门见客稀，色迷塞路行商断。小小细细如尘间，
轻轻缓缓成朴簌。官家不知民馁寒，尽驱牛车盈道载屑玉。
载载欲何之，秘藏深宫以御炎酷。徒能自卫九重间，
岂信车辙血，点点尽是农夫哭。刀兵残丧后，
满野谁为载白骨。远戍久乏粮，太仓谁为运红粟。
戎夫尚逆命，扁箱鹿角谁为敌。士夫困征讨，
买花载酒谁为适。天子端然少旁求，股肱耳目皆奸慝。
依违用事佞上方，犹驱饿民运造化防暑厄。
吾闻躬耕南亩舜之圣，为民吞蝗唐之德。
未闻q 孽苦苍生，相群相党上下为螫贼。
庙堂食禄不自惭，我为斯民叹息还叹息。

· 全唐诗 ·

卷 395_3 【修养】

刘叉

损神终日谈虚空，不必归命于胎中。我神不西亦不东，
烟收云散何濛濛。尝令体如微微风，绵绵不断道自冲。
世人逢一不逢一，一回存想一回出。只知一切望一切，
不觉一日损一日。劝君修真复识真，世上道人多忤人，
披图醮录益乱神。此法那能坚此身，心田自有灵地珍。
惜哉自有不自亲，明真汨没随埃尘。

卷 395_4 【勿执古寄韩潮州】

刘叉

古人皆执古，不辞冻饿悲。今人亦执古，自取行坐危。
老菊凌霜葩，狞松抱雪姿。武王亦至明，宁哀首阳饥。
仲尼岂非圣，但为互乡嗤。寸心生万路，今古棼若丝。
逐逐行不尽，茫茫休者谁。来恨不可遏，去悔何足追。
玉石共笑唾，驽骥相奔驰。请君勿执古，执古徒自隳。

· 全唐诗 ·

卷 395_5 【答孟东野】

刘叉

酸寒孟夫子，苦爱老叉诗。生涩有百篇，谓是琼瑶辞。
百篇非所长，忧来豁穷悲。唯有刚肠铁，百炼不柔亏。
退之何可骂，东野何可欺。文王已云没，谁顾好爵縻。
生死守一丘，宁计饱与饥。万事付杯酒，从人笑狂痴。

卷 395_6 【自古无长生劝姚合酒】

刘叉

奉子一杯酒，为子照颜色。但愿腮上红，莫管颊下白。
自古无长生，生者何戚戚。登山勿厌高，四望都无极。
丘陇逐日多，天地为我窄。只见李耳书，对之空脉脉。
何曾见天上，著得刘安宅。若问长生人，昭昭孔丘籍。

卷 395_7 【独饮】

刘叉

尽欲调太羹，自古无好手。所以山中人，兀兀但饮酒。

· 全唐诗 ·

卷 395_8 【作诗】

刘叉

作诗无知音，作不如不作。未逢赅载人，此道终寂寞。

有虞今已殁，来者谁为托。朗咏豁心胸，笔与泪俱落。

卷 395_9 【天津桥】

刘叉

洛阳宫阙照天地，四面山川无毒气。

谁令汉祖都秦关，从此奸雄转相炽。

卷 395_10 【嘲荆卿】

刘叉

白虹千里气，血颈一剑义。报恩不到头，徒作轻生士。

· 全唐诗 ·

卷 395_11【代牛言】

刘叉

渴饮颍水流，饿喘吴门月。黄金如可种，我力终不竭。

卷 395_12【莫问卜】

刘叉

莫问卜，人生吉凶皆自速。伏羲文王若无死，
今人不为古人哭。

卷 395_13【观八骏图】

刘叉

穆王八骏走不歇，海外去寻长日月。

五云望断阿母宫，归来落得新白发。

· 全唐诗 ·

卷 395_14 【经战地】

刘叉

杀气不上天，阴风吹雨血。冤魂不入地，髑髅哭沙月。

人命固有常，此地何夭折。

卷 395_15 【野哭】

刘叉

棘针生狞义路闲，野泉相吊声潺潺。

哀哉异教溺颓俗，淳源一去何时还。

卷 395_16 【古怨】

刘叉

君莫嫌丑妇，丑妇死守贞。山头一怪石，长作望夫名。

鸟有并翼飞，兽有比肩行。丈夫不立义，岂如鸟兽情。

· 全唐诗 ·

卷 395_17【烈士咏】

刘叉

烈士或爱金，爱金不为贫。义死天亦许，利生鬼亦嗔。

胡为轻薄儿，使酒杀平人。

卷 395_18【狂夫】

刘叉

大妻唱舜歌，小妻鼓湘瑟。狂夫游冶归，端坐仍作色。

不读关雎篇，安知后妃德。

卷 395_19【饿咏】

刘叉

文王久不出，贤士如土贱。妻孥从饿死，敢爱黄金篆。

· 全唐诗 ·

卷 395_20 【自问】

刘叉

自问彭城子，何人授汝颠。酒肠宽似海，诗胆大于天。

断剑徒劳匣，枯琴无复弦。相逢不多合，赖是向林泉。

卷 395_21 【入蜀】

刘叉

望空问真宰，此路为谁开。峡色侵天去，江声滚地来。

孔明深有意，钟会亦何才。信此非人事，悲歌付一杯。

卷 395_22 【塞上逢卢仝】

刘叉

直到桑干北，逢君夜不眠。上楼腰脚健，怀土眼睛穿。

斗柄寒垂地，河流冻彻天。羁魂泣相向，何事有诗篇。

· 全唐诗 ·

卷 395_23 【偶书】

刘叉

日出扶桑一丈高，人间万事细如毛。
野夫怒见不平处，磨损胸中万古刀。

卷 395_24 【爱碣山石】

刘叉

碣石何青青，挽我双眼睛。爱尔多古峭，不到人间行。

卷 395_25 【与孟东野】

刘叉

寒衣草木皮，饥饭葵藿根。不为孟夫子，岂识市井门。

卷 395_26 【姚秀才爱予小剑因赠】

刘叉

一条古时水，向我手心流。临行泻赠君，勿薄细碎仇。

· 全唐诗 ·

卷 395_27【老恨】

刘叉

雪打杉松残，补书书不完。懒学渭上翁，辛苦把钓竿。

卷三百九十六

卷 396_1 【思归乐】

元稹

山中思归乐，尽作思归鸣。尔是此山鸟，安得失乡名。
应缘此山路，自古离人征。阴愁感和气，俾尔从此生。
我虽失乡去，我无失乡情。惨舒在方寸，宠辱将何惊。
浮生居大块，寻丈可寄形。身安即形乐，岂独乐咸京。
命者道之本，死者天之平。安问远与近，何言殇与彭。
君看赵工部，八十支体轻。交州二十载，一到长安城。
长安不须臾，复作交州行。交州又累岁，移镇广与荆。
归朝新天子，济济为上卿。肌肤无瘴色，饮食康且宁。
长安一昼夜，死者如陨星。丧车四门出，何关炎瘴萦。
况我三十二，百年未半程。江陵道涂近，楚俗云水清。
遐想玉泉寺，久闻岷山亭。此去尽绵历，岂无心赏并。
红餐日充腹，碧涧朝析醒。开门待宾客，寄书安弟兄。
闲穷四声韵，闷阅九部经。身外皆委顺，眼前随所营。
此意久已定，谁能求苟荣。所以官甚小，不畏权势倾。
倾心岂不易，巧诈神之刑。万物有本性，况复人性灵。
金埋无土色，玉坠无瓦声。剑折有寸利，镜破有片明。
我可俘为囚，我可刃为兵。我心终不死，金石贯以诚。

· 全唐诗 ·

此诚患不至，诚至道亦亨。微哉满山鸟，叫噪何足听。

卷 396_2【春鸠】

元稹

春鸠与百舌，音响讵同年。如何一时语，俱得春风怜。
犹知化工意，当春不生蝉。免教争叫噪，沸渭桃花前。

卷 396_3【春蝉】

元稹

我自东归日，厌苦春鸠声。作诗怜化工，不遣春蝉生。
及来商山道，山深气不平。春秋两相似，虫豸百种鸣。

风松不成韵，螭蟾沸如羹。岂无朝阳凤，羞与微物争。
安得天上雨，奔浑河海倾。荡涤反时气，然后好晴明。

卷 396_4【兔丝】

元稹

人生莫依倚，依倚事不成。君看兔丝蔓，依倚榛与荆。

· 全唐诗 ·

荆榛易蒙密，百鸟撩乱鸣。下有狐兔穴，奔走亦纵横。
樵童斫将去，柔蔓与之并。翳荟生可耻，束缚死无名。
桂树月中出，珊瑚石上生。俊鹳度海食，应龙升天行。
灵物本特达，不复相缠萦。缠萦竟何者，荆棘与飞茎。

卷 396_5 【古社】

元稹

古社基址在，人散社不神。惟有空心树，妖狐藏魅人。
狐惑意颠倒，臊腥不复闻。丘坟变城郭，花草仍荆榛。
良田千万顷，占作天荒田。主人议芟斫，怪见不敢前。
那言空山烧，夜随风马奔。飞声鼓鼙震，高焰旗帜翻。
逡巡荆棘尽，狐兔无子孙。狐死魅人灭，烟消坛堦存。
绕坛旧田地，给授有等伦。农收村落盛，社树新团圆。
社公千万岁，永保村中民。

卷 396_6 【松树】

元稹

华山高幢幢，上有高高松。株株遥各各，叶叶相重重。
槐树夹道植，枝叶俱冥蒙。既无贞直干，复有罅挂虫。
何不种松树，使之摇清风。秦时已曾种，憔悴种不供。

· 全唐诗 ·

可怜孤松意，不与槐树同。闲在高山顶，穆盘虬与龙。
屈为大厦栋，庇荫侯与公。不肯作行伍，俱在尘土中。

卷 396_7【芳树】

元稹

芳树已寥落，孤英尤可嘉。可怜团团叶，盖覆深深花。
游蜂竞钻刺，斗雀亦纷拏。天生细碎物，不爱好光华。

非无殢殢法，念尔有生涯。春雷一声发，惊燕亦惊蛇。
清池养神蔡，已复长虾蟆。雨露贵平施，吾其春草芽。

卷 396_8【桐花】

元稹

胧月上山馆，紫桐垂好阴。可惜暗澹色，无人知此心。
舜没苍梧野，凤归丹穴岑。遗落在人世，光华那复深。
年年怨春意，不竞桃杏林。唯占清明后，牡丹还复侵。
况此空馆闭，云谁恣幽寻。徒烦鸟噪集，不语山嶽岑。
满院青苔地，一树莲花簪。自开还自落，暗芳终暗沈。
尔生不得所，我愿裁为琴。安置君王侧，调和元首音。
安问宫徵角，先辨雅郑淫。宫弦春以君，君若春日临。

· 全唐诗 ·

商弦廉以臣，臣作旱天霖。人安角声畅，人困斗不任。
羽以类万物，袄物神不歆。徵以节百事，奉事罔不钦。
五者苟不乱，天命乃可忱。君若问孝理，弹作梁山吟。
君若事宗庙，拊以和球琳。君若不好谏，愿献触疏箴。
君若不罢猎，请听荒于禽。君若侈台殿，雍门可沾襟。
君若傲贤隼，鹿鸣有食芩。君闻祈招什，车马勿騷騷。
君若欲败度，中有式如金。君闻薰风操，志气在愔愔。
中有阜财语，勿受来献琛。北里当绝听，祸莫大于淫。
南风苟不竞，无往遗之擒。奸声不入耳，巧言宁孔壬。
泉音亦云革，安得沴与侵。天子既穆穆，群材亦森森。
剑士还农野，丝人归织纈。丹凤巢阿阁，文鱼游碧浚。
和气浹寰海，易若溉蹄涔。改张乃可鼓，此语无古今。
非琴独能尔，事有谕因针。感尔桐花意，闲怨杳难禁。
待我持斤斧，置君为大琛。

卷 396_9【雉媒】

元稹

双雉在野时，可怜同嗜欲。毛衣前后成，一种文章足。
一雉独先飞，冲开芳草绿。网罗幽草中，暗被潜羁束。
剪刀摧六翮，丝线缝双目。啖养能几时，依然已驯熟。
都无旧性灵，返与他心腹。置在芳草中，翻令诱同族。
前时相失者，思君意弥笃。朝朝旧处飞，往往巢边哭。
今朝树上啼，哀音断还续。远见尔文章，知君草中伏。
和鸣忽相召，鼓翅遥相瞩。畏我未肯来，又啄翳前粟。

· 全唐诗 ·

敛翮远投君，飞驰势奔蹙。罽挂在君前，向君声促促。
信君决无疑，不道君相覆。自恨飞太高，疏罗偶然触。
看看架上鹰，拟食无罪肉。君意定何如，依旧雕笼宿。

卷 396_10【箭镞】

元稹

箭镞本求利，淬砺良甚难。砺将何所用，砺以射凶残。
不砺射不入，不射人不安。为盗即当射，宁问私与官。
夜射官中盗，中之血阑干。带箭君前诉，君王悄不欢。
顷曾为盗者，百箭中心攒。竟将儿女泪，滴沥助辛酸。
君王责良帅，此祸谁为端。帅言发矟罪，不使刃稍刊。
君王不忍杀，逐之如进丸。仍令后来箭，尽可头团团。
发矟去虽远，砺镞心不阑。会射蛟螭尽，舟行无恶澜。

卷 396_11【赛神】

元稹

村落事妖神，林木大如村。事来三十载，巫覡传子孙。
村中四时祭，杀尽鸡与豚。主人不堪命，积燎曾欲燔。
旋风天地转，急雨江河翻。采薪持斧者，弃斧纵横奔。
山深多掩映，仅免鲸鲵吞。主人集邻里，各各持酒樽。
庙中再三拜，愿得禾稼存。去年大巫死，小覡又妖言。

· 全唐诗 ·

邑中神明宰，有意效西门。焚除计未决，伺者迭乘轩。
庙深荆棘厚，但见狐兔蹲。巫言小神变，可验牛马蕃。
邑吏齐进说，幸勿祸乡原。逾年计不定，县听良亦烦。
涉夏祭时至，因令修四垣。忧虞神愤恨，玉帛意弥敦。
我来神庙下，箫鼓正喧喧。因言遣妖术，灭绝由本根。
主人中罢舞，许我重叠论。蜉蝣生湿处，鸱鸢集黄昏。
主人邪心起，气焰日夜繁。狐狸得蹊径，潜穴主人园。
腥臊袭左右，然后托丘樊。岁深树成就，曲直可轮辕。
幽妖尽依倚，万怪之所屯。主人一心好，四面无篱藩。
命樵执斤斧，怪木宁遽髡。主人且倾听，再为谕清浑。
阿胶在末派，罔象游上源。灵药逡巡尽，黑波朝夕喷。
神龙厌流浊，先伐鼉与鼃。鼃鼃在龙穴，妖气常郁温。
主人恶淫祀，先去邪与惛。惛邪中人意，蛊祸蚀精魂。
德胜妖不作，势强威亦尊。计穷然后赛，后赛复何恩。

卷 396_12【大觜乌】

元稹

阳乌有二类，嘴白者名慈。求食哺慈母，因以此名之。
饮啄颇廉俭，音响亦柔雌。百巢同一树，栖宿不复疑。
得食先反哺，一身常苦羸。缘知五常性，翻被众禽欺。
其一觜大者，攫搏性贪痴。有力强如鹄，有爪利如锥。
音声甚r喙，潜通妖怪词。受日余光庇，终天无死期。
翱翔富人屋，栖息屋前枝。巫言此乌至，财产日丰宜。
主人一心惑，诱引不知疲。转见乌来集，自言家转孳。

· 全唐诗 ·

白鹤门外养，花鹰架上维。专听乌喜怒，信受若神龟。
举家同此意，弹射不复施。往往清池侧，却令鸬鹭随。
群乌饱粱肉，毛羽色泽滋。远近恣所往，贪残无不为。
巢禽攫雏卵，厩马啄疮痍。渗沥脂膏尽，凤凰那得知。
主人一朝病，争向屋檐窥。呦鷖呼群鹄，翩翩集怪鸱。
主人偏养者，啸聚最奔驰。夜半仍惊噪，鸬鹚逐老狸。
主人病心怯，灯火夜深移。左右虽无语，奄然皆泪垂。
平明天出日，阴魅走参差。乌来屋檐上，又惑主人儿。
儿即富家业，玩好方爱奇。占募能言鸟，置者许高赀。
陇树巢鹦鹉，言语好光仪。美人倾心献，雕笼身自持。
求者临轩坐，置在白玉墀。先问鸟中苦，便言乌若斯。
众乌齐搏铄，翠羽几离披。远掷千馀里，美人情亦衰。
举家惩此患，事乌逾昔时。向言池上鹭，啄肉寝其皮。
夜漏天终晓，阴云风定吹。况尔乌何者，数极不知危。
会结弥天网，尽取一无遗。常令阿阁上，宛宛宿长离。

卷 396_13【分水岭】

元稹

崔嵬分水岭，高下与云平。上有分流水，东西随势倾。
朝同一源出，暮隔千里情。风雨各自异，波澜相背惊。
势高竞奔注，势曲已回萦。偶值当途石，蹙缩又纵横。
有时遭孔穴，变作呜咽声。褊浅无所用，奔波奚所营。
团团井中水，不复东西征。上应美人意，中涵孤月明。
旋风四面起，并深波不生。坚冰一时合，井深冻不成。

· 全唐诗 ·

终年汲引绝，不耗复不盈。五月金石铄，既寒亦既清。
易时不易性，改邑不改名。定如拱北极，莹若烧玉英。
君门客如水，日夜随势行。君看守心者，井水为君盟。

卷 396_14【四皓庙】

元稹

巢由昔避世，尧舜不得臣。伊吕虽急病，汤武乃可君。
四贤胡为者，千载名氛氲。显晦有遗迹，前后疑不伦。
秦政虐天下，黥武穷生民。诸侯战必死，壮士眉亦颦。
张良韩孺子，椎碎属车轮。遂令英雄意，日夜思报秦。
先生相将去，不复婴世尘。云卷在孤岫，龙潜为小鳞。
秦王转无道，谏者鼎镬亲。茅焦脱衣谏，先生无一言。
赵高杀二世，先生如不闻。刘项取天下，先生游白云。
海内八年战，先生全一身。汉业日已定，先生名亦振。
不得为济世，宜哉为隐沦。如何一朝起，屈作储贰宾。
安存孝惠帝，摧悴戚夫人。舍大以谋细，虬盘而蠖伸。
惠帝竟不嗣，吕氏祸有因。虽怀安刘志，未若周与陈。
皆落子房术，先生道何屯。出处贵明白，故吾今有云。

卷三百九十七

卷 397_1【青云驿】

元稹

岩峤青云岭，下有千仞谿。裴回不可上，人倦马亦嘶。
愿登青云路，若望丹霞梯。谓言青云驿，绣户芙蓉闺。
谓言青云骑，玉勒黄金蹄。谓言青云具，瑚琏杂象犀。
谓言青云吏，的的颜如珪。怀此青云望，安能复久稽。
攀援信不易，风雨正凄凄。已怪杜鹃鸟，先来山下啼。
才及青云驿，忽遇蓬蒿妻。延我开荜户，凿窦宛如圭。
逡巡吏来谒，头白颜色黧。馈食频叫噪，假器仍乞醯。
向时延我者，共舍藿与藜。乘我牂牁马，蒙茸大如羝。
悔为青云意，此意良噬脐。昔游蜀门下，有驿名青泥。
闻名意惨怆，若坠牢与狴。云泥异所称，人物一以齐。
复闻闾阖上，下视日月低。银城蕊珠殿，玉版金字题。
大帝直南北，群仙侍东西。龙虎俨队仗，雷霆轰鼓鼙。
元君理庭内，左右桃花蹊。丹霞烂成绮，景云轻若缣。
天池光滟滟，瑶草绿萋萋。众真千万辈，柔颜尽如荑。
手持凤尾扇，头戴翠羽笄。云韶互铿戛，霞服相提携。
双双发皓齿，各各扬轻袿。天祚乐未极，溟波浩无堤。
秽贱灵所恶，安肯问黔黎。桑田变成海，宇县烹为齏。

· 全唐诗 ·

虚皇不愿见，云雾重重翳。大帝安可梦，阊阖何由跻。
灵物可见者，愿以谕端倪。虫蛇吐云气，妖氛变虹霓。
获麟书诸册，豢龙醢为醢。凤凰占梧桐，丛杂百鸟栖。
野鹤啄腥虫，贪饕不如鸡。山鹿藏窟穴，虎豹吞其麋。
灵物比灵境，冠履宁甚睽。道胜即为乐，何惭居稗埤。
金张好车马，於陵亲灌畦。在梁或在火，不变玉与珉。
上天勿行行，潜穴勿凄凄。吟此青云谕，达观终不迷。

卷 397_2【阳城驿】

元稹

商有阳城驿，名同阳道州。阳公没已久，感我泪交流。
昔公孝父母，行与曾闵侔。既孤善兄弟，兄弟和且柔。
一夕不相见，若怀三岁忧。遂誓不婚娶，没齿同衾裯。
妹夫死他县，遗骨无人收。公令季弟往，公与仲弟留。
相别竟不得，三人同远游。共负他乡骨，归来藏故丘。
栖迟居夏邑，邑人无苟偷。里中竞长短，来问劣与优。
官刑一朝耻，公短终身羞。公亦不遗布，人自不盗牛。
问公何能尔，忠信先自修。发言当道理，不顾党与雠。
声香渐翕习，冠盖若云浮。少者从公学，老者从公游。
往来相告报，县尹与公侯。名落公卿口，涌如波荐舟。
天子得闻之，书下再三求。书中愿一见，不异旱地虬。
何以持为聘，束帛藉琳球。何以持为御，驷马驾安輶。
公方伯夷操，事殷不事周。我实唐士庶，食唐之田畴。
我闻天子忆，安敢专自由。来为谏大夫，朝夕侍冕旒。

· 全唐诗 ·

希夷惇薄俗，密勿献良筹。神医不言术，人瘼曾暗瘳。
月请谏官俸，诸弟相对谋。皆曰亲戚外，酒散目前愁。
公云不有尔，安得此嘉猷。施馀尽酤酒，客来相献酬。
日旰不谋食，春深仍弊裘。人心良戚戚，我乐独由由。
贞元岁云暮，朝有曲如钩。风波势奔蹙，日月光绸缪。
齿牙属为猾，禾黍暗生蠹。岂无司言者，肉食吞其喉。
岂无司搏者，利柄扼其鞲。鼻复势气塞，不得辩薰莸。
公虽未显谏，惴惴如患瘤。飞章八九上，皆若珠暗投。
炎炎日将炽，积燎无人抽。公乃帅其属，决谏同报仇。
延英殿门外，叩阁仍叩头。且曰事不止，臣谏誓不休。
上知不可遏，命以美语酬。降官司成署，俾之为赘疣。
奸心不快活，击刺砺戈矛。终为道州去，天道竟悠悠。
遂令不言者，反以言为訕。喉舌坐成木，鹰鹯化为鸠。
避权如避虎，冠豸如冠猴。平生附我者，诗人称好逑。
私来一执手，恐若坠诸沟。送我不出户，决我不回眸。
唯有太学生，各具粮与糒。咸言公去矣，我亦去荒陬。
公与诸生别，步步驻行驺。有生不可诀，行行过闽瓯。
为师得如此，得为贤者不。道州闻公来，鼓舞歌且讴。
昔公居夏邑，狎人如狎鸥。况自为刺史，岂复援鼓桴。
滋章一时罢，教化天下遒。炎瘴不得老，英华忽已秋。
有鸟哭杨震，无儿悲邓攸。唯余门弟子，列树松与楸。
今来过此驿，若吊汨罗洲。祠曹讳羊祜，此驿何不侔。
我愿避公讳，名为避贤邮。此名有深意，蔽贤天所尤。
吾闻玄元教，日月冥九幽。幽阴蔽翳者，永为幽翳囚。

· 全唐诗 ·

卷 397_3 【苦雨】

元稹

江瘴气候恶，庭空田地芜。烦昏一日内，阴暗三四殊。
巢燕污床席，苍蝇点肌肤。不足生诟怒，但若寡欢娱。
夜来稍清晏，放体阶前呼。未饱风月思，已为蚊蚋图。
我受簪组身，我生天地炉。炎蒸安敢倦，虫豸何时无。
凌晨坐堂庑，努力泥中趋。官家事不了，尤悔亦可虞。
门外竹桥折，马惊不敢逾。回头命僮御，向我色踟蹰。
自顾方濩落，安能相诘诛。隐忍心愤恨，翻为声煦愉。
逡巡崔嵬日，杲曜东南隅。已复云蔽翳，不使及泥涂。
良农尽蒲苇，厚地积潢污。三光不得照，万物何由苏。
安得飞廉车，磔裂云将躯。又提精阳剑，蛟螭支节屠。
阴沴皆电扫，幽妖亦雷驱。煌煌启闾阖，轧轧掉乾枢。
东西生日月，昼夜如转珠。百川朝巨海，六龙蹋亨衢。
此意倍寥廓，时来本须臾。今也泥鸿洞，鼃鼃真得途。

卷 397_4 【种竹】

元稹

昔公怜我直，比之秋竹竿。秋来苦相忆，种竹厅前看。
失地颜色改，伤根枝叶残。清风犹淅淅，高节空团团。
鸣蝉聒暮景，跳蛙集幽阑。尘土复昼夜，梢云良独难。

· 全唐诗 ·

丹丘信云远，安得临仙坛。瘴江冬草绿，何人惊岁寒。
可怜亭亭干，一一青琅玕。孤凤竟不至，坐伤时节阑。

卷 397_5【和乐天赠樊著作】

元稹

君为著作诗，志激词且温。璨然光扬者，皆以义烈闻。
千虑竟一失，冰玉不断痕。谬予顽不肖，列在数子间。
因君讥史氏，我亦能具陈。羲黄眇云远，载籍无遗文。
煌煌二帝道，铺设在典坟。尧心惟舜会，因著为话言。
皋夔益稷禹，粗得无间然。缅然千载后，后圣曰孔宣。
迥知皇王意，缀书为百篇。是时游夏辈，不敢措舌端。
信哉作遗训，职在圣与贤。如何至近古，史氏为闲官。
但令识字者，窃弄刀笔权。由心书曲直，不使当世观。
贻之千万代，疑言相并传。人人异所见，各各私所遍。
以是曰褒贬，不如都无焉。况乃丈夫志，用舍贵当年。
顾予有微尚，愿以出处论。出非利吾已，其出贵道全。
全道岂虚设，道全当及人。全则富与寿，亏则饥与寒。
遂我一身逸，不如万物安。解悬不泽手，拯溺无折旋。
神哉伊尹心，可以冠古先。其次有独善，善己不善民。
天地为一物，死生为一源。合杂分万变，忽若风中尘。
抗哉巢由志，尧舜不可迁。舍此二者外，安用名为宾。
持谢著书郎，愚不愿有云。

· 全唐诗 ·

卷 397_6 【和乐天感鹤】

元稹

我有所爱鹤，毛羽霜雪妍。秋霄一滴露，声闻林外天。
自随卫侯去，遂入大夫轩。云貌久已隔，玉音无复传。
吟君感鹤操，不觉心惕然。无乃予所爱，误为微物迁。
因兹谕直质，未免柔细牵。君看孤松树，左右萝茑缠。
既可习为饱，亦可薰为荃。期君常善救，勿令终弃捐。

卷 397_7 【谕宝二首】

元稹

沉玉在弱泥，泥弱玉易沉。扶桑寒日薄，不照万丈心。
安得潜渊虬，拔壑超邓林。泥封泰山趾，水散旱天霖。
洗此泥下玉，照耀台殿深。刻为传国宝，神器人不侵。
冰置白玉壶，始见清皎洁。珠穿殷红缕，始见明洞彻。
镆铔无人淬，两刃幽壤铁。秦镜无人拭，一片埋雾月。
骥跼环堵中，骨附筋入节。虬蟠尺泽内，鱼贯蛙同穴。
舳舻无巨海，浮浮矜濞濞。栋梁无广厦，颠倒卧霜雪。
大鹏无长空，举翮受羁绁。豫樟无厚地，危柢真飀隤。
圭璧无卞和，甘与顽石列。舜禹无陶尧，名随腐草灭。
神功伏神物，神物神乃别。神人不世出，所以神功绝。
神物岂徒然，用之乃施設。禹功九州理，舜德天下悦。

· 全唐诗 ·

璧充传国玺，圭用祈太折。千寻豫樟干，九万大鹏歇。
栋梁庇生民，舳舻济来哲。虬腾旱天雨，骥骋流电掣。
镜悬奸胆露，剑拂妖蛇裂。珠玉照乘光，冰莹环坐热。
此物比在泥，斯言为谁发。于今尽凡耳，不为君不说。

卷 397_8 【说剑】

元稹

吾友有宝剑，密之如密友。我实胶漆交，中堂共杯酒。
酒酣肝胆露，恨不眼前剖。高唱荆卿歌，乱击相如缶。
更击复更唱，更酌亦更寿。白虹坐上飞，青蛇匣中吼。
我闻音响异，疑是干将偶。为君再拜言，神物可见不。
君言我所重，我自为君取。迎箠已焚香，近鞘先泽手。
徐抽寸寸刃，渐屈弯弯肘。杀杀霜在锋，团团月临纽。
逡巡潜虬跃，郁律惊左右。霆电满室光，蛟龙绕身走。
我为捧之泣，此剑别来久。铸时近山破，藏在松桂朽。
幽匣狱底埋，神人水心守。本是稽泥淬，果非雷焕有。
我欲评剑功，愿君良听受。剑可剸犀兕，剑可切琼玖。
剑决天外云，剑冲日中斗。剑隳妖蛇腹，剑拂佞臣首。
太古初断鳌，武王亲击纣。燕丹卷地图，陈平绾花绶。
曾被桂树枝，寒光射林藪。曾经铸农器，利用翦稂莠。
神物终变化，复为龙牝牡。晋末武库烧，脱然排户牖。
为欲扫群胡，散作弥天帚。自兹失所往，豪英共为诟。
今复谁人铸，挺然千载后。既非古风胡，无乃近鸦九。
自我与君游，平生益自负。况擎宝剑出，重以雄心扣。

· 全唐诗 ·

此剑何太奇，此心何太厚。劝君慎所用，所用无或苟。
潜将辟魑魅，勿但防妾妇。留斩泓下蛟，莫试街中狗。
君今困泥滓，我亦坳尘垢。俗耳惊大言，逢人少开口。

卷 397_9【书异】

元稹

孟冬初寒月，渚泽蒲尚青。飘萧北风起，皓雪纷满庭。
行过冬至后，冻闭万物零。奔浑驰暴雨，骤鼓轰雷霆。
传云不终日，通宵曾莫停。瘴云愁拂地，急溜疑注瓶。
汹涌潢潦浊，喷薄鲸鲵腥。跳趯井蛙喜，突兀水怪形。
飞蚋奔不死，修蛇蛰再醒。应龙非时出，无乃岁不宁。
吾闻阴阳户，启闭各有扃。后时无肃杀，废职乃玄冥。
座配五天帝，荐用百品珍。权为祝融夺，神其焉得灵。
春秋雷电异，则必书诸经。仲冬雷雨苦，愿省蒙蔽刑。

卷 397_10【和乐天折剑头】

元稹

闻君得折剑，一片雄心起。讵意铁蛟龙，潜在延津水。
风云会一合，呼吸期万里。雷震山岳碎，电斩鲸鲵死。
莫但宝剑头，剑头非此比。

· 全唐诗 ·

卷三百九十八

卷 398_1 【松鹤】

元稹

渚宫本坳下，佛庙有台阁。台下三四松，低昂势前却。
是时晴景丽，松梢残雪薄。日色相玲珑，纤云映罗幕。
逡巡九霄外，似振风中铎。渐见尺帛光，孤飞唳空鹤。
裴回耀霜雪，顾慕下寥廓。蹋动樛盘枝，龙蛇互跳跃。
俯瞰九江水，旁瞻万里壑。无心眇乌鸢，有字悲城郭。
清角已沉绝，虞韶亦冥寞。鸞翻勿重留，幸及钧天作。

卷 398_2 【竞渡】

元稹

吾观竞舟子，因测大竞源。天地昔将竞，蓬勃昼夜昏。
龙蛇相噉薄，海岱俱崩奔。群动皆搅挠，化作流浑浑。
数极斗心息，太和蒸混元。一气忽为二，矗然画乾坤。
日月复照耀，春秋递寒温。八荒坦以旷，万物罗以繁。

· 全唐诗 ·

圣人中间立，理世了不烦。延绵复几岁，逮及羲与轩。
炎皇炽如炭，蚩尤扇其燔。有熊竞心起，驱兽出林樊。
一战波委焰，再战火燎原。战讫天下定，号之为轩辕。
自是岂无竞，琐细不复言。其次有龙竞，竞渡龙之门。
龙门浚如泻，淙射不可援。赤鳞化时至，唐突鳍鬣掀。
乘风瞥然去，万里黄河翻。接瞬电烜出，微吟霹雳喧。
傍瞻旷宇宙，俯瞰卑昆仑。庶类咸在下，九霄行易扞。
倏辞蛙黾穴，遽排天帝阍。回悲曝鳃者，未免鲸鲵吞。
帝命泽诸夏，不弃虫与昆。随时布膏露，称物施厚恩。
草木沾我润，豚鱼望我蕃。向来同竞辈，岂料由我存。
壮哉龙竞渡，一竞身独尊。舍此皆蚁斗，竞舟何足论。

卷 398_3 【寺院新竹】

元稹

宝地琉璃坼，紫苞琅玕踊。亭亭巧于削，一一大如拱。
冰碧林外寒，峰峦眼前耸。槎枒矛戟合，屹屹龙蛇动。
烟泛翠光流，岁馀霜彩重。风朝笋籟过，雨夜鬼神恐。
佳色有鲜妍，修茎无拥肿。节高迷玉镞，箨缀疑花捧。
讵必太山根，本自仙坛种。谁令植幽壤，复此依闲冗。
居然霄汉姿，坐受藩篱壅。噪集倦鸣乌，炎昏繁蠹蠹。
未遭伶伦听，非安子犹宠。威凤来有时，虚心岂无奉。

· 全唐诗 ·

卷 398_4 【酬别致用】

元稹

风行自委顺，云合非有期。神哉心相见，无朕安得离。
我有恳愤志，三十无人知。修身不言命，谋道不择时。
达则济亿兆，穷亦济毫厘。济人无大小，誓不空济私。
研几未淳熟，与世忽参差。意气一为累，猜仍良已随。
昨来窜荆蛮，分与平生隳。那言返为遇，获见心所奇。
一见肺肝尽，坦然无滞疑。感念交契定，泪流如断縑。
此交定生死，非为论盛衰。此契宗会极，非谓同路歧。
君今虎在柙，我亦鹰就羈。驯养保性命，安能奋殊姿。
玉色深不变，井水挠不移。相看各年少，未敢深自悲。

卷 398_5 【竹部】

元稹

竹部竹山近，岁伐竹山竹。伐竹岁亦深，深林隔深谷。
朝朝冰雪行，夜夜豺狼宿。科首霜断蓬，枯形烧馀木。
一束十余茎，千钱百余束。得钱盈千百，得粟盈斗斛。
归来不买食，父子分半菽。持此欲何为，官家岁输促。
我来荆门掾，寓食公堂肉。岂惟遍妻孥，亦以及僮仆。
分尔有限资，饱我无端腹。愧尔不复言，尔生何太蹙。

· 全唐诗 ·

卷 398_6 【赛神】

元稹

楚俗不事事，巫风事妖神。事妖结妖社，不问疏与亲。
年年十月暮，珠稻欲垂新。家家不敛获，赛妖无富贫。
杀牛赏官酒，椎鼓集顽民。喧阗里闾隘，凶酗日夜频。
岁暮雪霜至，稻珠随陇湮。吏来官税迫，求质倍称缗。
贫者日消铄，富亦无仓囤。不谓事神苦，自言诚不真。
岳阳贤刺史，念此为俗屯。未可一朝去，俾之为等伦。
粗许存习俗，不得呼党人。但许一日泽，不得月与旬。
吾闻国侨理，三年名乃振。巫风燎原久，未必怜徙薪。
我来歌此事，非独歌政仁。此事四邻有，亦欲闻四邻。

卷 398_7 【竞舟】

元稹

楚俗不爱力，费力为竞舟。买舟俟一竞，竞敛贫者赇。
年年四五月，蜚实麦小秋。积水堰堤坏，拔秧蒲稗稠。
此时集丁壮，习竞南亩头。朝饮村社酒，暮椎邻舍牛。
祭船如祭祖，习竞如习雠。连延数十日，作业不复忧。
君侯饷良吉，会客陈膳羞。画鹢四来合，大竞长江流。
建标明取舍，胜负死生求。一时欢呼罢，三月农事休。
岳阳贤刺史，念此为俗疣。习俗难尽去，聊用去其尤。

· 全唐诗 ·

百船不留一，一竞不滞留。自为里中戏，我亦不寓游。
吾闻管仲教，沐树惩堕游。节此淫竞俗，得为良政不。
我来歌此事，非独歌此州。此事数州有，亦欲闻数州。

卷 398_8【茅舍】

元稹

楚俗不理居，居人尽茅舍。茅苫竹梁栋，茅疏竹仍罅。
边缘堤岸斜，诘屈檐楹亚。篱落不蔽肩，街衢不容驾。
南风五月盛，时雨不来下。竹蠹茅亦干，迎风自焚爇。
防虞集邻里，巡警劳昼夜。遗烬一星然，连延祸相嫁。
号呼怜谷帛，奔走伐桑柘。旧架已新焚，新茅又初架。
前日洪州牧，念此常嗟訝。牧民未及久，郡邑纷如化。
峻邸俨相望，飞甍远相跨。旗亭红粉泥，佛庙青鸳瓦。
斯事才未终，斯人久云谢。有客自洪来，洪民至今藉。
惜其心太亟，作役无容暇。台观亦已多，工徒稍冤咤。
我欲他郡长，三时务耕稼。农收次邑居，先室后台榭。
启闭既及期，公私亦相借。度材无强略，庀役有定价。
不使及僭差，粗得御寒夏。火至殊陈郑，人安极嵩华。
谁能继此名，名流袭兰麝。五袴有前闻，斯言我非诈。

· 全唐诗 ·

卷 398_9【后湖】

元稹

荆有泥汙水，在荆之邑郭。郭前水在后，谓之而后湖。
环湖十馀里，岁积潢与污。臭腐鱼鳖死，不植菰与蒲。
郑公理三载，其理用煦愉。岁稔民四至，隘廛亦隘衢。
公乃署其地，为民先矢谋。人人悦自为，我亦不庀徒。
下里得闻之，各各相俞俞。提携翁及孙，捧戴妇与姑。
壮者负砾石，老亦捭茅刳。斤磨片片雪，椎隐连连珠。
朝餐布庭落，夜宿完户枢。邻里近相告，新戚远相呼。
鬻者自为鬻，酤者自为酤。鸡犬丰中市，人民岐下都。
百年废滞所，一旦奥浩区。我实司水土，得为官事无。
人言贱事贵，贵直不贵谀。此实公所小，安用歌袴襦。
答云潭及广，以至鄂与吴。万里尽泽国，居人皆垫濡。
富者不容盖，贫者不庇躯。得不歌此事，以我为楷模。

卷 398_10【八骏图诗】

元稹

穆满志空阔，将行九州野。神驭四来归，天与八骏马。
龙种无凡性，龙行无暂舍。朝辞扶桑底，暮宿昆仑下。
鼻息吼春雷，蹄声裂寒瓦。尾掉沧波黑，汗染白云赭。
华辔本修密，翠盖尚妍冶。御者腕不移，乘者寐不假。

· 全唐诗 ·

车无轮扁斲，轡无王良把。虽有万骏来，谁是敢骑者。

卷 398_11 【画松】

元稹

张璪画古松，往往得神骨。翠帚扫春风，枯龙戛寒月。
流传画师辈，奇态尽埋没。纤枝无萧洒，顽干空突兀。
乃悟埃尘心，难状烟霄质。我去淅阳山，深山看真物。

卷 398_12 【遣兴十首】

元稹

始见梨花房，坐对梨花白。行看梨叶青，已复梨叶赤。
严霜九月半，危蒂几时客。况有高高原，秋风四来迫。

莫厌夏日长，莫愁冬日短。欲识短复长，君看寒又暖。
城中百万家，冤哀杂丝管。草没奉诚园，轩车昔曾满。

孤竹迸荒园，误与蓬麻列。久拥萧萧风，空长高高节。
严霜荡群秽，蓬断麻亦折。独立转亭亭，心期凤凰别。

艳艳翦红英，团团削翠茎。托根在褊浅，因依泥滓生。
中有合欢蕊，池枯难遽呈。凉宵露华重，低徊当月明。

· 全唐诗 ·

晚荷犹展卷，早蝉遽萧嘹。露叶行已重，况乃江风摇。
炎夏火再伏，清商暗回飙。寄言抱志士，日月东西跳。

买马买锯牙，买犊买破车。养禽当养鹑，种树先种花。
人生负俊健，天意与光华。莫学蚯蚓辈，食泥近土涯。

爱直莫爱夸，爱疾莫爱斜。爱谏莫爱诈，爱施莫爱奢。
择才不求备，任物不过涯。用人如用己，理国如理家。

E E 刀刃光，弯弯弓面张。入水斩犀兕，上山椎虎狼。
里中无老少，唤作癫儿郎。一日风云会，横行归故乡。

团团规内星，未必明如月。托迹近北辰，周天无沦没。
老人在南极，地远光不发。见则寿圣明，愿照高高阙。

河清谅嘉瑞，吾帝真圣人。时哉不我梦，此时为废民。
光阴本跳踯，功业劳苦辛。一到江陵郡，三年成去尘。

卷 398_13【野节鞭】

元稹

神鞭鞭宇宙，玉鞭鞭骐驎。紧絁野节鞭，本用鞭羴羴。
使君鞭甚长，使君马亦利。司马并马行，司马马憔悴。
短鞭不可施，疾步无由致。使君驻马言，愿以长鞭遗。
此遗不寻常，此鞭不容易。金坚无缴绕，玉滑无尘腻。

· 全唐诗 ·

青蛇坼生石，不刺山阿地。乌龟旋眼斑，不染江头泪。
长看雷雨痕，未忍骛骀试。持用换所持，无令等闲弃。
答云君何奇，赠我君所贵。我用亦不凡，终身保明义。
誓以鞭奸顽，不以鞭蹇蹠。指撝狡兔踪，决挹怪龙睡。
惜令寸寸折，节节不虚坠。因作换鞭诗，诗成谓同志。
而我得闻之，笑君年少意。安用换长鞭，鞭长亦奚为。
我有鞭尺馀，泥抛风雨渍。不拟闲赠行，唯将烂夸醉。
春来信马头，款缓花前辔。愿我迟似牵，饶君疾如翅。

卷三百九十九

卷 399_1【旱灾自咎，贻七县宰】

元稹

吾闻上帝心，降命明且仁。臣稹苟有罪，胡不灾我身。
胡为旱一州，祸此千万人。一旱犹可忍，其旱亦已频。
腊雪不满地，膏雨不降春。恻恻诏书下，半减麦与缗。
半租岂不薄，尚竭力与筋。竭力不敢惮，惭戴天子恩。
累累妇拜姑，呐呐翁语孙。禾黍日夜长，足得盈我囷。
还填折粟税，酬偿赏麦邻。苟无公私责，饮水不为贫。
欢言未盈口，旱气已再振。六月天不雨，秋孟亦既旬。
区区昧陋积，祷祝非不勤。日驰衰白颜，再拜泥甲鳞。
归来重思忖，愿告诸邑君。以彼天道远，岂如人事亲。
团团囷圉中，无乃冤不申。扰扰食廩内，无乃奸有因。
轧轧输送车，无乃使不伦。遥遥负担卒，无乃役不均。
今年无大麦，计与珠玉滨。村胥与里吏，无乃求取繁。
符下敛钱急，值官因酒嗔。诛求与挞罚，无乃不逡巡。
生小下里住，不曾州县门。诉词千万恨，无乃不得闻。
强豪富酒肉，穷独无刍薪。俱由案牒吏，无乃移祸屯。
官分市井户，迭配水陆珍。未蒙所偿直，无乃不敢言。

· 全唐诗 ·

有一于此事，安可尤苍旻。借使漏刑宪，得不虞鬼神。
自顾顽滞牧，坐贻灾沴臻。上羞朝廷寄，下愧闾里民。
岂无神明宰，为我同苦辛。共布慈惠语，慰此衢客尘。

卷 399_2【虫豸诗·巴蛇】

元稹

巴蛇千种毒，其最鼻褰蛇。掉舌翻红焰，盘身蹙白花。
喷人竖毛发，饮浪沸泥沙。欲学叔敖瘞，其如多似麻。
越岭南滨海，武都西隐戎。雄黄假名石，鸚鸟远难笼。

讵有隳肠计，应无破脑功。巴山昼昏黑，妖雾毒濛濛。
汉帝斩蛇剑，晋时烧上天。自兹繁巨蟒，往往寿千年。
白昼遮长道，青溪蒸毒烟。战龙苍海外，平地血浮船。

卷 399_3【虫豸诗·蛴螬】

元稹

巴蛇蟠窟穴，穴下有巢蜂。近树禽垂翅，依原兽绝踪。
微遭断手足，厚毒破心胸。昔甚招魂句，那知眼自逢。
梨笑清都月，蜂游紫殿春。构脾分部伍，嚼蕊奉君亲。
翅羽颇同类，心神固异伦。安知人世里，不有噬人人。

· 全唐诗 ·

兰蕙本同畹，蜂蛇亦杂居。害心俱毒螫，妖焰两吹嘘。
雷蛰吞噬止，枯焚巢穴除。可怜相济恶，勿谓祸无馀。

卷 399_4【虫豸诗·蜘蛛】

元稹

蜘蛛天下足，巴蜀就中多。缝隙容长跖，虚空织横罗。
萦缠伤竹柏，吞噬及虫蛾。为送佳人喜，珠玑无奈何。

网密将求食，丝斜误著人。因依方纪绪，挂胃遂容身。
截道蝉冠碍，漫天玉露频。儿童怜小巧，渐欲及车轮。

稚子怜圆网，佳人祝喜丝。那知缘暗隙，忽被啗柔肌。
毒腴攻犹易，焚心疗恐迟。看看长袄绪，和扁欲涟洏。

卷 399_5【虫豸诗·蚊子】

元稹

蚊子生无处，偏因湿处生。阴霾烦扰攘，拾粒苦嚙吟。
床上主人病，耳中虚藏鸣。雷霆翻不省，闻汝作牛声。

时术功虽细，年深祸亦成。攻穿漏江海，嚼食困蛟鲸。
敢惮穰`蠹，深藏柱石倾。寄言持重者，微物莫全轻。

· 全唐诗 ·

攘攘终朝见，悠悠卒岁疑。讵能分牝牡，焉得有蜾蠃。
徙市竟何意，生涯都几时。巢由或逢我，应似我相期。

卷 399_6【虫豸诗·蟆子】

元稹

蟆子微於蚋，朝繁夜则无。毫端生羽翼，针喙嗜肌肤。
暗毒应难免，羸形日渐枯。将身远相就，不敢恨非辜。

晦景权藏毒，明时敢噬人。不劳生诟怒，只足助酸辛。
隼眦看无物，蛇躯庇有鳞。天方刍狗我，甘与尔相亲。

有口深堪异，趋时讵可量。谁令通鼻息，何故辨馨香。
沉水来沧海，崇兰泛露光。那能枉焚爇，尔众我微茫。

卷 399_7【虫豸诗·浮尘子】

元稹

可叹浮尘子，纤埃喻此微。宁论隔纱幌，并解透绵衣。
有毒能成瘠，无声不见飞。病来双眼暗，何计辨雰霏。

乍可巢蚊睫，胡为附蟒鳞。已微于蠹蠹，仍害及仁人。
动植皆分命，毫芒亦是身。哀哉此幽物，生死敌浮尘。

· 全唐诗 ·

但觉皮肤憊，安知琐细来。因风吹薄雾，向日误轻埃。
暗啮堪销骨，潜飞有祸胎。然无防备处，留待雪霜摧。

卷 399_8【虫豸诗·虻】

元稹

阴深山有瘴，湿垫草多虻。众噬锥刀毒，群飞风雨声。
汗粘疮痛痛，日曝苦辛行。饱尔蛆残腹，安知天地情。

千山溪沸石，六月火烧云。自顾生无类，那堪毒有群。
搏牛皮若截，噬马血成文。蹄角尚如此，肌肤安可云。

辛螫终非久，炎凉本递兴。秋风自天落，夏萼与霜澄。
一镜开潭面，千锋露石棱。气平虫豸死，云路好攀登。

卷 399_9【楚歌十首】

元稹

楚人千万户，生死系时君。当璧便为嗣，贤愚安可分。
干戈长浩浩，篡乱亦纷纷。纵有明在下，区区何足云。

陶虞事已远，尼父独将明。潜穴龙无位，幽林兰自生。
楚王谋授邑，此意复中倾。未别子西语，纵来何所成。

· 全唐诗 ·

平王渐昏惑，无极转承恩。子建犹相贰，伍奢安得存。
生居宫雉闕，死葬寝园尊。岂料奔吴士，鞭尸郢市门。

惧盈因邓曼，罢猎为樊姬。盛德留金石，清风鉴薄帷。
襄王忽妖梦，宋玉复淫辞。万事捐宫馆，空山云雨期。

宜僚南市住，未省食人恩。临难忽相感，解纷宁用言。
何如晋夷甫，坐占紫微垣。看著五胡乱，清谈空自尊。

谁恃王深宠，谁为楚上卿。包胥心独许，连夜哭秦兵。
千乘徒虚尔，一夫安可轻。殷勤聘名士，莫但倚方城。

梁业雄图尽，遗孙世运消。宣明徒有号，江汉不相朝。
碑碣高临路，松枝半作樵。唯馀开圣寺，犹学武皇妖。

江陵南北道，长有远人来。死别登舟去，生心上马回。
荣枯诚异日，今古尽同灰。巫峡朝云起，荆王安在哉。

三峡连天水，奔波万里来。风涛各自急，前后苦相推。
倒入黄牛漩，惊冲滟滪堆。古今流不尽，流去不曾回。

八荒同日月，万古共山川。生死既由命，兴衰还付天。
栖栖王粲赋，愤愤屈平篇。各自埋幽恨，江流终宛然。

· 全唐诗 ·

卷 399_10【襄阳道】

元稹

羊公名渐远，唯有岷山碑。近日称难继，曹王任马彝。
椒兰俱下世，城郭到今时。汉水清如玉，流来本为谁。

卷 399_11【赋得鱼登龙门】

元稹

鱼贯终何益，龙门在苦登。有成当作雨，无用耻为鹏。
激浪诚难溯，雄心亦自凭。风云潜会合，髣髴忽腾凌。
泥滓辞河浊，烟霄见海澄。回瞻顺流辈，谁敢望同升。

卷 399_12【贞元历】

元稹

象魏才颁历，龙鑕已御天。犹看后元历，新署永贞年。
半岁光阴在，三朝礼数迁。无因书简册，空得咏诗篇。

· 全唐诗 ·

卷 399_13【塞马】

元稹

塞马倦江渚，今朝神彩生。晓风寒猎猎，乍得草头行。
夷狄寝烽候，关河无战声。何由当阵面，从尔四蹄轻。

卷 399_14【鹿角镇】

元稹

去年湖水满，此地覆行舟。万怪吹高浪，千人死乱流。
谁能问帝子，何事宠阳侯。渐恐鲸鲵大，波涛及九州。

卷 399_15【感事三首】

元稹

为国谋羊舌，从来不为身。此心长自保，终不学张陈。
自笑心何劣，区区辨所冤。伯仁虽到死，终不向人言。
富贵年皆长，风尘旧转稀。白头方见绝，遥为一沾衣。

· 全唐诗 ·

卷 399_16 【题翰林东阁前小松】

元稹

檐碍修鳞亚，霜侵簇翠黄。唯余入琴韵，终待舜弦张。

· 全唐诗 ·

卷四百

卷 400_1 【清都夜境】

元稹

夜久连观静，斜月何晶荧。寥天如碧玉，历历缀华星。
楼榭自阴映，云牖深冥冥。纤埃悄不起，玉砌寒光清。
栖鹤露微影，枯松多怪形。南厢俨容卫，音响如可聆。
启圣发空洞，朝真趋广庭。闲开蕊珠殿，暗阅金字经。
屏气动方息，凝神心自灵。悠悠车马上，浩思安得宁。

卷 400_2 【春晚寄杨十二，兼呈赵八】

元稹

蒙蒙竹树深，帘牖多清阴。避日坐林影，余花委芳襟。
倾尊就残酌，舒卷续微吟。空际飏高蝶，风中聆素琴。
广庭备幽趣，复对商山岑。独此爱时景，旷怀云外心。
迁莺恋嘉木，求友多好音。自无琅玕实，安得莲花簪。
寄之二君子，希见双南金。

· 全唐诗 ·

卷 400_3【与杨十二、李三早入永寿寺看牡丹】

元稹

晓入白莲宫，琉璃花界净。开敷多喻草，凌乱被幽径。
压砌锦地铺，当霞日轮映。蝶舞香暂飘，蜂牵蕊难正。

笼处彩云合，露湛红珠莹。结叶影自交，摇风光不定。
繁华有时节，安得保全盛。色见尽浮荣，希君了真性。

卷 400_4【春余遣兴】

元稹

春去日渐迟，庭空草偏长。馀英间初实，雪絮萦蛛网。
好鸟多息阴，新篁已成响。帘开斜照入，树裹游丝上。

绝迹念物闲，良时契心赏。单衣颇新绰，虚室复清敞。
置酒奉亲宾，树萱自怡养。笑倚连枝花，恭扶瑞藤杖。

步履恣优游，望山多气象。云叶遥卷舒，风裾动萧爽。
簪纓固烦杂，江海徒浩荡。野马笼赤霄，无由负羈鞅。

· 全唐诗 ·

卷 400_5【忆云之】

元稹

为鱼实爱泉，食辛宁避蓼。人生既相合，不复论窈窕。
沧海良有穷，白日非长皎。何事一人心，各在四方表。

泛若逐水萍，居为附松茑。流浪随所之，萦纡牵所绕。
百龄颇踟躇，况复迷寿夭。芟发君已衰，冠岁予非小。

娱乐不及时，暮年壮心少。感此幽念绵，遂为长悄悄。
中庭草木春，历乱递相扰。奇树花冥冥，竹竿凤袅袅。
幽芳被兰径，安得寄天杪。万里潇湘魂，夜夜南枝鸟。

卷 400_6【别李三】

元稹

阶萸附瑶砌，丛兰偶芳藿。高位良有依，幽姿亦相托。
鲍叔知我贫，烹葵不为薄。半面契始终，千金比然诺。

人生系时命，安得无苦乐。但感游子颜，又值馀英落。
苍苍秦树云，去去缙山鹤。日暮分手归，杨花满城郭。

· 全唐诗 ·

卷 400_7【秋夕远怀】

元稹

旦夕天气爽，风飘叶渐轻。星繁河汉白，露逼衾枕清。

丹鸟月中灭，莎鸡床下鸣。悠悠此怀抱，况复多远情。

卷 400_8【东西道】

元稹

天皇开四极，便有东西道。万古阅行人，行人几人老。

顾我倦行者，息阴何不早。少壮尘事多，那言壮年好。

卷 400_9【分流水】

元稹

古时愁别泪，滴作分流水。日夜东西流，分流几千里。

通塞两不见，波澜各自起。与君相背飞，去去心如此。

· 全唐诗 ·

卷 400_10【西还】

元稹

悠悠洛阳梦，郁郁灞陵树。落日正西归，逢君又东去。

卷 400_11【含风夕】

元稹

炎昏倦烦久，逮此含风夕。夏服稍轻清，秋堂已岑寂。
载欣凉宇旷，复念佳辰掷。络纬惊岁功，顾我何成绩。

青荧微月钩，幽晖洞阴魄。水镜涵玉轮，若见渊泉璧。
参差帘牖重，次第笼虚白。树影满空床，萤光缀深壁。

怅望牵牛星，复为经年隔。露网裹风珠，轻河泛遥碧。
讵无深秋夜，感此乍流易。亦有迟暮年，壮年良自惜。

循环切中肠，感念追往昔。接瞬无停阴，何言问陈积。
馨香推蕙兰，坚贞谕松柏。生物固有涯，安能比金石。

况兹百龄内，扰扰纷众役。日月东西驰，飞车无留迹。
来者良未穷，去矣定奚适。委顺在物为，营营复何益。

· 全唐诗 ·

卷 400_12【秋堂夕】

元稹

炎凉正回互，金火郁相乘。云雷时交构，川泽方蒸腾。
清风一朝胜，白露忽已凝。草木凡气尽，始见天地澄。
况此秋堂夕，幽怀旷无朋。萧条帘外雨，倏闪案前灯。
书卷满床席，蟪蛄悬复升。啼儿屡哑咽，倦僮时寝兴。
泛览昏夜目，咏谣畅烦膺。况吟获麟章，欲罢久不能。
尧舜事已远，丘道安可胜。蜉蝣不信鹤，螟蛉肯窥鹏。
当年且不偶，没世何必称。胡为揭闻见，褒贬贻爱憎。
焉用汨其泥，岂在清如冰。非白又非黑，谁能点青蝇。
处世苟无闷，佯狂道非弘。无言被人觉，予亦笑孙登。

卷 400_13【酬乐天】

元稹

放鹤在深水，置鱼在高枝。升沉或异势，同谓非所宜。
君为邑中吏，皎皎鸾凤姿。顾我何为者，翻侍白玉墀。
昔作芸香侣，三载不暂离。逮兹忽相失，旦夕梦魂思。
崔嵬骊山顶，宫树遥参差。只得两相望，不得长相随。
多君岁寒意，裁作秋兴诗。上言风尘苦，下言时节移。
官家事拘束，安得携手期。愿为云与雨，会合天之垂。

· 全唐诗 ·

卷 400_14 【杨子华画三首】

元稹

杨画远于展，何言今在兹。依然古妆服，但感时节移。
念君一朝意，遗我千载思。子亦几时客，安能长苦悲。
皓腕卷红袖，锦鞦臂苍鹗。故人断弦心，稚齿从禽乐。
当年惜贵游，遗形寄丹臆。骨象或依稀，铅华已寥落。
似对古人民，无复昔城郭。子亦观病身，色空俱寂寞。
颠倒是人心，纷纷乏公是。真赏画不成，画赏真相似。
丹青各所尚，工拙何足恃。求此妄中精，嗟哉子华子。

卷 400_15 【西州院】

元稹

自入西州院，唯见东川城。今夜城头月，非暗又非明。
文案床席满，卷舒赃罪名。惨凄且烦倦，弃之阶下行。
怅望天回转，动摇万里情。参辰次第出，牛女颠倒倾。
况此风中柳，枝条千万茎。到来篱下笋，亦已长短生。
感怆正多绪，鸦鸦相唤惊。墙上杜鹃鸟，又作思归鸣。
以彼撩乱思，吟为幽怨声。吟罢终不寝，冬冬复铛铛。

· 全唐诗 ·

卷 400_16 【台中鞠狱，忆开元观旧事，呈损之，兼赠周兄四十韵】

元稹

忆在开元馆，食柏练玉颜。疏慵日高卧，自谓轻人寰。
李生隔墙住，隔墙如隔山。怪我久不识，先来问骄顽。
十过乃一往，遂成相往还。以我文章卷，文章甚斑斓。
因言辛庾辈，亦愿放羸孱。既回数子顾，展转相连攀。
驱令选科目，若在闾与闾。学随尘土坠，漫数公卿关。
唯恐坏情性，安能惧谤讪。还招辛庾李，静处杯巡环。
进取果由命，不由趋险艰。穿杨二三子，弓矢次第弯。
推我亦上道，再联朝士班。二月除御史，三月使巴蛮。
蛮民詆謫诉，咄指明痛癢。怜蛮不解语，为发昏帅奸。
归来五六月，旱色天地殷。分司别兄弟，各各泪潸潸。
哀哉剧部职，唯数赃罪钁。死款依稀取，斗辞方便删。
道心常自愧，柔发难久黣。折支望车乘，支痛谁置患。
奇哉乳臭儿，绯紫绷被间。渐大官渐贵，渐富心渐慳。
闹装辔头轳，静拭腰带斑。鹞子绣线t，狗儿金油环。
香汤洗骢马，翠箴笼白鹇。月请公王封，冰受天子颁。
开筵试歌舞，别宅宠妖娴。坐卧摩绵褥，捧拥綰丝鬟。
旦夕不相离，比翼若飞鸾。而我亦何苦，三十身已鰥。
愁吟心骨颤，寒卧支体l。居处虽幽静，尤悔少愉懽。
不如周道士，鹤岭临钟湾。绕院松瑟瑟，通畦水潺潺。
阳坡自寻蕨，村沼看沅菅。穷通两未遂，营营真老闲。

· 全唐诗 ·

卷 400_17【韦氏馆与周隐客、杜归和泛舟】

元稹

天色低澹澹，池光漫油油。轻舟闲缴绕，不远池上楼。
时物欣外奖，真元随内修。神恬津藏满，气委支节柔。
众处岂自异，旷怀谁我侔。风车笼野马，八荒安足游。
开颜陆浑杜，握手灵都周。持君宝珠赠，顶戴头上头。

卷 400_18【刘氏馆集隐客、归和、子元、及之、子蒙、晦之】

元稹

湿垫缘竹径，寥落护岸冰。偶然沽市酒，不越四五升。
诗客爱时景，道人话升腾。笑言各有趣，悠哉古孙登。

卷 400_19【寄隐客】

元稹

我年三十二，鬓有八九丝。非无官次第，其如身早衰。
今人夸富贵，肉食与妖姬。而我俱不乐，贵富亦何为。
况逢多士朝，贤俊若布棋。班行次第立，朱紫相参差。
谟猷密勿进，羽檄纵横驰。监察官甚小，发言无所裨。

· 全唐诗 ·

小官仍不了，谴夺亦已随。时或不之弃，得不自弃之。
陶君喜不遇，顾我复何疑。潜书周隐士，白云今有期。

卷 400_20【元和五年予官不了，罚俸西归，三月六日至陕府，
与吴十一兄端公、崔二十二院长，思怆曩游，因投五十韵】

元稹

小年闲爱春，认得春风意。未有花草时，先醺晓窗睡。
霞朝澹云色，霁景牵诗思。渐到柳枝头，川光始明媚。
长安车马客，倾心奉权贵。昼夜尘土中，那言早春至。
此时我独游，我游有伦次。闲行曲江岸，便宿慈恩寺。
扣林引寒龟，疏丛出幽翠。凌晨过杏园，晓露凝芳气。
初阳好明净，嫩树怜低庳。排房似缀珠，欲啼红脸泪。
新莺语娇小，浅水光流利。冷饮空腹杯，因成日高醉。
酒醒闻饭钟，随僧受遗施。餐罢还复游，过从上文记。
行逢二月半，始足游春骑。是时春已老，我游亦云既。
藤开九华观，草结三条隧。新笋踊犀株，落梅翻蝶翅。
名倡绣毂车，公子青丝辔。朝士还旬休，豪家得春赐。
提携好音乐，翦铲空田地。同占杏花园，喧阗各丛萃。
顾予烦寝兴，复往散憔悴。倦仆色肌羸，蹇驴行跛痹。
春衫未成就，冬服渐尘腻。倾盖吟短章，书空忆难字。
遥闻公主笑，近被王孙戏。邀我上华筵，横头坐宾位。
那知我年少，深解酒中事。能唱犯声歌，偏精变筹义。
含词待残拍，促舞递繁吹。叫噪掷投盘，生狞摄觥使。
逡巡光景晏，散乱东西异。古观闭闲门，依然复幽閤。

· 全唐诗 ·

无端矫情性，漫学求科试。薄艺何足云，虚名偶频遂。
拾遗天子前，密奏升平议。召见不须臾，憺庸已猜忌。
朝陪香案班，暮作风尘尉。去岁又登朝，登为柏台吏。
台官相束缚，不许放情志。寓直劳送迎，上堂烦避讳。
分司在东洛，所职尤不易。罚俸得西归，心知受朝庇。
常山攻小寇，淮右择良帅。国难身不行，劳生欲何为。
吾兄谙性灵，崔子同臭味。投此挂冠词，一生还自恣。

第四百零一卷

卷 401_1【寄吴士矩端公五十韵】

元稹

昔在凤翔日，十岁即相识。未有好文章，逢人赏颜色。
可怜何郎面，二十才冠饰。短发予近梳，罗衫紫蝉翼。
伯舅各骄纵，仁兄未摧抑。事业若杯盘，诗书甚徽纆。
西州戎马地，贤豪事雄特。百万时可赢，十千良易借。
寒食桐阴下，春风柳林侧。藉草送远游，列筵酬博塞。
萎蕤云幕翠，灿烂红茵赭。脍缕轻似丝，香醑腻如脂。
将军频下城，佳人尽倾国。媚语娇不闻，纤腰软无力。
歌辞妙宛转，舞态能剌刻。箏弦玉指调，粉汗红绡拭。
予时最年少，专务酒中职。未能解生狞，偏矜任狂直。
曲庇桃根盏，横讲捎云式。乱布斗分朋，惟新闻讪慝。
耻作最先吐，羞言未朝食。醉眼渐纷纷，酒声频。 。
扣节参差乱，飞觥往来织。强起相维持，翻成两匍匐。
边霜飒然降，战马鸣不息。但喜秋光丽，谁忧塞云黑。
常随猎骑走，多在豪家匿。夜饮天既明，朝歌日还昃。
荒狂岁云久，名利心潜逼。时辈多得途，亲朋屡相敕。
闲因适农野，忽复爱稼穡。平生中圣人，翻然腐肠贼。
亦从酒仙去，便被书魔惑。脱迹壮士场，甘心竖儒域。

· 全唐诗 ·

矜持翠筠管，敲断黄金勒。屡益兰膏灯，犹研兔枝墨。
崎岖来掉荡，矫枉事沉默。隐笑甚艰难，敛容还劣削。
与君始分散，勉我劳修饰。岐路各营营，别离长恻恻。
行看二十载，万事纷何极。相值或须臾，安能洞胸臆。
昨来陕郊会，悲欢两难克。问我新相知，但报长相忆。
岂无新知者，不及小相得。亦有生岁游，同年不同德。
为别讵几时，伊予坠沟洫。大江鼓风浪，远道参荆棘。
往事返无期，前途浩难测。一旦得自由，相求北山北。

卷 401_2【三月二十四日宿曾峰馆，夜对桐花，寄乐天】

元稹

微月照桐花，月微花漠漠。怨澹不胜情，低回拂帘幕。
叶新阴影细，露重枝条弱。夜久春恨多，风清暗香薄。
是夕远思君，思君瘦如削。但感事暌违，非言官好恶。
奏书金銮殿，步屣青龙阁。我在山馆中，满地桐花落。

卷 401_3【酬乐天书怀见寄】

元稹

新昌北门外，与君从此分。街衢走车马，尘土不见君。
君为分手归，我行行不息。我上秦岭南，君直枢星北。
秦岭高崔嵬，商山好颜色。月照山馆花，裁诗寄相忆。

· 全唐诗 ·

天明作诗罢，草草随所如。凭人寄将去，三月无报书。
荆州白日晚，城上鼓冬冬。行逢贺州牧，致书三四封。
封题乐天字，未坼已沾裳。坼书八九读，泪落千万行。
中有酬我诗，句句截我肠。仍云得诗夜，梦我魂凄凉。
终言作书处，上直金銮东。诗书费一夕，万恨殫其中。
中宵宫中出，复见宫月斜。书罢月亦落，晓灯随暗花。
想君书罢时，南望劳所思。况我江上立，吟君怀我诗。
怀我浩无极，江水秋正深。清见万丈底，照我平生心。
感君求友什，因报壮士吟。持谢众人口，销尽犹是金。

卷 401_4【酬乐天登乐游园见忆】

元稹

昔君乐游园，怅望天欲曛。今我大江上，快意波翻云。
秋空压澶漫，颶洞无垢氛。四顾皆豁达，我眉今日伸。
长安隘朝市，百道走埃尘。轩车随对列，骨肉非本亲。
夸游丞相第，偷入常侍门。爱君直如发，勿念江湖人。

卷 401_5【酬乐天早夏见怀】

元稹

庭柚有垂实，燕巢无宿雏。我亦辞社燕，茫茫焉所如。
君诗夏方早，我叹秋已徂。食物风土异，衾裯时节殊。

· 全唐诗 ·

荒草满田地，近移江上居。八日复切九，月明侵半除。

卷 401_6【酬乐天劝醉】

元稹

神曲清浊酒，牡丹深浅花。少年欲相饮，此乐何可涯。
沉机造神境，不必悟楞伽。酡颜返童貌，安用成丹砂。
刘伶称酒德，所称良未多。愿君听此曲，我为尽称嗟。
一杯颜色好，十盏胆气加。半酣得自恣，酩酊归太和。
共醉真可乐，飞觥撩乱歌。独醉亦有趣，兀然无与他。
美人醉灯下，左右流横波。王孙醉床上，颠倒眠绮罗。
君今劝我醉，劝醉意如何。

卷 401_7【和乐天初授户曹喜而言志】

元稹

王爵无细大，得请即为恩。君求户曹掾，贵以禄奉亲。
闻君得所请，感我欲沾巾。今人重轩冕，所重华与纷。
矜夸仕台阁，奔走无朝昏。君衣不盈篋，君食不满囷。
君言养既薄，何以荣我门。披诚再三请，天子怜俭贫。
词曹直文苑，捧诏荣且忻。归来高堂上，兄弟罗酒尊。
各称千万寿，共饮三四巡。我实知君者，千里能具陈。
感君求禄意，求禄殊众人。上以奉颜色，馀以及亲宾。

· 全唐诗 ·

弃名不弃实，谋养不谋身。可怜白华士，永愿凌青云。

卷 401_8【和乐天赠吴丹】

元稹

不识吴生面，久知吴生道。迹虽染世名，心本奉天老。
雌一守命门，回九填血脑。委气荣卫和，咽津颜色好。
传闻共甲子，衰隤尽枯槁。独有冰雪容，纤华夺鲜缟。
问人何能尔，吴实旷怀抱。弁冕徒挂身，身外非所宝。
伊予固童昧，希真亦云早。石坛玉晨尊，昼夜长自扫。
密印视丹田，游神梦三岛。万过黄庭经，一食青精稻。
冥搜方朔桃，结念安期枣。绿发幸未改，丹诚自能保。
行当摆尘缨，吴门事探讨。君为先此词，终期搴瑶草。

卷 401_9【和乐天秋题曲江】

元稹

十载定交契，七年镇相随。长安最多处，多是曲江池。
梅杏春尚小，芰荷秋已衰。共爱寥落境，相将偏此时。
绵绵红蓼水，颺颺白鹭鹚。诗句偶未得，酒杯聊久持。
今来云雨旷，旧赏魂梦知。况乃江枫夕，和君秋兴诗。

· 全唐诗 ·

卷 401_10【和乐天别弟后月夜作】

元稹

闻君别爱弟，明天照夜寒。秋雁拂檐影，晓琴当砌弹。
怅望天澹澹，因思路漫漫。吟为别弟操，闻者为辛酸。
况我兄弟远，一身形影单。江波浩无极，但见时岁阑。

卷 401_11【和乐天秋题牡丹丛】

元稹

敝宅艳山卉，别来长叹息。吟君晚丛咏，似见摧颜色。
欲识别后容，勤过晚丛侧。

卷 401_12【春月】

元稹

春月虽至明，终有霭霭光。不似秋冬色，逼人寒带霜。
纤粉澹虚壁，轻烟笼半床。分晖间林影，余照上虹梁。
病久尘事隔，夜闲清兴长。拥抱颠倒领，步履东西厢。
风柳结柔援，露梅飘暗香。雪含樱绽蕊，珠蹙桃缀房。
杳杳有馀思，行行安可忘。四邻非旧识，无以话中肠。

· 全唐诗 ·

南有居士俨，默坐调心王。款关一问讯，为我披衣裳。
延我入深竹，暖我于小堂。视身琉璃莹，谕指芭蕉黄。
复有比丘溢，早传龙树方。口中秘丹诀，肘后悬青囊。
锡杖虽独振，刀圭期共尝。未知仙近远，已觉神轻翔。
夜久魂耿耿，月明露苍苍。悲哉沉眠士，宁见兹夕良。

卷 401_13【月临花】

元稹

临风飏飏花，透影胧胧月。巫峡隔波云，姑峰漏霞雪。
镜匀娇面粉，灯泛高笼缬。夜久清露多，啼珠坠还结。

卷 401_14【红芍药】

元稹

芍药绽红绡，巴篱织青琐。繁丝蹙金蕊，高焰当炉火。
翦刻彤云片，开张赤霞裹。烟轻琉璃叶，风亚珊瑚朵。
受露色低迷，向人娇婀娜。酡颜醉后泣，小女妆成坐。
艳艳锦不如，天天桃未可。晴霞畏欲散，晚日愁将堕。
结植本为谁，赏心期在我。采之谅多思，幽赠何由果。

· 全唐诗 ·

卷 401_15 【送王十一南行】

元稹

夏水漾天末，晚暘依岸村。风调乌尾劲，眷恋馀芳尊。
解袂方瞬息，征帆已翩翻。江豚涌高浪，枫树摇去魂。
远戍宗侣泊，暮烟洲渚昏。离心讵几许，骤若移寒温。
此别信非久，胡为坐忧烦。我留石难转，君泛云无根。
万里湖南月，三声山上猿。从兹耿幽梦，夜夜湘与沅。

卷 401_16 【三叹】

元稹

孤剑锋刃涩，犹能神彩生。有时雷雨过，暗吼阊阖声。
主人閤灵宝，畏作升天行。淬砺当阳铁，刻为干镆名。
远求鸞鹄莹，同用玉匣盛。颜色纵相类，利钝颇相倾。
雄为光电烺，雌但深泓澄。龙怒有奇变，青蛇终不惊。
仙凤翠皇死，葳蕤光彩低。非无鸳鸾侣，誓不同树栖。
飞驰岁云暮，感念雏在泥。顾影不自暖，寄尔蟠桃鸡。
驯养岂无愧，类族安得齐。愿言成羽翼，奋翅凌丹梯。
天骥失龙偶，三年常夜嘶。哀缘喷风断，渴且含霜啼。
长恐绝遗类，不复蹑云霓。非无駉駉者，鹤意不在鸡。
春来筋骨瘦，吊影心亦迷。自此渥洼种，应生浊水泥。

· 全唐诗 ·

卷 401_17【遣昼】

元稹

密竹有清阴，旷怀无尘滓。况乃秋日光，玲珑晓窗里。
旬休聊自适，今辰日高起。栉沐坐前轩，风轻镜如水。
开卷恣咏谣，望云闲徙倚。新菊媚鲜妍，短萍怜羸靡。
扫除田地静，摘掇园蔬美。幽玩惬诗流，空堂称居士。
客来伤寂寞，我念遗烦鄙。心迹两相忘，谁能验行止。

卷 401_18【冬夜怀李侍御、王太祝、段丞】

元稹

浩露烟壒尽，月光闲有馀。松篁细阴影，重以帘牖疏。
泛览星粲粲，轻河悠碧虚。纤云不成叶，脉脉风丝舒。

丹灶炽东序，烧香罗玉书。飘飘魂神举，若骖鸾鹤舆。
感念夙昔意，华尚簪与裾。簪裾讵几许，累创吞钩鱼。

今闻馨香道，一以悟臭帑。悟觉誓不惑，永抱胎仙居。
昼夜欣所适，安知岁云除。行行二三友，君怀复何如。

· 全唐诗 ·

卷 401_19【西斋小松二首】

元稹

松树短于我，清风亦已多。况乃枝上雪，动摇微月波。
幽姿得闲地，讵感岁蹉跎。但恐厦终构，藉君当奈何。

簇簇枝新黄，纤纤攒素指。柔苳渐依条，短莎还半委。
清风日夜高，凌云意何已。千岁盘老龙，修鳞自兹始。

卷 401_20【周先生】

元稹

寥寥空山岑，冷冷风松林。流月垂鳞光，悬泉扬高音。
希夷周先生，烧香调琴心。神力盈三千，谁能还黄金。

· 全唐诗 ·

卷四百零二

卷 402_1【遣春十首】

元稹

晓月笼云影，莺声馥雾中。暗芳飘露气，轻寒生柳风。
冉冉一趋府，未为劳我躬。因兹得晨起，但觉情兴隆。

久雨怜霁景，偶来堤上行。空濛天色嫩，杳淼江面平。
百草短长出，众禽高下鸣。春阳各有分，予亦澹无情。

镜皎碧潭水，微波粗成文。烟光垂碧草，琼脉散纤云。
岸柳好阴影，风裾遗垢氛。悠然送春目，八荒谁与群。

低迷笼树烟，明净当霞日。阳焰波春空，平湖漫凝溢。
雪鹭远近飞，渚牙浅深出。江流复浩荡，相为坐纡郁。

暄寒深浅春，红白前后花。颜色诤相让，生成良有涯。
梅花勿自早，春来归燕多。葺旧良易就，新院亦已罗。
俯怜雏化卵，仰愧鹏无窠。巢栋与巢幕，秋风俱奈何。

撩乱扑树蜂，摧残恋房蕊。风吹雨又频，安得繁于绮。

· 全唐诗 ·

酒杯沉易过，世事纷何已。莫倚颜似花，君看岁如水。

绕郭高高冢，半是荆王墓。后嗣炽阳台，前贤甘萃路。
善恶徒自分，波流尽东注。胡然不饮酒，坐落桐花树。

花阴莎草长，藕莎闲自酌。坐看莺斗枝，轻花满尊杓。
葛巾竹稍挂，旧卷琴上阁。沽酒过此生，狂歌眼前乐。

梨叶已成阴，柳条纷起絮。波绿紫屏风，螺红碧筹箸。
三杯面上热，万事心中去。我意风散云，何劳问行处。

卷 402_2【表夏十首】

元稹

夏风多暖暖，树木有繁阴。新笋紫长短，早樱红浅深。
烟花云幕重，榴艳朝景侵。华实各自好，讵云芳意沉。

初日满阶前，轻风动帘影。旬时得休浣，高卧阅清景。
僮儿拂巾箱，鸦轧深林井。心到物自闲，何劳远箕颖。

江瘴炎夏早，蒸腾信难度。今宵好风月，独此荒庭趣。
露叶倾暗光，流星委余素。但恐清夜徂，讵悲朝景暮。

孟月夏犹浅，奇云未成峰。度霞红漠漠，压浪白溶溶。
玉委有余润，飙驰无去踪。何如捧云雨，喷毒随蛟龙。

· 全唐诗 ·

流芳递炎景，繁英尽寥落。公署香满庭，晴霞覆阑药。
裁红起高焰，缀绿排新萼。凭此遣幽怀，非言念将谑。

红丝散芳树，旋转光风急。烟泛被笼香，露浓妆面湿。
佳人不再此，恨望阶前立。忽厌夏景长，今春行已及。

百舌渐吞声，黄莺正娇小。云鸿方警夜，笼鸡已鸣晓。
当时客自适，运去谁能矫。莫厌夏虫多，蝥蟧定相扰。

翩翩帘外燕，戢戢巢内雏。啖食筋力尽，毛衣成紫襦。
朝来各飞去，雄雌梁上呼。养子将备老，恶儿那胜无。

西山夏雪消，江势东南泻。风波高若天，滟潏低于马。
正被黄牛旋，难期白帝下。我在平地行，翻忧济川者。

灵均死波后，是节常浴兰。彩缕碧筠粽，香粳白玉团。
逝者良自苦，今人反为欢。哀哉徇名士，没命求所难。

卷 402_3【解秋十首】

元稹

清晨颰寒水，动摇襟袖轻。翳翳林上叶，不知秋暗生。
回悲镜中发，华白三四茎。岂无满头黑，念此衰已萌。

微霜才结露，翔鸿初变鹰。无乃天地意，使之行小惩。

· 全唐诗 ·

鸱鸺诚可恶，蔽日有高鹏。舍大以擒细，我心终不能。

往岁学仙侣，各在无何乡。同时鹜名者，次第鸛鹭行。
而我两不遂，三十鬓添霜。日暮江上立，蝉鸣枫树黄。

后伏火犹在，先秋蝉已多。云色日夜白，骄阳能几何。
壤隙漏江海，忽微成网罗。勿言时不至，但恐岁蹉跎。

新月才到地，轻河如泛云。萤飞高下火，树影参差文。
露簟有微润，清香时暗焚。夜闲心寂默，洞庭无垢氛。

霁丽床前影，飘萧帘外竹。簟凉朝睡重，梦觉茶香熟。
亲烹园内葵，凭买家家曲。酿酒并毓蔬，人来有棋局。

寒竹秋雨重，凌霄晚花落。低回翠玉梢，散乱栀黄萼。
颜色有殊异，风霜无好恶。年年百草芳，毕意同萧索。

春非我独春，秋非我独秋。岂念百草死，但念霜满头。
头白古所同，胡为坐烦忧。茫茫百年内，处身良未休。

西风冷衾簟，展转布华茵。来者承玉体，去者流芳尘。
适意丑为好，及时疏亦亲。衰周仲尼出，无乃为妖人。

漠漠江面烧，微微枫树烟。今日复今夕，秋怀方浩然。
况我头上发，衰白不待年。我怀有时极，此意何由诠。

· 全唐诗 ·

卷 402_4【遣病十首】

元稹

服药备江瘴，四年方一疴。岂是药无功，伊予久留滞。
滞留人固薄，瘴久药难制。去日良已甘，归途奈无际。

弃置何所任，郑公怜我病。三十九万钱，资予养顽暝。
身贱杀何益，恩深报难罄。公其万千年，世有天之郑。

忆作孩稚初，健羨成人列。倦学厌日长，嬉游念佳节。
今来渐讳年，顿与前心别。白日速如飞，佳晨亦骚屑。

昔在痛饮场，憎人病辞醉。病来身怕酒，始悟他人意。
怕酒岂不闲，悲无少年气。传语少年儿，杯盘莫回避。

忆初头始白，昼夜惊一缕。渐及鬓与须，多来不能数。
壮年等闲过，过壮年已五。华发不再青，劳生竟何补。

在家非不病，有病心亦安。起居甥侄扶，药饵兄嫂看。
今病兄远路，逍遥书信难。寄言娇小弟，莫作官家官。

燕巢官舍内，我尔俱为客。岁晚我独留，秋深尔安适。
风高翅羽垂，路远烟波隔。去去玉山岑，人间网罗窄。

檐宇夜来旷，暗知秋已生。卧悲衾簟冷，病觉支体轻。

· 全唐诗 ·

炎昏岂不倦，时去聊自惊。浩叹终一夕，空堂天欲明。

秋依静处多，况乃凌晨趣。深竹蝉昼风，翠茸衫晓露。
庭莎病看长，林果闲知数。何以强健时，公门日劳骛。

朝结故乡念，暮作空堂寝。梦别泪亦流，啼痕暗横枕。
昔愁凭酒遣，今病安能饮。落尽秋槿花，离人病犹甚。

卷 402_5【寒】

元稹

江瘴节候暖，腊初梅已残。夜来北风至，喜见今日寒。
扣冰浅塘水，拥雪深竹阑。复此满尊醪，但嗟谁与欢。

卷 402_6【玉泉道中作】

元稹

楚俗物候晚，孟冬才有霜。早农半华实，夕水含风凉。
遐想云外寺，峰峦渺相望。松门接官路，泉脉连僧房。
微露上弦月，暗焚初夜香。谷深烟壑净，山虚钟磬长。
念此清境远，复忧尘事妨。行行即前路，勿滞分寸光。

· 全唐诗 ·

卷 402_7【遣病】

元稹

自古谁不死，不复记其名。今年京城内，死者老少并。
独孤才四十，仕宦方荣荣。李三三十九，登朝有清声。
赵昌八十馀，三拥大将旌。为生信异异，之死同冥冥。
其家哭泣爱，一一无异情。其类嗟叹惜，各各无重轻。
万龄龟菌等，一死天地平。以此方我病，我病何足惊。
借如今日死，亦足了一生。借使到百年，不知何所成。
况我早师佛，屋宅此身形。舍彼复就此，去留何所萦。
前身为过迹，来世即前程。但念行不息，岂忧无路行。
蛻骨龙不死，蛻皮蝉自鸣。胡为神蛻体，此道人不明。
持谢爱朋友，寄之仁弟兄。吟此可达观，世言何足听。

卷 402_8【感梦】

元稹

十月初二日，我行蓬州西。三十里有馆，有馆名芳溪。
荒邮屋舍坏，新雨田地泥。我病百日馀，肌体顾若刳。
气填暮不食，早早掩奚圭。阴寒筋骨病，夜久灯火低。
忽然寝成梦，宛见颜如珪。似叹久离别，嗟嗟复凄凄。
问我何病痛，又叹何栖栖。答云痰滞久，与世复相睽。
重云痰小疾，良药固易挤。前时奉橘丸，攻疾有神功。

· 全唐诗 ·

何不善和疗，岂独头有风。殷勤平生事，款曲无不终。
悲欢两相极，以是半日中。言罢相与行，行行古城里。
同行复一人，不识谁氏子。逡巡急吏来，呼唤愿且止。
驰至相君前，再拜复再起。启云吏有奉，奉命传所旨。
事有大惊忙，非君不能理。答云久就闲，不愿见劳使。
多谢致勤勤，未敢相唯唯。我因前献言，此事愚可料。
乱热由静消，理繁在知要。君如冬月阳，奔走不必召。
君如铜镜明，万物自可照。愿君许苍生，勿复高体调。
相君不我言，顾我再三笑。行行及城户，黯黯馀日晖。
相君不我言，命我从此归。不省别时语，但省涕淋漓。
觉来身体汗，坐卧心骨悲。闪闪灯背壁，胶胶鸡去埽。
倦童颠倒寝，我泪纵横垂。泪垂啼不止，不止啼且声。
啼声觉僮仆，僮仆撩乱惊。问我何所苦，问我何所思。
我亦不能语，惨惨即路岐。前经新政县，今夕复明辰。
置置满心气，不得说向人。奇哉赵明府，怪我眉不伸。
云有北来僧，住此月与旬。自言辨贵骨，谓若识天真。
谈游费闕景，何不与逡巡。僧来为予语，语及昔所知。
自言有奇中，裴相未相时。读书灵山寺，住处接园篱。
指言他日贵，晷刻似不移。我闻僧此语，不觉泪歔歔。
因言前夕梦，无人一相谓。无乃裴相君，念我胸中气。
遣师及此言，使我尽前事。僧云彼何亲，言下涕不已。
我云知我深，不幸先我死。僧云裴相君，如君恩有几。
我云滔滔众，好直者皆是。唯我与白生，感遇同所以。
官学不同时，生小异乡里。拔我尘土中，使我名字美。
美名何足多，深分从此始。吹嘘莫我先，顽陋不我鄙。
往往裴相门，终年不曾履。相门多众流，多誉亦多毁。
如闻风过尘，不动井中水。前时予掾荆，公在期复起。

· 全唐诗 ·

自从裴公无，吾道甘已矣。白生道亦孤，谗谤销骨髓。
司马九江城，无人一言理。为师陈苦言，挥涕满十指。
未死终报恩，师听此男子。

卷 402_9【和东川李相公慈竹十二韵】

元稹

慈竹不外长，密比青瑶华。矛攒有森束，玉粒无蹉跎。
纤粉妍膩质，细琼交翠柯。亭亭霄汉近，霭霭雨露多。
冰碧寒夜耸，箫韶风昼罗。烟含朏朏影，月泛鳞鳞波。
鸾凤一已顾，燕雀永不过。幽姿媚庭实，颢气爽天涯。
峻节高转露，贞筠寒更佳。托身仙坛上，灵物神所呵。
时与天籁合，日闻阳春歌。应怜孤生者，摧折成病痾。

· 全唐诗 ·

卷四百零三

卷 403_1 【酬东川李相公十六韵】

元稹

昔附赤霄羽，葳蕤游紫垣。斗班香案上，奏语玉晨尊。
戆直撩忌讳，科仪惩傲顽。自从真籍除，弃置勿复论。
前时共游者，日夕黄金轩。请帝下巫觋，八荒求我魂。
鸾凤屡鸣顾，燕雀尚篱藩。徒令霄汉外，往往尘念存。
存念岂虚设，并投琼与璠。弹珠古所讶，此用何太敦。
邹律寒气变，郑琴祥景奔。灵芝绕身出，左右光彩繁。
碾玉无俗色，蕊珠非世言。重惭前日句，陋若菰并荪。
腊月巴地雨，瘴江愁浪翻。因持骇鸡宝，一照浊水昏。

卷 403_2 【酬独孤二十六送归通州】

元稹

再拜捧兄赠，拜兄珍重言。我有平生志，临别将具论。
十岁慕倜傥，爱白不爱昏。宁爱寒切烈，不爱暘温暾。

· 全唐诗 ·

二十走猎骑，三十游海门。憎兔跳跃跃，恶鹏黑翻翻。
鳌钓气方壮，鹖拳心颇尊。下观狴犴辈，一扫冀不存。

名冠壮士籍，功酬明主恩。不然合身弃，何况身上痕。
金石有销烁，肺腑无寒温。分画久已定，波涛何足烦。

尝希苏门啸，詎厌巴树猿。瘴水徒浩浩，浮云亦轩轩。
长歌莫长叹，饮斛莫饮樽。生为醉乡客，死作达士魂。

卷 403_3 【酬刘猛见送】

元稹

种花有颜色，异色即为妖。养鸟恶羽翮，剪翮不待高。
非无剪伤者，物性难自逃。百足虽捷捷，商羊亦翘翘。

伊余狷然质，谬入多士朝。任气有馥馥，容身寡朋曹。
愚狂偶似直，静僻非敢骄。一为毫发忤，十载山川遥。

烁铁不在火，割肌不在刀。险心露山岳，流语翻波涛。
六尺安敢主，方寸由自调。神剑土不蚀，异布火不焦。

虽无二物姿，庶欲效一毫。未能深蹙蹙，多谢相劳劳。
去去我移马，迟迟君过桥。云势正横壑，江流初满槽。
持此慰远道，此之为旧交。

· 全唐诗 ·

卷 403_4【酬乐天赴江州路上见寄三首】

元稹

昔在京城心，今在吴楚末。千山道路险，万里音尘阔。
天上参与商，地上胡与越。终天升沉异，满地网罗设。

心有无朕环，肠有无绳结。有结解不开，有环寻不歇。
山岳移可尽，江海塞可绝。离恨若空虚，穷年思不彻。
生莫强相同，相同会相别。

襄阳大堤绕，我向堤前住。烛随花艳来，骑送朝云去。
万竿高庙竹，三月徐亭树。我昔忆君时，君今怀我处。
有身有离别，无地无岐路。风尘同古今，人世劳新故。

人亦有相爱，我尔殊众人。朝朝宁不食，日日愿见君。
一日不得见，愁肠坐氛氲。如何远相失，各作万里云。
云高风苦多，会合难遽因。天上犹有碍，何况地上身。

卷 403_5【邕竹】

元稹

庭有萧萧竹，门有阗阗骑。器静本殊途，因依偶同寄。
亭亭乍干云，袅袅亦垂地。人有异我心，我无异人意。

· 全唐诗 ·

卷 403_6【落月】

元稹

落月沉馀影，阴渠流暗光。蚊声覆窗户，萤火绕屋梁。

飞幌翠云薄，新荷清露香。不吟复不寐，竟夕池水傍。

卷 403_7【高荷】

元稹

种藕百馀根，高荷才四叶。飏闪碧云扇，团圆青玉叠。

亭亭自抬举，鼎鼎难藏擫。不学著水荃，一生长怙怙。

卷 403_8【和裴校书鹭鸶飞】

元稹

鹭鸶鹭鸶何遽飞，鸦惊雀噪难久依。

清江见底草堂在，一点白光终不归。

· 全唐诗 ·

卷 403_9【夜池】

元稹

荷叶团圆茎削削，绿萍面上红衣落。
满池明月思啼蛩，高屋无人风张幕。

卷 403_10【酬杨司业十二兄早秋述情见寄】

元稹

白发故人少，相逢意弥远。往事共销沉，前期各衰晚。
昨来遇弥苦，已复云离岫。秋草古胶庠，寒沙废宫苑。
知心岂忘鲍，咏怀难和阮。壮志日萧条，那能竞朝幘。

卷 403_11【代杭人作使君一朝去二首】

元稹

使君一朝去，遗爱在人口。惠化境内春，才名天下首。
为问龚黄辈，兼能作诗否。

使君一朝去，断肠如剉檠。无复见冰壶，唯应镂金石。
自此一州人，生男尽名白。

· 全唐诗 ·

卷 403_12【长庆历】

元稹

年历复年历，卷尽悲且惜。历日何足悲，但悲年运易。
年年岂无叹，此叹何唧唧。所叹别此年，永无长庆历。

卷 403_13【顺宗至德大圣大安孝皇帝挽歌词三首】

元稹

不改延洪祚，因成揖让朝。讴歌同戴启，遏密共思尧。
雨露施恩广，梯航会葬遥。号弓那独切，曾感昔年招。
前春文祖庙，大舜嗣尧登。及此逾年感，还因是月崩。
寿缘追孝促，业在继明兴。俭诏同今古，山川绕灞陵。
七月悲风起，凄凉万国人。羽仪经巷内，輶 转城闉。
暝色依陵早，秋声入辂新。自嗟同草木，不识永贞春。

卷 403_14【宪宗章武孝皇帝挽歌词三首】

元稹

国付重离后，身随十圣仙。北辰移帝座，西日到虞泉。
方文言虚设，华胥事眇然。触鳞曾在宥，偏哭堕髯前。

· 全唐诗 ·

天宝遗馀事，元和盛圣功。二凶梟帐下，三叛斩都中。
始服沙陀虏，方吞逻娑戎。狼星如要射，犹有鼎湖弓。
月落禁垣西，星攒晓仗齐。风传宫漏苦，云拂羽仪低。
路隘车千两，桥危马万蹄。共蹉封石检，不为报功泥。

卷 403_15【恭王故太妃挽歌词二首】

元稹

燕姑贻天梦，梁王尽孝思。虽从魏诏葬，得用汉藩仪。
曙月残光敛，寒箫度曲迟。平生奉恩地，哀挽欲何之。

文卫罗新圻，仙娥掩暝山。雪云埋陇合，箫鼓望城还。
寒树风难静，霜郊夜更闲。哀荣深孝嗣，仪表在河间。

卷 403_16【哭吕衡州六首】

元稹

气敌三人杰，交深一纸书。我投冰莹眼，君报水怜鱼。
髀股惟夸瘦，膏肓岂暇除。伤心死诸葛，忧道不忧余。

望有经纶钓，虔收宰相刀。江文驾风远，云貌接天高。
国待球琳器，家藏虎豹韬。尽将千载宝，埋入五原蒿。

· 全唐诗 ·

白马双旌队，青山八阵图。请缨期系虏，枕草誓捐躯。
势激三千壮，年应四十无。遥闻不瞑目，非是不怜吴。

雕鹗生难敌，沉檀死更香。儿童喧巷市，羸老哭碑堂。
雁起沙汀暗，云连海气黄。祝融峰上月，几照北人丧。

回雁峰前雁，春回尽却回。联行四人去，同葬一人来。
铙吹临江返，城池隔雾开。满船深夜哭，风棹楚猿哀。

杜预春秋癖，扬雄著述精。在时兼不语，终古定归名。
耒水波纹细，湘江竹叶轻。平生思风月，潜寐若为情。

卷 403_17【僧如展及韦载同游碧涧寺，各赋诗，予落句云：
他山莫忘灵山座，满壁人名后稀。展共吟他生之句，因话释氏
缘会所以，莫不凄然久之。不十日，而展公长逝。惊悼返覆，
则他生岂有兆耶？其间展公仍赋黄字五十韵，飞札相示。予方
属和未毕，自此不复撰成，徒以四韵为识】

元稹

重吟前日他生句，岂料逾旬便隔生。会拟一来身塔下，
无因共绕寺廊行。紫毫飞札看犹湿，黄字新诗和未成。
纵使得如羊叔子，不闻兼记旧交情。

· 全唐诗 ·

卷 403_18【公安县远安寺水亭见展公题壁，漂然泪流，因书四韵】

元稹

碧涧去年会，与师三两人。今来见题壁，师已是前身。

菱叶迎僧夏，杨花度俗春。空将数行泪，洒遍塔中尘。

卷 403_19【寒食日毛空路示侄晦及从简】

元稹

我昔孩提从我兄，我今衰白尔初成。

分明寄取原头路，百世长须此路行。

卷 403_20【别孙村老人】

元稹

年年渐觉老人稀，欲别孙翁泪满衣。

未死不知何处去，此身终向此原归。

· 全唐诗 ·

卷 403_21 【和乐天刘家花】

元稹

闲坊静曲同消日，泪草伤花不为春。
遍问旧交零落尽，十人才有两三人。

卷 403_22 【褒城驿二首】

元稹

容州诗句在褒城，几度经过眼暂明。
今日重看满衫泪，可怜名字已前生。

忆昔万株梨映竹，遇逢黄令醉残春。
梨枯竹尽黄令死，今日再来衰病身。

卷 403_23 【和乐天梦亡友刘太白同游二首】

元稹

君诗昨日到通州，万里知君一梦刘。
闲坐思量小来事，只应元是梦中游。

· 全唐诗 ·

老来东郡复西州，行处生尘为丧刘。
纵使刘君魂魄在，也应至死不同游。

卷 403_24 【酬乐天见忆，兼伤仲远】

元稹

死别重泉閤，生离万里赊。瘴侵新病骨，梦到故人家。
遥泪陈根草，闲收落地花。庾公楼怅望，巴子国生涯。
河任天然曲，江随峡势斜。与君皆直戆，须分老泥沙。

卷 403_25 【与乐天同葬杓直】

元稹

元伯来相葬，山涛誓抚孤。不知他日事，兼得似君无。

· 全唐诗 ·

卷四百零四

卷 404_1【夜闲】

元稹

感极都无梦，魂销转易惊。风帘半钩落，秋月满床明。
怅望临阶坐，沉吟绕树行。孤琴在幽匣，时迸断弦声。

卷 404_2【感小株夜合】

元稹

纤干未盈把，高条才过眉。不禁风苦动，偏受露先萎。
不分秋同尽，深嗟小便衰。伤心落残叶，犹识合昏期。

卷 404_3【醉醒】

元稹

积善坊中前度饮，谢家诸婢笑扶行。

· 全唐诗 ·

今宵还似当时醉，半夜觉来闻哭声。

卷 404_4 【追昔游】

元稹

谢傅堂前音乐和，
狗儿吹笛胆娘歌。
花园欲盛千场饮，
水阁初成百度过。
醉摘樱桃投小玉，
懒梳丛鬓舞曹婆。
再来门馆唯相吊，
风落秋池红叶多。

卷 404_5 【空屋题】

元稹

朝从空屋里，骑马入空台。
尽日推闲事，还归空屋来。
月明穿暗隙，灯烬落残灰。
更想咸阳道，魂车昨夜回。

卷 404_6 【初寒夜寄卢子蒙】

元稹

月是阴秋镜，寒为寂寞资。
轻寒酒醒后，斜月枕前时。
倚壁思闲事，回灯检旧诗。
闻君亦同病，终夜远相悲。

· 全唐诗 ·

卷 404_7【城外回，谢子蒙见谕】

元稹

十里抚柩别，一身骑马回。寒烟半堂影，烬火满庭灰。
稚女凭人问，病夫空自哀。潘安寄新咏，仍是夜深来。

卷 404_8【谕子蒙】

元稹

抚稚君休感，无儿我不伤。片云离岫远，双燕念巢忙。
大壑谁非水，华星各自光。但令长有酒，何必谢家庄。

卷 404_9【遣悲怀三首】

元稹

谢公最小偏怜女，嫁与黔娄百事乖。顾我无衣搜画篋，
泥他沽酒拔金钗。野蔬充膳甘长藿，落叶添薪仰古槐。
今日俸钱过十万，与君营奠复营斋。
昔日戏言身后意，今朝皆到眼前来。衣裳已施行看尽，
针线犹存未忍开。尚想旧情怜婢仆，也曾因梦送钱财。
诚知此恨人人有，贫贱夫妻百事哀。

· 全唐诗 ·

闲坐悲君亦自悲，百年都是几多时。邓攸无子寻知命，
潘岳悼亡犹费词。同穴窅冥何所望，他生缘会更难期。
唯将终夜长开眼，报答平生未展眉。

卷 404_10 【旅眠】

元稹

内外都无隔，帷屏不复张。夜眠兼客坐，同在火炉床。

卷 404_11 【除夜】

元稹

忆昔岁除夜，见君花烛前。今宵祝文上，重叠叙新年。
闲处低声哭，空堂背月眠。伤心小儿女，撩乱火堆边。

卷 404_12 【感梦】

元稹

行吟坐叹知何极，影绝魂销动隔年。
今夜商山馆中梦，分明同在后堂前。

· 全唐诗 ·

卷 404_13【合衣寝】

元稹

良夕背灯坐，方成合衣寝。酒醉夜未阑，几回颠倒枕。

卷 404_14【竹簟】

元稹

竹簟衬重茵，未忍都令卷。忆昨初来日，看君自施展。

卷 404_15【听庾及之弹乌夜啼引】

元稹

君弹乌夜啼，我传乐府解古题。良人在狱妻在闺，
官家欲赦乌报妻。乌前再拜泪如雨，乌作哀声妻暗语。
后人写出乌啼引，吴调哀弦声楚楚。四五年前作拾遗，
谏书不密丞相知。谪官诏下吏驱遣，身作囚拘妻在远。
归来相见泪如珠，唯说闲宵长拜乌。君来到舍是乌力，
妆点乌盘邀女巫。今君为我千万弹，乌啼啄啄泪澜澜。
感君此曲有深意，昨日乌啼桐叶坠。当时为我赛乌人，
死葬咸阳原上地。

· 全唐诗 ·

卷 404_16 【梦井】

元稹

梦上高原，原上有深井。登高意枯渴，愿见深泉冷。
裴回绕井顾，自照泉中影。沉浮落井瓶，井上无悬绠。
念此瓶欲沉，荒忙为求请。遍入原上村，村空犬仍猛。
还来绕井哭，哭声通复哽。哽噎梦忽惊，觉来房舍静。
灯焰碧胧胧，泪光疑冢冢。钟声夜方半，卧心难整。
忽忆咸阳原，荒田万余顷。土厚圻亦深，埋魂在深埂。
埂深安可越，魂通有时逞。今宵泉下人，化作瓶相憬。
感此涕洟澜，洟澜涕沾领。所伤觉梦间，便觉死生境。
岂无同穴期，生期谅绵永。又恐前后魂，安能两知省。
寻环意无极，坐见天将昞。吟此梦井诗，春朝好光景。

卷 404_17 【江陵三梦】

元稹

平生每相梦，不省两相知。况乃幽明隔，梦魂徒尔为。
情知梦无益，非梦见何期。今夕亦何夕，梦君相见时。
依稀旧妆服，暗淡昔容仪。不道间生死，但言将别离。
分张碎针线，褊叠故屏帏。抚稚再三嘱，泪珠千万垂。
嘱云唯此女，自叹总无儿。尚念娇且黠，未禁寒与饥。
君复不恤事，奉身犹脱遗。况有官缚束，安能长顾私。

· 全唐诗 ·

他人生间别，婢仆多谩欺。君在或有托，出门当付谁。
言罢泣幽噎，我亦涕淋漓。惊悲忽然寤，坐卧若狂痴。

月影半床黑，虫声幽草移。心魂生次第，觉梦久自疑。
寂默深想像，泪下如流澌。百年永已诀，一梦何太悲。

悲君所娇女，弃置不我随。长安远于日，山川云间之。
纵我生羽翼，网罗生絪维。今宵泪零落，半为生别滋。

感君下泉魄，动我临川思。一水不可越，黄泉况无涯。
此怀何由极，此梦何由追。坐见天欲曙，江风吟树枝。

古原三丈穴，深葬一枝琼。崩剥山门坏，烟绵坟草生。
久依荒陇坐，却望远村行。惊觉满床月，风波江上声。

君骨久为土，我心长似灰。百年何处尽，三夜梦中来。
逝水良已矣，行云安在哉。坐看朝日出，众鸟双裴回。

卷 404_18【张旧蚊帱】

元稹

逾年间生死，千里旷南北。家居无见期，况乃异乡国。
破尽裁缝衣，忘收遗翰墨。独有缟纱帱，凭人远携得。
施张合欢榻，展卷双鸳翼。已矣长空虚，依然旧颜色。
裴回将就寝，徙倚情何极。昔透香田田，今无魂恻恻。

· 全唐诗 ·

隙穿斜月照，灯背空床黑。达理强开怀，梦啼还过臆。
平生贫寡欢，天枉劳苦忆。我亦距几时，胡为自摧逼。
烛蛾焰中舞，茧蚕丛上织。焦烂各自求，他人顾何力。
多离因苟合，恶影当务息。往事勿复言，将来幸前识。

卷 404_19【独夜伤怀赠呈张侍御】

元稹

烬火孤星灭，残灯寸焰明。竹风吹面冷，檐雪坠阶声。
寡鹤连天叫，寒雏彻夜惊。只应张侍御，潜会我心情。

卷 404_20【六年春遣怀八首】

元稹

伤禽我是笼中鹤，沉剑君为泉下龙。
重纆犹存孤枕在，春衫无复旧裁缝。
检得旧书三四纸，高低阔狭粗成行。
自言并食寻高事，唯念山深驿路长。
公无渡河音响绝，已隔前春复去秋。
今日闲窗拂尘土，残弦犹进钿箜篌。
婢仆晒君馀服用，娇痴稚女绕床行。
玉梳钿朵香胶解，尽日风吹玳瑁筝。
伴客销愁长日饮，偶然乘兴便醺醺。

· 全唐诗 ·

怪来醒后傍人泣，醉里时时错问君。
我随楚泽波中梗，君作咸阳泉下泥。
百事无心值寒食，身将稚女帐前啼。
童稚痴狂撩乱走，绣球花仗满堂前。
病身一到總帷下，还向临阶背日眠。
小于潘岳头先白，学取庄周泪莫多。
止竟悲君须自省，川流前后各风波。

卷 404_21【答友封见赠】

元稹

荀令香销潘簟空，悼亡诗满旧屏风。
扶床小女君先识，应为些些似外翁。

卷 404_22【梦成之】

元稹

烛暗船风独梦惊，梦君频问向南行。
觉来不语到明坐，一夜洞庭湖水声。

· 全唐诗 ·

卷 404_23 【哭小女降真】

元稹

雨点轻沍风复惊，偶来何事去何情。
浮生未到无生地，暂到人间又一生。

卷 404_24 【哭女樊】

元稹

秋天净绿月分明，何事巴猿不賸鸣。
应是一声肠断去，不容啼到第三声。

卷 404_25 【哭女樊四十韵】

元稹

逝者何由见，中人未达情。马无生角望，猿有断肠鸣。
去伴投遐徼，来随梦险程。四年巴养育，万里碛回萦。
病是他乡染，魂应远处惊。山魑邪乱逼，沙虱毒潜婴。
母约看宁辨，余慵疗不精。欲寻方次第，俄值疾充盈。
灯火徒相守，香花只浪擎。莲初开月梵，薜已落朝荣。
魄散云将尽，形全玉尚莹。空垂两行血，深送一枝琼。

· 全唐诗 ·

秘祝休巫覡，安眠放使令。旧衣和篋施，残药满瓿倾。
乳媪闲于社，医僧媿似醒。悯渠身觉剩，讶佛力难争。
骑竹痴犹子，牵车小外甥。等长迷过影，遥戏误啼声。
浣纸伤馀画，扶床念试行。独留呵面镜，谁弄倚墙筝。
忆昨工言语，怜初妙长成。撩风妒鹦舌，凌露触兰英。
翠凤舆真女，红蕖捧化生。只忧嫌五浊，终恐向三清。
宿恶诸荤味，悬知众物名。环从枯树得，经认宝函盛。
愠怒偏憎数，分张雅爱平。最怜贪栗妹，频救懒书兄。
为占娇饶分，良多眷恋诚。别常回面泣，归定出门迎。
解怪还家晚，长将远信呈。说人偷罪过，要我抱纵横。
腾蹋游江舫，攀缘看乐棚。和蛮歌字拗，学妓舞腰轻。
迢递离荒服，提携到近京。未容夸伎俩，唯恨枉聪明。
往绪心千结，新丝鬓百茎。暗窗风报晓，秋幌雨闻更。
败槿萧疏馆，衰杨破坏城。此中临老泪，仍自哭孩婴。

卷 404_26【哭子十首】

元稹

维鹄受刺因吾过，得马生灾念尔冤。
独在中庭倚闲树，乱蝉嘶噪欲黄昏。
才能辨别东西位，未解分明管带身。
自食自眠犹未得，九重泉路托何人。
尔母溺情连夜哭，我身因事有时悲。
钟声欲绝东方动，便是寻常上学时。
莲花上品生真界，兜率天中离世途。

· 全唐诗 ·

彼此业缘多障碍，不知还得见儿无。
节量梨栗愁生疾，教示诗书望早成。
鞭扑校多怜校少，又缘遗恨哭三声。
深嗟尔更无兄弟，自叹予应绝子孙。
寂寞讲堂基址在，何人车马入高门。
往年鬓已同潘岳，垂老年教作邓攸。
烦恼数中除一事，自兹无复子孙忧。
长年苦境知何限，岂得因儿独丧明。
消遣又来缘尔母，夜深和泪有经声。
乌生八子今无七，猿叫三声月正孤。
寂寞空堂天欲曙，拂帘双燕引新雏。
频频子落长江水，夜夜巢边旧处栖。
若是愁肠终不断，一年添得一声啼。

卷 404_27【感逝】

元稹

头白夫妻分无子，谁令兰梦感衰翁。三声啼妇卧床上，
一寸断肠埋土中。蜩甲暗枯秋叶坠，燕雏新去夜巢空。
情知此恨人皆有，应与暮年心不同。

· 全唐诗 ·

卷 404_28【妻满月日相唁】

元稹

十月辛勤一月悲，今朝相见泪淋漓。
狂风落尽莫惆怅，犹胜因花压折枝。

卷四百零五

卷 405_1【代曲江老人百韵】

元稹

何事花前泣，曾逢旧日春。先皇初在镐，贱子正游秦。
拨乱干戈后，经文礼乐辰。徽章悬象魏，貔虎画骐驎。
光武休言战，唐尧念睦姻。琳琅铺柱础，葛藟茂河漣。
尚齿惇耆艾，搜材拔积薪。裴王持藻镜，姚宋斡陶钧。
内史称张敞，苍生借寇恂。名卿唯讲德，命士耻忧贫。
杞梓无遗用，刍荛不忘询。悬金收逸骥，鼓瑟荐嘉宾。
羽翼皆随凤，圭璋肯杂珉。班行容济济，文质道彬彬。
百度依皇极，千门辟紫宸。措刑非苟简，稽古蹈因循。
书谬偏求伏，诗亡远听申。雄推三虎贾，群擢八龙荀。
海外恩方洽，寰中教不泯。儒林精闕奥，流品重清淳。
天净三光丽，时和四序均。卑官休力役，蠲赋免艰辛。
蛮貊同车轨，乡原尽里仁。帝途高荡荡，风俗厚闾閭。
暇日耕耘足，丰年雨露频。戍烟生不见，村竖老犹纯。
耒耜勤千亩，牲牢奉六禋。南郊礼天地，东野辟原畇。
校猎求初吉，先农卜上寅。万方来合杂，五色瑞轮囷。
池籞呈朱雁，坛场得白麟。酹金光照耀，奠璧彩璘玕。

· 全唐诗 ·

掉荡云门发，踟蹰鹭羽振。集灵撞玉磬，和鼓奏金鐃。
建簾崇牙盛，衔钟兽目瞋。总干形屹峩，戛敌背嶙峩。
文物千官会，夷音九部陈。鱼龙华外戏，歌舞洛中嫔。
佳节修酺礼，非时宴侍臣。梨园明月夜，花萼艳阳晨。
李杜诗篇敌，苏张笔力匀。乐章轻鲍照，碑板笑颜竣。
泰狱陪封禅，汾阴颂鬼神。星移逐西顾，风暖助东巡。
浴德留汤谷，蒐畋过渭滨。沸天雷殷殷，匝地毂辘辘。
沃土心逾炽，豪家礼渐湮。老农羞荷锄，贪贾学垂绅。
曲艺争工巧，雕机变组紃。青鳧连不解，红粟朽相因。
山泽长孳货，梯航竞献珍。翠毛开越雉，龙眼弊瓠闽。
玉饌薪燃蜡，椒房烛用银。铜山供横赐，金屋贮宜颀。
班女恩移赵，思王赋感甄。辉光随顾步，生死属摇唇。
世族功勋久，王姬宠爱亲。街衢连甲第，冠盖拥朱轮。
大道垂珠箔，当垆踏锦茵。轩车隘南陌，钟磬满西邻。
出入张公子，骄奢石季伦。鸡场潜介羽，马埒并扬尘。
韬袖夸狐腋，弓弦尚鹿F。紫绦牵白犬，绣G被花駟。
箭倒南山虎，鹰擒东郭昀。翻身迎过雁，劈肘取回鹘。
竟蓄朱公产，争藏邴氏缙。桥桃矜马骠，倚顿数牛羖。
齏斗冬中韭，羹怜远处菹。万钱才下箸，五酖未称醇。
曲水闲销日，倡楼醉度旬。探丸依郭解，投辖伴陈遵。
共谓长之泰，那知遽构屯。奸心兴桀黠，凶丑比顽嚚。
斗柄侵妖彗，天泉化逆鳞。背恩欺乃祖，连祸及吾民。
猘獠当前路，鲸鲵得要津。王师才业业，暴卒已H H。
杂虏同谋夏，宗周暂去豳。陵园深暮景，霜露下秋旻。
凤阙悲巢鵙，鹑行乱野麇。华林荒茂草，寒竹碎贞筠。
村落空垣坏，城隍旧井堙。破船沉古渡，战鬼聚阴磷。
振臂谁相应，攒眉独不伸。毁容怀赤绂，混迹戴黄巾。

· 全唐诗 ·

木梗随波荡，桃源数隐沦。弟兄书信断，鸥鹭往来驯。
忽遇山光澈，遥瞻海气真。秘图推废主，后圣合经纶。
野杏浑休植，幽兰不复纫。但惊心愤愤，谁恋水粼粼。
尽室杂深洞，轻桡荡小I。殷勤题白石，怅望出青蘋。
梦寐平生在，经过处所新。阮郎迷里巷，辽鹤记城闉。
虚过休明代，旋为朽病身。劳生常砭砭，语旧苦谆谆。
晚岁多衰柳，先秋愧大椿。眼前年少客，无复昔时人。

卷 405_2【开元观闲居，酬吴士矩侍御三十韵】

元稹

静习狂心尽，幽居道气添。神编启黄简，秘篆捧朱签。
烂熳烟霞驻，优游岁序淹。登坛拥旄节，趋殿礼胡髯。
醺起彤庭烛，香开白玉奁。结盟金剑重，斩魅宝刀铦。
禹步星纲动，焚符灶鬼詹。冥搜呼直使，章奏役飞廉。
仙籍聊凭检，浮名复为占。赤诚祈皓鹤，绿发代青缣。
虚室常怀素，玄关屡引枮。貂蝉徒自宠，鸥鹭不相嫌。
始悟身为患，唯欣禄未恬。龟龙恋淮海，鸡犬傍阊闾。
松笠新偏翠，山峰远更尖。箫声吟茂竹，虹影逗虚檐。
初日先通牖，轻颺每透帘。露盘朝滴滴，钩月夜纤纤。
已得餐霞味，应嗤食蓼甜。工琴闲度昼，耽酒醉销炎。
几案随宜设，诗书逐便拈。灌园多抱瓮，刈藿乍腰镰。
野鸟终难狎，鹪鹩本易厌。风高云远逝，波骇鲤深潜。
邸第过从隔，蓬壶梦寐瞻。所希颜颇练，谁恨突无黔。
思拙惭圭璧，词烦杂米盐。谕锥言太小，求药意何谦。

· 全唐诗 ·

语默君休问，行藏我讵兼。狂歌终此曲，情尽口长箝。

卷 405_3【病减逢春，期白二十二、辛大不至十韵】

元稹

病与穷阴退，春从血气生。寒肤渐舒展，阳脉乍虚盈。
就日临阶坐，扶床履地行。问人知面瘦，祝鸟愿身轻。

风暖牵诗兴，时新变卖声。饥馋看药忌，闲闷点书名。
旧雪依深竹，微和动早萌。推迁悲往事，疏数辨交情。
琴待嵇中散，杯思阮步兵。世间除却病，何者不营营。

卷 405_4【黄明府诗】

元稹

少年曾痛饮，黄令苦飞觥。席上当时走，马前今日迎。
依稀迷姓氏，积渐识平生。故友身皆远，他乡眼暂明。

便邀连榻坐，兼共榜船行。酒思临风乱，霜棱扫地平。
不堪深浅酌，贪怱古今情。逦迤七盘路，坡陀数丈城。
花疑褒女笑，栈想武侯征。一种埋幽石，老闲千载名。

· 全唐诗 ·

卷 405_5【酬翰林白学士代书一百韵】

元稹

昔岁俱充赋，同年遇有司。八人称迥拔，两郡滥相知。
逸骥初翻步，鞲鹰暂脱羈。远途忧地窄，高视觉天卑。
并入红兰署，偏亲白玉规。近朱怜冉冉，伐木愿偲偲。

鱼鲁非难识，铅黄自懒持。心轻马融帐，谋夺子房帷。
秀发幽岩电，清澄隘岸陂。九霄排直上，万里整前期。
勇赠栖鸾句，惭当古井诗。多闻全受益，择善颇相师。

脱俗殊常调，潜工大有为。还醇凭酎酒，运智托围棋。
情会招车胤，闲行觅戴逵。僧餐月灯阁，釀宴劫灰池。
胜概争先到，篇章竞出奇。输赢论破的，点窜肯容丝。

山岫当街翠，墙花拂面枝。莺声爱娇小，燕翼玩逶迤。
辔为逢车缓，鞭缘趁伴施。密携长上乐，偷宿静坊姬。
僻性慵朝起，新晴助晚嬉。相欢常满目，别处鲜开眉。

翰墨题名尽，光阴听话移。绿袍因醉典，乌帽逆风遗。
暗插轻筹箸，仍提小屈卮。本弦才一举，下口已三迟。
逃席冲门出，归倡借马骑。狂歌繁节乱，醉舞半衫垂。

散漫纷长薄，邀遮守隘岐。几遭朝士笑，兼任巷童随。
苟务形骸达，浑将性命推。何曾爱官序，不省计家资。

· 全唐诗 ·

忽悟成虚掷，翻然叹未宜。使回耽乐事，坚赴策贤时。
寝食都忘倦，园庐遂绝窥。劳神甘戚戚，攻短过孜孜。
叶怯穿杨箭，囊藏透颖锥。超遥望云雨，摆落占泉坻。

略削荒凉苑，搜求激直词。那能作牛后，更拟助洪基。
唱第听鸡集，趋朝忘马疲。内人舆御案，朝景丽神旗。
首被呼名姓，多惭冠等衰。千官容眷盼，五色照离披。

鹓侣从兹洽，鸥情转自縻。分张殊品命，中外却驱驰。
出入称金籍，东西侍碧墀。斗班云汹涌，开扇雉参差。
切愧寻常质，亲瞻咫尺姿。日轮光照耀，龙服瑞葳蕤。

誓欲通愚謇，生憎效喔咻。佞存真妾妇，谏死是男儿。
便殿承偏召，权臣惧挠私。庙堂虽稷契，城社有狐狸。
似锦言应巧，如弦数易欺。敢嗟身暂黜，所恨政无毗。

谬辱良由此，升腾亦在斯。再令陪宪禁，依旧履阽危。
使蜀常绵远，分台更嶮巇。匿奸劳发掘，破党恶持疑。
斧刃迎皆碎，盘牙老未萎。乍能还帝笏，讵忍折吾支。

虎尾元来险，圭文却类疵。浮荣齐壤芥，闲气咏江蓠。
阙下殷勤拜，樽前啸傲辞。飘沈委蓬梗，忠信敌蛮夷。
戏诮青云驿，讥题皓发祠。贪过谷隐寺，留读岷山碑。

草没章台趾，堤横楚泽湄。野莲侵稻陇，亚柳压城陴。
遇物伤凋换，登楼思漫漈。金攒嫩橙子，罌泛远鸕鶒。
仰竹藤缠屋，苫茆荻补篱。面梨通蒂朽，火米带芒炊。

· 全唐诗 ·

苇笋针筒束，鳊鱼箭羽髻。芋羹真底可，鲈鲙漫劳思。
北渚销魂望，南风著骨吹。度梅衣色渍，食稗马蹄羸。
院榷和泥碱，官酤小麹醅。讹音烦缴绕，轻俗丑威仪。

树罕贞心柏，畦丰卫足葵。坳洼饶瘠矮，游惰压庸缁。
病赛乌称鬼，巫占瓦代龟。连阴蛙张王，瘴疟雪治医。
我正穷于是，君宁念及兹。一篇从日下，双鲤送天涯。

坐捧迷前席，行吟忘结褵。匡床铺错绣，几案踊灵芝。
形影同初合，参商喻此离。扇因秋弃置，镜异月盈亏。
壮志诚难夺，良辰岂复追。宁牛终夜永，潘鬓去年衰。

溟渤深那测，穹苍意在谁。驭方轻騕褭，车肯重辛夷。
卧辙希濡沫，低颜受颔颐。世情焉足怪，自省固堪悲。
溷鼠虚求洁，笼禽方讶饥。犹胜忆黄犬，幸得早图之。

卷四百零六

卷 406_1 【纪怀，赠李六户曹、崔二十功曹五十韵】

元稹

昔冠诸生首，初因三道征。公卿碧墀会，名姓白麻称。
日月光遥射，烟霄志渐弘。荣班联锦绣，谏纸赐笺藤。
便欲呈肝胆，何言犯股肱。椎埋冲斗剑，消碎莹壶冰。
赤县才分务，青骢已迥乘。因骑度海鹢，拟杀蔽天鹏。
缚虎声空壮，连鳌力未胜。风翻波竟蹙，山压势逾崩。
僇辱徒相困，苍黄性不能。酣歌离岷顶，负气入江陵。
华表当蟾魄，高楼挂玉绳。角声悲掉荡，城影暗棱层。
军幕威容盛，官曹礼数兢。心虽出云鹤，身尚触笼鹰。
竦足良甘分，排衙苦未曾。通名参将校，抵掌见亲朋。
煦沫求涓滴，沧波怯斗升。荒居邻鬼魅，羸马步荒荆。
白草堂檐短，黄梅雨气蒸。沾黏经汗席，飏闪尽油灯。
夜怯餐肤蚋，朝烦拂面蝇。过从愁厌贱，专静畏猜仍。
旅寓谁堪托，官联自可凭。甲科崔并驾，柱史李齐升。
共展排空翼，俱遭激远矰。他乡元易感，同病转相矜。
投分多然诺，忘言少爱憎。誓将探肺腑，耻更辨淄渑。
会宿形骸远，论交意气增。一心吞渤澥，戮力拔嵩恒。
语到磨圭角，疑消破弩症。吹嘘期指掌，患难许檐簷。

· 全唐诗 ·

鍛翮鸾栖棘，藏锋箭在弰。雪中方睹桂，木上莫施罽。
且泛觴沿水，兼过被病僧。有时鞭款段，尽日醉懵懵。
蹑屐看秧稻，敲船和采菱。叉鱼江火合，唤客谷神应。
啸傲虽开口，幽忧复满膺。望云鳍拨刺，透匣色腾凌。
每想潢池寇，犹稽赤族惩。夔龙劳算画，貔虎带威棱。
逐鸟忠潜奋，悬旌意远凝。弋弓思彻札，绊驷闷牵絙。
运甕调辛苦，闻鸡屡寝兴。闲随人兀兀，梦听鼓冬冬。
班笔行看掷，黄陂莫漫澄。麒麟高阁上，须及壮时登。

卷 406_2【答姨兄胡灵之见寄五十韵】

元稹

忆昔凤翔城，韶年是事荣。理家烦伯舅，相宅尽吾兄。
诗律蒙亲授，朋游忝自迎。题头筠管缦，教射角弓駢。
矮马驼鬟G，牦牛兽面纓。对谈依赳赳，送客步盈盈。
米碗诸贤让，蠡杯大户倾。一船席外语，三榼拍心精。
传盞加分数，横波掷目成。华奴歌淅淅，媚子舞卿卿。
斗设狂为好，谁忧饮败名。屠过隐朱亥，楼梦古秦嬴。
环坐唯便草，投盘暂废觥。春郊才烂漫，夕鼓已砰轰。
荏苒移灰琯，喧阗倦塞兵。糟浆闻渐足，书剑讶无成。
抵璧惭虚弃，弹珠觉用轻。遂笼云际鹤，来狎谷中莺。
学问攻方苦，篇章兴太清。囊疏萤易透，锥钝股多坑。
笔阵戈矛合，文房栋桷撑。豆萁才敏俊，羽猎正峥嵘。
岐下寻时别，京师触处行。醉眠街北庙，闲绕宅南营。
柳爱凌寒软，梅怜上番惊。观松青黛笠，栏药紫霞英。

· 全唐诗 ·

尽日听僧讲，通宵咏月明。正耽幽趣乐，旋被宦途萦。
吏晋资材枉，留秦岁序更。我髯鬢数寸，君发白千茎。
芸阁怀铅暇，姑峰带雪晴。何由身倚玉，空睹翰飞琼。
世道难于剑，谗言巧似笙。但憎心可转，不解蹠如擎。
始效神羊触，俄随旅雁征。孤芳安可驻，五鼎几时烹。
潦倒沉泥滓，欹危践矫衡。登楼王粲望，落帽孟嘉情。
巫峡连天水，章台塞路荆。雨摧渔火焰，风引竹枝声。
分作屯之蹇，那知困亦亨。官曹三语掾，国器万寻桢。
逸杰雄姿迥，皇王雅论评。蕙依潜可习，云合定谁令。
原燎逢冰井，鸿流值木罍。智囊推有在，勇爵敢徒争。
迅拔看鹏举，高音侍鹤鸣。所期人拭目，焉肯自佯盲。
铅钝丁宁淬，芜荒展转耕。穷通须豹变，攫搏笑狼狞。
愧捧芝兰赠，还披肺腑呈。此生如未死，未拟变平生。

卷 406_3【酬许五康佐】

元稹

奋迅君何晚，羁离我讵俦。鹤笼闲警露，鹰缚闷牵鞲。
蓬阁深沉省，荆门远慢州。课书同吏职，旅宦各乡愁。
白日伤心过，沧江满眼流。嘶风悲代马，喘月伴吴牛。
枯涸方穷辙，生涯不系舟。猿啼三峡雨，蝉报两京秋。
珠玉惭新赠，芝兰忝旧游。他年问狂客，须向老农求。

· 全唐诗 ·

卷 406_4【送崔侍御之岭南二十韵】

元稹

汉法戎施幕，秦官郡置监。萧何归旧印，鲍永授新衔。
帑聘虽盈篋，泥章未破缄。蛛悬丝缭绕，鹊报语諛諛。
再砺神羊角，重开宪简函。鞶纓骢赳赳，綬珮绣緜緜。
逸翮怜鸿翥，离心觉刃剗。联游亏片玉，洞照失明鉴。
遥想车登岭，那无泪满衫。茅蒸连蟒气，衣渍度梅颿。
象斗缘谿竹，猿鸣带雨杉。飈风狂浩浩，韶石峻崭崭。
宿浦宜深泊，祈泷在至誠。瘴江乘早度，毒草莫亲芟。
试蛊看银黑，排腥贵食咸。菌须虫已蠹，果重鸟先鵒。
冰莹怀贪水，霜清顾痛岩。珠玑当尽掷，薏苡讵能谗。
荆俗欺王粲，吾生问季咸。远书多不达，勤为枉搢搢。

卷 406_5【酬段丞与诸棋流会宿弊居见赠二十四韵】

元稹

鸣局宁虚日，闲窗任废时。琴书甘尽弃，园井讵能窥。
运石疑填海，争筹忆坐帷。赤心方苦斗，红烛已先施。
蛇势萦山合，鸿联度岭迟。堂堂排直阵，袞袞逼羸师。
悬劫偏深猛，回征特险巇。旁攻百道进，死战万般为。
异日玄黄队，今宵黑白棋。斫营看迥点，对垒重相持。
善败虽称怯，骄盈最易欺。狼牙当必碎，虎口祸难移。

· 全唐诗 ·

乘胜同三捷，扶颠望一词。希因送目便，敢恃指纵奇。
退引防边策，雄吟斩将诗。眠床都浪置，通夕共忘疲。
晓雉风传角，寒丛雪压枝。繁星收玉版，残月耀冰池。
僧请闻钟粥，宾催下药卮。兽炎馀炭在，蜡泪短光衰。
俯仰嗟陈迹，殷勤卜后期。公私牵去住，车马各支离。
分作终身癖，兼从是事隳。此中无限兴，唯怕俗人知。

卷 406_6【酬窦校书二十韵】

元稹

鸥鹭元相得，杯觞每共传。芳游春烂漫，晴望月团圆。
调笑风流剧，论文属对全。赏花珠并缀，看雪璧常连。
竹寺荒唯好，松斋小更怜。潜投孟公辖，狂乞莫愁钱。
尘土抛书卷，枪筹弄酒权。令夸齐箭道，力斗抹弓弦。
但喜添樽满，谁忧乏桂然。渐轻身外役，浑证饮中禅。
及我辞云陛，逢君仕圃田。音徽千里断，魂梦两情偏。
足听猿啼雨，深藏马腹鞭。官醪半清浊，夷馔杂腥膻。
顾影无依倚，甘心守静专。那知暮江上，俱会落英前。
款曲生平在，悲凉岁序迁。鹤方同北渚，鸿又过南天。
丽句惭虚掷，沉机懒强牵。粗酬珍重意，工拙定相悬。

· 全唐诗 ·

卷 406_7【泛江玩月十二韵】

元稹

楚塞分形势，羊公压大邦。因依多士子，参画尽敦庞。
岳壁闲相对，荀龙自有双。共将船载酒，同泛月临江。
远树悬金镜，深潭倒玉幢。委波添净练，洞照灭凝缸。
阗咽沙头市，玲珑竹岸窗。巴童唱巫峡，海客话神泷。
已困连飞盏，犹催未倒缸。饮荒情烂熳，风棹乐崢嶸。
胜事他年忆，愁心此夜降。知君皆逸韵，须为应莛杠。

卷 406_8【店卧闻幕中诸公征乐会饮，因有戏呈三十韵】

元稹

濩落因寒甚，沉阴与病偕。药囊堆小案，书卷塞空斋。
胀腹看成鼓，羸形渐比柴。道情忧易适，温瘴气难排。
治腫扶轻仗，开门立静街。耳鸣疑暮角，眼暗助昏霾。
野竹连荒草，平陂接断崖。坐隅甘对鵬，当路恐遭豺。
蛇蛊迷弓影，雕翎落箭靫。晚篱喧斗雀，残菊半枯荂。
怅望悲回雁，依迟傍古槐。一生长苦节，三省讎行怪。
奔北翻成勇，司南却是呆。穹苍真漠漠，风雨漫喑喑。
彼美犹谿女，其谁占馆娃。诚知通有日，太极浩无涯。
布卦求无妄，祈天愿孔皆。藏衰谋计拙，地僻往还乖。
况羡莲花侣，方欣绮席谐。钿车迎妓乐，银翰屈朋侪。

· 全唐诗 ·

白纈颦歌黛，同蹄坠舞钗。纤身霞出海，艳脸月临淮。
筹箸随宜放，投盘止罚哇。红娘留醉打，觥使及醒差。
顾我潜孤愤，何人想独怀。夜灯然檨叶，冻雪堕砖阶。
坏壁虚缸倚，深炉小火埋。鼠骄衔笔砚，被冷束筋骸。
毕竟图斟酌，先须遣疴痲。枪旗如在手，那复敢崴K。

卷 406_9【酬友封话旧叙怀十二韵】

元稹

风波千里别，书信二年稀。乍见悲兼喜，犹惊是与非。
身名判作梦，杯盏莫相违。草馆同床宿，沙头待月归。
春深乡路远，老去宦情微。魏阙何由到，荆州且共依。
人欺翻省事，官冷易藏威。但拟驯鸥鸟，无因用弩机。
开张图卷轴，颠倒醉衫衣。莼菜银丝嫩，鲈鱼雪片肥。
怜君诗似涌，赠我笔如飞。会遣诸伶唱，篇篇入禁闱。

卷 406_10【送王协律游杭越十韵】

元稹

去去莫凄凄，馀杭接会稽。松门天竺寺，花洞若耶溪。
浣渚逢新艳，兰亭识旧题。山经秦帝望，垒辨越王栖。
江树春常早，城楼月易低。镜呈湖面出，云叠海潮齐。
章甫官人戴，莼丝姹女提。长干迎客闹，小市隔烟迷。

· 全唐诗 ·

纸乱红蓝压，瓯凝碧玉泥。荆南无抵物，来日为依携。

卷 406_11 【送东川马逢侍御使回十韵】

元稹

风水荆门阔，文章蜀地豪。眼青宾礼重，眉白众情高。
思勇曾吞笔，投虚惯用刀。词锋倚天剑，学海驾云涛。
南郡传纱帐，东方让锦袍。旋吟新乐府，便续古离骚。
雪岸犹封草，春江欲满槽。饯筵君置醴，随俗我铺糟。
莫叹巴三峡，休惊鬓二毛。流年等头过，人世各劳劳。

· 全唐诗 ·

卷四百零七

卷 407_1 【酬卢秘书】

元稹

偶有冲天气，都无处世才。未容荣路稳，先踏祸机开。
分久沉荆掾，惭经厕柏台。理推愁易惑，乡思病难裁。
夜伴吴牛喘，春惊朔雁回。北人肠断送，西日眼穿颓。
唯望魂归去，那知诏下来。涸鱼千丈水，僵燕一声雷。
幽匣提清镜，衰颜拂故埃。梦云期紫阁，厌雨别黄梅。
亲戚迎时到，班行见处陪。文工犹畏忌，朝士绝嫌猜。
新识蓬山杰，深交翰苑材。连投珠作贯，独和玉成堆。
剧敌徒相轧，羸师亦自媒。磨砭刮骨刃，翻掷委心灰。
恐被神明哭，忧为造化灾。私调破叶箭，定饮擎旗杯。
金宝潜砂砾，芝兰似草莱。凭君毫发鉴，莫遣翳莓苔。

卷 407_2 【见人咏韩舍人新律诗，因有戏赠】

元稹

喜闻韩古调，兼爱近诗篇。玉磬声声彻，金铃个个圆。

· 全唐诗 ·

高疏明月下，细腻早春前。花态繁于绮，闺情软似绵。
轻新便妓唱，凝妙入僧禅。欲得人人伏，能教面面全。
延之苦拘检，摩诃好因缘。七字排居敬，千词敌乐天。
殷勤闲太祝，好去老通川。莫漫裁章句，须饶紫禁仙。

卷 407_3【奉和权相公行次临阙驿，逢郑仆射相公归朝，俄顷分途，因以奉赠诗十四韵】

元稹

帝下赤霄符，搜求造化炉。中台归内座，太一直南都。
黄霸乘轺入，王尊叱驭趋。万人东道送，六纛北风驱。
栈阁才倾盖，关门已合繻。贯鱼行迢迢，交马语踟蹰。
去速熊羆兆，来驰虎豹夫。昔怜三易地，今讶两分途。
别路环山雪，离章运寸珠。锋铓断犀兕，波浪没蓬壶。
区宇声虽动，淮河孽未诛。将军遥策画，师氏密訃谋。
汉上坛仍筑，褒西阵再图。公方先二虏，何暇进愚儒。

卷 407_4【酬乐天东南行诗一百韵】

元稹

我病方吟越，君行已过湖。去应缘直道，哭不为穷途。
亚竹寒惊牖，空堂夜向隅。暗魂思背烛，危梦怯乘桴。
坐痛筋骸憊，旁嗟物候殊。雨蒸虫沸渭，浪涌怪眢眢。

· 全唐诗 ·

索纆飘蚊蚋，蓬麻瓷舳舻。短檐苦稻草，微俸封渔租。
泥浦喧捞蛤，荒郊险斗獮。鲸吞近溟涨，猿闹接黔巫。
芒屨沔牛妇，丫头荡桨夫。酢醅荷裹卖，醺酒水淋沽。
舞态翻鸂鶒，歌词咽鹧鸪。夷音啼似笑，蛮语谜相呼。
江郭船添店，山城木竖郭。吠声沙市犬，争食墓林乌。
犷俗诚堪惮，妖神甚可虞。欲令仁渐及，已被疟潜图。
膳减思调鼎，行稀恐蠹枢。杂莼多剖鱠，和黍半蒸菰。
绿粽新菱实，金丸小木奴。芋羹真暂淡，飏炙漫涂苏。
鱼鳖那胜斫，烹鲙只似鲈。楚风轻似蜀，巴地湿如吴。
气浊星难见，州斜日易晡。通宵但云雾，未酉即桑榆。
瘴窟蛇休蛰，炎溪暑不徂。侘魂阴叫啸，鵬貌昼踟蹰。
乡里家藏蛊，官曹世乏儒。敛缙偷印信，传箭作符繻。
椎髻抛巾帽，鐏刀代辘轳。当心鞞铜鼓，背弮射桑弧。
岂复民氓料，须将鸟兽驱。是非浑并漆，词讼敢研朱。
陋室鸛窥伺，衰形蟒覬覦。鬓毛霜点合，襟泪血痕濡。
倍忆京华伴，偏忘我尔躯。谪居今共远，荣路昔同趋。
科试铨衡局，衙参典校厨。月中分桂树，天上识昌蒲。
应召逢鸿泽，陪游值赐酺。心唯撞卫磬，耳不乱齐竽。
海岱词锋截，皇王笔阵驱。疾奔凌骥裹，高唱轧吴歙。
点检张仪舌，提携传说图。摆囊看利颖，开颌出明珠。
并取千人特，皆非十上徒。白麻云色腻，墨诏电光粗。
众口贪归美，何颜敢妒姝。秦台纳红旭，酆匣洗黄垆。
谏猎宁规避，弹豪讵嘒嘒。肺肝憎巧曲，蹊径绝萦迂。
誓遣朝纲振，忠饶翰苑输。驥调方汗血，蝇点忽成卢。
遂谪栖遑掾，还飞送别盂。痛嗟亲爱隔，颠望友朋扶。
狸病翻随鼠，骍羸返作驹。物情良徇俗，时论太诬吾。
瓶罄壘偏耻，松摧柏自枯。虎虽遭陷阱，龙不怕泥涂。

· 全唐诗 ·

重喜登贤苑，方欣佐伍符。判身入矛戟，轻敌比锱铢。
驿骑来千里，天书下九衢。因教罢飞檄，便许到皇都。
舟败罌浮汉，骖疲杖过邳。邮亭一萧索，烽候各崎岖。
馈饷人推辘，谁何吏执殳。拔家逃力役，连锁责逋诛。
防戍兄兼弟，收田妇与姑。缣缃工女竭，青紫使臣纡。
望国参云树，归家满地芜。破窗尘L L，幽院鸟鸣呜。
祖竹丛新笋，孙枝压旧梧。晚花狂蛱蝶，残蒂宿茱萸。
始悟摧林秀，因衔避缴芦。文房长遣闭，经肆未曾铺。
鸛鹭方求侣，鸱鸢已吓雏。征还何郑重，斥去亦须臾。
迢递投遐徼，苍黄出奥区。通川诚有咎，湓口定无辜。
利器从头匣，刚肠到底刳。薰莸任盛贮，稊稗莫超逾。
公干经时卧，钟仪几岁拘。光阴流似水，蒸瘴热于炉。
薄命知然也，深交有矣夫。救焚期骨肉，投分刻肌肤。
二妙驰轩陛，三英咏袴襦。李多嘲螭蜥，窦数集蜘蛛。
数子皆奇货，唯予独朽株。邯鄲笑匍匐，燕蒯受揶揄。
懒学三闾愤，甘齐百里愚。耽眠稀醒素，凭醉少嗟吁。
学问徒为尔，书题尽已于。别犹多梦寐，情尚感凋枯。
近喜司戎健，寻伤掌诂徂。士元名位屈，伯道子孙无。
旧好飞琼翰，新诗灌玉壶。几催闲处泣，终作苦中娱。
廉蔺声相让，燕秦势岂俱。此篇应绝倒，休漫捋髭须。

卷 407_5【和乐天送客游岭南二十韵】

元稹

我自离乡久，君那度岭频。一杯魂惨澹，万里路艰辛。

· 全唐诗 ·

江馆连沙市，泷船泊水滨。骑田回北顾，铜柱指南邻。
大壑浮三岛，周天过五均。波心涌楼阁，规外布星辰。
狒狒穿筒格，猩猩置屐驯。贡兼蛟女绢，俗重语儿巾。
舶主腰藏宝，黄家砦起尘。歌钟排象背，炊爨上鱼身。
电白雷山接，旗红贼舰新。岛夷徐市种，庙覲赵佗神。
鸢跼方知瘴，蛇苏不待春。曙潮云斩斩，夜海火燐燐。
冠冕中华客，梯航异域臣。果然皮胜锦，吉了舌如人。
风飘秋茅叶，烟埋晓月轮。定应玄发变，焉用翠毛珍。
句漏沙须买，贪泉货莫亲。能传稚川术，何患隐之贫。

卷 407_6【献荥阳公诗五十韵】

元稹

郑驿骑翩翩，丘门子弟贤。文翁开学日，正礼聘途年。
骏骨黄金买，英髦绛帐延。趋风皆蹀足，侍坐各差肩。
解榻招徐稚，登楼引仲宣。凤攒题字扇，鱼落讲经筵。
盛气河包济，贞姿岳柱天。皋夔当五百，邹鲁重三千。
科斗翻腾取，关雎教授先。篆垂朝露滴，诗缀夜珠联。
逸礼多心匠，焚书旧口传。陈遵修尺牍，阮瑀让飞笺。
中的颜初启，抽毫踵未旋。森罗万木合，属对百花全。
词海跳波涌，文星拂坐悬。戴冯遥避席，祖逖后施鞭。
西蜀凌云赋，东阳咏月篇。劲芟鳌足断，精贯虱心穿。
浩汗神弥王，鹄觚兴欲仙。冰壶通皓雪，绮树眇晴烟。
驱驾雷霆走，铺陈锦绣鲜。清机登突奥，流韵溢山川。
墨客膺潜服，谈宾膝误前。张鳞定摧败，折角反矜怜。

· 全唐诗 ·

句句推琼玉，声声播管弦。纤新撩造化，湏洞斡陶甄。
卫磬琤鍠极，齐竽僭滥偏。空虚惭炙輠，点窜许怀铅。
惫色秋来草，哀吟雨后蝉。自伤魂惨沮，何暇思幽玄。
喜到樽罍侧，愁亲几案边。菁华知竭矣，肺腑尚求旃。
抵滞浑成醉，徘徊转慕膻。老叹才渐少，闲苦病相煎。
瓦砾难追琢，刍荛分弃捐。漫劳成恳恳，那得美娟娟。
拙劣仍非速，迂愚且异专。移时停笔砚，挥景乏戈鋌。
仪舌忻犹在，舒帷誓不褰。会将连献楚，深耻谬游燕。
蒲有临书叶，韦充读易编。沙须披见宝，经拟带耕田。
入雾长期闰，持朱本望研。轮辕呈曲直，凿枘取方圆。
呼吸宁徒尔，沾濡岂浪然。过箫资响亮，随水涨沦涟。
惜日看圭短，偷光恨壁坚。勤勤雕朽木，细细导蒙泉。
传癖今应甚，头风昨已痊。丹青公旧物，一为变蚩妍。

· 全唐诗 ·

卷四百零八

卷 408_1 【酬乐天江楼夜吟稹诗，因成三十韵】

元稹

忽见君新句，君吟我旧篇。见当巴徼外，吟在楚江前。
思鄙宁通律，声清遂扣玄。三都时觉重，一顾世称妍。
排韵曾遥答，分题几共联。昔凭银翰写，今赖玉音宣。
布鼓随椎响，坯泥仰匠圆。铃因风断续，珠与调牵绵。
阮籍惊长啸，商陵怨别弦。猿羞啼月峡，鹤让警秋天。
志士潜兴感，高僧暂废禅。兴飘沧海动，气合碧云连。
点缀工微者，吹嘘势特然。休文徒倚槛，彦伯浪回船。
伎乐当筵唱，儿童满巷传。改张思妇锦，腾跃贾人笺。
魏拙虚教出，曹风敢望痊。定遭才子笑，恐赚学生癫。
裁什情何厚，飞书信不专。隼猜鸿蓄缩，虎横犬迍邐。
水墨看虽久，琼瑶喜尚全。才从鱼里得，便向市头悬。
夜置堂东序，朝铺座右边。手寻韦欲绝，泪滴纸浑穿。
甘蔗销残醉，醍醐醒早眠。深藏那遽灭，同咏苦无缘。
雅羨诗能圣，终嗟药未仙。五千诚远道，四十已中年。
暗魄多相梦，衰容每自怜。卒章还恸哭，蚊蚋溢山川。

· 全唐诗 ·

卷 408_2【酬乐天待漏入阁见赠】

元稹

未勘银台契，先排浴殿关。沃心因特召，承旨绝常班。
颺闪才人袖，呕鸦软举鬟。宫花低作帐，云从积成山。
密视枢机草，偷瞻咫尺颜。恩垂天语近，对久漏声闲。
丹陛曾同立，金銮恨独攀。笔无鸿业润，袍愧紫文殷。
河水通天上，瀛州接世间。谪仙名籍在，何不重来还。

卷 408_3【酬乐天早春闲游西湖，颇多野趣，恨不得与微之同赏，因思在越官重事殷，镜湖之游，或恐未暇，因成十八韵，见寄乐天。前篇到时，适会予亦宴镜湖南亭，因述目前所睹，以成酬答。末章亦未暇诚，则势使之然，亦欲粗为恬养之赠耳】

元稹

雁思欲回宾，风声乍变新。各携红粉伎，俱伴紫垣人。
水面波疑縠，山腰虹似巾。柳条黄大带，茭葑绿文茵。
雪尽才通屐，汀寒未有蘋。向阳偏晒羽，依岸小游鳞。
浦屿崎岖到，林园次第巡。墨池怜嗜学，丹井羨登真。
雅叹游方盛，聊非意所亲。白头辞北阙，沧海是东邻。
问俗烦江界，蒐畋想渭津。故交音讯少，归梦往来频。
独喜同门旧，皆为列郡臣。三刀连地轴，一苇碍车轮。
尚阻青天雾，空瞻白玉尘。龙因雕字识，犬为送书驯。

· 全唐诗 ·

胜事无穷境，流年有限身。懒将闲气力，争斗野塘春。

卷 408_4【江边四十韵】

元稹

官借江边宅，天生地势坳。欹危饶坏构，迢递接长郊。
怪鵬频栖息，跳蛙颇混淆。总无篱缴绕，尤怕虎咆哮。
停潦鱼招獭，空仓鼠敌猫。土虚烦穴蚁，柱朽畏藏蛟。
蛇虺吞檐雀，豺狼逐野麋。犬惊狂浩浩，鸡乱响嚶嚶。
瀼落贫甘守，荒凉秽尽包。断帘飞熠耀，当户网蟫蛸。
曲突翻成沼，行廊却代庖。桥横老颠杙，马病裹乌茭。
一一床头点，连连砌下泡。辱泥疑在绛，避雨想经崤。
相顾忧为鳖，谁能复系匏。誓心来利往，卜食过安爻。
何计逃昏垫，移文报旧交。栋梁存伐木，苫盖愧分茅。
金琯排黄荻，琅玕袅翠梢。花砖水面斗，鸳瓦玉声敲。
方础荆山采，修椽郢匠铄。隐锥雷震蛰，破竹箭鸣骹。
正寝初停午，频眠欲转胞。困圆收薄禄，厨敝备嘉肴。
各各人宁宇，双双燕贺巢。高门受车辙，华厩称蒲捎。
尺寸皆随用，毫厘敢浪抛。篋馀笼白鹤，枝剩架青鸢。
制榻容筐篚，施关拒斗筲。栏干防汲井，密室待持胶。
庭草佣工薅，园蔬稚子搗。本图闲种植，那要择肥饶。
绿柚勤勤数，红榴个个抄。池清漉螃蟹，瓜蠹拾螯螯。
晒篆看沙鸟，磨刀绽海蛟。罗灰修药灶，筑堞阅弓弰。
散诞都由习，童蒙剩懒教。最便陶静饮，还作解愁嘲。
近浦闻归楫，遥城罢晓铙。王孙如有问，须为并挥鞘。

卷 408_5【春六十韵】

元稹

节应寒灰下，春生返照中。未能消积雪，已渐少回风。
迎气邦经重，斋诚帝念隆。龙骧紫宸北，天压翠坛东。
仙仗摇佳彩，荣光答圣衷。便从威仰座，随入大罗宫。
先到璇渊底，偷穿玳瑁栊。馆娃朝镜晚，太液晓冰融。
撩摘芳情遍，搜求好处终。九霄浑可可，万姓尚忡忡。
昼漏频加箭，宵晖欲半弓。驱令三殿出，乞与百蛮同。
直自方壶岛，斜临绝漠戎。南巡暖珠树，西转丽崆峒。
度岭梅甘坼，潜泉脉暗洪。悠悠铺塞草，冉冉著江枫。
蚕役投筐妾，耘催荷蓀翁。既蒸难发地，仍送懒归鸿。
约略环区宇，殷勤绮镐沣。华山青黛扑，渭水碧沙蒙。
宿露清馀霭，晴烟塞迥空。燕巢才点缀，莺舌最惺忪。
腻粉梨园白，胭脂桃径红。郁金垂嫩柳，罽画委高笼。
地甲门阑大，天开禁掖崇。层台张舞凤，阁道架飞虹。
麝麝调神化，鸛鸾竭至忠。歌钟齐锡宴，车服奖庸功。
俊造欣时用，闾阎贺岁丰。倡楼妆耀耀，农野绿芃芃。
贵主骄矜盛，豪家恃赖雄。偏沾打球彩，频得铸钱铜。
专杀擒杨若，殊恩赦邓通。女孙新在内，婴稚近封公。
游衍关心乐，诗书对面聒。盘筵饶异味，音乐斥庸工。
酒爱油衣浅，杯夸玛瑙烘。挑鬟玉钗髻，刺绣宝装拢。
启齿呈编贝，弹丝动削葱。醉圆双媚靥，波溢两明瞳。
但赏欢无极，那知恨亦充。洞房闲窈窕，庭院独葱茏。
谢砌萦残絮，班窗网曙虫。望夫身化石，为伯首如蓬。

· 全唐诗 ·

顾我沉忧士，骑他老病骢。静街乘旷荡，初日接曛曛。
饮败肺常渴，魂惊耳更聪。虚逢好阳艳，其那苦昏懵。
黽勉还移步，持疑又省躬。慵将疲悴质，漫走倦羸僮。
季月行当暮，良辰坐叹穷。晋悲焚介子，鲁愿浴沂童。
燧改鲜妍火，阴繁晦澹桐。瑞云低M M，香雨润濛濛。
药溉分窠数，篱栽备幼冲。种莎怜见叶，护笋冀成筒。
有梦多为蝶，因蒐定作熊。漂沉随坏芥，荣茂委苍穹。
震动风千变，晴和鹤一冲。丁宁攀芳侣，须识未开丛。

卷 408_31【月三十韵】

元稹

萸叶标新朔，霜豪引细辉。白眉惊半隐，虹势讶全微。
凉魄潭空洞，虚弓雁畏威。上弦何汲汲，佳色转依依。
绮幕残灯敛，妆楼破镜飞。玲珑穿竹树，岑寂思屏帏。
坐爱规将合，行看望已几。绛河冰鉴朗，黄道玉轮巍。
迥照偏琼砌，馀光借粉闱。泛池相皎洁，压桂共芳菲。
的的当歌扇，娟娟透舞衣。殷勤入怀什，恳款堕云圻。
素液传烘盏，鸣琴荐碧徽。椒房深肃肃，兰路霭霏霏。
翡翠通帘影，琉璃莹殿扉。西园筵玳瑁，东壁射蛺蝶。
老将占天阵，幽人钓石矶。荷锄元亮息，回棹子猷归。
迢递同千里，孤高净九围。从星作风雨，配日丽旌旗。
麟斗宁徒设，蝇声岂浪讥。司存委卿士，新拜出郊畿。
今古虽云极，亏盈不易违。珠胎方夜满，清露忍朝晞。
渐减姮娥面，徐收楚练机。卞疑雕璧碎，潘感竟床稀。

· 全唐诗 ·

捐篋辞班女，潜波蔽虞妃。氛埃谁定灭，蟾兔杳难希。
须遣圆明尽，良嗟造化非。如能付刀尺，别为创璿玑。

卷 408_32【饮致用神麴酒三十韵】

元稹

七月调神麴，三春酿绿醪。雕镌荆玉盏，烘透内丘瓶。
试滴盘心露，疑添案上萤。满尊凝止水，祝地落繁星。
翻陋琼浆浊，唯闻石髓馨。冰壶通角簟，金镜彻云屏。
雪映烟光薄，霜涵霁色冷。蚌珠悬皎晶，桂魄倒瀲灩。
昼洒蝉将饮，宵挥鹤误聆。琉璃惊太白，钟乳讶微青。
讵敢辞濡首，并怜可鉴形。行当遣俗累，便得造禅扃。
何惮说千日，甘从过百龄。但令长泛蚁，无复恨漂萍。
胆壮还增气，机忘反自冥。瓮眠思毕卓，糟籍忆刘伶。
仿佛中圣日，希夷夹大庭。眼前须底物，座右任他铭。
刮骨都无痛，如泥未拟停。残觞犹漠漠，华烛已荧荧。
真性临时见，狂歌半睡听。喧阗争意气，调笑学娉婷。
酩酊焉知极，羁离忽暂宁。鸡声催欲曙，蟾影照初醒。
咽绝鹃啼竹，萧撩雁去汀。遥城传漏箭，乡寺响风铃。
楚泽一为梗，尧阶屡变蓂。醉荒非独此，愁梦几曾经。
每耻穷途哭，今那客泪零。感君澄醴酒，不遣渭和泾。

· 全唐诗 ·

卷 408_33【感石榴二十韵】

元稹

何年安石国，万里贡榴花。迢递河源道，因依汉使槎。
酸辛犯葱岭，憔悴涉龙沙。初到褊珍木，多来比乱麻。
深抛故园里，少种贵人家。唯我荆州见，怜君胡地赊。
从教当路长，兼恣入檐斜。绿叶裁烟翠，红英动日华。
新帘裙透影，疏牖烛笼纱。委作金炉焰，飘成玉砌瑕。
乍惊珠缀密，终误绣帏奢。琥珀烘梳碎，燕支懒颊涂。
风翻一树火，电转五云车。绛帐迎宵日，芙蕖绽早牙。
浅深俱隐映，前后各分葩。宿露低莲脸，朝光借绮霞。
暗虹徒缴绕，濯锦莫周遮。俗态能嫌旧，芳姿尚可嘉。
非专爱颜色，同恨阻幽遐。满眼思乡泪，相嗟亦自嗟。

卷 408_34【度门寺】

元稹

北祖三禅地，西山万树松。门临溪一带，桥映竹千重。
翦凿基阶正，包藏景气浓。诸岩分院宇，双岭抱垣墉。
舍利开层塔，香炉占小峰。道场居士置，经藏大师封。
太子知栽植，神王守要冲。由旬排讲座，丈六写真容。
佛语迦陵说，僧行猛虎从。修罗抬日拒，楼至拔霜锋。
画井垂枯朽，穿池救噎喁。蕉非难败坏，槿喻暂丰茸。

· 全唐诗 ·

宝界留遗事，金棺灭去踪。钵传烘玛瑙，石长翠芙蓉。
影帐纱全落，绳床土半壅。荒林迷醉象，危壁亚盘龙。
行色怜初月，归程待晓钟。心源虽了了，尘世苦憧憧。
宿荫高声忏，斋粮并力舂。他生再来此，还愿总相逢。

卷 408_35 【大云寺二十韵】

元稹

地胜宜台殿，山晴离垢氛。现身千佛国，护世四王军。
碧耀高楼瓦，赭飞半壁文。鹤林萦古道，雁塔没归云。
幡影中天飏，钟声下界闻。攀萝极峰顶，游目到江滨。
驯鸽闲依缀，调猿静守群。虎行风捷猎，龙睡气氛氲。
获稻禅衣卷，烧畬劫火焚。新英蜂采掇，荒草象耕耘。
钵付灵童洗，香教善女熏。果枝低罍罍，花雨泽雰雰。
示化维摩疾，降魔力士勋。听经神变见，说偈鸟纷纭。
上境光犹在，深谿暗不分。竹笼烟欲暝，松带日馀曛。
真谛成知别，迷心尚有云。多生沉五蕴，宿习乐三坟。
谕鹿车虽设，如蚕绪正棼。且将平等义，还奉圣明君。

卷 408_36 【和友封题开善寺十韵】

元稹

梁王开佛庙，云构岁时遥。珠缀飞闲鸽，红泥落碎椒。

· 全唐诗 ·

灯笼青焰短，香印白灰销。古匣收遗施，行廊画本朝。
藏经沾雨烂，魔女捧花娇。亚树牵藤阁，横查压石桥。
竹荒新笋细，池浅小鱼跳。匠正琉璃瓦，僧锄芍药苗。
旋蒸茶嫩叶，偏把柳长条。便欲忘归路，方知隐易招。

· 全唐诗 ·

卷四百零九

卷 409_1 【牡丹二首】

元稹

簇蕊风频坏，裁红雨更新。眼看吹落地，便别一年春。
繁绿阴全合，衰红展渐难。风光一抬举，犹得暂时看。

卷 409_2 【象人】

元稹

被色空成象，观空色异真。自悲人是假，那复假为人。

卷 409_3 【与杨十二巨源、卢十九经济同游大安亭，各赋二物，各为五韵，探得松石】

元稹

片石与孤松，曾经物外逢。月临栖鹤影，云抱老人峰。

· 全唐诗 ·

蜀客君当问，秦官我旧封。积膏当琥珀，新劫长芙蓉。
待补苍苍去，樛柯早变龙。

卷 409_4【赋得春雪映早梅】

元稹

飞舞先春雪，因依上番梅。一枝方渐秀，六出已同开。
积素光逾密，真花节暗催。抟风飘不散，见睨忽偏摧。
郢曲琴空奏，羌音笛自哀。今朝两成咏，翻挟昔人才。

卷 409_5【赋得玉卮无当】

元稹

共惜连城宝，翻成无当卮。诟惭君子贵，深讶巧工隳。
泛蚁功全小，如虹色不移。可怜殊砾石，何计辨糟醅。
江海诚难满，盘筵莫忘施。纵乖斟酌意，犹得对光仪。

卷 409_6【赋得数萼】

元稹

将课司天历，先观近砌萼。一句开应月，五日数从星。

· 全唐诗 ·

桂满丛初合，蟾亏影渐零。辨时长有素，数闰或馀青。
坠叶推前事，新芽察未形。尧年始今岁，方欲瑞千龄。

卷 409_7【赋得九月尽】

元稹

霜降三旬后，蓂馀一叶秋。玄阴迎落日，凉魄尽残钩。
半夜灰移琯，明朝帝御裘。潘安过今夕，休咏赋中愁。

卷 409_8【赋得雨后花】

元稹

红芳怜静色，深与雨相宜。馀滴下纤蕊，残珠堕细枝。
浣花江上思，啼粉镜中窥。念此低回久，风光幸一吹。

卷 409_9【早归】

元稹

春静晓风微，凌晨带酒归。远山笼宿雾，高树影朝晖。
饮马鱼惊水，穿花露滴衣。娇莺似相恼，含啖傍人飞。

· 全唐诗 ·

卷 409_10 【晚秋】

元稹

竹露滴寒声，离人晓思惊。酒醒秋簟冷，风急夏衣轻。
寝倦解幽梦，虑闲添远情。谁怜独欹枕，斜月透窗明。

卷 409_11 【送林复梦赴韦令辟】

元稹

蜀路危于剑，怜君自坦途。几回曾啖炙，千里远衔珠。
野性便荒饮，时风忌酒徒。相门多礼让，前后莫相逾。

卷 409_12 【忆杨十二】

元稹

杨子爱言诗，春天好咏时。恋花从马滞，联句放杯迟。
日映含烟竹，风牵卧柳丝。南山更多兴，须作白云期。

· 全唐诗 ·

卷 409_13【夜合】

元稹

绮树满朝阳，融融有露光。雨多疑濯锦，风散似分妆。

叶密烟蒙火，枝低绣拂墙。更怜当暑见，留咏日偏长。

卷 409_14【新竹】

元稹

新篁才解箨，寒色已青葱。冉冉偏凝粉，萧萧渐引风。

扶疏多透日，寥落未成丛。惟有团团节，坚贞大小同。

卷 409_15【秋相望】

元稹

檐月惊残梦，浮凉满夏衾。蟪蛄低户网，萤火度墙阴。

炉暗灯光短，床空帐影深。此时相望久，高树忆横岑。

· 全唐诗 ·

卷 409_16 【春病】

元稹

病来闲卧久，因见静时心。残月晓窗迥，落花幽院深。
望山移坐榻，行药步墙阴。车马门前度，遥闻哀苦吟。

卷 409_17 【山竹枝】

元稹

深院虎溪竹，远公身自栽。多惭折君节，扶我出山来。
贵宅安危步，难将混俗材。还投辋川水，从作老龙回。

卷 409_18 【悟禅三首寄胡果】

元稹

近闻胡隐士，潜认得心王。不恨百年促，翻悲万劫长。
有修终有限，无事亦无殃。慎莫通方便，应机不顿忘。

百年都几日，何事苦嚣然。晚岁倦为学，闲心易到禅。
病宜多宴坐，贫似少攀缘。自笑无名字，因名自在天。

· 全唐诗 ·

近见新章句，因知见在心。春游晋祠水，晴上霍山岑。
问法僧当偈，还丹客赠金。莫惊头欲白，禅观老弥深。

卷 409_19【东台去】

元稹

陶君喜不遇，予每为君言。今日东台去，澄心在陆浑。
旋抽随日俸，并买近山园。千万崔兼白，殷勤承主恩。

卷 409_20【戴光弓】

元稹

潞府筋角劲，戴光因合成。因君怀胆气，赠我定交情。
不拟闲穿叶，那能枉始生。唯调一只箭，飞入破聊城。

卷 409_21【刘颇诗】

元稹

一言感激士，三世义忠臣。破瓮嫌妨路，烧庄耻属人。
迴分辽海气，闲踏洛阳尘。傥使权由我，还君白马津。

· 全唐诗 ·

卷 409_22 【夜饮】

元稹

灯火隔帘明，竹梢风雨声。诗篇随意赠，杯酒越巡行。
漫唱江朝曲，闲征药草名。莫辞终夜饮，朝起又营营。

卷 409_23 【褒城驿】

元稹

严秦修此驿，兼涨驿前池。已种千竿竹，又栽千树梨。
四年三月半，新笋晚花时。怅望东川去，等闲题作诗。

卷 409_24 【闲二首】

元稹

晦澹洲烟白，篱筛日脚红。江喧过云雨，船泊打头风。
艇子收鱼市，鸦儿噪荻丛。不堪堤上立，满眼是蚊虫。

青衫经夏黻，白发望乡稠。雨冷新秋簟，星稀欲曙楼。
连鸿尽南去，双鲤本东流。北信无人寄，蝉声满树头。

· 全唐诗 ·

卷 409_25 【欲曙】

元稹

江堤阅暗流，漏鼓急残筹。片月低城堞，稀星转角楼。

鹤媒华表上，鸂鶒柳枝头。不为来趋府，何因欲曙游。

卷 409_26 【寄胡灵之】

元稹

早岁颠狂伴，城中共几年。有时潜步出，连夜小亭眠。

月影侵床上，花丛在眼前。今宵正风雨，空宅楚江边。

卷 409_27 【夜雨】

元稹

水怪潜幽草，江云拥废居。雷惊空屋柱，电照满床书。

竹瓦风频裂，茅檐雨渐疏。平生沧海意，此去怯为鱼。

· 全唐诗 ·

卷 409_28 【酬李六醉后见寄口号】

元稹

顿愈关风疾，因吟口号诗。文章纷似绣，珠玉布如棋。
健羨觥飞酒，苍黄日映篱。命童寒色倦，抚稚晚啼饥。
潦倒惭相识，平生颇自奇。明公将有问，林下是灵龟。

卷 409_29 【归田】

元稹

陶君三十七，挂绶出都门。我亦今年去，商山浙岸村。
冬修方丈室，春种桔槔园。千万人间事，从兹不复言。

卷 409_30 【缘路】

元稹

总是玲珑竹，兼藏浅漫溪。沙平深见底，石乱不成泥。
烟火遥村落，桑麻隔稻畦。此中如有问，甘被到头迷。

· 全唐诗 ·

卷 409_31 【谪卢戡与予数约游三寺，戡独沉醉而不行】

元稹

乘兴无羁束，闲行信马蹄。路幽穿竹远，野迥望云低。
素帚茅花乱，圆珠稻实齐。如何卢进士，空恋醉如泥。

卷 409_32 【遣春三首】

元稹

杨公三不惑，我惑两般全。逢酒判身病，拈花尽意怜。
水生低岸没，梅蹙小珠连。千万红颜辈，须惊又一年。
柳眼开浑尽，梅心动已阑。风光好时少，杯酒病中难。

学问慵都废，声名老更判。唯馀看花伴，未免忆长安。
失却游花伴，因风浪引将。柳堤遥认马，梅径误寻香。
晚景行看谢，春心渐欲狂。园林都不到，何处枉风光。

卷 409_33 【岁日】

元稹

一日今年始，一年前事空。凄凉百年事，应与一年同。

· 全唐诗 ·

卷 409_34【湘南登临湘楼】

元稹

高处望潇湘，花时万井香。雨馀怜日嫩，岁闰觉春长。
霞剝分危榜，烟波透远光。情知楼上好，不是仲宣乡。

卷 409_35【晚宴湘亭】

元稹

晚日宴清湘，晴空走艳阳。花低愁露醉，絮起觉春狂。
舞旋红裙急，歌垂碧袖长。甘心出童羖，须一尽时荒。

卷 409_36【酒醒】

元稹

饮醉日将尽，醒时夜已阑。暗灯风焰晓，春席水窗寒。
未解萦身带，犹倾坠枕冠。呼儿问狼籍，疑是梦中欢。

· 全唐诗 ·

卷四百一十

卷 410_1【独游】

元稹

远地难逢侣，闲人且独行。上山随老鹤，接酒待残莺。

花当西施面，泉胜卫玠清。鸂鶒满春野，无限好同声。

卷 410_2【洞庭湖】

元稹

人生除泛海，便到洞庭波。驾浪沉西日，吞空接曙河。

虞巡竟安在，轩乐讵曾过。唯有君山下，狂风万古多。

· 全唐诗 ·

卷 410_3【雪天】

元稹

故乡千里梦，往事万重悲。小雪沉阴夜，闲窗老病时。

独闻归去雁，偏咏别来诗。惭愧红妆女，频惊两鬓丝。

卷 410_4【赠熊士登】

元稹

平生本多思，况复老逢春。今日梅花下，他乡值故人。

卷 410_5【别岭南熊判官】

元稹

十年常远道，不忍别离声。况复三巴外，仍逢万里行。

桐花新雨气，梨叶晚春晴。到海知何日，风波从此生。

· 全唐诗 ·

卷 410_6 【水上寄乐天】

元稹

眼前明月水，先入汉江流。汉水流江海，西江过庾楼。

庾楼今夜月，君岂在楼头。万一楼头望，还应望我愁。

卷 410_7 【夏阳亭临望，寄河阳侍御尧】

元稹

望远音书绝，临川意绪长。殷勤眼前水，千里到河阳。

卷 410_8 【日高睡】

元稹

隔是身如梦，频来不为名。怜君近南住，时得到山行。

· 全唐诗 ·

卷 410_9【辋川】

元稹

世累为身累，闲忙不自由。殷勤辋川水，何事出山流。

卷 410_10【天坛归】

元稹

为结区中累，因辞洞里花。还来旧城郭，烟火万人家。

卷 410_11【雨后】

元稹

倦寝数残更，孤灯暗又明。竹梢馀雨重，时复拂帘惊。

卷 410_12【晴日】

元稹

多病苦虚羸，晴明强展眉。读书心绪少，闲卧日长时。

· 全唐诗 ·

卷 410_13【直台】

元稹

麋入神羊队，鸟惊海鹭眠。仍教百馀日，迎送直厅前。

卷 410_14【行宫】

元稹

寥落古行宫，宫花寂寞红。白头宫女在，闲坐说玄宗。

卷 410_15【醉行】

元稹

秋风方索漠，霜貌足睽携。今日骑骢马，街中醉蹋泥。

卷 410_16【指巡胡】

元稹

遣闷多凭酒，公心只仰胡。挺身唯直指，无意独欺愚。

· 全唐诗 ·

卷 410_17【饮新酒】

元稹

闻君新酒熟，况值菊花秋。莫怪平生志，图销尽日愁。

卷 410_18【香球】

元稹

顺俗唯团转，居中莫动摇。爱君心不恻，犹讶火长烧。

卷 410_19【景申秋八首】

元稹

年年秋意绪，多向雨中生。渐欲烟火近，稍怜衣服轻。
咏诗闲处立，忆事夜深行。濩落寻常惯，凄凉别为情。

蚊幌雨来卷，烛蛾灯上稀。啼儿冷秋簟，思妇问寒衣。
帘断萤火入，窗明蝙蝠飞。良辰日夜去，渐与壮心违。

唧唧檐溜凝，丁丁窗雨繁。枕倾筒簟滑，幔飏案灯翻。
唤魇儿难觉，吟诗婢苦烦。强眠终不著，闲卧暗消魂。

· 全唐诗 ·

瓶泻高檐雨，窗来激箭风。病憎灯火暗，寒觉薄帟空。
婢报樵苏竭，妻愁院落通。老夫慵计数，教想蔡城东。

风头难著枕，病眼厌看书。无酒销长夜，回灯照小余。
三元推废王，九曜入乘除。廊庙应多算，参差斡太虚。

经雨篱落坏，入秋田地荒。竹垂哀折节，莲败惜空房。
小片慈菇白，低丛柚子黄。眼前撩乱辈，无不是同乡。

雨柳枝枝弱，风光片片斜。蜻蜓怜晓露，蛱蝶恋秋花。
饥啖空篱雀，寒栖满树鸦。荒凉池馆内，不似有人家。

病苦十年后，连阴十日馀。人方教作鼠，天岂遣为鱼。
蛟绡酆城剑，虫凋鬼火书。出闻泥泞尽，何地不摧车。

卷 410_20【遣行十首】

元稹

惨切风雨夕，沉吟离别情。燕辞前日社，蝉是每年声。
暗泪深相感，危心亦自惊。不如元不识，俱作路人行。

十五年前事，恹惶无限情。病僮更借出，羸马共驰声。
射叶杨才破，闻弓雁已惊。小年辛苦学，求得苦辛行。

徙倚檐宇下，思量去住情。暗萤穿竹见，斜雨隔窗声。

· 全唐诗 ·

就枕回转数，闻鸡撩乱惊。一家同草草，排比送君行。

已怆朋交别，复怀儿女情。相兄亦相旧，同病又同声。
白发年年剩，秋蓬处处惊。不堪身渐老，频送异乡行。

塞上风雨思，城中兄弟情。北随鹧立位，南送雁来声。
遇适尤兼恨，闻书喜复惊。唯应遥料得，知我伴君行。

暮欲歌吹乐，暗冲泥水情。稻花秋雨气，江石夜滩声。
犬吠穿篱出，鸥眠起水惊。愁君明月夜，独自入山行。

七过褒城驿，回回各为情。八年身世梦，一种水风声。
寻觅诗章在，思量岁月惊。更悲西塞别，终夜绕池行。

褒县驿前境，曲江池上情。南堤衰柳意，西寺晚钟声。
云水兴方远，风波心已惊。可怜皆老大，不得自由行。

见说巴风俗，都无汉性情。猿声芦管调，羌笛竹鸡声。
迎候人应少，平安火莫惊。每逢危栈处，须作贯鱼行。

闻道阴平郡，邈然古戍情。桥兼麋鹿蹋，山应鼓鼙声。
羌妇梳头紧，蕃牛护尾惊。怜君闲闷极，只傍白江行。

· 全唐诗 ·

卷 410_21 【生春二十首】

元稹

何处生春早，春生云色中。笼葱闲著水，晦淡欲随风。
度晓分霞态，馀光庇雪融。晚来低漠漠，浑欲泥幽丛。

何处生春早，春生漫雪中。浑无到地片，唯逐入楼风。
屋上些些薄，池心旋旋融。自悲销散尽，谁假入兰丛。

何处生春早，春生霁色中。远林横返照，高树亚东风。
水冻霜威庇，泥新地气融。渐知残雪薄，杪近最怜丛。

何处生春早，春生曙火中。星围分暗陌，烟气满晴风。
宫树栖鸦乱，城楼带雪融。竞排闾阖侧，珂伞自相丛。

何处生春早，春生晓禁中。殿阶龙旆日，漏阁宝箏风。
药树香烟重，天颜瑞气融。柳梅浑未觉，青紫已丛丛。

何处生春早，春生江路中。雨移临浦市，晴候过湖风。
芦笋锥犹短，凌澌玉渐融。数宗船载足，商妇两眉丛。

何处生春早，春生野墅中。病翁闲向日，征妇懒成风。
斫筴天虽暖，穿区冻未融。鞭牛县门外，争土盖蚕丛。

何处生春早，春生冰岸中。尚怜扶腊雪，渐觉受东风。

· 全唐诗 ·

织女云桥断，波神玉貌融。便成呜咽去，流恨与莲丛。

何处生春早，春生柳眼中。芽新才绽日，茸短未含风。
绿误眉心重，黄惊蜡泪融。碧条殊未合，愁绪已先丛。

何处生春早，春生梅援中。蕊排难犯雪，香乞拟来风。
陇迥羌声怨，江遥客思融。年年最相恼，缘未有诸丛。

何处生春早，春生鸟思中。鹊巢移旧岁，鸢羽旋高风。
鸿雁惊沙暖，鸳鸯爱水融。最怜双翡翠，飞入小梅丛。

何处生春早，春生池榭中。镂琼冰陷日，文縠水回风。
柳爱和身动，梅愁合树融。草芽犹未出，挑得小萱丛。

何处生春早，春生稚戏中。乱骑残爆竹，争唾小旋风。
骂雨愁妨走，呵冰喜旋融。女儿针线尽，偷学五辛丛。

何处生春早，春生人意中。晓妆虽近火，晴戏渐怜风。
暗入心情懒，先添酒思融。预知花好恶，偏在最深丛。

何处生春早，春生半睡中。见灯如见雾，闻雨似闻风。
开眼犹残梦，抬身便恐融。却成双翅蝶，还绕庠花丛。

何处生春早，春生晓镜中。手寒匀面粉，鬟动倚帘风。
宿雾梅心滴，朝光幕上融。思牵梳洗懒，空拔绿丝丛。

何处生春早，春生绮户中。玉栊穿细日，罗幔张轻风。

· 全唐诗 ·

柳软腰支嫩，梅香密气融。独眠傍妒物，偷铲合欢丛。

何处生春早，春生老病中。土膏蒸足肿，天暖痒头风。
似觉肌肤展，潜知血气融。又添新一岁，衰白转成丛。

何处生春早，春生客思中。旅魂惊北雁，乡信是东风。
纵有心灰动，无由鬓雪融。未知开眼日，空绕未开丛。

何处生春早，春生濛雨中。裊尘微有气，拂面细如风。
柳误啼珠密，梅惊粉汗融。满空愁淡淡，应忆忆芳丛。

卷 410_22【嘉陵水】

元稹

尔是无心水，东流有恨无。我心无说处，也共尔何殊。

卷 410_23【漫天岭赠僧】

元稹

五上两漫天，因师忏业缘。漫天无尽日，浮世有穷年。

· 全唐诗 ·

卷 410_24 【百牢关】

元稹

天上无穷路，生期七十间。那堪九年内，五度百牢关。

卷 410_25 【二月十九日酬王十八全素】

元稹

君念世上川，嗟予老瘵天。那堪十日内，又长白头年。

卷 410_26 【荥阳郑公以稹寓居严茅有池塘之胜，寄诗四首，因有意献】

元稹

激射分流阔，湾环此地多。暂停随便浪，犹阅败霜荷。

恨阻还江势，思深到海波。自伤才畎浍，其奈赠珠何。

· 全唐诗 ·

卷 410_27 【酬乐天寄蕲州簟】

元稹

蕲簟未经春，君先拭翠筠。知为热时物，预与瘴中人。
碾玉连心润，编牙小片珍。霜凝青汗简，冰透碧游鳞。
水魄轻涵黛，琉璃薄带尘。梦成伤冷滑，惊卧老龙身。

卷 410_28 【酬李浙西先因从事见寄之作】

元稹

近日金銮直，亲于汉珥貂。内人传帝命，丞相让吾僚。
郡悬旌远，长安谕日遥。因君蕊珠赠，还一梦烟霄。

卷 410_29 【酬周从事望海亭见寄】

元稹

年老无流辈，行稀足薜萝。热时怜水近，高处见山多。
衣袖长堪舞，喉咙转解歌。不辞狂复醉，人世有风波。

· 全唐诗 ·

卷 410_30【代杭民答乐天】

元稹

翠幕笼斜日，朱衣俨别筵。管弦凄欲罢，城郭望依然。

路溢新城市，农开旧废田。春坊幸无事，何惜借三年。

· 全唐诗 ·

卷四百一十一

卷 411_1 【杏园】

元稹

浩浩长安车马尘，狂风吹送每年春。
门前本是虚空界，何事栽花误世人。

卷 411_2 【菊花】

元稹

秋丛绕舍似陶家，遍绕篱边日渐斜。
不是花中偏爱菊，此花开尽更无花。

卷 411_3 【酬哥舒大少府寄同年科第】

元稹

前年科第偏年少，未解知羞最爱狂。九陌争驰好鞍马，

· 全唐诗 ·

八人同著彩衣裳。自言行乐朝朝是，岂料浮生渐渐忙。
赖得官闲且疏散，到君花下忆诸郎。

卷 411_4【幽栖】

元稹

野人自爱幽栖所，近对长松远是山。尽日望云心不系，
有时看月夜方闲。壶中天地乾坤外，梦里身名旦暮间。
辽海若思千岁鹤，且留城市会飞还。

卷 411_5【清都春霁，寄胡三、吴十一】

元稹

蕊珠宫殿经微雨，草树无尘耀眼光。白日当空天气暖，
好风飘树柳阴凉。蜂怜宿露攒芳久，燕得新泥拂户忙。
时节催年春不住，武陵花谢忆诸郎。

卷 411_6【华岳寺】

元稹

山前古寺临长道，来往淹留为爱山。双燕营巢始西别，

· 全唐诗 ·

百花成子又东还。暝驱羸马频看堠，晓听鸣鸡欲度关。
羞见奚师无外役，竹窗依旧老身闲。

卷 411_7【天坛上境】

元稹

野人性僻穷深僻，芸署官闲不似官。万里洞中朝玉帝，
九光霞外宿天坛。洪涟浩渺东溟曙，白日低回上境寒。
因为南昌检仙籍，马君家世奉还丹。

卷 411_8【寻西明寺僧不在】

元稹

春来日日到西林，飞锡经行不可寻。
莲池旧是无波水，莫逐狂风起浪心。

卷 411_9【与吴侍御春游】

元稹

苍龙阙下陪骢马，紫阁峰头见白云。
满眼流光随日度，今朝花落更纷纷。

· 全唐诗 ·

卷 411_10【晚春】

元稹

昼静帘疏燕语频，双双斗雀动阶尘。

柴扉日暮随风掩，落尽闲花不见人。

卷 411_11【先醉】

元稹

今日樽前败饮名，三杯未尽不能倾。

怪来花下长先醉，半是春风荡酒情。

卷 411_12【独醉】

元稹

一树芳菲也当春，漫随车马拥行尘。

桃花解笑莺能语，自醉自眠那藉人。

· 全唐诗 ·

卷 411_13【宿醉】

元稹

风引春心不自由，等闲冲席饮多筹。

朝来始向花前觉，度却醒时一夜愁。

卷 411_14【惧醉】

元稹

闻道秋来怯夜寒，不辞泥水为杯盘。

殷勤惧醉有深意，愁到醒时灯火阑。

卷 411_15【羨醉】

元稹

绮陌高楼竞醉眠，共期憔悴不相怜。

也应自有寻春日，虚度而今正少年。

· 全唐诗 ·

卷 411_16 【忆醉】

元稹

自叹旅人行意速，每嫌杯酒缓归期。

今朝偏遇醒时别，泪落风前忆醉时。

卷 411_17 【病醉】

元稹

醉伴见侬因病酒，道侬无酒不相窥。

那知下药还沾底，人去人来剩一卮。

卷 411_18 【拟醉】

元稹

九月闲宵初向火，一尊清酒始行杯。

怜君城外遥相忆，冒雨冲泥黑地来。

· 全唐诗 ·

卷 411_19【劝醉】

元稹

寥家能酿销愁酒，但是愁人便与销。

愿我共君俱寂寞，只应连夜复连朝。

卷 411_20【任醉】

元稹

本怕酒醒浑不饮，因君相劝觉情来。

殷勤满酌从听醉，乍可欲醒还一杯。

卷 411_21【同醉】

元稹

柏树台中推事人，杏花坛上炼形真。

心源一种闲如水，同醉樱桃林下春。

· 全唐诗 ·

卷 411_22 【狂醉】

元稹

一自柏台为御史，二年辜负两京春。

岷亭今日颠狂醉，舞引红娘乱打人。

卷 411_23 【伴僧行】

元稹

春来求事百无成，因向愁中识道情。

花满杏园千万树，几人能伴老僧行。

卷 411_24 【古寺】

元稹

古寺春馀日半斜，竹风萧爽胜人家。

花时不到有花院，意在寻僧不在花。

· 全唐诗 ·

卷 411_25【定僧】

元稹

落魄闲行不著家，遍寻春寺赏年华。
野僧偶向花前定，满树狂风满树花。

卷 411_26【观心处】

元稹

满坐喧喧笑语频，独怜方丈了无尘。
灯前便是观心处，要似观心有几人。

卷 411_27【智度师二首】

元稹

四十年前马上飞，功名藏尽拥禅衣。
石榴园下擒生处，独自闲行独自归。

三陷思明三突围，铁衣抛尽衲禅衣。
天津桥上无人识，闲凭栏干望落晖。

· 全唐诗 ·

卷 411_28【西明寺牡丹】

元稹

花向琉璃地上生，光风炫转紫云英。

自从天女盘中见，直至今朝眼更明。

卷 411_29【忆杨十二】

元稹

去时芍药才堪赠，看却残花已度春。

只为情深偏怆别，等闲相见莫相亲。

卷 411_30【送复梦赴韦令幕】

元稹

世上于今重检身，吾徒耽酒作狂人。

西曹旧事多持法，慎莫吐他丞相茵。

· 全唐诗 ·

卷 411_31 【送刘太白】

元稹

洛阳大底居人少，从善坊西最寂寥。

想得刘君独骑马，古堤愁树隔中桥。

卷 411_32 【奉诚园】

元稹

萧相深诚奉至尊，旧居求作奉诚园。

秋来古巷无人扫，树满空墙闭戟门。

卷 411_33 【与太白同之东洛，至栎阳，太白染疾驻行，予九月二十五日至华岳寺，雪后望山】

元稹

共作洛阳千里伴，老刘因疾驻行轩。

今朝独自山前立，雪满三峰倚寺门。

· 全唐诗 ·

卷 411_34 【野狐泉柳林】

元稹

去日野狐泉上柳，紫牙初绽拂眉低。

秋来寥落惊风雨，叶满空林踏作泥。

卷 411_35 【酬胡三凭人问牡丹】

元稹

窃见胡三问牡丹，为言依旧满西栏。

花时何处偏相忆，寥落衰红雨后看。

卷 411_36 【酬乐天秋兴见赠，本句云：莫怪独吟秋兴苦，
比君校近二年】

元稹

劝君休作悲秋赋，白发如星也任垂。

毕竟百年同是梦，长年何异少何为。

· 全唐诗 ·

卷四百一十二

卷 412_1 【雪后宿同轨店，上法护寺钟楼望月】

元稹

满山残雪满山风，野寺无门院院空。
烟火渐稀孤店静，月明深夜古楼中。

卷 412_2 【陪韦尚书丈归履信宅，因赠韦氏兄弟】

元稹

紫垣驄骑入华居，公子文衣护锦輿。
眠阁书生复何事，也骑羸马从尚书。

卷 412_3 【永贞二年正月二日，上御丹凤楼，赦天下，予与李公垂、庾顺之闲行曲江，不及盛观】

元稹

春来饶梦慵朝起，不看千官拥御楼。

· 全唐诗 ·

却著闲行是忙事，数人同傍曲江头。

卷 412_4【韦居守晚岁，常言退休之志，因署其居曰大隐洞，命予赋诗，因赠绝句】

元稹

谢公潜有东山意，已向朱门启洞门。
大隐犹疑恋朝市，不知名作罢归园。

卷 412_5【赠李十二牡丹花片，因以钱行】

元稹

莺涩余声絮堕风，牡丹花尽叶成丛。
可怜颜色经年别，收取朱阑一片红。

卷 412_6【题李十一修行里居壁】

元稹

云阙朝回尘骑合，杏花春尽曲江闲。
怜君虽在城中住，不隔人家便是山。

· 全唐诗 ·

卷 412_7【靖安穷居】

元稹

喧静不由居远近，大都车马就权门。
野人住处无名利，草满空阶树满园。

卷 412_8【赠乐天】

元稹

等闲相见销长日，也有闲时更学琴。
不是眼前无外物，不关心事不经心。

卷 412_9【使东川·骆口驿二首】

元稹

邮亭壁上数行字，崔李题名王白诗。
尽日无人共言语，不离墙下至行时。

二星微外通蛮服，五夜灯前草御文。
我到东川恰相半，向南看月北看云。

· 全唐诗 ·

卷 412_10【使东川·清明日】

元稹

常年寒食好风轻，触处相随取次行。
今日清明汉江上，一身骑马县官迎。

卷 412_11【使东川·亚枝红】

元稹

平阳池上亚枝红，怅望山邮事事同。
还向万竿深竹里，一枝浑卧碧流中。

卷 412_12【使东川·梁州梦】

元稹

梦君同绕曲江头，也向慈恩院院游。
亭吏呼人排去马，所惊身在古梁州。

· 全唐诗 ·

卷 412_13【使东川·南秦雪】

元稹

帝城寒尽临寒食，骆谷春深未有春。才见岭头云似盖，
已惊岩下雪如尘。千峰笋石千株玉，万树松萝万朵银。
飞鸟不飞猿不动，青骢御史上南秦。

卷 412_14【使东川·江楼月】

元稹

嘉陵江岸驿楼中，江在楼前月在空。月色满床兼满地，
江声如鼓复如风。诚知远近皆三五，但恐阴晴有异同。
万一帝乡还洁白，几人潜傍杏园东。

卷 412_15【使东川·惭问囚】

元稹

司马子微坛上头，与君深结白云俦。尚平村落拟连买，
王屋山泉为别游。各待陆浑求一尉，共资三径便同休。
那知今日蜀门路，带月夜行缘问囚。

· 全唐诗 ·

卷 412_16【使东川·江上行】

元稹

闷见汉江流不息，悠悠漫漫竟何成。

江流不语意相问，何事远来江上行。

卷 412_17【使东川·汉江上笛】

元稹

小年为写游梁赋，最说汉江闻笛愁。

今夜听时在何处，月明西县驿南楼。

卷 412_18【使东川·邮亭月】

元稹

君多务实我多情，大抵偏嗔步月明。

今夜山邮与蛮嶂，君应坚卧我还行。

· 全唐诗 ·

卷 412_19【使东川·嘉陵驿二首】

元稹

嘉陵驿上空床客，一夜嘉陵江水声。
仍对墙南满山树，野花撩乱月胧明。

墙外花枝压短墙，月明还照半张床。
无人会得此时意，一夜独眠西畔廊。

卷 412_20【使东川·百牢关】

元稹

嘉陵江上万重山，何事临江一破颜。
自笑只缘任敬仲，等闲身度百牢关。

卷 412_21【使东川·江花落】

元稹

日暮嘉陵江水东，梨花万片逐江风。
江花何处最肠断，半落江流半在空。

· 全唐诗 ·

卷 412_22【使东川·嘉陵江二首】

元稹

秦人惟识秦中水，长想吴江与蜀江。
今日嘉川驿楼下，可怜如练绕明窗。

千里嘉陵江水声，何年重绕此江行。
只应添得清宵梦，时见满江流月明。

卷 412_23【使东川·西县驿】

元稹

去时楼上清明夜，月照楼前撩乱花。
今日成阴复成子，可怜春尽未还家。

卷 412_24【使东川·望喜驿】

元稹

满眼文书堆案边，眼昏偷得暂时眠。
子规惊觉灯又灭，一道月光横枕前。

· 全唐诗 ·

卷 412_25 【使东川 · 好时节】

元稹

身骑骢马峨眉下，面带霜威卓氏前。

虚度东川好时节，酒楼元被蜀儿眠。

卷 412_26 【使东川 · 夜深行】

元稹

夜深犹自绕江行，震地江声似鼓声。

渐见戍楼疑近驿，百牢关吏火前迎。

卷 412_27 【使东川 · 望驿台】

元稹

可怜三月三旬足，怅望江边望驿台。

料得孟光今日语，不曾春尽不归来。

· 全唐诗 ·

卷 412_28 【赠咸阳少府萧郎】

元稹

莫怪逢君泪每盈，仲由多感有深情。陆家幼女托良婿，
阮氏诸房无外生。顾我自伤为弟拙，念渠能继事姑名。
别时何处最肠断，日暮渭阳驱马行。

卷 412_29 【赠吕三校书】

元稹

同年同拜校书郎，触处潜行烂熳狂。共占花园争赵辟，
竞添钱贯定秋娘。七年浮世皆经眼，八月闲宵忽并床。
语到欲明欢又泣，旁人相笑两相伤。

卷 412_30 【封书】

元稹

鹤台南望白云关，城市犹存暂一还。
书出步虚三百韵，蕊珠文字在人间。

· 全唐诗 ·

卷 412_31 【仁风李著作园醉后寄李十】

元稹

胧明春月照花枝，花下音声是管儿。

却笑西京李员外，五更骑马趁朝时。

卷 412_32 【灯影】

元稹

洛阳昼夜无车马，漫挂红纱满树头。

见说平时灯影里，玄宗潜伴太真游。

卷 412_33 【贬江陵途中寄乐天、杓直、杓直以员外郎判盐铁，乐天以拾遗在翰林】

元稹

想到江陵无一事，酒杯书卷缀新文。紫芽嫩茗和枝采，
朱橘香苞数瓣分。暇日上山狂逐鹿，凌晨过寺饱看云。
算缗草诏终须解，不敢将心远羨君。

· 全唐诗 ·

卷 412_34 【渡汉江】

元稹

嶓冢去年寻漾水，襄阳今日渡江滨。山遥远树才成点，
浦静沉碑欲辨文。万里朝宗诚可羨，百川流入渺难分。
鲛鲸归穴东溟溢，又作波涛随伍员。

卷 412_35 【哀病骢呈致用】

元稹

枥上病骢啼裊裊，江边废宅路迢迢。自经梅雨长垂耳，
乍食菰蒋欲折腰。金络头衔光未灭，玉花衫色瘦来焦。
曾听禁漏惊衙鼓，惯蹋康衢怕小桥。半夜雄嘶心不死，
日高饥卧尾还摇。龙媒薄地天池远，何事牵牛在碧霄。

卷 412_36 【送岭南崔侍御】

元稹

我是北人长北望，每嗟南雁更南飞。君今又作岭南别，
南雁北归君未归。洞主参承惊豸角，岛夷安集慕霜威。
黄家贼用镋刀利，白水郎行旱地稀。蜃吐朝光楼隐隐，

· 全唐诗 ·

鳌吹细浪雨霏霏。毒龙蛻骨轰雷鼓，野象埋牙鬪石矶。
火布垢尘须火浣，木绵温软当绵衣。桄榔面砑槟榔涩，
海气常昏海日微。蛟老变为妖妇女，舶来多卖假珠玑。
此中无限相忧事，请为殷勤事事依。

卷 412_37 【酬乐天八月十五夜禁中独直玩月见寄】

元稹

一年秋半月偏深，况就烟霄极赏心。金凤台前波漾漾，
玉钩帘下影沉沉。宴移明处清兰路，歌待新词促翰林。
何意枚皋正承诏，瞥然尘念到江阴。

卷 412_38 【予病瘴，乐天寄通中散、碧腴垂云膏，仍题四韵，以慰远怀，开坼之间，因有酬答】

元稹

紫河变炼红霞散，翠液煎研碧玉英。金籍真人天上合，
盐车病骥轭前惊。愁肠欲转蛟龙吼，醉眼初开日月明。
唯有思君治不得，膏销雪尽意还生。

· 全唐诗 ·

卷四百一十三

卷 413_1【陪诸公游故江西韦大夫通德湖旧居有感，题四韵，兼呈李六侍御，即韦大夫旧僚也】

元稹

高墉行马接通湖，巨壑藏舟感大夫。尘壁暗埋悲旧札，
风帘吹断落残珠。烟波漾日侵颓岸，狐兔奔丛拂坐隅。
唯有满园桃李下，膺门偏拜阮元瑜。

卷 413_2【送友封二首】

元稹

桃叶成阴燕引雏，南风吹浪贴樯乌。瘴云拂地黄梅雨，
明月满帆青草湖。迢递旅魂归去远，颠狂酒兴病来孤。
知君兄弟怜诗句，遍为姑将恼大巫。

惠和坊里当时别，岂料江陵送上船。鹏翼张风期万里，
马头无角已三年。甘将泥尾随龟后，尚有云心在鹤前。
若见中丞忽相问，为言腰折气冲天。

· 全唐诗 ·

卷 413_3【放言五首】

元稹

近来逢酒便高歌，醉舞诗狂渐欲魔。五斗解醒犹恨少，
十分飞盏未嫌多。眼前仇敌都休问，身外功名一任他。
死是等闲生也得，拟将何事奈吾何。

莫将心事厌长沙，云到何方不是家。酒熟餽糟学渔父。
饭来开口似神鸦。竹枝待凤千茎直，柳树迎风一向斜。
总被天公沾雨露，等头成长尽生涯。

霆轰电烓数声频，不奈狂夫不藉身。纵使被雷烧作烬，
宁殊埋骨扬为尘。得成蝴蝶寻花树，傥化江鱼掉锦鳞。
必若乖龙在诸处，何须惊动自来人。

安得心源处处安，何劳终日望林峦。玉英惟向火中冷，
莲叶元来水上干。甯戚饭牛图底事，陆通歌凤也无端。
孙登不语启期乐，各自当情各自欢。

三十年来世上行，也曾狂走趁浮名。两回左降须知命，
数度登朝何处荣。乞我杯中松叶满，遮渠肘上柳枝生。
他时定葬烧缸地，卖与人家得酒盛。

· 全唐诗 ·

卷 413_4【刘二十八以文石枕见赠，仍题绝句，以将厚意，因持壁州鞭酬谢，兼广为四韵】

元稹

枕截文琼珠缀篇，野人酬赠壁州鞭。用长时节君须策，
泥醉风云我要眠。歌晒彩霞临药灶，执陪仙仗引炉烟。
张骞却上知何日，随会归期在此年。

卷 413_5【奉和严司空重阳日同崔常侍、崔郎中即诸公登龙山落帽台佳宴】

元稹

谢公愁思眇天涯，蜡屐登高为菊花。贵重近臣光绮席，
笑怜从事落乌纱。萸房暗绽红珠朵，茗碗寒供白露芽。
咏碎龙山归去号，马奔流电妓奔车。

卷 413_6【送王十一郎游剡中】

元稹

越州都在浙河湾，尘土消沉景象闲。百里油盆镜湖水，
千峰钿朵会稽山。军城楼阁随高下，禹庙烟霞自往还。

· 全唐诗 ·

想得玉郎乘画舸，几回明月坠云间。

卷 413_7【送友封】

元稹

轻风略略柳欣欣，晴色空濛远似尘。斗柄未回犹带闰，
江痕潜上已生春。兰成宅里寻枯树，宋玉亭前别故人。
心断洛阳三两处，窈娘堤抱古天津。

卷 413_8【送致用】

元稹

泪沾双袖血成文，不为悲身为别君。望鹤眼穿期海外，
待乌头白老江滨。遥看逆浪愁翻雪，渐失征帆错认云。
欲识九回肠断处，浔阳流水逐条分。

卷 413_9【早春登龙山静胜寺，时非休浣，司空特许是行，
因赠幕中诸公】

元稹

谢傅知怜景气新，许寻高寺望江春。龙文远水吞平岸，

· 全唐诗 ·

羊角轻风旋细尘。山茗粉含鹰觜嫩，海榴红绽锦窠匀。
归来笑问诸从事，占得闲行有几人。

卷 413_10【书乐天纸】

元稹

金銮殿里书残纸，乞与荆州元判司。
不忍拈将等闲用，半封京信半题诗。

卷 413_11【酬孝甫见赠十首】

元稹

宋玉秋来续楚词，阴铿官漫足闲诗。
亲情书札相安慰，多道萧何作判司。

杜甫天材颇绝伦，每寻诗卷似情亲。
怜渠直道当时语，不著心源傍古人。

十岁荒狂任博徒，挈莎五木掷枭卢。
野诗良辅偏怜假，长借金鞍迓酒胡。

曾经绰立侍丹墀，绽蕊宫花拂面枝。
雉尾扇开朝日出，柘黄衫对碧霄垂。

· 全唐诗 ·

一自低心翰墨场，箭鞮抛尽负书囊。
近来兼爱休粮药，柏叶纱罗杂豆黄。

莫笑风尘满病颜，此生元在有无间。
卷舒莲叶终难湿，去住云心一种闲。

无事抛棋侵虎口，几时开眼复联行。
终须杀尽缘边敌，四面通同掩大荒。

原宪甘贫每自开，子春伤足少人哀。
巷南唯有陈居士，时学文殊一问来。

每识闲人如未识，与君相识更相怜。
经旬不解来过宿，忍见空床夜夜眠。

开坼新诗展大璆，明珠炫转玉音浮。
酬君十首三更坐，减却常时半夜愁。

卷 413_12【和乐天招钱蔚章看山绝句】

元稹

碧落招邀闲旷望，黄金城外玉方壶。
人间还有大江海，万里烟波天上无。

· 全唐诗 ·

卷 413_13【折枝花赠行】

元稹

櫻桃花下送君时，一寸春心逐折枝。
别后相思最深处，千株万片绕林垂。

卷 413_14【寄刘颇二首】

元稹

平生嗜酒颠狂甚，不许诸公占丈夫。
唯爱刘君一片胆，近来还敢似人无。

前年碣石烟尘起，共看官军过洛城。
无限公卿因战得，与君依旧绿衫行。

卷 413_15【晨起送使，病不行，因过王十一馆居二首】

元稹

自笑今朝误夙兴，逢他御史疟相仍。
过君未起房门掩，深映寒窗一盏灯。

· 全唐诗 ·

密宇深房小火炉，饭香鱼熟近中厨。
野人爱静仍耽寝，自问黄昏肯去无。

卷 413_16【送孙胜】

元稹

桐花暗澹柳惺惚，池带轻波柳带风。
今日与君临水别，可怜春尽宋亭中。

卷 413_17【游三寺回，呈上府主严司空，时因寻寺，道出当阳县，奉命覆视县囚，牵于游于，不暇详究，故以诗自诮尔】

元稹

谢公恣纵颠狂掾，触处闲行许自由。举板支颐对山色，
当筵吹帽落台头。贪缘稽首他方佛，无暇精心满县囚。
莫责寻常吐茵吏，书囊赤白报君侯。

卷 413_18【远望】

元稹

满眼伤心冬景和，一山红树寺边多。
仲宣无限思乡泪，漳水东流碧玉波。

· 全唐诗 ·

卷 413_19【早春寻李校书】

元稹

款款春风澹澹云，柳枝低作翠栊裙。梅含鸡舌兼红气，
江弄琼花散绿纹。带雾山莺啼尚小，穿沙芦笋叶才分。
今朝何事偏相觅，撩乱芳情最是君。

卷 413_20【过襄阳楼，呈上府主严司空，楼在江陵节度使宅北隅】

元稹

襄阳楼下树阴成，荷叶如钱水面平。拂水柳花千万点，
隔林莺舌两三声。有时水畔看云立，每日楼前信马行。
早晚暂教王粲上，庾公应待月分明。

卷 413_21【八月六日与僧如展、前松滋主簿韦戴同游碧涧寺，赋得扉字韵，寺林蜀江，内有碧涧穿注两廊，又有龙女洞能兴云雨，诗中喷字以平声韵】

元稹

空阔长江碍铁围，高低行树倚岩扉。穿廊玉润喷红旭，

· 全唐诗 ·

踊塔金轮拆翠微。草引风轻驯虎睡，洞驱云入毒龙归。
他生莫忘灵山别，满壁人名后会稀。

卷 413_22【奉和窦容州】

元稹

明公莫讶容州远，一路潇湘景气浓。斑竹初成二妃庙，
碧莲遥耸九疑峰。禁林闻道长倾凤，池水那能久滞龙。
自叹风波去无极，不知何日又相逢。

卷 413_23【卢头陀诗】

元稹

卢师深话出家由，剃尽心花始剃头。马哭青山别车匿，
鹊飞螺髻见罗睺。还来旧日经过处，似隔前身梦寐游。
为向八龙兄弟说，他生缘会此生休。

卷 413_24【醉别卢头陀】

元稹

醉迷狂象别吾师，梦觉观空始自悲。尽日笙歌人散后，

· 全唐诗 ·

满江风雨独醒时。心超几地行无处，云到何天住有期。

顿见佛光身上出，已蒙衣内缀摩尼。

· 全唐诗 ·

卷四百一十四

卷 414_1 【陪张湖南宴望岳楼，稹为监察御史张中丞知杂事】

元稹

观象楼前奉末班，绛峰只似殿庭间。
今日高楼重陪宴，雨笼衡岳是南山。

卷 414_2 【岳阳楼】

元稹

岳阳楼上日衔窗，影到深潭赤玉幢。
怅望残春万般意，满棂湖水入西江。

卷 414_3 【寄庾敬休】

元稹

小来同在曲江头，不省春时不共游。

· 全唐诗 ·

今日江风好暄暖，可怜春尽古湘州。

卷 414_4【花栽二首】

元稹

买得山花一两栽，离乡别土易摧颓。
欲知北客居南意，看取南花北地来。

南花北地种应难，且向船中尽日看。
纵使将来眼前死，犹胜抛掷在空栏。

卷 414_5【宿石矶】

元稹

石矶江水夜潺湲，半夜江风引杜鹃。
灯暗酒醒颠倒枕，五更斜月入空船。

卷 414_6【遭风二十韵】

元稹

洞庭瀟灑接天回，一点君山似措杯。暝色已笼秋竹树，

· 全唐诗 ·

夕阳犹带旧楼台。湘南贾伴乘风信，夏口篙工厄溯洄。

后侣逢滩方拽\$，前宗到浦已眠桅。俄惊四面云屏合，
坐见千峰雪浪堆。罔象睺眈频逞怪，石尤翻动忽成灾。

胜凌岂但河宫溢，块轧浑忧地轴摧。疑是阴兵致昏黑，
果闻灵鼓借喧豗。龙归窟穴深潭漩，蜃作波涛古岸颓。

水客暗游烧野火，枫人夜长吼春雷。浸淫沙市儿童乱，
汨没汀洲雁鹭哀。自叹生涯看转烛，更悲商旅哭沉财。

樯乌斗折头仓掉，水狗斜倾尾缆开。在昔讵惭横海志，
此时甘乏济川才。历阳旧事曾为鳖，鲛穴相传有化能。

闭目唯愁满空电，冥心真类不然灰。那知否极休征至，
渐觉宵分曙气催。怪族潜收湖黯湛，幽妖尽走日崔嵬。

紫衣将校临船问，白马君侯傍柳来。唤上驿亭还酹酹，
两行红袖拂樽罍。

卷 414_7【赠崔元儒】

元稹

殷勤夏口阮元瑜，二十年前旧饮徒。最爱轻欺杏园客，
也曾辜负酒家胡。些些风景闲犹在，事事颠狂老渐无。

· 全唐诗 ·

今日头盘三两掷，翠娥潜笑白髭须。

卷 414_8【鄂州寓馆严涧宅】

元稹

凤有高梧鹤有松，偶来江外寄行踪。花枝满院空啼鸟，
尘榻无人忆卧龙。心想夜闲唯足梦，眼看春尽不相逢。
何时最是思君处，月入斜窗晓寺钟。

卷 414_9【送杜元颖】

元稹

江上五年同送客，与君长羡北归人。
今朝又送君先去，千里洛阳城里尘。

卷 414_10【贻蜀五首·病马诗寄上李尚书】

元稹

万里长鸣望蜀门，病身犹带旧疮痕。遥看云路心空在，
久服盐车力渐烦。尚有高悬双镜眼，何由并驾两朱轡。
唯应夜识深山道，忽遇君侯一报恩。

· 全唐诗 ·

卷 414_11【贻蜀五首·李中丞表臣】

元稹

韦门同是旧亲宾，独恨潘床簟有尘。十里花溪锦城丽，
五年沙尾白头新。倅戎何事劳专席，老掾甘心逐众人。
却待文星上天去，少分光影照沉沦。

卷 414_12【贻蜀五首·卢评事子蒙】

元稹

为我殷勤卢子蒙，近来无复昔时同。懒成积疹推难动，
禅尽狂心炼到空。老爱早眠虚夜月，病妨杯酒负春风。
唯公两弟闲相访，往往潸然一望公。

卷 414_13【贻蜀五首·张校书元夫】

元稹

未面西川张校书，书来稠叠颇相於。我闻声价金应敌，
众道风姿玉不如。远处从人须谨慎，少年为事要舒徐。
劝君便是酬君爱，莫比寻常赠鲤鱼。

· 全唐诗 ·

卷 414_14【贻蜀五首·韦兵曹臧文】

元稹

处处侯门可曳裾，人人争事蜀尚书。摩天气直山曾拔，
澈底心清水共虚。鹏翼已翻君好去，乌头未变我何如。
殷勤为话深相感，不学冯谖待食鱼。

卷 414_15【赠严童子】

元稹

卫瓘诸孙卫玠珍，可怜雏凤好青春。解拈玉叶排新句，
认得金环识旧身。十岁佩觿娇稚子，八行飞札老成人。
杨公莫讶清无业，家有骊珠不复贫。

卷 414_16【桐孙诗】

元稹

去日桐花半桐叶，别来桐树老桐孙。
城中过尽无穷事，白发满头归故园。

· 全唐诗 ·

卷 414_17【西归绝句十二首】

元稹

双堠频频减去程，渐知身得近京城。
春来爱有归乡梦，一半犹疑梦里行。

五年江上损容颜，今日春风到武关。
两纸京书临水读，小桃花树满商山。

同归谏院韦丞相，共贬河南亚大夫。
今日还乡独憔悴，几人怜见白髭须。

只去长安六日期，多应及得杏花时。
春明门外谁相待，不梦闲人梦酒卮。

白头归舍意如何，贺处无穷吊亦多。
左降去时裴相宅，旧来车马几人过。

还乡何用泪沾襟，一半云霄一半沉。
世事渐多饶怅望，旧曾行处便伤心。

闲游寺观从容到，遍问亲知次第寻。
肠断裴家光德宅，无人扫地戟门深。

一世营营死是休，生前无事定无由。

· 全唐诗 ·

不知山下东流水，何事长须日夜流。
今朝西渡丹河水，心寄丹河无限愁。
若到庄前竹园下，殷勤为绕故山流。

寒窗风雪拥深炉，彼此相伤指白须。
一夜思量十年事，几人强健几人无。
云覆蓝桥雪满溪，须臾便与碧峰齐。

风回面市连天合，冻压花枝著水低。
寒花带雪满山腰，著柳冰珠满碧条。
天色渐明回一望，玉尘随马度蓝桥。

卷 414_18【留呈梦得、子厚、致用】

元稹

泉溜才通疑夜磬，烧烟馥暖有春泥。千层玉帐铺松盖，
五出银区印虎蹄。暗落金乌山渐黑，深埋粉堠路浑迷。
心知魏阙无多地，十二琼楼百里西。

卷 414_19【小碎】

元稹

小碎诗篇取次书，等闲题柱意何如。

· 全唐诗 ·

诸郎到处应相问，留取三行代鲤鱼。

卷 414_20 【和乐天高相宅】

元稹

莫愁已去无穷事，漫苦如今有限身。
二百年来城里宅，一家知换几多人。

卷 414_21 【和乐天仇家酒】

元稹

病嗟酒户年年减，老觉尘机渐渐深。
饮罢醒馀更惆怅，不如闲事不经心。

卷 414_22 【和乐天赠云寂僧】

元稹

欲离烦恼三千界，不在禅门八万条。
心火自生还自灭，云师无路与君销。

· 全唐诗 ·

卷 414_23【沔西别乐天、博载、樊宗宪、李景信两秀才、侄谷三月三十日相饯送】

元稹

今朝相送自同游，酒语诗情替别愁。

忽到沔西总回去，一身骑马向通州。

卷 414_24【寄昙、嵩、寂三上人】

元稹

长学对治思苦处，偏将死苦教人间。

今因为说无生死，无可对治心更闲。

卷 414_25【题漫天岭智藏师兰若僧云住此二十八年】

元稹

僧临大道阅浮生，来往憧憧利与名。

二十八年何限客，不曾闲见一人行。

· 全唐诗 ·

卷 414_26 【苍溪县寄扬州兄弟】

元稹

苍溪县下嘉陵水，入峡穿江到海流。
凭仗鲤鱼将远信，雁回时节到扬州。

卷 414_27 【赠吴渠州从姨兄士则】

元稹

忆昔分襟童子郎，白头抛掷又他乡。三千里外巴南恨，
二十年前城里狂。宁氏舅甥俱寂寞，荀家兄弟半沦亡。
泪因生别兼怀旧，回首江山欲万行。

卷 414_28 【长滩梦李绅】

元稹

孤吟独寝意千般，合眼逢君一夜欢。
惭愧梦魂无远近，不辞风雨到长滩。

· 全唐诗 ·

卷四百一十五

卷 415_1 【新政县】

元稹

新政县前逢月夜，嘉陵江底看星辰。已闻城上三更鼓，
不见心中一个人。须鬓暗添巴路雪，衣裳无复帝乡尘。
曾沾几许名兼利，劳动生涯涉苦辛。

卷 415_2 【南昌滩】

元稹

渠江明净峡逶迤，船到明滩拽\$迟。橹竅动摇妨作梦，
巴童指点笑吟诗。畚馀宿麦黄山腹，日背残花白水湄。
物色可怜心莫恨，此行都是独行时。

· 全唐诗 ·

卷 415_3【见乐天诗】

元稹

通州到日日平西，江馆无人虎印泥。
忽向破檐残漏处，见君诗在柱心题。

卷 415_4【夜坐】

元稹

雨滞更愁南瘴毒，月明兼喜北风凉。古城楼影横空馆，
湿地虫声绕暗廊。萤火乱飞秋已近，星辰早没夜初长。
孩提万里何时见，狼藉家书满卧床。

卷 415_5【闻乐天授江州司马】

元稹

残灯无焰影幢幢，此夕闻君谪九江。
垂死病中惊坐起，暗风吹雨入寒窗。

· 全唐诗 ·

卷 415_6 【岁日赠拒非】

元稹

君思曲水嗟身老，我望通州感道穷。
同入新年两行泪，白头翁坐说城中。

卷 415_7 【送卢戡】

元稹

红树蝉声满夕阳，白头相送倍相伤。老嗟去日光阴促，
病觉今年昼夜长。顾我亲情皆远道，念君兄弟欲他乡。
红旗满眼襄州路，此别泪流千万行。

卷 415_8 【雨声】

元稹

风吹竹叶休还动，雨点荷心暗复明。
曾向西江船上宿，惯闻寒夜滴篷声。

· 全唐诗 ·

卷 415_9【奉和荥阳公离筵作】

元稹

南郡生徒辞绛帐，东山妓乐拥油旌。

钧天排比箫韶待，犹顾人间有别情。

卷 415_10【嘉陵水】

元稹

古时应是山头水，自古流来江路深。

若使江流会人意，也应知我远来心。

卷 415_11【阆州开元寺壁题乐天诗】

元稹

忆君无计写君诗，写尽千行说向谁。

题在阆州东寺壁，几时知是见君时。

· 全唐诗 ·

卷 415_12【凭李忠州寄书乐天】

元稹

万里寄书将出峡，却凭巫峡寄江州。

伤心最是江头月，莫把书将上庾楼。

卷 415_13【得乐天书】

元稹

远信入门先有泪，妻惊女哭问何如。

寻常不省曾如此，应是江州司马书。

卷 415_14【寄乐天】

元稹

无身尚拟魂相就，身在那无梦往还。

直到他生亦相觅，不能空记树中环。

· 全唐诗 ·

卷 415_15 【酬知退】

元稹

终须修到无修处，闻尽声闻始不闻。

莫著妄心销彼我，我心无我亦无君。

卷 415_16 【通州】

元稹

平生欲得山中住，天与通州绕郡山。

睡到日西无一事，月储三万买教闲。

卷 415_17 【酬乐天书后三韵】

元稹

今日庐峰霞绕寺，昔时鸾殿凤回书。两封相去八年后，

一种俱云五夜初。渐觉此生都是梦，不能将泪滴双鱼。

· 全唐诗 ·

卷 415_18 【相忆泪】

元稹

西江流水到江州，闻道分成九道流。我滴两行相忆泪，
遣君何处遣人求。除非入海无由住，纵使逢滩未拟休。
会向伍员潮上见，气充顽石报心仇。

卷 415_19 【喜李十一景信到】

元稹

何事相逢翻有泪，念君缘我到通州。
留君剩住君须住，我不自由君自由。

卷 415_20 【与李十一夜饮】

元稹

寒夜灯前赖酒壶，与君相对兴犹孤。
忠州刺史应闲卧，江水猿声睡得无。

· 全唐诗 ·

卷 415_21 【赠李十一】

元稹

淮水连年起战尘，油旌三换一何频。
共君前后俱从事，羞见功名与别人。

卷 415_22 【寒食日】

元稹

今年寒食好风流，此日一家同出游。
碧水青山无限思，莫将心道是涪州。

卷 415_23 【三兄以白角巾寄遗，发不胜冠，因有感叹】

元稹

病瘴年深浑秃尽，那能胜置角头巾。暗梳蓬发羞临镜，
私戴莲花耻见人。白发过于冠色白，银钉少校颌中银。
我身四十犹如此，何况吾兄六十身。

· 全唐诗 ·

卷 415_24 【别李十一五绝】

元稹

巴南分与亲情别，不料与君床并头。
为我远来休怅望，折君灾难是通州。

京城每与闲人别，犹自伤心与白头。
今日别君心更苦，别君缘是在通州。

万里尚能来远道，一程那忍便分头。
鸟笼猿槛君应会，十步向前非我州。

来时见我江南岸，今日送君江上头。
别后料添新梦寐，虎惊蛇伏是通州。

闻君欲去潜销骨，一夜暗添新白头。
明朝别后应肠断，独棹破船归到州。

卷 415_25 【酬乐天醉别】

元稹

前回一去五年别，此别又知何日回。
好住乐天休怅望，匹如元不到京来。

· 全唐诗 ·

卷 415_26 【酬乐天雨后见忆】

元稹

雨滑危梁性命愁，差池一步一生休。
黄泉便是通州郡，渐入深泥渐到州。

卷 415_27 【和乐天过秘阁书省旧厅】

元稹

闻君西省重徘徊，秘阁书房次第开。壁记欲题三漏合，
吏人惊问十年来。经排蠹简怜初校，芸长陈根识旧栽。
司马见诗心最苦，满身蚊蚋哭烟埃。

卷 415_28 【和乐天赠杨秘书】

元稹

旧与杨郎在帝城，搜天斡地觅诗情。曾因并句甘称小，
不为论年便唤兄。刮骨直穿由苦斗，梦肠翻出暂闲行。
因君投赠还相和，老去那能竞底名。

· 全唐诗 ·

卷 415_29【和乐天题王家亭子】

元稹

风吹箏箏飘红砌，雨打桐花尽绿莎。

都大资人无暇日，泛池全少买池多。

卷 415_30【酬乐天频梦微之】

元稹

山水万重书断绝，念君怜我梦相闻。

我今因病魂颠倒，唯梦闲人不梦君。

卷 415_31【琵琶】

元稹

学语胡儿撼玉玲，甘州破里最星星。

使君自恨常多事，不得工夫夜夜听。

· 全唐诗 ·

卷 415_32【春词】

元稹

山翠湖光似欲流，蜂声鸟思却堪愁。

西施颜色今何在，但看春风百草头。

· 全唐诗 ·

卷四百一十六

卷 416_1 【酬乐天春寄微之】

元稹

鸚心明黠雀幽蒙，何事相将尽入笼。君避海鲸惊浪里，
我随巴蟒瘴烟中。千山塞路音书绝，两地知春历日同。
一树梅花数升酒，醉寻江岸哭东风。

卷 416_2 【酬乐天舟泊夜读微之诗】

元稹

知君暗泊西江岸，读我闲诗欲到明。
今夜通州还不睡，满山风雨杜鹃声。

卷 416_3 【酬乐天武关南见微之题山石榴花诗】

元稹

比因酬赠为花时，不为君行不复知。

· 全唐诗 ·

又更几年还共到，满墙尘土两篇诗。

卷 416_4 【酬乐天见寄】

元稹

三千里外巴蛇穴，四十年来司马官。瘴色满身治不尽，
疮痕刮骨洗应难。常甘人向衰容薄，独讶君将旧眼看。
前日诗中高盖字，至今唇舌遍长安。

卷 416_5 【酬乐天得稹所寄纁丝布白轻庸制成衣服以诗报之】

元稹

湓城万里隔巴庸，纁薄绁轻共一封。腰带定知今瘦小，
衣衫难作远裁缝。唯愁书到炎凉变，忽见诗来意绪浓。
春草绿茸云色白，想君骑马好仪容。

卷 416_6 【和乐天寻郭道士不遇昔尝为僧，于荆州相别。】

元稹

昔年我见杯中渡，今日人言鹤上逢。两虎定随千岁鹿，
双林添作几株松。方瞳应是新烧药，短脚知缘旧施春。

· 全唐诗 ·

为僧时先有脚疾。欲请僧繇远相画，苦愁频变本形容。

卷 416_7 【酬乐天寄生衣】

元稹

秋茅处处流痲疟，夜鸟声声哭瘴云。
羸骨不胜纤细物，欲将文服却还君。

卷 416_8 【酬乐天得微之诗知通州事因成四首】

元稹

茅檐屋舍竹篱州，虎怕偏蹄蛇两头。暗蛊有时迷酒影，
浮尘向日似波流。沙含水弩多伤骨，田仰畬刀少用牛。
知得共君相见否，近来魂梦转悠悠。

平地才应一顷余，阁栏都大似巢居。入衙官吏声疑鸟，
下峡舟船腹似鱼。市井无钱论尺丈，田畴付火罢耘锄。
此中愁杀须甘分，惟惜平生旧著书。

哭鸟昼飞人少见，恹魂夜啸虎行多。满身沙虱无防处，
独脚山魈不奈何。甘受鬼神侵骨髓，常忧岐路处风波。
南歌未有东西分，敢唱沦浪一字歌。

· 全唐诗 ·

荒芜满院不能锄，甑有尘埃圃乏蔬。定觉身将囚一种，
未知生共死何如。饥摇困尾丧家狗，热暴枯鳞失水鱼。
苦境万般君莫问，自怜方寸本来虚。

卷 416_9【酬乐天闻李尚书拜相以诗见贺】

元稹

初因弹劾死东川，又为亲情弄化权。百口共经三峡水，
一时重上两漫天。尚书入用虽旬月，司马衔冤已十年。
若待更遭秋瘴后，便愁平地有重泉。

卷 416_10【酬乐天叹穷愁见寄】

元稹

病煎愁绪转纷纷，百里何由说向君。老去心情随日减，
远来书信隔年闻。三冬有电连春雨，九月无霜尽火云。
并与巴南终岁热，四时谁道各平分。

· 全唐诗 ·

卷 416_11 【酬乐天三月三日见寄】

元稹

当年此日花前醉，今日花前病里销。
独倚破帘闲怅望，可怜虚度好春朝。

卷 416_12 【酬乐天叹损伤见寄】

元稹

前途何在转茫茫，渐老那能不自伤。病为怕风多睡月，
起因花药暂扶床。函关气索迷真侣，峡水波翻碍故乡。
唯有秋来两行泪，对君新赠远诗章。

卷 416_13 【瘴塞】

元稹

瘴塞巴山哭鸟悲，红妆少妇敛啼眉。
殷勤奉药来相劝，云是前年欲病时。

· 全唐诗 ·

卷 416_14 【红荆】

元稹

庭中栽得红荆树，十月花开不待春。
直到孩提尽惊怪，一家同是北来人。

卷 416_15 【黄草峡听柔之琴二首】

元稹

胡笳夜奏塞声寒，是我乡音听渐难。
料得小来辛苦学，又因知向峡中弹。

别鹤凄清觉露寒，离声渐咽命难难。
怜君伴我涪州宿，犹有心情彻夜弹。

卷 416_16 【书剑】

元稹

渝工剑刃皆欧冶，巴吏书踪尽子云。
唯我心知有来处，泊船黄草夜思君。

· 全唐诗 ·

卷 416_17【内状诗寄杨、白二员外】

元稹

天门暗辟玉琤琮，昼送中枢晓禁清。彤管内人书细腻，
金銮御印篆分明。冲街不避将军令，跋敕兼题宰相名。
南省郎官谁待诏，与君将向世间行。

卷 416_18【别毅郎】

元稹

尔爷只为一杯酒，此别那知死与生。
儿有何辜才七岁，亦教儿作瘡江行。

爱惜尔爷唯有我，我今憔悴望何人。
伤心自比笼中鹤，翦尽翎翎愁到身。

卷 416_19【自责】

元稹

犀带金鱼束紫袍，不能将命报分毫。
他时得见牛常侍，为尔君前捧佩刀。

· 全唐诗 ·

卷 416_20 【送公度之福建】

元稹

棠阴犹在建溪矶，此去那论是与非。

若见白头须尽敬，恐曾江岸识胡威。

卷 416_21 【喜五兄自泗州至】

元稹

眼中三十年来泪，一望南云一度垂。

惭愧临淮李常侍，远教形影暂相随。

卷 416_22 【杏花】

元稹

常年出入右银台，每怪春光例早回。

惭愧杏园行在景，同州园里也先开。

· 全唐诗 ·

卷 416_23 【第三岁日咏春风，凭杨员外寄长安柳】

元稹

三日春风已有情，拂人头面稍怜轻。
殷勤为报长安柳，莫惜枝条动软声。

卷 416_24 【赠别杨员外巨源】

元稹

忆昔西河县下时，青山憔悴宦名卑。揄扬陶令缘求酒，
结托萧娘只在诗。朱紫衣裳浮世重，苍黄岁序长年悲。
白头后会知何日，一盏烦君不用辞。

卷 416_25 【寄乐天二首】

元稹

荣辱升沉影与身，世情谁是旧雷陈。唯应鲍叔犹怜我，
自保曾参不杀人。山入白楼沙苑暮，潮生沧海野塘春。
老逢佳景唯惆怅，两地各伤何限神。

论才赋命不相干，凤有文章雉有冠。羸骨欲销犹被刻，

· 全唐诗 ·

疮痕未没又遭弹。剑头已折藏须盖，丁字虽刚屈莫难。
休学州前罗刹石，一生身敌海波澜。

卷 416_26【听妻弹别鹤操】

元稹

别鹤声声怨夜弦，闻君此奏欲潸然。
商瞿五十知无子，更付琴书与仲宣。

卷 416_27【和王侍郎酬广宣上人观放榜后相贺】

元稹

渥洼徒自有权奇，伯乐书名世始知。竞走墙前希得俊，
高悬日下表无私。都中纸贵流传后，海外金填姓字时。
珍重刘繇因首荐，为君送和碧云诗。

· 全唐诗 ·

卷四百一十七

卷 417_1 【酬乐天喜邻郡】

元稹

蹇驴瘦马尘中伴，紫绶朱衣梦里身。
符竹偶因成对岸，文章虚被配为邻。
湖翻白浪常看雪，火照红妆不待春。
老大那能更争竞，任君投募醉乡人。

卷 417_2 【再酬复言和前篇】

元稹

经过二郡逢贤牧，聚集诸郎宴老身。
清夜漫劳红烛会，白头非是翠娥邻。
曾携酒伴无端宿，自入朝行便别春。
潦倒微之从不占，未知公议道何人。

· 全唐诗 ·

卷 417_3【赠乐天】

元稹

莫言邻境易经过，彼此分符欲奈何。

垂老相逢渐难别，白头期限各无多。

卷 417_4【重赠】

元稹

休遣玲珑唱我诗，我诗多是别君词。

明朝又向江头别，月落潮平是去时。

卷 417_5【别后西陵晚眺】

元稹

晚日未抛诗笔砚，夕阳空望郡楼台。

与君后会知何日，不似潮头暮却回。

· 全唐诗 ·

卷 417_6【以州宅夸于乐天】

元稹

州城迴绕拂云堆，镜水稽山满眼来。四面常时对屏障，
一家终日在楼台。星河似向檐前落，鼓角惊从地底回。
我是玉皇香案吏，谪居犹得住蓬莱。

卷 417_7【重夸州宅旦暮景色，兼酬前篇末句】

元稹

仙都难画亦难书，暂合登临不合居。绕郭烟岚新雨后，
满山楼阁上灯初。人声晓动千门辟，湖色宵涵万象虚。
为问西州罗刹岸，涛头冲突近何如。

卷 417_8【酬乐天吟张员外诗见寄，因思上京每与乐天于居敬兄升平里，咏张新诗】

元稹

乐天书内重封到，居敬堂前共读时。四友一为泉路客，
三人两咏浙江诗。别无远近皆难见，老减心情自各知。
杯酒与他年少隔，不相酬赠欲何之。

· 全唐诗 ·

卷 417_9【寄乐天】

元稹

闲夜思君坐到明，追寻往事倍伤情。同登科后心相合，
初得官时髭未生。二十年来谙世路，三千里外老江城。
犹应更有前途在，知向人间何处行。

卷 417_10【戏赠乐天、复言】

元稹

乐事难逢岁易徂，白头光景莫令孤。弄涛船更曾观否，
望市楼还有会无。眼力少将寻案牍，心情且强掷枭卢。
孙园虎寺随宜看，不必遥遥羡镜湖。

卷 417_11【重酬乐天】

元稹

红尘扰扰日西徂，我兴云心两共孤。暂出已遭千骑拥，
故交求见一人无。百篇书判从饶白，八米诗章未伏卢。
最笑近来黄叔度，自投名刺占陂湖。

· 全唐诗 ·

卷 417_12【再酬复言】

元稹

绕郭笙歌夜景徂，稽山迢带月轮孤。休文欲咏心应破，
道子虽来画得无。顾我小才同培塿，知君险斗敌都卢。
不然岂有姑苏郡，拟著陂塘比镜湖。

卷 417_13【郡务稍简，因得整比旧诗，并连缀焚削，封章
繁委篋笥，仅逾百轴，偶成自叹，因寄乐天】

元稹

近来章奏小年诗，一种成空尽可悲。书得眼昏朱似碧，
用来心破发如丝。催身易老缘多事，报主深恩在几时。
天遣两家无嗣子，欲将文集与它谁。

卷 417_14【酬乐天余思不尽加为六韵之作】

元稹

律吕同声我尔身，文章君是一伶伦。众推贾谊为才子，
帝喜相如作侍臣。次韵千言曾报答，直词三道共经纶。
元诗驳杂真难辨，白朴流传用转新。蔡女图书虽在口，

· 全唐诗 ·

于公门户岂生尘。商瞿未老犹希冀，莫把赢金便付人。

卷 417_15【寄乐天】

元稹

莫嗟虚老海壖西，天下风光数会稽。灵汜桥前百里镜，
石帆山崦五云溪。冰销田地芦锥短，春入枝条柳眼低。
安得故人生羽翼，飞来相伴醉如泥。

卷 417_16【酬乐天雪中见寄】

元稹

知君夜听风萧索，晓望林亭雪半糊。撼落不教封柳眼，
扫来偏尽附梅株。敲扶密竹枝犹亚，煦暖寒禽气渐苏。
坐觉湖声迷远浪，回惊云路在长途。钱塘湖上蘋先合，
梳洗楼前粉暗铺。石立玉童披鹤氅，台施瑶席换龙须。
满空飞舞应为瑞，寡和高歌只自娱。莫遣拥帘伤思妇，
且将盈尺慰农夫。称觴彼此情何异，对景东西事有殊。
镜水绕山山尽白，琉璃云母世间无。

· 全唐诗 ·

卷 417_17【和乐天早春见寄】

元稹

雨香云澹觉微和，谁送春声入棹歌。萱近北堂穿土早，
柳偏东面受风多。湖添水色消残雪，江送潮头涌漫波。
同受新年不同赏，无由缩地欲如何。

卷 417_18【酬复言长庆四年元日郡斋感怀见寄】

元稹

腊尽残销春又归，逢新别故欲沾衣。自惊身上添年纪，
休系心中小是非。富贵祝来何所遂，聪明鞭得转无机。
羞看稚子先拈酒，怅望平生旧采薇。去日渐加馀日少，
贺人虽闹故人稀。椒花丽句闲重检，艾发衰容惜寸辉。
苦思正旦酬白雪，闲观风色动青旂。千官仗下炉烟里，
东海西头意独违。

卷 417_19【代郡斋神答乐天】

元稹

虚白堂神传好语，二年长伴独吟时。夜怜星月多离烛，

· 全唐诗 ·

日滉波涛一下帷。为报何人偿酒债，引看墙上使君诗。

卷 417_20 【酬乐天重寄别】

元稹

却报君侯听苦辞，老头抛我欲何之。
武牢关外虽分手，不似如今衰白时。

卷 417_21 【和乐天重题别东楼】

元稹

山容水态使君知，楼上从容万状移。日映文章霞细丽，
风驱鳞甲浪参差。鼓催潮户凌晨击，笛赛婆官彻夜吹。
唤客潜挥远红袖，卖垆高挂小青旗。賸铺床席春眠处，
乍卷帘帷月上时。光景无因将得去，为郎抄在和郎诗。

卷 417_22 【余杭周从事以十章见寄，词调清婉，难于遍酬，
聊和诗首篇，以答来贶】

元稹

扰扰纷纷旦暮间，经营闲事不曾闲。多缘老病推辞酒，

· 全唐诗 ·

少有功夫久羨山。清夜笙歌喧四郭，黄昏钟漏下重关。
何由得似周从事，醉入人家醒始还。

卷 417_23【寄浙西李大夫四首】

元稹

柳眼梅心渐欲春，白头西望忆何人。
金陵太守曾相伴，共蹋银台一路尘。

蕊珠深处少人知，网索西临太液池。
浴殿晓闻天语后，步廊骑马笑相随。

禁林同直话交情，无夜无曾不到明。
最忆西楼人静夜，玉晨钟磬两三声。

由来鹏化便图南，浙右虽雄我未甘。
早渡西江好归去，莫抛舟楫滞春潭。

卷 417_24【初除浙东，妻有阻色，因以四韵晓之】

元稹

嫁时五月归巴地，今日双旌上越州。兴庆首行千命妇，
会稽旁带六诸侯。海楼翡翠闲相逐，镜水鸳鸯暖共游。

· 全唐诗 ·

我有主恩羞未报，君于此外更何求。

卷 417_25【为乐天自勘诗集，因思顷年城南醉归，马上递唱艳曲，十余里不绝，长庆初俱以制诰侍宿南郊斋宫，夜后偶吟数十篇，两掖诸公泊翰林学士三十余人惊起就听，逮至卒吏，莫不众观。群公直至侍众行礼之时，不复聚寐，予与卷后。越中冬夜风雨，不觉将晓，诸门互启关锁，即事成篇】

元稹

春野醉吟十里程，斋宫潜咏万人惊。
今宵不寐到明读，风雨晓闻开锁声。

卷 417_26【题长庆四年历日尾】

元稹

残历半张余十四，灰心雪鬓两凄然。
定知新岁御楼后，从此不名长庆年。

· 全唐诗 ·

卷四百一十八

卷 418_1 【梦上天】

元稹

梦上高高天，高高苍苍高不极。下视五岳块累累，
仰天依旧苍苍色。蹋云耸身身更上，攀天上天攀未得。
西瞻若水兔轮低，东望蟠桃海波黑。日月之光不到此，
非暗非明烟塞塞。天悠地远身跨风，下无阶梯上无力。
来时畏有他人上，截断龙胡斩鹏翼。茫茫漫漫方自悲，
哭向青云椎素臆。哭声厌咽旁人恶，唤起惊悲泪飘露。
千惭万谢唤厌人，向使无君终不寤。

卷 418_2 【冬白纈】

元稹

吴宫夜长宫漏款，帘幕四垂灯焰暖。西施自舞王自管，
雪纈翻翻鹤翎散，促节牵繁舞腰懒。舞腰懒，王罢饮，
盖覆西施凤花锦。身作匡床臂为枕，朝珮枳玉王晏寝。

· 全唐诗 ·

寝醒阁报门无事，子胥死后言为讳。近王之臣论王意，
共笑越王穷惴惴，夜夜抱冰寒不睡。

卷 418_3【将进酒】

元稹

将进酒，将进酒。酒中有毒鸩主父，言之主父伤主母。
母为妾地父妾天，仰天俯地不忍言。阳为僵踣主父前，
主父不知加妾鞭。旁人知妾为主说，主将泪洗鞭头血。
推椎主母牵下堂，扶妾遣升堂上床。将进酒，
酒中无毒令主寿。愿主回恩归主母，遣妾如此由主父。
妾为此事人偶知，自惭不密方自悲。主今颠倒安置妾，
贪天僭地谁不为。

卷 418_4【采珠行】

元稹

海波无底珠沉海，采珠之人判死采。万人判死一得珠，
斛量买婢人何在。年年采珠珠避人。今年采珠由海神。
海神采珠珠尽死，死尽明珠空海水。珠为海物海属神，
神今自采何况人。

· 全唐诗 ·

卷 418_5【董逃行】

元稹

董逃董逃董卓逃，揩铿戈甲声劳嘈。剜剜深脐脂焰焰，
人皆数叹曰，尔独不忆年年取我身上膏。
膏销骨尽烟火死，长安城中贼毛起。城门四走公卿士，
走劝刘虞作天子。刘虞不敢作天子，曹瞒篡乱从此始。
董逃董逃人莫喜，胜负相环相枕倚，缝缀难成裁破易。
何况曲针不能伸巧指，欲学裁缝须准拟。

卷 418_6【忆远曲】

元稹

忆远曲，郎身不远郎心远。沙随郎饭俱在匙，
郎意看沙那比饭。水中书字无字痕，君心暗画谁会君。
况妾事姑姑进止，身去门前同万里。一家尽是郎腹心，
妾似生来无两耳。妾身何足言，听妾私劝君。
君今夜夜醉何处，姑来伴妾自闭门。嫁夫恨不早，
养儿将备老。妾自嫁郎身骨立，老姑为郎求娶妾。
妾不忍见姑郎忍见，为郎忍耐看姑面。

· 全唐诗 ·

卷 418_7 【夫远征】

元稹

赵卒四十万，尽为坑中鬼。赵王未信赵母言，
犹点新兵更填死。填死之兵兵气索，秦强赵破括敌起。

括虽专命起尚轻，何况牵肘之人牵不已。坑中之鬼妻在营，
髻麻戴经鹅雁鸣。送夫之妇又行哭，哭声送死非送行。
夫远征，远征不必戍长城，出门便不知死生。

卷 418_8 【织妇词】

元稹

织夫何太忙，蚕经三卧行欲老。蚕神女圣早成丝，
今年丝税抽征早。早征非是官人恶。去岁官家事戎索。

征人战苦束刀疮，主将勋高换罗幕。缫丝织帛犹努力，
变缉撩机苦难织。东家头白双女儿，为解挑纹嫁不得。

檐前袅袅游丝上，上有蜘蛛巧来往。羡他虫豸解缘天，
能向虚空织罗网。

· 全唐诗 ·

卷 418_9【田家词】

元稹

牛吒吒，田确确。旱块敲牛蹄趵趵，种得官仓珠颗谷。
六十年来兵簇簇，月月食粮车辘辘。一日官军收海服，
驱牛驾车食牛肉。归来攸得牛两角，重铸锄犁作斤劓。
姑舂妇担去输官，输官不足归卖屋，愿官早胜讎早覆。
农死有儿牛有犊，誓不遣官军粮不足。

卷 418_10【侠客行】

元稹

侠客不怕死，怕在事不成，事成不肯藏姓名。
我非窃贼谁夜行，白日堂堂杀袁盎。九衢草草人面青，
此客此心师海鲸。海鲸露背横沧溟，海波分作两处生。
分海减海力，侠客有谋，人不识测三尺铁蛇延二国。

卷 418_11【君莫非】

元稹

鸟不解走，兽不解飞。两不相解，那得相识。犬不饮露，

· 全唐诗 ·

蝉不啖肥。以蝉易犬，蝉死犬饥。燕在梁栋，鼠在阶基。
各自窠窟，人不能移。妇好针缕，夫读书诗。男翁女嫁，
卒不相知。惧聒摘耳，效痛嚬眉。我不非尔，尔无我非。

卷 418_12【田野狐兔行】

元稹

种豆耘锄，种禾沟洫。禾苗豆甲，狐榾兔翦。割鹄喂鹰，
烹麟啖犬。鹰怕兔毫，犬被狐引。狐兔相须，鹰犬相尽。
日暗天寒，禾稀豆损。鹰犬就烹，狐兔俱晒。

卷 418_13【当来日大难行】

元稹

当来日大难行。前有阪，后有坑。大梁侧，小梁倾。
两轴相绞，两轮相撑。大牛竖，小牛横。乌啄牛背，
足趺力伧。当来日大难行。太行虽险，险可使平。
轮轴自挠，牵制不停。泥潦渐久，荆棘旋生。行必不得，
不如不行。

· 全唐诗 ·

卷 418_14【人道短】

元稹

古道天道长人道短，我道天道短人道长。
天道昼夜回转不曾住，春秋冬夏忙。颠风暴雨电雷狂，
晴被阴暗，月夺日光。往往星宿，日亦堂堂。天既职性命，
道德人自强。尧舜有圣德，天不能遣，寿命永昌。
泥金刻玉，与秦始皇。周公传说，何不长宰相。老聃仲尼，
何事栖遑。莽卓恭显，皆数十年富贵。梁冀夫妇，
车马煌煌。若此颠倒事，岂非天道短，岂非人道长。
尧舜留得神圣事，百代天子有典章。仲尼留得孝顺语，
千年万岁父子不敢相灭亡。殁后千余载，
唐家天子封作文宣王。老君留得五千字，子孙万万称圣唐。
谥作玄元帝，魂魄坐天堂。周公周礼二十卷，
有能行者知纪纲。傅说说命三四纸，有能师者称祖宗。
天能夭人命，人使道无穷。若此神圣事，谁道人道短，
岂非人道长。天能种百草，莠得十年有气息，蕞才一日芳。
人能拣得丁沈兰蕙，料理百和香。天解养禽兽，
喂虎豹豺狼。人解和曲蘖。充杓祀烝尝。杜鹃无百作，
天遣百鸟哺雏，不遣哺凤凰。巨蟒寿千岁，
天遣食牛吞象充腹肠。蛟螭与变化，鬼怪与隐藏。
蚊蚋与利觜，枳棘与锋铓。赖得人道有拣别，
信任天道真茫茫。若此撩乱事，岂非天道短，赖得人道长。

· 全唐诗 ·

卷 418_15【苦乐相倚曲】

元稹

古来苦乐之相倚，近于掌上之十指。君心半夜猜恨生，
荆棘满怀天未明。汉成眼瞥飞燕时，可怜班女恩已衰。
未有因由相决绝，犹得半年佯暖热。转将深意谕旁人，
缉缀瑕疵遣潜说。一朝诏下辞金屋，班姬自痛何仓卒。
呼天抚地将自明，不悟寻时暗销骨。白首宫人前再拜，
愿将日月相辉解。苦乐相寻昼夜间，灯光那有天明在。
主今被夺心应苦，妾夺深恩初为主。欲知妾意恨主时，
主今为妾思量取。班姬收泪抱妾身，我曾排摈无限人。

卷 418_16【出门行】

元稹

兄弟同出门，同行不同志。凄凄分歧路，各各营所为。
兄上荆山巅，翻石辨虹气。弟沉沧海底，偷珠待龙睡。
出门不数年，同归亦同遂。俱用私所珍，升沉自兹异。
献珠龙王宫，值龙觅珠次。但喜复得珠，不求珠所自。
酬客双龙女，授客六龙辔。遣充行雨神，雨泽随客意。
零夏钟鼓繁，á秋玉帛积。彩色画廊庙，奴僮被珠翠。
骥騄千万双，鸞鸯七十二。言者未摇舌，无人敢轻议。
其兄因献璞，再别不履地。门户亲戚疏，匡床妻妾弃。

· 全唐诗 ·

铭心有所待，视足无所愧。持璞自枕头，泪痕双血渍。
一朝龙醒寤，本问偷珠事。因知行雨偏，妻子五刑备。
仁兄捧尸哭，势友掉头讳。丧车黔首葬，吊客青蝇至。
楚有望气人，王前忽长跪。贺王得贵宝，不远王所莅。
求之果如言，剖出浮筠腻。白珩无颜色，垂棘有瑕累。
在楚裂地封，入赵连城贵。秦遣李斯书，书为传国瑞。
秦亡汉魏传，传者得神器。卞和名永永，与宝不相坠。
劝尔出门行，行难莫行易。易得还易失，难同亦难离。
善贾识贪廉，良田无稊稗。磨剑莫磨锥，磨锥成小利。

卷 418_17【捉捕歌】

元稹

捉捕复捉捕，莫捉狐与兔。狐兔藏窟穴，豺狼妨道路。
道路非不妨，最忧蝼蚁聚。豺狼不陷阱，蝼蚁潜幽蠹。
切切主人窗，主人轻细故。延缘蚀`栌，渐入栋梁柱。
梁栋尽空虚，攻穿痕不露。主人坦然意，昼夜安寝寤。
网罗布参差，鹰犬走回互。尽力穷窟穴，无心自还顾。
客来歌捉捕，歌竟泪如雨。岂是惜狐兔，畏君先后误。
愿君扫梁栋，莫遣蝼蚁附。次及清道涂，尽灭豺狼步。
主人堂上坐，行客门前度。然后巡野田，遍张畋猎具。
外无枭獍援，内有熊罴驱。狡兔掘荒榛，妖狐熏古墓。
用力不足多，得禽自无数。畏君听未详，听客有明喻。
虬虱谁不轻，鲸鲵谁不恶。在海尚幽遐，在怀交秽污。
歌此劝主人，主人那不悟。不悟还更歌，谁能恐违忤。

· 全唐诗 ·

卷 418_18【古筑城曲五解】

元稹

年年塞下丁，长作出塞兵。自从冒顿强，官筑遮虏城。
筑城须努力，城高遮得贼。但恐贼路多，有城遮不得。
丁口传父言，莫问城坚不。平城被虏围，汉鬲城墙走。
因兹请休和，虏往骑来过。半疑兼半信，筑城犹嵯峨。
筑城安敢烦，愿听丁一言。请筑鸿胪寺，兼愁虏出关。

卷 418_19【估客乐】

元稹

估客无住著，有利身则行。出门求火伴，入户辞父兄。
父兄相教示，求利莫求名。求名有所避，求利无不营。
火伴相勒缚，卖假莫卖诚。交关但交假，本生得失轻。
自兹相将去，誓死意不更。亦解市头语，便无邻里情。
鍤石打臂钏，糯米吹项瓔。归来村中卖，敲作金石声。
村中田舍娘，贵贱不敢争。所费百钱本，已得十倍赢。
颜色转光净，饮食亦甘馨。子本频蕃息，货贩日兼并。
求珠驾沧海，采玉上荆衡。北买党项马，西擒吐蕃鹦。
炎洲布火浣，蜀地锦织成。越婢脂肉滑，奚僮眉眼明。
通算衣食费，不计远近程。经游天下遍，却到长安城。
城中东西市，闻客次第迎。迎客兼说客，多财为势倾。

· 全唐诗 ·

客心本明黠，闻语心已惊。先问十常侍，次求百公卿。
侯家与主第，点缀无不精。归来始安坐，富与王者勍。

市卒酒肉臭，县胥家舍成。岂唯绝言语，奔走极使令。
大儿贩材木，巧识梁栋形。小儿贩盐卤，不入州县征。

一身偃市利，突若截海鲸。钩距不敢下，下则牙齿横。
生为估客乐，判尔乐一生。尔又生两子，钱刀何岁平。

· 全唐诗 ·

卷四百一十九

卷 419_1 【连昌宫词】

元稹

连昌宫中满宫竹，岁久无人森似束。又有墙头千叶桃，
风动落花红蔌蔌。宫边老翁为余泣，小年进食曾因入。
上皇正在望仙楼，太真同凭阑干立。楼上楼前尽珠翠，
炫转荧煌照天地。归来如梦复如痴，何暇备言宫里事。
初过寒食一百六，店舍无烟宫树绿。夜半月高弦索鸣，
贺老琵琶定场屋。力士传呼觅念奴，念奴潜伴诸郎宿。
须臾觅得又连催，特敕街中许然烛。春娇满眼睡红绡，
掠削云鬟旋装束。飞上九天歌一声，二十五郎吹管逐。
逡巡大遍凉州彻，色色龟兹轰录续。李谟擫笛傍宫墙，
偷得新翻数般曲。平明大驾发行宫，万人歌舞涂路中。
百官队仗避岐薛，杨氏诸姨车斗风。明年十月东都破，
御路犹存禄山过。驱令供顿不敢藏，万姓无声泪潜堕。
两京定后六七年，却寻家舍行宫前。庄园烧尽有枯井，
行宫门闭树宛然。尔后相传六皇帝，不到离宫门久闭。
往来年少说长安，玄武楼成花萼废。去年敕使因斫竹，
偶值门开暂相逐。荆榛枿比塞池塘，狐兔骄痴缘树木。

· 全唐诗 ·

舞榭欹倾基尚在，文窗窈窕纱犹绿。尘埋粉壁旧花钿，
乌啄风筝碎珠玉。上皇偏爱临砌花，依然御榻临阶斜。
蛇出燕巢盘斗拱，菌生香案正当衙。寝殿相连端正楼，
太真梳洗楼上头。晨光未出帘影黑，至今反挂珊瑚钩。
指似傍人因恸哭，却出宫门泪相续。自从此后还闭门，
夜夜狐狸上门屋。我闻此语心骨悲，太平谁致乱者谁。
翁言野父何分别，耳闻眼见为君说。姚崇宋璟作相公，
劝谏上皇言语切。燮理阴阳禾黍丰，调和中外无兵戎。
长官清平太守好，拣选皆言由相公。开元之末姚宋死，
朝廷渐渐由妃子。禄山宫里养作儿，虢国门前闹如市。
弄权宰相不记名，依稀忆得杨与李。庙谖颠倒四海摇，
五十年来作疮痍。今皇神圣丞相明，诏书才下吴蜀平。
官军又取淮西贼，此贼亦除天下宁。年年耕种宫前道，
今年不遣子孙耕。老翁此意深望幸，努力庙谋休用兵。

卷 419_2【望云骖马歌】

元稹

忆昔先皇幸蜀时，八马入谷七马疲。肉绽筋挛四蹄脱，
七马死尽无马骑。天子蒙尘天雨泣，巉岩道路淋漓湿。
峥嵘白草眇难期，謏洞黄泉安可入。朱泚围兵抽未尽，
怀光寇骑追行及。嫔娥相顾倚树啼，鹧鸪无声仰天立。
圉人初进望云骖，彩色憔悴众马欺。上前喷吼如有意，
耳尖卓立节踠奇。君王试遣回胸臆，撮骨锯牙骈两肋。
蹄悬四踞脑颡方，胯耸三山尾株直。圉人畏谄仍相惑，

· 全唐诗 ·

此马无良空有力。频频啮掣辔难施，往往跳趯鞍不得。
色沮声悲仰天诉，天不遣言君未识。亚身受取白玉羁，
开口衔将紫金勒。君王自此方敢骑，似遇良臣久凄恻。
龙腾鱼鳖倏然惊，骥盼驴骡少颜色。七圣心迷运方厄，
五丁力尽路犹窄。橐它山上斧刃堆，望秦岭下锥头石。
五六百里真符县，八十四盘青山驿。掣开流电有辉光，
突过浮云无朕迹。地平险尽施黄屋，九九属车十二纛。
齐映前导引骖头，严震迎号抱骖足。路旁垂白天宝民，
望骖礼拜见骖哭。皆言玄宗当时无此马，不免骑骡来幸蜀。
雄雄猛将李令公，收城杀贼豺狼空。天旋地转日再中，
天子却坐明光宫。朝廷无事忘征战，校猎朝回暮球宴。
御马齐登拟用槽，君王自试宣徽殿。圉人还进望云骖，
性强步阔无方便。分驂摆杖头太高，擘肘回头项难转。
人人共恶难回跋，潜遣飞龙减刍秣。银鞍绣鞵不复施，
空尽天年御槽活。当时邹谚已有言，莫倚功高浪开阖。
登山纵似望云骖，平地须饶红叱拨。长安三月花垂草，
果下翩翩紫骝好。千官暖热李令闲，百马生狞望云老。
望云骖，尔之种类世世奇。当时项王乘尔祖，
分配英豪称霸主。尔身今日逢圣人，从幸巴渝归入秦。
功成事遂身退天之道，何必随群逐队到死蹋红尘。
望云骖，用与不用各有时，尔勿悲。

卷 419_3【和李校书新题乐府十二首·上阳白发人】

元稹

天宝年中花鸟使，撩花狎鸟含春思。满怀墨诏求嫔御，

· 全唐诗 ·

走上高楼半酣醉。醉酣直入卿士家，闺闱不得偷回避，
良人顾妾心死别，小女呼爷血垂泪。十中有一得更衣，
永配深宫作宫婢。御马南奔胡马蹙，宫女三千合宫弃。
宫门一闭不复开，上阳花草青苔地。月夜闲闻洛水声，
秋池暗度风荷气。日日长看提众门，终身不见门前事。
近年又送数人来，自言兴庆南宫至。我悲此曲将彻骨，
更想深冤复酸鼻。此辈贱嫔何足言，帝子天孙古称贵。
诸王在閤四十年，七宅六宫门户闕。隋炀枝条袭封邑，
肃宗血胤无官位。王无妃媵主无婿，阳亢阴淫结灾累。
何如决雍顺众流，女遣从夫男作吏。

卷 419_4【和李校书新题乐府十二首·华原磬】

元稹

泗滨浮石裁为磬，古乐疏音少人听。工师小贱牙旷稀，
不辨邪声嫌雅正。正声不屈古调高，钟律参差管弦病。
铿金戛瑟徒相杂，投玉敲冰杳然零。华原软石易追琢，
高下随人无雅郑。弃旧美新由乐胥，自此黄钟不能竞。
玄宗爱乐爱新乐，梨园弟子承恩横。霓裳才彻胡骑来，
云门未得蒙亲定。我藏古磬藏在心，有时激作南风咏。
伯夔曾抚野兽驯，仲尼暂叩春雷盛。何时得向箏篴悬，
为君一吼君心醒。愿君每听念封疆，不遣豺狼剿人命。

· 全唐诗 ·

卷 419_5【和李校书新题乐府十二首·五弦弹】

元稹

赵璧五弦弹徵调，徵声巉绝何清峭。辞雄皓鹤警露啼，
失子哀猿绕林啸。风入春松正凌乱，莺含晓舌怜娇妙。
呜呜暗溜咽冰泉，杀杀霜刀涩寒鞘。促节频催渐繁拨，
珠幢斗绝金铃掉。千鞞鸣镝发胡弓，万片清球击虞庙。
众乐虽同第一部，德宗皇帝常偏召。旬休节假暂归来，
一声狂杀长安少。主第侯家最难见，授歌按曲皆承诏。
水精帘外教贵嫔，玳瑁筵心伴中要。臣有五贤非此弦，
或在拘囚或屠钓。一贤得进胜累百，两贤得进同周召。
三贤事汉灭暴强，四贤镇岳宁边徼。五贤并用调五常，
五常既叙三光耀。赵璧五弦非此贤，九九何劳设庭燎。

卷 419_6【和李校书新题乐府十二首·西凉伎】

元稹

吾闻昔日西凉州，人烟扑地桑柘稠。蒲萄酒熟恣行乐，
红艳青旗朱粉楼。楼下当垆称卓女，楼头伴客名莫愁。
乡人不识离别苦，更卒多为沉滞游。哥舒开府设高宴，
八珍九酝当前头。前头百戏竞撩乱，丸剑跳踯霜雪浮。
狮子摇光毛彩竖，胡腾醉舞筋骨柔。大宛来献赤汗马，
赞普亦奉翠茸裘。一朝燕贼乱中国，河湟没尽空遗丘。

· 全唐诗 ·

开远门前万里堠，今来蹙到行原州。去京五百而近何其逼，
天子县内半没为荒陬，西凉之道尔阻修。连城边将但高会，
每听此曲能不羞。

卷 419_7【和李校书新题乐府十二首·法曲】

元稹

吾闻黄帝鼓清角，弭伏熊罴舞玄鹤。舜持干羽苗革心，
尧用咸池凤巢阁。大夏濩武皆象功，功多已讶玄功薄。
汉祖过沛亦有歌，秦王破阵非无作。作之宗庙见艰难，
作之军旅传糟粕。明皇度曲多新态，宛转侵淫易沉著。
赤白桃李取花名，霓裳羽衣号天落。雅弄虽云已变乱，
夷音未得相参错。自从胡骑起烟尘，毛毳腥膻满咸洛。
女为胡妇学胡妆，伎进胡音务胡乐。火凤声沉多咽绝，
春莺啭罢长萧索。胡音胡骑与胡妆，五十年来竞纷泊。

卷 419_8【和李校书新题乐府十二首·驯犀】

元稹

建中之初放驯象，远归林邑近交广。兽返深山鸟构巢，
鹰雕鹞鹯无羁鞅。贞元之岁贡驯犀，上林置圈官司养。
玉盆金栈非不珍，虎啖狴牢鱼食网。渡江之橘逾汶貉，
反时易性安能长。腊月北风霜雪深，踰躅鳞身遂长往。

· 全唐诗 ·

行地无疆费传驿，通天异物罹幽枉。乃知养兽如养人，
不必人人自敦奖。不扰则得之于理，不夺有以多于赏。
脱衣推食衣食之，不若男耕女令纺。尧民不自知有尧，
但见安闲聊击壤。前观驯象后驯犀，理国其如指诸掌。

卷 419_9【和李校书新题乐府十二首·立部伎】

元稹

胡部新声锦筵坐，中庭汉振高音播。太宗庙乐传子孙，
取类群凶阵初破。戢戢攒枪霜雪耀，腾腾击鼓云雷磨。
初疑遇敌身启行，终象由文士宪左。昔日高宗常立听，
曲终然后临玉座。如今节将一掉头，电卷风收尽摧挫。
宋晋郑女歌声发，满堂会客齐喧呵。珊珊珮玉动腰身，
一一贯珠随咳唾。顷向圜丘见郊祀，亦曾正旦亲朝贺。
太常雅乐备宫悬，九奏未终百寮惰。遑滞难令季札辨，
迟回但恐文侯卧。工师尽取聋昧人，岂是先王作之过。
宋沅尝传天宝季，法曲胡音忽相和。明年十月燕寇来，
九庙千门虏尘浞。我闻此语叹复泣，古来邪正将谁奈。
奸声入耳佞入心，侏儒饱饭夷齐饿。

卷 419_10【和李校书新题乐府十二首·骠国乐】

元稹

骠之乐器头象驼，音声不合十二和。促舞跳趯筋节硬，

· 全唐诗 ·

繁辞变乱名字讹。千弹万唱皆咽咽，左旋右转空傿傿。
俯地呼天终不会，曲成调变当如何。德宗深意在柔远，
笙镛不御停娇娥。史馆书为朝贡传，太常编入鞞鞞科。
古时陶尧作天子，逊遁亲听康衢歌。又遣道人持木铎，
遍采讴谣天下过。万人有意皆洞达，四岳不敢施烦苛。
尽令区中击壤块，燕及海外覃恩波。秦霸周衰古官废，
下堙上塞王道颇。共矜异俗同声教，不念齐民方荐瘥。
传称鱼鳖亦咸若，苟能效此诚足多。借如牛马未蒙泽，
岂在抱瓮滋黿鼉。教化从来有源委，必将泳海先泳河。
是非倒置自古有，骛兮骛兮谁尔诃。

卷 419_11【和李校书新题乐府十二首·胡旋女】

元稹

天宝欲末胡欲乱，胡人献女能胡旋。旋得明王不觉迷，
妖胡奄到长生殿。胡旋之义世莫知，胡旋之容我能传。
蓬断霜根羊角疾，竿戴朱盘火轮炫。骊珠迸珥逐飞星，
虹晕轻巾掣流电。潜鲸暗吸笮波海，回风乱舞当空霰。
万过其谁辨终始，四座安能分背面。才人观者相为言，
承奉君恩在圆变。是非好恶随君口，南北东西逐君眄，
柔软依身著佩带，裴回绕指同环钏。佞臣闻此心计回，
荧惑君心君眼眩。君言似曲屈为钩，君言好直舒为箭。
巧随清影触处行，妙学春莺百般啭。倾天侧地用君力，
抑塞周遮恐君见。翠华南幸万里桥，玄宗始悟坤维转。
寄言旋目与旋心，有国有家当共谴。

· 全唐诗 ·

卷 419_12【和李校书新题乐府十二首·蛮子朝】

元稹

西南六诏有遗种，僻在荒陬路寻壅。部落支离君长贱，
比诸夷狄为幽冗。犬戎强盛频侵削，降有愤心战无勇。
夜防抄盗保深山，朝望烟尘上高冢。鸟道绳桥来款附，
非因慕化因危悚。清平官系金呖嵯，求天叩地持双珙。
益州大将韦令公，顷实遭时定汧陇。自居剧镇无他绩，
幸得蛮来固恩宠。为蛮开道引蛮朝，迎蛮送蛮常继踵。
天子临轩四方贺，朝廷无事唯端拱。漏天走马春雨寒，
泸水飞蛇瘴烟重。椎头丑类除忧患，肿足役夫劳汹涌。
匈奴互市岁不供，云蛮通好辔长骢。戎王养马渐多年，
南人耗悴西人恐。

卷 419_13【和李校书新题乐府十二首·缚戎人】

元稹

边头大将差健卒，入抄禽生快于鹘。但逢赭面即捉来，
半是边人半戎羯。大将论功重多级，捷书飞奏何超忽。
圣朝不杀谐至仁，远送炎方示微罚。万里虚劳肉食费，
连头尽被毡裘喝。华裯重席卧腥臊，病犬愁鸱声咽咽。
中有一人能汉语，自言家本长城窟。少年随父戍安西，
河渭瓜沙眼看没。天宝末乱犹数载，狼星四角光蓬勃。

· 全唐诗 ·

中原祸作边防危，果有豺狼四来伐。蕃马膘成正翘健，
蕃兵肉饱争唐突。烟尘乱起无亭燧，主帅惊跳弃旄钺。
半夜城摧鹅雁鸣，妻啼子叫曾不歇。阴森神庙未敢依，
脆薄河冰安可越。荆棘深处共潜身，前困蒺藜后艱隘。
平明蕃骑四面走，古墓深林尽株橛。少壮为俘头被髡，
老翁留居足多刖。乌鸢满野尸狼藉，楼榭成灰墙突兀。
暗水溅溅入旧池，平沙漫漫铺明月。戎王遣将来安慰，
口不敢言心咄咄。供进腋腋御叱般，岂料穹庐拣肥腩。
五六十年消息绝，中间盟会又猖獗。眼穿东日望尧云，
肠断正朝梳汉发。近年如此思汉者，半为老病半埋骨。
常教孙子学乡音，犹话平时好城阙。老者傥尽少者壮，
生长蕃中似蕃悖。不知祖父皆汉民，便恐为蕃心矻矻。
缘边饱喂十万众，何不齐驱一时发。年年但捉两三人，
精卫衔芦塞溟渤。

卷 419_14【和李校书新题乐府十二首·阴山道】

元稹

年年买马阴山道，马死阴山帛空耗。元和天子念女工，
内出金银代酬犒。臣有一言昧死进，死生甘分答恩焘。
费财为马不独生，耗帛伤工有他盗。臣闻平时七十万匹马，
关中不省闻嘶噪。四十八监选龙媒，时贡天庭付良造。
如今坳野十无一，尽在飞龙相践暴。万束刍茭供旦暮，
千钟菽粟长牵漕。屯军郡国百馀镇，缣绡岁奉春冬劳。
税户逋逃例摊配，官司折纳仍贪冒。挑纹变力倍费，

· 全唐诗 ·

弃旧从新人所好。越縠缭绫织一端，十匹素缣功未到。
豪家富贾逾常制，令族清班无雅操。从骑爱奴丝布衫，
臂鹰小儿云锦韬。群臣利己要差僭，天子深衷空悯悼。
绰立花砖鹓凤行，雨露恩波几时报。

· 全唐诗 ·

卷四百二十

卷 420_1【有鸟二十章】

元稹

有鸟有鸟名老鸱，鸱张贪很老不衰。似鹰指爪唯攫肉，戾天羽翮徒翰飞。朝偷暮窃恣昏饱，后顾前瞻高树枝。珠丸弹射死不去，意在护巢兼护儿。

有鸟有鸟毛似鹤，行步虽迟性灵恶。主人但见闲慢容，行占蓬莱最高阁。弱羽长忧俊鹳拳，疽肠暗著鸬雏啄。千年不死伴灵龟，枭心鹤貌何人觉。

有鸟有鸟如鸛雀，食蛇抱0 天姿恶。行经水浒为毒流，羽拂酒杯为死药。汉后忍渴天岂知，骊姬坟地君宁觉。呜呼为有白色毛，亦得乘轩谬称鹤。

有鸟有鸟名为鸕，毛衣软毳心性柔。鸕缘暖足怜不吃，鸕为同科曾共游。飞飞渐上高高阁，百鸟不猜称好逑。佳人许伴鸕雏食，望尔化为张氏钩。

有鸟有鸟名野鸡，天姿耿介行步齐。主人偏养怜整顿，

· 全唐诗 ·

玉粟充肠瑶树栖。池塘潜狎不鸣雁，津梁暗引无用鹈。
秋鹰迸逐霜鹘远，鵬鸟护巢当昼啼。主人频问遣妖术，
力尽计穷音响凄。当时何不早量分，莫遣辉光深照泥。

有鸟有鸟群翠碧，毛羽短长心并窄。皆曾偷食渌池鱼，
前去后来更逼迫。食鱼满腹各自飞，池上见人长似客。
飞飞竞占嘉树林，百鸟不争缘凤惜。

有鸟有鸟群纸鸢，因风假势童子牵。去地渐高人眼乱，
世人为尔羽毛全。风吹绳断童子走，馀势尚存犹在天。
愁尔一朝还到地，落在深泥谁复怜。

有鸟有鸟名啄木，木中求食常不足。偏啄邓林求一虫，
虫孔未穿长觜秃。木皮已穴虫在心，虫蚀木心根柢覆。
可怜树上百鸟儿，有时飞向新林宿。

有鸟有鸟众蝙蝠，长伴佳人占华屋。妖鼠多年羽翮生，
不辨雌雄无本族。穿墉伺隙善潜身，昼伏宵飞恶明烛。
大厦虽存柱石倾，暗啮栋梁成蠹木。

有鸟有鸟名为鹞，深藏孔穴难动摇。鹰鹞绕树探不得，
随珠弹尽声转娇。主人烦惑罢擒取，许占神林为物妖。
当时幸有燎原火，何不鼓风连夜烧。

有鸟有鸟名燕子，口中未省无泥滓。春风吹送廊庑间，
秋社驱将嵌孔里。雷惊雨洒一时苏，云压霜摧半年死。
驱去驱来长信风，暂托栋梁何用喜。

· 全唐诗 ·

有鸟有鸟名老乌，贪痴突悖天下无。田中攫肉吞不足，
偏入诸巢探众雏。归来仍占主人树，腹饱巢高声响粗。
山鸦野鹊闲受肉，凤凰不得闻罪辜。秋鹰掣断架上索，
利爪一挥毛血落。可怜鸦鹊慕腥膻，犹向巢边竞纷泊。

有鸟有鸟谓白鹇，雪毛皓白红觜殷。贵人妾妇爱光彩，
行提坐臂怡朱颜。妖姬谢宠辞金屋，雕笼又伴新人宿。
无心为主拟衔花，空长白毛映红肉。

有鸟有鸟群雀儿，中庭啄粟篱上飞。秋鹰欺小嫌不食，
凤凰容众从尔随。大鹏忽起遮白日，馀风簸荡山岳移。
翩跹百万徒惊噪，扶摇势远何由知。古来妄说衔花报，
纵解衔花何所为。可惜官仓无限粟，伯夷饿死黄口肥。

有鸟有鸟皆百舌，舌端百啭声咄-。先春尽学百鸟啼，
真伪不分听者悦。伶伦凤律乱宫商，盘木天鸡误时节。
朝朝暮暮主人耳，桃李无言管弦咽。五月炎光朱火盛，
阳焰烧阴幽响绝。安知不是卷舌星，化作刚刀一时截。

有鸟有鸟毛羽黄，雄者为鸳雌者鸯。主人并养七十二，
罗列雕笼开洞房。雄鸣一声雌鼓翼，夜不得栖朝不食。
气息惛然双翅垂，犹入笼中就颜色。

有鸟有鸟名鹞雏，铃子眼睛苍锦襦。贵人腕软怜易臂，
奋肘一挥前后呼。俊鹞无由拳狡兔，金雕不得擒魅狐。
文王长在苑中猎，何日非熊休卖屠。

· 全唐诗 ·

有鸟有鸟名鹦鹉，养在雕笼解人语。主人曾问私所闻，
因说妖姬暗欺主。主人方惑翻见疑，趁归陇底双翅垂。
山鸦野雀怪鹦语，竞噪争窥无已时。君不见隋朝陇头姥，
娇养双鹦嘱新妇。一鹦曾说妇无仪，悍妇杀鹦欺主母。

一鹦闭口不复言，母问不言何太久。鹦言悍妇杀鹦由，
母为逐之乡里丑。当时主母信尔言，顾尔微禽命何有。
今之主人翻尔疑，何事笼中漫开口。

有鸟有鸟名俊鹖，鹖小雕痴俊无匹。雏鸭拂爪血迸天，
狡兔中拳头粉骨。平明度海朝未食，拔上秋空云影没。
瞥然飞下人不知，搅碎荒城魅狐窟。

有鸟有鸟真白鹤，飞上九霄云漠漠。司晨守夜悲鸡犬，
啄腐吞腥笑雕鹗。尧年值雪度关山，晋室闻琴下寥廓。
辽东尽尔千岁人，怅望桥边旧城郭。

卷 420_2【有酒十章】

元稹

有酒有酒鸡初鸣，夜长睡足神虑清。悄然危坐心不平，
浩思一气初彭亨。溷洞浩汗真无名，胡不终浑成。
胡为沉浊以升清，矗然分画高下程。天蒸地郁群动萌，
毛鳞裸介如鬣鬣。呜呼万物纷已生，我可奈何兮杯一倾。

· 全唐诗 ·

有酒有酒东方明，一杯既进吞元精。尚思天地之始名，
一元既二分浊清。地居方直天体明，胡不八荒圻圻如砥平。
胡山高屹率海泓澄，胡不日车杲杲昼夜行，
胡为月轮灭缺星' 盯，呜呼不得真宰情，
我可奈何兮杯再倾。

有酒有酒兮湛淥波，饮将愉兮气弥和。念万古之纷罗，
我独慨然而浩歌。歌曰：天耶，地耶，肇万物耶，
储胥大庭之君耶。恍耶，忽耶，有耶，传而信耻，
久而谬耶。文字生而羲农作耶，仁义别而圣贤出耶。
炎始暴耶，蚩尤炽耶，轩辕战耶，不得已耶。仁耶，
圣耶，悯人之毒耶。天荡荡耶，尧穆穆耶。岂其让耶，
归有德耶。舜其贪耶，德能嗣耶。岂其让耶，授有功耶。
禹功大耶，人戴之耶。益不逮耶，启能德耶。家天下耶，
荣后嗣耶。于后嗣之荣则可耶，于天下之荣其可耶。
呜呼远尧舜之日耶，何弃舜之速耶。辛癸虐耶，汤武革耶。
顺天意耶，公天下耶。踵夏荣嗣，私其公耶。并建万国，
均其私耶。专征递伐，斗海内耶。秦扫其类，威定之耶。
二代而隕，守不仁耶。汉魏而降，乘其机耶。短长理乱，
系其术耶。尧耶，舜耶，终不可逮耶。将德之者不位，
位者不逮其德耶。时耶，时耶，时其可耶。

我可奈何兮一杯又进歌且歌。

有酒有酒兮黯兮溟，仰天大呼兮，天漫漫兮高兮青。
高兮漫兮吾孰知天否与灵。取人之仰者，
无乃在乎昭昭乎曰与夫日星。何三光之并照兮，
奄云雨之冥冥。幽妖倏忽兮水怪族形，
鼋鼉岸走兮海若斗鲸。河溃溃兮愈浊，济翻翻兮不宁。
蛇喷云而出穴，虎啸风兮屡鸣。污高巢而凤去兮，

· 全唐诗 ·

溺厚地而芝兰以之不生。葵心倾兮何向，松影直而孰明。
人惧愁兮戴荣，天寂默兮无声。呜呼，天在云之上兮，
人在云之下兮，又安能决云而上征。呜呼，
既上征之不可兮，我奈何兮杯复倾。

有酒有酒香满尊，君宁不饮开君颜。岂不知君饮此心恨，
君今独醒谁与言。君宁不见飓风翻海火燎原，
巨鳌唐突高焰延。精卫衔芦塞海溢，枯鱼喷沫救池燔。
筋疲力竭波更大，鳍焦甲裂身已干。有翼劝尔升九天，
有鳞劝尔登龙门。九天下视日月转，龙门上激雷雨奔。
螭虬虽怒谁尔惧，鸛旦虽啼谁尔怜。抟空意远风来壮，
我可奈何兮一杯又进消我烦。

有酒有酒歌且哀，江春例早多早梅。樱桃桃李相续开，
间以木兰之秀香裴回。东风吹尽南风来，莺声渐涩花摧颓。
四月清和艳残卉，芍药翻红蒲映水。夏龙痛毒雷雨多，
蒲叶离披艳红死。红艳犹存榴树花，紫苞欲绽高笋牙。
笋牙成竹冒霜雪，榴花落地还销歇。万古盈亏相逐行，
君看夜夜当窗月。荣落亏盈可奈何，生成未遍霜霰过。
霜霰过兮复奈何，灵芝夤绝荆棘多。荆棘多兮可奈何，
可奈何兮终奈何。秦皇尧舜俱腐骨，
我可奈何兮又进一杯歌复歌。

有酒有酒方烂漫，饮酣拔剑心眼乱。声若雷砰目流电，
醉舞翻环身眩转。乾纲倒轧坤维旋，白日横空星宿见，
一夫心醉万物变。何况蚩尤之蹴蹋，安得不以熊羆战。
呜呼，风后力牧得亲见，我可奈何兮又进一杯除健羨。

· 全唐诗 ·

有酒有酒兮告临江，风漫漫兮波长。渺渺兮注海，
海苍苍兮路茫茫。彼万流之混入兮，
又安能分若畎浍淮河与夫岷吴之巨江。味作咸而若一，
虽甘淡兮谁谓尔为良。济涓涓而缕贯，
将奈何兮万里之浑黄。鲸归穴兮渤溢，鳌载山兮低昂。
阴火然兮众族沸渭，飓风作兮昼夜猖狂。顾千珍与万怪兮，
皆委润而深藏。信天地之溷蓄兮，
我可奈何兮一杯又进兮包大荒。
有酒有酒兮日将落，余光委照在林薄。阳乌撩乱兮屋上栖，
阴怪跳趯兮水中跃。月争光兮星又繁，烧横空兮焰仍烁。
我可奈何兮时既昏，一杯又进兮聊处廓。
有酒有酒兮再祝，祝予心兮何欲。欲天泰而地宁，
欲人康而岁熟。欲凤翥而鸛随兮，欲龙亨而骥逐。
欲日盛而星微兮，欲滋兰而歼毒。欲人欲而天从，
苟天未从兮，我可奈何兮一杯又进聊自足。

卷 420_3 【华之巫】

元稹

有一人兮神之侧，庙森森兮神默默。神默默兮可奈何，
愿一见神兮何可得。女巫索我何所有，神之开闭予之手。
我能进若神之前，神不自言寄予口。尔欲见神安尔身，
买我神钱沽我酒。我家又有神之盘，尔进此盘神尔安。
此盘不进行路难，陆有摧车舟有澜。我闻此语长太息，
岂有神明欺正直。尔居大道谁南北，姿矫神言假神力。

· 全唐诗 ·

假神力兮神未悟，行道之人不得度。我欲见神诛尔巫，
岂是因巫假神祐。尔巫，尔巫，尔独不闻乎。与其媚于奥，
不若媚于灶。使我倾心事尔巫，吾宁驱车守吾道。
尔巫尔巫且相保，吾民自有丘之祷。

卷 420_4【庙之神】

元稹

我马烦兮释我车，神之庙兮山之阿。予一拜而一祝，
祝予心之无涯。涕洟澜而零落，神寂默而无哗。神兮神兮，
奈神之寂默而不言何。复再拜而再祝，鼓吾腹兮歌吾歌。
歌曰：今耶，古耶，有耶，无耶。福不自神耶，
神不福人耶。巫尔惑耶，稔而诛耶。谒不得耶，
终不可谒耶。返吾驾而遵吾道，庙之木兮山之花。